


ლევან სანიკიძე

ანჯიკური ქვეყნების ისჯორია

პუნიკური ომების ეპოქა

დამხმარე სახელმძღვანელო სტუდენტთათვის



საქართველოს სსრ კულტურის სამინისტროს
სახელმწიფო გამომცემლობა „ცოდნა“
თბილისი — 1963

რედაქტორისაბან

ანტიკური ქვეყნების შესწავლას უდიდესი მნიშვნელობა აქვს კაცობრიობის ისტორიული განვითარების გაგებისათვის. ანტიკური ცივილიზაცია საფუძვლად დაედო საერთო ევროპული ცივილიზაციის განვითარებას. როგორც ფ. ენგელსი აღნიშნავს, „...ბერძნებისა და რომის იმპერიის მიერ ჩაყრილი საფუძველის გარეშე თანამედროვე ევროპა ვერ აშენდებოდა.“¹ ამდენად, ანტიკურმა საზოგადოებამ უდიდესი წვლილი შეიტანა საერთო მსოფლიო ცივილიზაციის ჩამოყალიბებაში.

ანტიკურ საზოგადოებათა შორის ძველი რომის სახელმწიფოს ერთ-ერთი წამყვანი ადგილი უჭირავს. რომში ჩამოყალიბდა ყველაზე განვითარებული კლასიკური მონათმფლობელური ურთიერთობა. რომმა შეითვისა ბერძნულ-ელინისტური კულტურა. განავითარა იგი და მეგვიდრეობად დაუტოვა ევროპას. საუკუნეთა მანძილზე რომის სახელმწიფო მსოფლიოში უმთავრესი იყო, მის პოლიტიკურ გავლენას ემორჩილებოდა მრავალი ხალხი როგორც დასავლეთში, ისე აღმოსავლეთში. რომის სახელმწიფოში წარმოქმნილი საზოგადოებრივი წყობილება, პოლიტიკური ინსტიტუტები საფუძვლად დაედო ბევრი ხალხის საზოგადოებრივ-სახელმწიფოებრივ ჩამოყალიბებას. მრავალი ქვეყნის ისტორიული ცხოვრება საუკუნეების მანძილზე მჭიდროდ იყო დაკავშირებული რომთან... და სწორედ ამით აიხსნება ის უდიდესი ინტერესი, რომელსაც მსოფლიოს ისტორიოგრაფია ანტიკური რომის, მისი ისტორიის ცალკეული ეტაპების შესწავლისადმი იჩენს.

რომის სახელმწიფოს ისტორიაში ერთ-ერთ ყველაზე მნიშვნელოვან ხანას ე. წ. „პუნიკური ომების“ ეპოქა წარმოადგენდა, როდესაც ხმელთაშუა ზღვის აუზში ერთმანეთს შეეჯახა მაშინდელი მსოფლიოს ორი უდიდესი სახელმწიფო—რომი და კართაგენი.

რომი ამ დროისათვის (ძვ. წ. III საუკუნის შუა ხანები) აღმავლობის გზაზე იდგა, მის ბატონობას უკვე მთელი აპენინის ნახევარკუნძული ემორჩილებოდა და იგი გაბედულად გამოდიოდა ხმელთაშუა ზღვის აუზის პოლიტიკურ სარბიელზე.

აფრიკის ჩრდილო-დასავლეთ სანაპიროზე მდებარე მდიდარი კართაგენი დიდი ისტორიული ტრადიციების მქონე სახელმწიფოს წარმოადგენდა და აქამდე განუყოფლად ბატონობდა დასავლეთ ხმელთაშუა ზღვეთში. ამ ორი მეტოქის ინტერესები ისე მკვეთრად დაუპირისპირ-

¹ ფ. ენგელსი, ანტიდიურანი, 1933, გვ. 148.

და ერთმანეთს, რომ შათ შორის შეტაკება გარდუვალი იყო. თითქმის 120 წელიწადი გაგრძელდა მათი ბრძოლა და ამ ხნის განმავლობაში ეს ბრძოლა მსოფლიოს ისტორიაში ყველაზე მთავარი მოვლენა იყო.

პუნიკურმა ომებმა და ამ ომებში რომის გამარჯვებამ განაპირობა ფაქტიურად უკანასკნელის გაძლიერება და მსოფლიო სახელმწიფოდ გადაქცევა, ხმელთაშუა ზღვის აუზსა და ახლო აღმოსავლეთში გაბატონება. ამ ომებს დიდი როლი განეკუთვნება, მათი შესწავლა ძალზე მნიშვნელოვანია ანტიკური ისტორიის გაგებისათვის.

ლ. სანიკიდის წინამდებარე წიგნში მოცემულია პუნიკურ ომთა წარმოშობის მიზეზების ანალიზი, გადმოცემულია ომების მსვლელობისა და მათთან დაკავშირებული სხვა მოვლენების სრული სურათი. მკითხველს ეძლევა საშუალება ხმელთაშუა ზღვის აუზის ქვეყნების ისტორიის ამ უმნიშვნელოვანესი პერიოდის სწორი გაგება-გააზრებისა.

მიუხედავად პუნიკური ომების ესოდენი მნიშვნელობისა, ჩვენ დღემდე არ გავაჩნდა სპეციალური მონოგრაფიული გამოკვლევა რომის ისტორიის ამ მონაკვეთის შესახებ. ლ. სანიკიდის წიგნი ამ მიმართულებით პირველ ცდას წარმოადგენს.

აქვე უნდა აღინიშნოს, რომ რომის არმიათა გამარჯვებებით და „დიადი რომის სახელმწიფოს“ საზღვრების ძლევამოსილი და სწრაფი გაფართოებით გატაცებული ბურჟუაზიული მკვლევარები თავის შრომებში არ უთმობენ ადგილს კართაგენის, ბალკანეთის ნახევარკუნძულისა და ესპანეთის ხალხთა გმირულ ბრძოლას რომაული აგრესიის წინააღმდეგ. ლ. სანიკიდემ კარგად გვიჩვენა, რომ პუნიკური ომები ორივე მხრიდან იმპერიალისტური ომები იყო (ლენინი), ამასთან ერთად გვიჩვენა აგრეთვე რომის მიერ დაპყრობილ ხალხთა ფართო მასების თავგანწირული ბრძოლა თავისუფლებისათვის.

ჩვენ ამჟამად ნაკლებად მოგვეპოვება ძველ ისტორიაში ქართულ ენაზე დაწერილი სახელმძღვანელოები და დამხმარე ლიტერატურა. ამ ხარვეზს ნაწილობრივ ავსებს ლ. სანიკიდის წინამდებარე წიგნი. რომელიც დიდ დახმარებას გაუწევს უნივერსიტეტის ისტორიის ფაკულტეტისა და პედაგოგიური ინსტიტუტების ისტორია-ფილოლოგიის ფაკულტეტების სტუდენტებს რომის ისტორიის კურსის უკეთ მომზადებაში, სასემინარო-პრაქტიკულ მეცადინეობაში, საკურსო და სადიპლომო შრომების დაწერასა და, ერთი სიტყვით, ძველი ისტორიის უკეთ შესწავლაში. ამასთან ერთად, იგი საინტერესო საკითხავი წიგნი იქნება ფართო მკითხველი საზოგადოებისათვისაც.

შესავალი

რომი და კართაგენი „კუნიაური ომების“ წინ

ზოგადი მიმოხილვა

რომი

აპენინის ცენტრალური ნაწილის სამხრეთ-დასავლეთ რაიონში, ე. წ. ლაციუმის ოლქში, მდ. ტიბრზე ქველი წელთაღრიცხვის VIII ს-ში დაარსდა ქალაქი რომი (Roma), რომელიც მალე დაწინაურდა სხვა ლათინურ ქალაქთა შორის.

რომა პირველად მეფეები განაგებდნენ. სულ შვიდი მეფის (რომულუსი, ნუმა პომპილიუსი, ტულუს კოსტილიუსი, ანკუს მარციუსი, ტარქვინიუს პრისკუსი, სერვიუს ტულუსი და ტარქვინიუს ამაციუსუპერბუს) მმართველობის ისტორია შემოგვიწინაბა ლათინურმა ტრადიციამ.

მეფეთა ხანა გვაროვნული წყობილების დაშლისა და რომის სახელმწიფოს წარმოშობის ხანას წარმოადგენს. კერძოდ, VI ს-ში მეექვსე მეფის, სერვიუს ტულიუსის რეფორმით საბოლოოდ დამკვიდრდა რომის სახელმწიფოებრივი წყობილება. მალე ამის შემდეგ (509 წ.) რომში მეფის ხელისუფლება დაემხო და მონათმფლობელურ-რესპუბლიკური წყობილება დამყარდა.

რესპუბლიკური კონსტიტუციით სახელმწიფოს უმაღლეს საკანონმდებლო ორგანოს წარმოადგენდა სახალხო კრება. რომელიც ღებულობდა და ამტკიცებდა კანონებს, იზილავდა და სწყვეტდა ომისა და ზავის საკითხებს, ირჩევდა უმაღლესი თანამდებობის პირებს (მაგისტრატებს) და სხვ.

რესპუბლიკის ხელმძღვანელ ორგანოს წარმოადგენდა სენატი. უხუცესთა საბჭო (სიტყვისაგან senex — მსცოვანი). რომელიც რომის არისტოკრატთა—პატრიციების და საერთოდ ეკონომიურად და პოლიტიკურად ძლიერი სოციალური ფენის. შეზღვევაში ე. წ. ნობილიტეტის,

¹ წიგნში მოხსენებული ამბები მთლიანად ჩვენს წელთაღრიცხვამდე მიმდინარეობდა. ამიტომ საჭიროდ აღარ მიგვაჩნია ყველა თარიღთან დაკავშირებით ამის აღნიშვნა.

ბირთვს წარმოადგენდა. სენატი 300 სენატორისაგან შედგებოდა. მასში შედიოდნენ უმაღლესი მაგისტრატურაგავლილი პირები: ყოფილი დიქტატორები, კონსულები, პრეტორები, ქვესტორები და სხვ.

სენატი დიდი უფლებებით სარგებლობდა. მისი მოწონების (*auctoritas patrum*) გარეშე სახალხო კრების დადგენილება კანონად არ ითვლებოდა. განსაკუთრებული საშინაო ან საგარეო საფრთხის შემთხვევაში სენატი აცხადებდა საგანგებო მდგომარეობას და ასეთი საფრთხის აღკვეთის მიზნით ნიშნავდა საგანგებო უმაღლეს მაგისტრატს. დიქტატორს. სენატის სხდომაზე იხილავდნენ და საზღვრავდნენ არმიის შეკრების, მისი შედგენის, მომარაგებისა და დაფინანსების საკითხებს. ტრიუმფით აჯილდოებდა ან უარს ეუბნებოდა გამარჯვებულ სარდლებს. სენატი იხილავდა და ამზადებდა ომისა და ზავის საკითხებსაც სახალხო კრებაზე გატანამდე. რელიგიურ და სამოსამართლო საქმეებზე ზედამხედველობაც ისევ სენატს ევალებოდა. ამგვარად, სენატი იყო რომის სახელმწიფოს უმაღლესი ადმინისტრაციული და საკონტროლო ორგანო.

აღმასრულებელ ხელისუფლებას უმაღლესი თანამდებობის პირები, მაგისტრატები ახორციელებდნენ. მაგისტრატურები განიყოფოდა ორად: ორდინალურად (ჩვეულებრივი) და ექსტრაორდინალურად (საგანგებო).

რესპუბლიკის უმაღლეს მაგისტრატებად და სახელმწიფოს ოფიციალურ მეთაურებად ითვლებოდნენ კონსულები. რომაელები ყოველწლიურად ირჩევდნენ ორ კონსულს. კონსულები აღჭურვილი იყვნენ უმაღლესი სამოქალაქო და სამხედრო ძალაუფლებით. ისინი კოლეგიალური წესით განაგებდნენ საშინაო საქმეებს და სარდლობდნენ არმიებს ომის დროს; უშუალოდ ხელმძღვანელობდნენ არმიების დაკომპლექტებას, სამხედრო მეთაურთა დანიშვნას; საჭიროების შემთხვევაში იწვევდნენ სახალხო კრებასა და სენატის სხდომებს; მათი სახელების მიხედვით ხდებოდა წელთაღრიცხვა; ქალაქის გარეთ მათ განუსაზღვრელი უფლებები ენიჭებოდათ. მოქალაქეთა სიკვდილით დასჯაც კი შეეძლოთ („სიკვდილ-სიკოცხლის უფლება“ — *Jus vitae necisque*). მათი უმაღლესი იმპერიუმის აღსანიშნავად თვითიველ მათგანს წინ მოუძღოდა 12 ლიქტორი, ანუ საპატიო მცველი, მსახური — წკებლების კონებით, რომლებშიაც ქალაქიდან გასვლისას ჩარჭობილი ჰქონდათ ცულები; გარდა ამისა, კონსულის ატრიბუტებს წარმოადგენდა ძოწეულის არშიამოვლებული წამოსასხამი და სპილოს ძვლით მოჭედილი სავარძელი.

კონსულთა შემდეგ მოდიოდნენ უმცროსი მაგისტრატები; პრეტო-

რ ე ბ ი (ევალუბოდათ ქალაქში წესრიგის დაცვა და სამოქალაქო და სისხლის სამართლის საქმეთა ხელმძღვანელობა), ე დ ი ლ ე ბ ი (ქალაქის ეკონომიური ცხოვრების, მომარაგების, ბაზრების, სანახაობათა მოწესრიგება), ქ ვ ე ს ტ ო რ ე ბ ი (სახელმწიფო ხაზინის, შემოსავალ-გასავლის დოკუმენტების, არქივებისა და ომში წასული არმიების ფინანსთა მესვეურები). ორდინალურ მაგისტრატთა ჯგუფს ეკუთვნოდნენ ც ე ნ ზ ო რ ე ბ ი ც, რომელთაც სხვა თანამდებობის პირთაგან განსხვავებით ირჩევდნენ ხუთი წლის ვადით. ცენზორებად, ჩვეულებრივ, ირჩეოდნენ ყოფილი კონსულები. ისინი არავის წინაშე არ იყვნენ ანგარიშვალდებული. ცენზორები აწარმოებდნენ სენატის სიების გადასინჯვას და ხელახლა შედგენას, მოქალაქეთა ცენზის დადგენას და ტრიბებზე მიწერას; შეთვალყურებობას უწევდნენ მოქალაქეთა ზნეობრივ ქცევას; ხელმძღვანელობდნენ სახელმწიფო ქონების დაცვას და საზოგადოებრივი სამუშაოების წარმოებას.

საგანგებო მდგომარეობის შექმნის დროს (ომის, შინაგანი მღელვარების, შიმშილობისა თუ სხვა მსგავს შემთხვევაში) სენატი ირჩევდა ექსტრაორდინალურ მაგისტრატს, დ ი ქ ტ ა ტ ო რ ს. რომელსაც ემორჩილებოდა ყველა თანამდებობის პირი და მის ხელში იყრიდა თავს მთელი სახელმწიფოს მართვა-გამგეობის სადავეები. ის სარგებლობდა განუსაზღვრელი ძალაუფლებით; აღჭურვილი იყო უმაღლესი ხელისუფლების მთელი სისრულით (summum imperium). ამიტომაც იყო, რომ რესპუბლიკური კონსტიტუციით დიქტატორის რწმუნებათა ვადა მკაცრად იყო განსაზღვრული ექვსი თვით. დიქტატორს წინ მიუძღოდა 24 ლიქტორი, ხელში ნაჯახიანი წყებლების კონებით. დიქტატორი ნიშნავდა თავის მოადგილეს, რომელიც იმავდროულად ითვლებოდა ცენზოსანი კ ა ვ ა ლ ე რ ი ი ს უ ფ რ ო ს ა დ.

რომაულ მაგისტრატურათა შორის განსაკუთრებული ადგილი ეჭირა ს ა ხ ა ლ ხ ო ტ რ ი ბ უ ნ ა ტ ს, რომლის წარმოშობა პატრიციებსა და პლებეებს შორის წარმოებული ხანგრძლივი ბრძოლების შედეგს წარმოადგენს. ყველა ზემოთ აღნიშნული თანამდებობის დაქვერა პირველ ხანებში შეეძლოთ მხოლოდ პატრიციებს. ამიტომ პლებეების ბრძოლის ერთ-ერთ ძირითად საკითხს მათთვის განსაკუთრებული უმაღლესი თანამდებობის დაწესება წარმოადგენდა (რა თქმა უნდა, ისინი ამავე დროს ცდილობდნენ, რომ ყველა სხვა დაწესებულ მაგისტრატურაზე არჩევის დროსაც თავიანთი კანდიდატების წამოყენებით პატრიციების თანაბარი ყოფილიყვნენ, რასაც ბოლოს მიაღწიეს კიდეც). მართლაც, სახალხო პლებეურმა მასებმა აქტიური ბრძოლით მოიპოვეს თავიანთ უფლებათა დამცველი მაგისტრატების არჩევა. ასეთები იყვნენ სახალხო ტრიბუ-

ნები, რომელთაც (პირველად ორს, შემდეგში ათს) ირჩევდნენ ყოველწლიურად.


სახალხო ტრიბუნებს ირჩევდა პლებეური სახალხო კრება (comitia tributa). ტრიბუნის მოვალეობად ითვლებოდა სახალხო მასების, პლებეების ინტერესების დაცვა. მისი სახლი დევნილთა და დაჩაგრულთა (მხოლოდ არა მონათა) თავშესაფარებლად დღე-ღამეების განმავლობაში ღია უნდა ყოფილიყო. ტრიბუნის პიროვნება და მისი ქონება ხელშეუხებლად ითვლებოდა. სახალხო ტრიბუნს უფლება ჰქონდა, გარდა დიქტატორისა და ცენზორისა, ყველა მაგისტრატის საქმიანობაში ჩარეულიყო (Jus intercessionis). მას უფლება ჰქონდა „ვეტო“ (veto — „უკრძალავ“) დაედო და ამით გაეუქმებინა სენატისა და სახალხო კრებისაგან მიღებული ყველა კანონი; შეეძლო მაგისტრატთა დაპატიმრება, სახელმწიფო ხაზინის დალუქვა და სხვ. მაგრამ სახალხო ტრიბუნებს არავითარი უფლება აღარ ჰქონდათ ქალაქის საზღვრის გარეთ.

რომი მეფეთა ხანაში ლათინურ ქალაქთა ფედერაციაში შედიოდა, ადაც გაბატონებული მდგომარეობა ქალაქ-ალაღონგას ეჭირა. მაგრამ მეფეთა უკანასკნელ პერიოდში (VI ს.) რომი თანდათანობით წინაურდება და ლაციუმის ქალაქთა ჰეგემონობაზე აცხადებს პრეტენზიას.

VI ს-ის დასასრულს და V ს-ის დასაწყისში რომაელები სისტემატურ ბრძოლას აწარმოებენ ჩრდილოეთით ეტრუსკების წინააღმდეგ, აღმოსავლეთითა და სამხრეთ-აღმოსავლეთით — ვოლსკების, ეჭვებისა და საბინების წინააღმდეგ. ეს ომები მთელი საუკუნე გაგრძელდა და რომის გამარჯვებით დამთავრდა.

IV საუკუნე აპენინის ნახევარკუნძულზე ძლიერი ტომების, გალბების (იგივე კელტები) შემოსევით დაიწყო. გალებს ერთ-ერთი განშტოება, სენონების ტომი შუა იტალიაში შეიჭრა და ალყა შემოარტყა ეტრუსკულ ქალაქ კლუზიუმს, რომელმაც დახმარება სთხოვა რომს. მაგრამ მალე გალები თვითონ რომისაკენ დაიძრნენ. 390 წლის ზაფხულზე მდ. ტიბრის მარცხენა შენაკად ალიასთან მოხდა ცნობილი ბრძოლა, სადაც რომაელები სასტიკად დამარცხდნენ („ალიას დღე!“). მეორე დღესვე გალებმა აიღეს რომი, იგი სასტიკად გაძარცვეს და ააოხრეს. მხოლოდ კაპიტოლიუმის ციტადელი იცავდა თავს. გალები შვიდი თვის განმავლობაში იდგნენ კაპიტოლიუმის გარშემო, მაგრამ ვერ აიღეს იგი. ბოლოს ისინი, იმის გამოც, რომ ჩრდილოეთიდან ახალი ტომები შემოიჭრნენ და მოალყეთა შორის ეპიდემიაც გაჩნდა, იძულებული შეიქნენ რომელთაგან გამოსასყიდს დასჯერებოდნენ და ქალაქი დაეტოვებინათ.

რომაული დიპლომატია საგარეო პოლიტიკაში იმთავითვე ანხორციელებდა შემდგომში ცნობილ პრინციპს: „დაპყავი და იბატონე!“



ლეგიონი — კოპორტებად დაწყობილი.

ორასი წლის მანძილზე წარმოებული მძიმე ომების პერიოდში ჩამოყალიბდა ძლიერი, იმ დროისათვის პირველხარისხოვანი რომაული არმია.



ტრიარქები და პრინციპები.

რომის არმიის უმსხვილეს სამხედრო გაერთიანებას წარმოადგენდა ლეგიონი, რომელიც სხვადასხვა დროს 3000-დან 6000-მდე მეომ-

რისაგან შედგებოდა. ლეგიონში შედიოდა 10 კოჰორტა, ყოველ კოჰორტაში 3 მანიპული, ხოლო ყოველი მანიპული 2 ცენტური-ისაგან იყო შემდგარი, ე. ი. ლეგიონში შედიოდა 10 კოჰორტა, 30 მანიპული და 60 ცენტურია.

ბრძოლის წინ მებრძოლები არმიაში ასაკისა და გამოცდილების მიხედვით ჯგუფდებოდნენ და სამხედრო დანაყოფებიც ამის მიხედვით იყო შედგენილი. პირველ რიგში დგებოდნენ ყველაზე ახალგაზრდები, ე. წ. პასტატები, ანუ შუბოსნები (hasta—შუბი), შემდეგ — ბრძოლებში ნაწრთობი, ასაკში შესული ვაჟაკები, ე. წ. პრინციპები (principes — უპირველესნი) და სულ ბოლოს — მცოვანი მეომრები, რომელთაც ტრიარიები (triarii—მესამენი) ეწოდებოდათ. პასტატების და პრინციპების რიცხვი ყოველ მანიპულში შეადგენდა 120 მეომარს, ხოლო ტრიარიებისა — 60 მეომარს. გარდა ამისა, ყოველ ცენტურიაზე მოდიოდა 20 მსუბუქად შეიარაღებული მებრძოლი, ე. წ. ველიტები. ლეგიონს ემატებოდა 300 ცხენოსანი, დაყოფილი 10 ტურმადა, ე. ი. თითოეულ ტურმაში 30 ცხენოსანი.



რომაელი ლეგიონერი.


საერთოდ ნორმალური ლეგიონის სურათი ასეთი იყო¹:

პასტატები	10 მანიპული, თითოეულში	120	კაცი—1200	კაცი
პრინციპები	10	120	„ —1200	„
ტრიარიები	10	60	„ —600	„
ველიტები	60 ცენტურიიდან თითო- ეულზე	20	„ —1200	„
სულ: ქვეითი			4200	კაცი
ცხენოსანი			300	„
სულ			4500	

რომაელ მოქალაქეთაგან შემდგარი ლეგიონების გარდა არმიაში შედიოდნენ ე. წ. „მოკავშირენი“ (socii), ე. ი. იტალიის დამორჩილებულ ტომთა მეომრები. ყოველ ლეგიონს ემატებოდა „მოკავშირეთა“

¹ С. И. Ковалев, История Рима, 1948, გვ. 160.

5000 მეომარი და 900 მხედარი, მაშასადამე. გაცილებით მეტი, ვიდრე



რომაელი ველიტი.

თვით რომაული ლეგიონი იყო.

თითოეული კონსულის, ომის შემთხვევაში იგივე სარდლების, არმიები ძირითადად ორ-ორი ლეგიონისაგან შედგებოდა, ე. ი. რომელთა გაერთიანებული არმია ოთხი ლეგიონისაგან იყო შემდგარი. უფრო გვიან ლეგიონების რიცხვი კიდევ უფრო გაიზარდა.

არმიების გაერთიანების შემთხვევაში კონსულები რიგრიგობით მთავარსარდლობდნენ. მათ ჰყავდათ მოადგილეები, რომელთაც ლეგატები ეწოდებოდათ. ექვსი სამხედრო ტრიბუნი რიგრიგობით

გობით მეთაურობდა ლეგიონს. მანიპულებს ცენტურიონები უდგნენ სათავეში, ხოლო ასეულების მეთაურები ცენტურიონთა მოადგილეებად ითვლებოდნენ.


მძიმედ შეიარაღებული რომაელი ლეგიონერი აღკუთრვილი იყო ორღესული მოკლე მახვილით, ხანჯლითა და შუბით. გარდა ამისა, პანტატებს ჰქონდათ ორი მეტრის სიგრძის სასროლი შუბი, ე. წ. პილუმი, სათხედი. ლეგიონერებს თავზე ეხურათ ლითონის ჩაფხუტები: ტანზე ეცვათ ტყავის ჯავშანი, ლითონის ფურცლებით შეჭედილი; ფეხებსა და მკლავებზე — ლითონის საბარკულები და ხელში —



რომაელი მხედარი.

ტყავით და ლითონით დაფარული ხის ნახევარცილინდრისებური ფარი. მსუბუქად შეიარაღებულს თავზე ეხურა ტყავის ჩაფხუტი და თავს იცავდა მსუბუქი მრგვალი ფარით, შეიარაღებული იყო მახვილითა და სათხედებით.

საინტერესო იყო რომაელთა სამხედრო ბანაკი (castra). ბრძოლის ადგილზე მისვლისას თუ დასვენებისას რომაელები აგებდნენ ბა-



რომაული სამხედრო ბანაკი.

ნაკს, რომელიც ოთხივე მხრიდან შეკრული იყო ღრმა თხრილებითა და მიწაყრილებით, ყოველ მხარეზე მტკიცედ დაცული კარებით. ბანაკში მტკიცედ იყო განსაზღვრული ყოველი სამხედრო შენაერთის ადგილი, სარდალთა და სამხედრო მეთაურთა კარავები, საკრებულოები და სხვ. ძალიან ძნელი იყო რომაელთა სამხედრო ბანაკის აღება.

ასეთი იყო რომის არმია, რომის ძლიერების ერთ-ერთი ძირითადი საყრდენი. ამასთან ერთად მთელი იტალიის დაუშრეტელი მატერიალური სიმდიდრენი და ომში გასაწევვე ადამიანთა



სათხედის სროლა.

კონტინენტების სიმრავლე რომს აქცევდა იმ დროისათვის მეტად მძლავრ სამხედრო და პოლიტიკურ ძალად.

ასეთი იყო რომი, როდესაც მან მთლიანად დაიმორჩილა იტალია და სიცილიის სანაპიროებს მიადგა... „იმ ხანძრის მსგავსად, რომელიც ჰბუგავს მის გზაზე მდებარე ტყეებს და მდინარის პირას მისული დროებით შენელებდა ხოლმე, ასევე რომაელი ხალხიც, იტალიის დამამარცხებელი, მივიდა თუ არა სრუტემდე, ერთი წუთით შეჩერდა. მაგრამ მალე თავისი თვალი სიცილიას მიაპყრო. ეს იყო მდიდარი ნადავლი, რომელიც ცხვირწინ ედო და თითქოს მოწყვეტილი იყო იტალიის ხმელეთს. ის აღიგზნა სურვილით, სიცილია კონტინენტისათვის დაებრუნებინა. ფიქრობდნენ, რომ ომი და იარაღი გააკეთებდნენ იმას, რის გაკეთებაც ვერ შესძლეს ვერც ხიდებმა და ვერც გზებმა“.¹

რომაელებმა ხარბი თვალი მიაპყრეს კუნძულ სიცილიას, მაგრამ მისი დაპყრობისათვის ხელის აღმართვა ნიშნავდა ისეთ ძლიერ მოწინააღმდეგესთან სამკედრო-სასიცოცხლო დუელში გასვლას, როგორთანაც რომს ჯერ კიდევ საქმე არა ჰქონია.

ეს იყო კ ა რ თ ა გ ე ნ ი,

კართაგენი

X — IX საუკუნეებში ფინიკელებმა, რომელთაც რომაელები „პუნიებს“ (poeni—აქედანვე სიტყვა „პუნიკური“) უწოდებდნენ, ძველი მსოფლიოს „ზღვის მეეტლეებმა“ და სახელგანთქმულმა ვაჭრებმა, ძველი ხმელთაშუა ზღვის აუზი და მისი სანაპიროები სავაჭრო კოლონიებით დაასახლეს. ფინიკეელთა კოლონიზაცია განსაკუთრებით ძლიერი იყო ხმელთაშუა ზღვის დასავლეთ ნაწილში, ჩრდილოეთ აფრიკასა და სამხრეთ ესპანეთის სანაპიროებზე.

IX საუკუნის ბოლოს (814 წ.) აფრიკის ჩრდილოეთ სანაპიროზე ფინიკიის ძლიერი ქალაქის — ტ ი რ ო ს ი ს მცხოვრებლებმა დააარსეს ქ. კ ა რ თ ა გ ე ნ ი, ანუ „ახალქალაქი“ (ფინიკურად — „ქართხადაშტ“, ბერძნულად — „კარხედონ“, ლათინურად — „კართაგო“).

კართაგენს შესანიშნავი გეოგრაფიული მდებარეობა ჰქონდა ტ უ ნ ი ს ი ს ყურეში და საუკეთესო ნავსადგურს წარმოადგენდა. ხმელეთიდან მას გასს ერტყა მდ. ბაგრაღით კარგად მორწყული და გაპოხიერებული, მოსავლით უხვნი სამიწათმოქმედო ოლქი.

¹ ფლორუსი, II, 2.

VII — VI საუკუნეებიდან კართაგენი სწრაფად ძლიერდება. მან ხელში ჩაიგდო მთელი დასავლეთ ხმელთაშუა ზღვა, ჩრდილოეთ აფრიკის, სამხრეთ ესპანეთის, ბალეარის, სარდინიის, კორსიკისა და სიცილიის ფინიკიური ქალაქები.

ამგვარად, თანდათანობით საფუძველი ჩაეყარა კართაგენის მძლავრ მონათმფლობელურ, სავაჭრო-საზღვაო სახელმწიფოს.

კართაგენის ეკონომიკის ძირითად საფუძველს საშუამავლო ვაჭრობა წარმოადგენდა. კართაგენელი ვაჭრები მაშინდელი მსოფლიოს ყველა კუთხესთან ვაჭრობდნენ. მათ მსოფლიოს ბაზრებზე გაჰქონდათ სახელგანთქმული ფინიკიური ძოწეული (პურპური) და იისფერი ქსოვილები, საღებავები, თევზი, ხე-ტყე; მცირე აზიის, ესპანეთისა და სარდინიის ლითონები; ლიბიის (იგივე აფრიკა), სიცილიის, სარდინიის, ეგვიპტისა და იტალიის სასოფლო-სამეურნეო პროდუქტები; სუდანისა და ეთიოპიის სპილოს ძვალი და ოქროს ქვიშა; საბერძნეთის ზეთი და მხატვრული ნაკეთობანი; ცენტრალური აფრიკის ფარშევანგები და არაბული ნელსაცხებლები; ეგვიპტური კერამიკა და ხალიჩები; ბალტიისა და ჩრდილოეთის ზღვების სანაპირო ქვეყნების კალა და ქარვა. ისინი ვაჭრობდნენ მსოფლიოს თითქმის ყველა კუთხიდან მორგეილ მონათა კონტინგენტებით. ანტიკური დროის წყაროები კართაგენს მოიხსენიებენ როგორც მსოფლიოში უმდიდრეს ქალაქს.

კართაგენის ეკონომიურ სიძლიერეს, ვაჭრობის გარდა, მაღალ საფეხურზე მდგომი სოფლის მეურნეობაც შეადგენდა. ამას მოწმობს თუნდაც ის ფაქტი, რომ ჩვენამდე მოღწეულია კართაგენელთა მიერ სპეციალურად შედგენილი სასოფლო-სამეურნეო ტრაქტატები. ჩრდილოეთ აფრიკის ის ოლქები. სადაც კართაგენი და კიდევ უფრო ძველი ფინიკიური ქალაქი უტიკა მდებარეობდა, მიწათმოქმედებისათვის საუკეთესო ბუნებრივი პირობებით ხასიათდებოდა. ეს რაიონები მოფენილი იყო მსხვილ კართაგენელ მიწათმფლობელთა სახნავ-სათესი მიწებით, ხორბლეული კულტურების პლანტაციებით, ვენახებითა და ბაღ-ბოსტნებით. მათი მეურნეობა ძირითადად მონურ შრომაზე იყო დამყარებული. ამიტომაც შემთხვევითი არ არის, რომ კართაგენი მონათმფლობელობის კლასიკურ ქვეყნად ითვლება. ამავე დროს კართაგენელთა მიწებს ამუშავებდა ადგილობრივი დაშორჩილებული მოსახლეობა: ლიბიელები, მაკრიტანელები, გეტულები, ნუმიდიელები და სხვა აფრიკული ტომები.

კართაგენის პოლიტიკური წყობილება წმინდა ოლიგარქიული ხასიათისა იყო. სახელმწიფოს მთელი ძალაუფლება ხელთ ეპყრა მდიდარ ფინანსიურ და მიწათმფლობელურ არისტოკრატას.

ქვეყნის უმაღლეს ადმინისტრაციულ და სასამართლო ინსტიტუტებს და ანხორციელებდა ორი სუფერტი (ფინიციური shofetim — მოსამართლე), რომელთაც რომაელები და ბერძნები მეფეებს უწოდებდნენ. სუფეტები თავიანთი უფლებებითა და მოვალეობით უფრო რომაელ კონსულებს მოგვაგონებდნენ. მათ ირჩევდნენ ერთი წლის ვადით, ისინი მშვიდობიანობის დროს განაგებდნენ სამოქალაქო საქმეებს, ხოლო ომის შემთხვევაში სარდლობდნენ არმიასა და ფლოტს.

აღრე კართაგენის უმაღლეს საკანონმდებლო ორგანოს სახალხო კრება წარმოადგენდა, მაგრამ IV — III საუკუნეებში ოლიგარქები მას უკვე აღარაფერს ეკითხებოდნენ. სახალხო კრებას იწვევდნენ იშვიათად და ისიც მხოლოდ მაშინ, როცა სუფეტებს ირჩევდნენ ან სუფეტებსა და სენატს შორის რაიმე განხეთქილება ჩამოვარდებოდა.

კართაგენის ფაქტიურ უმაღლეს საკანონმდებლო ორგანოს წარმოადგენდა 300 მდიდარი არისტოკრატიისაგან შემდგარი სენატი, რომელიც სწვევდა სახელმწიფოს ყველა ძირითად საქმეს, ომისა და ზავის საკითხებს, სცემდა ყველა სახის კანონს. მიმდინარე საქმიანობას უშუალოდ ხელმძღვანელობდა სენატისაგან სპეციალურად გამოყოფილი 30 კაცისაგან შემდგარი ოლიგარქიული კომიტეტი.

კართაგენში არსებობდა, აგრეთვე, ე. წ. ასოთხის საბჭო. ეს ორგანო ისმენდა ცალკეულ უწყებათა უფროსების ანგარიშებს, ამზადებდა საკითხებს სენატსა და სახალხო კრებაზე გასატანად და კონტროლს უწევდა სახელმწიფოში გამოცემული კანონების ცხოვრებაში გატარებას.

სახელმწიფოს მმართველ ოლიგარქიაშიც არ არსებობდა სრული თანხმობა და ერთსულოვნება. იგი ძირითადად ორი მიმდინარეობისაგან შედგებოდა: საეკატრო-ფინიანსური და მიწათმფლობელური. რასაკვირველია, ასეთი დაყოფა გამომდინარეობდა კართაგენის ზემოხსენებული ეკონომიური სტრუქტურისაგან. ამ ორ დაჯგუფებას შორის ძალიან ხშირი განხეთქილებები ხდებოდა. ოლიგარქიის საეკატრო-ფინანსურ ნაწილს ყოველთვის ფართო საგარეო პოლიტიკის, ხშირი ომებისა და მსოფლიოს ახალი ბაზრების დაპყრობისაკენ ეჭირა თვალი, მაშინ როცა კონსერვატიულ-აგრარული არისტოკრატია ფართო საომარი პოლიტიკის გატარებას, რასაც ხშირად შედეგად სამეურნეო ნგრევა მოსდევდა, შიშის თვალით უცქერდა და ყოველ ხელსაყრელ მომენტში ენერგიულადაც ებრძოდა მას.

კართაგენის სახმელეთო არმია ძირითადად დაქირავებული მეომრებისაგან შედგებოდა. მასში შედიოდნენ ლიბიელები, ნუმიდიელები,

ესპანელები, კელტები, იტალიკები, ბერძნები და სხვ. ისინი გაწვრთნილი და მამაცი პროფესიონალი მეომრები იყვნენ და თუ კი კარგ ფასს მისცემდნენ და მდიდარი ნადავლის პერსპექტივას დაუხატავდნენ, სიამოვნებით ყიდდნენ თავიანთ სისხლს კართაგენელების საომარ გეგმათა განხორციელებისათვის. ასეთი არმია ძლიერი სამხედრო ძალა იყო, მაგრამ ხანგრძლივი, გაჭიანურებული ომის პირობებში დაღლილობას მალე გრძნობდა, უხალისოდ იბრძოდა და დრტვინვას იწყებდა.

კართაგენს რომის მსგავსად სამოქალაქო ლაშქარი არ ჰყოლია, რადგან მას თავისი, საკუთარი მკვიდრი გლეხური მოსახლეობა არ ჰყავდა. ხოლო თვით ქალაქის მცხოვრებნი ვაჭრები და ხელოსნები იყვნენ და საომარ საქმეს იშვიათად ეტანებოდნენ. მხოლოდ უკიდურეს შემთხვევაში თუ მოჰკიდებდნენ ისინი იარაღს ხელს. ამდენად რომის არმია, რომელიც მთლიანად მკვიდრი რომაელი მოქალაქეებისაგან და იტალიელი მოკავშირეებისაგან შედგებოდა, კართაგენის სახმელეთო არმიაზე უფრო ძლიერი და ბრძოლისუნარიანი იყო. განსაკუთრებით ეს უპირატესობა იგრძნობოდა ხანგრძლივ ომებში.

სამაგიეროდ, იმ დროს, როდესაც რომს საკუთრად თითქმის არც ერთი სამხედრო და სავაჭრო გემი არ გააჩნდა და მხოლოდ იტალიელთა და ბერძენთა ხომალდებით სარგებლობდა, კართაგენს მთელს მსოფლიოში უძლიერესი და უპირველესი საზღვაო ფლოტი ჰყავდა. კართაგენს საჭიროების შემთხვევაში შეეძლო რამდენიმე ასეული სამხედრო გემი გამოეყვანა შესანიშნავად დახელოვნებული საზღვაო ეკიპაჟებით. მათი სამ და ხუთბაჭნიანი გემები ამაყად სერავდნენ ჰმელ-საშუა ზღვას, გადიოდნენ ჰიბრალტარის სრუტეში, რომელსაც ისინი მეღკარტის სვეტებს ეძახდნენ, უშიშრად დანავარდობდნენ ატლანტის ოკეანეში და მის მოსაზღვრე ქვეყნებში.

ამგვარად, III საუკუნის 60-იანი წლებისათვის ხმელთაშუა ზღვის აუზში ორი მძლავრი სახელმწიფო არსებობდა — რომი და კართაგენი.

კართაგენი შეშფოთებული იყო რომაელთა წინსვლით სამხრეთისაკენ, სიცილიისაკენ. ის განსაკუთრებით ვერ ურიგდებოდა იმას, რომ იტალიის ბერძნული ქალაქები, რომლებიც მუდამ კართაგენის მეტოქეები და მოსისხლე მტრები იყვნენ, ახლა რომის სამფლობელოთა ორბიტში შედიოდნენ. მაშინ როცა კართაგენელები თვითონ არაერთგზის ცდილან იტალიის კოლონიზაციას, ახლა მთელი იტალია, რომის მეთაურობით, თვითონ უქმნიდა საფრთხეს მის საზღვაო და სავაჭრო ძლიერებას ხმელთაშუა ზღვაზე.

კართაგენი მით უფრო უნდა ცდილიყო რომის მხრივ საფრთხეს

აღკვეთას, რომ რომაელები მესენის სრუტეს მოადგნენ და, როგორც ეტუობოდა. სიცილიაზე ჯარების გადმოსასხმელად ემზადებოდნენ.

ახალგაზრდა რომის სახელმწიფო, იტალიის მთლიანად დამორჩილების შემდეგ, უშუალოდ შეეჯახა კართაგენის სავაჭრო-ეკონომიურ და პოლიტიკურ ინტერესებს ხმელთაშუა ზღვაზე. რომაელები და მისი „მოკავშირე“ მოვაჭრე ოლქები, განსაკუთრებით ბერძნული ქალაქები, დაჟინებით მოითხოვდნენ ფინიკიელებისაგან იტალიისა და სიცილიის გარშემო მდებარე საზღვაო გზებისა და მთელი ხმელთაშუა ზღვეთის განთავისუფლებას. ისინი განსაკუთრებით ვერ ურიგდებოდნენ იმას, რომ სიცილიის უდიდესი ნაწილი კართაგენელებს ეჭირათ.

რომისა და კართაგენის მთელი ეკონომიური და პოლიტიკური წინააღმდეგობანი პირველ რიგში სიცილიაში იყრიდნენ თავს.

ამ დროს სიცილიის აღმოსავლეთ ნაწილში ცნობილი ბერძნული ქალაქის, სირაკუზის ბატონობა სუფევდა. მაგრამ ქ. სირაკუზი, რომელიც ერთ დროს ძლიერი და მთელი სიცილიის მფლობელობის მონოპოლისტი იყო, ახლა შედარებით სუსტი მმართველის, ტირან პიერონ II-ის ძალაუფლებას ემორჩილებოდა და კუნძულის მხოლოდ აღმოსავლეთ ნაწილზე ბატონობდა. III ს-ის პირველ მეოთხედში კართაგენელებმა ხელში ჩაიგდეს სიცილიის უდიდესი ნაწილი და დღე-დღეზე შთანთქმით ემუქრებოდნენ იმ აღმოსავლეთ რაიონებსაც, სადაც ჯერ კიდევ აფარებდნენ თავს ბერძნები.

კუნძული სიცილია რომისა და კართაგენის საბრძოლო „განხეთქილების ვაშლად“ იყო ქცეული. ორი მტაცებელი გაფაციცებით ელოდებოდა დროსა და საბაბს მისი სრული დასაკუთრებისათვის. როცა 276 წელს მეფე პიროსი სიცილიას სტოვებდა, მას უთქვამს: „ოო, როგორ საბრძოლო ასპარეზს ვუტოვებ მე კართაგენელებსა და რომაელებსო!“ პიროსი არ სტყუოდა. მისი სიტყვებიდან 12 წლის შემდეგ სიცილიაში ატყდა საბრძოლო ყიყინა.

დაიწყო ხანგრძლივი ომები რომსა და კართაგენს შორის. ეს ომები ისტორიაში შევიდა „პუნიკური ომების“ სახელწოდებით.




თავი პირველი¹

პირველი პუნიკური ომი

ომის პირველი წლები. ბროლა მილასთან

ომის დაწყების საბაბი ქ. მესანის ამბებს დაუკავშირდა.

ქ. მესანა მდებარეობდა სიცილიის ჩრდილოეთის კონცხზე. ის მხოლოდ ვიწრო სრუტით იყო გამოყოფილი აპენინიდან და უახლოვდებოდა იტალიის უკიდურესი სამხრეთის ქალაქ რეგიუმს. ამდე-



მესანა.

ნადაც მესანას დიდი ეკონომიური და სტრატეგიული მნიშვნელობა ჰქონდა როგორც რომისა და კართაგენისათვის, ასევე სირაკუზისათვის.

ამ დროს მესანა ხელთ ეპყრათ კამპანელ დაქირავებულ მეომრებს, ე. წ. მამერტინელებს, ე. ი. „მარსის“ ხალხს“, როგორც ისინი უწოდებდნენ თავიანთ თავს.

¹ მარსი (რომაელებთან) იგივე არესი (ბერძნებთან) — ომის ღმერთი.

მამერტინელები სირაკუზის ტირანის აგათოკლეს (317 — 285) არმიანში მსახურობდნენ. აგათოკლეს სიკვდილის შემდეგ, 284 წ., ისინი წეიქრენ მესანაში და აიღეს იგი. ქალაქის მცხოვრებთა დიდი ნაწილი ამოხოცეს, ნაწილი გააძევეს; მათი ქალები და ბავშვები ურთიერთ შორის გაინაწილეს; ქონება დაიტაცეს; ქალაქი და მისი მიდამოები ზოლიანად თავის საკუთრებად გაიხადეს.

სწორედ იმავე ხანებში კამპანიელი ავანტიურისტების მეორე ჯგუფმა სრუტე გადალახა და სცადა ხელში ჩაეგდო ქალაქი რეგიუმი, მაგრამ მალე მოუსწრეს რომაელებმა. მათ კამპანიელები გაანადგურეს და რეგიუმი თვითონ დაისაკუთრეს.

270 წ. მესანის ხელში ჩაგდება გადაწყვიტა სირაკუზის მეფემ ჰიერონ I-მ. მან რამდენიმე უშედეგო იერიშის შემდეგ ძლიერი ალყა შემოარტყა ქალაქს. მამერტინელები ხუთი წლის მანძილზე ებრძოდნენ შიმშილსა და გაჭირვებას. ბოლოს, როცა შეატყვევეს, რომ საკუთარი ძალებით ალყისაგან თავის დაღწევა არ შეეძლოთ, გადაწყვიტეს რომელიმე ძლიერი ქვეყნისათვის ეთხოვათ დახმარება. ასეთ ჩამრეც ძალად მიჩნეული უნდა ყოფილიყო ან კართაგენი, ან რომი.

დიდი ბკობისა და დავის შემდეგ, თუ ვისთვის უნდა ეთხოვათ დახმარება, რომისა თუ კართაგენისათვის, მამერტინელებმა ელჩები გაგზავნეს რომში.

რომმა გადაწყვიტა სიცილიის საქმეში ჩარევა, ე. ი. რომი ომის გზაზე დადგა.

264 წლის გაზაფხულზე კონსულ აპიუს კლავდიუსის სარდლობით რომელთა არმია და მცირერიცხოვანი იტალიური ფლოტი მესანის სრუტეში შევიდა ქ. რეგიუმთან. მაგრამ აქ მათ შეიტყვეს, რომ მესანაში უკვე კართაგენელთა გარნიზონი იდგა.

სწორედ იმ დროს, როცა მამერტინელთა ელჩები რომისაკენ მიეშურებოდნენ, მესანის სრუტეში გამოჩნდა კართაგენელთა ძლიერი ფლოტი ჰანონის სარდლობით.

კართაგენელთა მომხრეებმა კარი გაუღეს ჰანონს, რომელმაც სრულიად უსისხლოდ ჩაიგდო ქალაქი ხელში და აკროპოლისშიც ძლიერი გარნიზონი ჩააყენა.

რომაელების ჩამოსვლამ გაამხნევა და გააძლიერა მათი მომხრე მოსახლეობის ნაწილი, რომელიც მესანის მცხოვრებთა უმრავლესობას შეადგენდა. ამან ხელი შეუწყო აპიუს კლავდიუსის ენერგიული ნაბიჯის გადადგმას. ზან, პირველი წარუმატებლობის მიუხედავად, მაინც მოახერხა სრუტის გადალახვა და ქალაქთან მისვლა. კართაგენელთა სარდალმა ვერ გამოიჩინა საკმარ ენერგიულობა და წინდახედულობა. ის აპიუს კლავდიუსის მიწვევიჩე დათანხმდა და მის ბანაკში გამოცხად-

და. აქ რომაელებმა პანონი დააკავეს და აიძულეს თავისი გარნიზონისათვის განკარგულება მიეცა ქალაქის დატოვების შესახებ.

პანონმა შეასრულა რომაელის ბრძანება. ამგვარად, 264 წელს მესანა რომაელების ხელში გადავიდა. პანონს მისმა თანამემამულეებმა ბრალი დასდეს წინდაუხედაობასა და სიმხდალესი და ჯვარზე გააკრეს. ხოლო რომს ომი გამოუცხადეს.

იმევე წელს რომაელებმა ცალ-ცალკე გაანადგურეს კართაგენელთა ახალი ჯარები და მათი მოკავშირე ჰიერონ II. ამის შემდეგ ჰიერონი რომაელთა მხარეზე გადავიდა და სიკვდილამდე მათ ერთგულ მოკავშირედ დარჩა.

კართაგენელებმა სიცილიაში გადმოსხეს 50 000 მეომრისაგან შემდგარი არმია. 262 წლისათვის კართაგენელთა ეს არმია პანიბალ გისგონის ძის სარდლობით ძლიერ სამხედრო გარნიზონებად დაბანაკდა სიცილიის სამხრეთ-დასავლეთ სანაპიროს ქალაქ აგრიგენტუმში.

რომაელებმა ხუთი თვის ალყის შემდეგ აიღეს ქალაქი აგრიგენტუმში. მათ ხელთ იგდეს მტრის მთელი ბანაკი, ალალი და სპილოების დიდ ნაწილი. მაგრამ თვითონაც იმდენად იყვნენ დასუსტებული და გაჩანაგებული, რომ გაქცეული მტრის ღვეხა და მისი საბოლოოდ განადგურება აღარ შეეძლოთ.


აგრიგენტუმის აღების შემდეგ სიცილიის ქალაქები, მცირე გამოწიკისაგან გარდა, მთლიანად რომის მხარეზე გადავიდნენ. ამგვარად, თითქმის მთელი კუნძული უკვე რომის ძალაუფლებას ემორჩილებოდა.

მაგრამ რომაელებმა თითქმის ახლა შეამჩნიეს, რომ კართაგენი მაინც მთელი ხმელთაშუა ზღვის ბატონ-პატრონი იყო და ძლიერი საზღვაო ძალებით სისტემატურად დაუბრკოლებლად თავს ესხმოდა იტალიისა და სიცილიის სანაპიროებს.

რომაელები მივიდნენ იმ დასკვნამდე, რომ ძლიერი ფლოტის გარეშე შეუძლებელია კართაგენთან საბრძოლო ასპარეზზე გასვლა. ამიტომ რომაელებმა არაჩვეულებრივი ენერჯითა და ენთუზიაზმით მოჰკიდეს ხელი სამხედრო ფლოტის მშენებლობას. მოკლე ხანში ბერძენი ოსტატების დახმარებით მათ ააგეს 100 ხუთბაქნიანი (პენტერა) და 20 სამბაქნიანი (ტრიერა) სამხედრო ხომალდი. მაგრამ რომაელთა მძიმე და ნაკლებმოდრავი გემები ძლივს ცურავდნენ ზღვაზე და ვაცოლებით ჩამორჩებოდნენ ფინიკიელთა სწრაფმავალ, მანევრირებისუნარიან ხომალდებს. ამიტომ რომაელებმა ამის საწინააღმდეგო ნერხიც გამოიგონეს. მათ თავიანთ გემებს წინ ცხვირებზე გაუკეთეს პატარა ხიდები, გვერდებზე მოაჭირითა და ბოლოებზე რკინის კაუჭით (ამიტომაც ჯარისკაცები მათ „ყუავებს“ ეძახდნენ). ასეთი ხიდი ბრძოლაში ჩაბმამდე აღმართული და მიკრული იყო გემის ანძაზე. ხოლო როგორც კი მოწინა-

აღმდეგის ხომალდს მიუახლოვდებოდნენ, აუშვებდნენ მას და გადაისვრიდნენ მისკენ. კაუჭი მაგრად ჩაეჭიდებოდა მოწინააღმდეგის გემის ძგიდეს და ამგვარად დაბმულს ადგილზევე „გაჰყინავდა“, ხოლო ამასობაში გადაიკრებოდნენ მასზე, ჩაუხტებოდნენ მოწინააღმდეგეს მათი გემების ბაქნებზე და იბრძოლებდნენ ისე, როგორც ხმელეთზე. ამგვარად. რომაელებთან საზღვაო ბრძოლა ბევრად აღარ იქნებოდა განსხვავებული სახმელეთო ბრძოლისაგან.

260 წელს. მოხდა დიდი საზღვაო ბრძოლა. სადაც ახალგაზრდა რომაულმა ფლოტმა გამოცდა ბრწყინვალედ ჩააბარა. ეს იყო მესანის და-



რომაული ხომალდი.

სავლეთით მდებარე კონცხ მიღესთან. აქ რომაელები და კართაგენელები ერთმანეთს შეხვდნენ მთელი თავისი საზღვაო ძალებით.

რომაელთა ფლოტს სათავეში ედგა კონსული გაიუს მარკუს დულიუსი, ხოლო კართაგენელებს წინ მოუძღოდათ ჰანიბალი. პირველი შეტაკებისთანავე რომაულმა „ყვაებმა“ 30-მდე ფინიკიური ხომალდი „დააბეს“. დულიუსის ლეგიონერები შეუკავებელ ნიაღვრად იჭრებიან მოწინააღმდეგეთა გემებზე და უწყალოდ ქლეტენ ჰოულოდნელობით დაბნეულ მტრებს. რომელი ჰხრიდანაც არ სცადეს ჰანიბალის სწრაფმა „ზვირთებზე მფრინავმა“ ხომალდებმა მოწინააღმდეგის თითქმის უძრავად მდგარ ხის მასებზე თავდასხმა და ლითონის ქიმებით დაჯახება, იმავე მხრიდან ეშვებოდა საბედისწერო კაუჭიანი ხიდი.

დიდი იყო კართაგენელთა ზარალი. მათ 130 გემიდან დაჰკარგეს 50 თავისი საზღვაო ეკიპაჟებითურთ.

რომაელები დიდი ზეიმით შეხვდნენ მილეს ბრძოლის გმირსა და სარდალს. გაიუს დულიუსს. მის პატივსაცემად პირველად მოეწყო რომში საზღვაო ტრიუმფი. რომაელები საშინელი ღრიანცელით მისდევდნენ ტრიუმფში გატარებული ტყვე კართაგენელი მეზღვაურების რიგებს. დულიუსის სარდლობით მოპოვებული გამარჯვების უკვდავ-საყოფად სენატის დადგენილებით რომის ფორუმზე მოედანზე აღმართულ იქნა მარმარილოს სვეტი, რომელიც მორთული იყო გემების ლითონის ქიმებიტა და მემორიალური წარწერით (columna rostrata Duilii). ამ პატივს ისიც მიუმატეს, რომ როცა დულიუსი ღამით შინ ბრუნდებოდა, მას ყოველთვის წინ მიუძღოდნენ სპეციალურად გამოყოფილი მსახური ჩირადღნით და მუსიკოსი ფლეიტას დაკვრით.

ლაშქრობა აფრიკაში

მილეს ბრძოლიდან სამი წლის მანძილზე სიცილიაში გულის გამაწყალებლად ქიანურდებოდა გაუთავებელი შეტაკებანი. ქალაქები ხელიდან ხელში გადადოდა და გადამწყვეტი შედეგი არ ჩანდა.

ბოლოს რომაელებმა უფრო გადამჭრელი ნაბიჯი გადადგეს. გადაწყდა განხორციელებულიყო იდეა, რომელზეც ადრე ოცნებობდა მეფე პიროსი: მოეწყოთ დიდი სამხედრო ექსპედიცია აფრიკაში, უშუალოდ კართაგენის წინააღმდეგ. რა თქმა უნდა. ასეთი გაბედული გეგმის განხორციელება საბოლოოდ დაშლდა ამდენი ხნის დაქიმულობისა და დამქანცველი უშედეგობის ატმოსფეროს.

რომაელებმა აფრიკაში სალაშქროდ ძლიერი საზღვაო ფლოტი გაამზადეს. ის შედგებოდა 330 სამხედრო გემისაგან და 100 000 მეომარ-მეზღვაურისაგან. ეს ფლოტი 256 წლის გაზაფხულზე დაიძრა სამხრეთისაკენ, გაიარა მესანიის სრუტე და სიცილიის აღმოსავლეთ სანაპიროების გავლით შემოუარა პახინუმის კონცს და შეჩერდა კუნძულის სამხრეთ სანაპიროზე, აგრიგენტუმის აღმოსავლეთით, მდ. ჰიმერას შესართავთან. აქ საზღვაო ეკიპაჟს მიემატა 40 000 მეომრისაგან შემდგარი სახმელეთო არმია, რომელსაც კონსულები მარკუს ატილიუს რეგულუსი და ლუციუს მანლიუს ვოლსონი სარდლობდნენ. უკვე ყველაფერი მზად იყო. კონსულებმა ბრძანება გასცეს და ის იყო გემებმა ღუზები აუშვეს, რომ დასავლეთის ჰორიზონტზე გამოჩნდა კართაგენელთა 350 გემისაგან შემდგარი ფინიკიური ფლოტი.

ამგვარად, 256 წლის გაზაფხულზე სიცილიის სამხრეთ სანაპიროზე, მდ. ჰიმერას შესართავთან მდებარე კონცის ეკონომის მახლობ-

ლად სამკედრო-სასიცოცხლო ბრძოლისათვის ერთმანეთს შეხვდნენ მოწინააღმდეგეთა უზარმაზარი ძალები. ეს ბრძოლა ანტიკური მსოფლიოს ისტორიაში პირველი უდიდესი საზღვაო ბრძოლა იყო. რომაელთა ფლოტი 140 000 მეომრისაგან შედგებოდა; კართაგენელთა გემბანებზე 150 000 მეომარ-შეზღვაური იდგა. ამგვარად, ეკნომის ბრძოლაში ორივე მხრიდან დაახლოებით 300 000 კაცი ლებულობდა შონაწილეობას.

ეკნომთან ბრძოლა რომაელთა ბრწყინვალე გამარჯვებით დამთავრდა. კონსულებმა არმიები აფრიკაში გადასხეს. ისინი დაუბრკოლებლად დათარეშობდნენ კართაგენის სამფლობელოებში. მათ ზვიადობას საზღვარი არ ჰქონდა. თვით რომშიც ეჭვი აღარაგვის ეპარებოდა, რომ დღეს თუ ხვალ კართაგენი იარაღს დაჰყრიდა. რომში იმდენად ძლიერი იყო უძლეველობის რწმენა, რომ საჭიროდაც აღარ ჩათვალეს აფრიკაში ორივე კონსულის, მათი არმიებისა და ფლოტის ერთდროული ყოფნა. ამიტომ ზამთრის დასაწყისში მოვიდა სენატის განკარგულება: ერთ-ერთი კონსული, სახელდობრ ლ. მანლიუს ვოლსონი, თავისი ლეგიონებითა და ფლოტის ნახევარი ნაწილით, აგრეთვე მონადქცეული ადამიანების კონტინგენტებით, დაბრუნებულიყო იტალიაში.

აფრიკაში დარჩა კონსული მარკუს ატილიუს რეგულუსი. კართაგენთან შემდგომი ომების საწარმოებლად მისი განკარგულების ქვეშ იმყოფებოდა 15 000 ქვეითი მეომარი, 500 ცხენოსანი და 40 გემი.

კართაგენის ხელისუფლებამ სერიოზულად შეაფასა კარზე მომდგარი საშიშროება. რომაელთა შეზოჰრამ სწრაფი ნგრევა გამოიწვია ფინიკიური იარაღის ქვეშ მყოფი ლიბიური (აფრიკული) ოლქების გაერთიანებაში. კართაგენის კირთების ქვეშ მგმინავი აფრიკელი მოსახლეობა ჯანყდებოდა და რომაელთა მხარეზე გადადიოდა. სრული განადგურების თავიდან ასაცილებლად საჭირო იყო მთელი სამხედრო შესაძლებლობათა კონსოლიდირება: თვით აფრიკაში, ამიტომ სიცილიიდან გამოწვეულ იქნა საზღვაო ფლოტი და არმია, რომელიც იქ. ჰამილიკარის სარდლობით, უშედეგოდ ცდილობდა რომაელთა წარმატების შეფერხებას. ამგვარად, რეგულუსის წინააღმდეგ აფრიკაში ჩამოყალიბდა ძლიერი არმია, რომელსაც სათავეში ჩაუდგნენ ჰანდრუბალი (ჰანონის შვილი), ბოსტარი და ჰამილიკარი.

256 წლის დეკემბერში რეგულუსმა ქ. აღისთან სასტიკად დაამარცხა კართაგენელთა არმია.

აღისის აღების შედეგად კართაგენის აფრიკულ სამფლობელოთა მნიშვნელოვანი ნაწილი ისევ რომაელთა ხელში გადავიდა. უკვე 74 ქალაქი და მრავალი სოფელი იმყოფებოდა რეგულუსის ბატონობის

ქვეშ. იმავე დეკემბრის თვეში მან ხელში ჩაიგდო ქ. ტუნესი (ტუნისი), საიდანაც რომაელები უკვე ხედავდნენ ლეგენდარული ქალაქის კედელთა კოშკებს და აკროპოლისის ცათამბვენ ქონგურებს. რეგულუსმა რომის სენატს მისწერა, რომ მან შიშით ჩაჰკეტა კართაგენის კარები.

რეგულუსის ბანაკში საზავო მოლაპარაკებისათვის გამოცხადდნენ კართაგენის რჩეული მოქალაქენი.

რეგულუსმა კართაგენელ დესპანებს შემდეგი შინაარსის ზავის პირობები წაუყენა: კართაგენი ვალდებულია დაუყოვნებლივ გაათავისუფლოს და გადასცეს რომს სიცილია და სარდინია; ყოველწლიურად გადაიხადოს გარკვეული რაოდენობის ხარკი; ყოველგვარი გამოსასყიდის გარეშე დააბრუნოს სამხედრო ტყვეები მაშინ. როცა აფრიკელი სამხედრო ტყვეები გათავისუფლებული იქნებიან. მხოლოდ გამოსასყიდის ვალდებით; უნდა მოისპოს კართაგენის საზღვაო ძლიერება; ყოველი საჰიროებისა და მოთხოვნის შემთხვევაში კართაგენმა რომს დამხმარედ უნდა გაუზღავნოს 50 სამხედრო გემი; და, რაც მთავარია, რომი ცხადდება კართაგენის უმადლეს ხელისუფლად. რომის დაუქობხავად და თანხმობის გარეშე კართაგენს უფლება არა აქვს აწარმოოს საგარეო პოლიტიკა, გამოუცხადოს ომი ვინმეს ან დასდოს ზავი.

კართაგენმა ასეთ ზავზე უარი სთქვა და არაჩვეულებრივი ენთუზიაზმით შეუდგა საომარ სამზადისს. სიცილიიდან გამოწვეულ იქნენ სამხედრო ნაწილები; თითქმის მთელი ფინანსური სახსრება გამოყოფილ იქნა დაქირავებული მეომრების შესაგროვებლად ესპანეთში, გალიაში, ლიბიასა და საბერძნეთში. შეიქმნა ძლიერი სახმელეთო არმია. მის რიგებს შემატა სპარტიდან ჩამოსული საუკეთესოდ გაწვრთნილი და იმ დროისათვის სახელგანთქმული პოპლიტა რაზმები მამაცი მეომრისა და ჰქვიანი სტრატეგოსის ქსანთიპეს მეთაურობით. მთელს კართაგენში გავრცელდა ქსანთიპეს აზრი იმის შესახებ, რომ დღემდე კართაგენელმა სარდლებმა მეტა მარცხი თვითონ მიაყენეს თავის თავს, ვიდრე რომაელებმაო. სპარტანელი ამას სრულიად სამართლიანად და დასაბუთებულად სთვლიდა იმით, რომ კართაგენელმა სარდლებმა არ იცოდნენ სახმელეთო არმიების ხელმძღვანელობა; აფრიკის ფართო ველებზე ვერ იყენებდნენ



რეგულუსი.

სპილოებსა და შესანიშნავ ნუმიდიურ კავალერიას, ე. ი. იმ ნაწილებს, რომლებითაც მათ სრული უპირატესობა უნდა ჰქონოდათ რომაელებთან ბრძოლაში.

ქსანთიპეს მტკიცება იმდენად პოპულარული შეიქნა, რომ მას კართაგენში ანგარიშს უწევენ და როგორი უკმაყოფილებითა და შურითაც არ უნდა აღვსილიყვნენ ქედმაღალი კართაგენელი სარდლები, მამაც სპარტანელს ახლად ჩამოყალიბებული არმიის მთავარსარდლად ნიშნავენ.

255 წლის გაზაფხულზე მოხდა გადამწყვეტი ბრძოლა.

ქსანთიპემ თავისი არმიის წინა ხაზზე ჩამაწყრივა სპილოები, იმ დროის საბრძოლო „ტანკები“, მათ ზურგში მარცხენა ფლანგზე განალაგა კართაგენელ მოქალაქეთაგან შემდგარი ფლანგები, ხოლო მარჯვენა ფლანგზე — დაქირავებული მეომრები. სულ ბოლოს ორივე ფლანგის ფრთებზე დააწყო მსუბუქად შეიარაღებული მეომრები და აფრიკელი კავალერია. ასეთი წყობის წინააღმდეგ რეგულუსმა თავისი არმია (15 000 ქვეითი და 500 ცხენოსანი) ჩვეულებრივზე უფრო მეტად შეამჭიდროვა და გააღრმავა. იმისათვის, რომ სპილოებს მისი რიგები ვერ გაერღვიათ. მანიპულები სქლად დააყენა ერთიმეორის ზურგში; სულ წინ განალაგა მსუბუქად შეიარაღებული მეომრები, ხოლო ფლანგებზე — კავალერია.

ქსანთიპემ მისცა ნიშანი და ბრძოლაც დაიწყო. სპილოები დაიძრენ რომაელთა რიგებისაკენ; აფრიკელთა კავალერია, მიცემული ბრძანებას თანახმად, გაქანდა ბტრის ფლანგებისაკენ. გამხეცებულმა სპილოებმა გაარღვიეს და გასთელეს რეგულუსის არმიის მარჯვენა ფრთა; რომაელთა არმია თითქმის მთლიანად განადგურდა. გადარჩა მხოლოდ 2 000 კაცი. მათ ძლივს გაარღვიეს რკინისებური რკალი და თავი შეაფარეს ქ. კლუპეას. კართაგენელებმა ტყვედ ჩაიგდეს თვით რეგულუსი 500 კაცის თანხლებით. ამას ზედ ისიც დაერთო, რომ 255 წლის ზაფხულში 250 ხომალდისაგან შემდგარი რომაული ფლოტი, რომელიც კლუპეაში ჩაკეტილი 2 000 რომაელის საშველად იყო წასული, სიცილიის სამხრეთ-აღმოსავლეთ სანაპიროზე ქარიშხალმა დაღწა.

ასეთი კრახით დამთავრდა რომაელთა პირველი სამხედრო ექსპედიცია აფრიკაში.

ინეს სიცილიაში

კართაგენი ზეიმობდა რომაელთა ფლოტის დაღუპვას. იგი მეტი მხნეობით შეუდგა ახალი სამხედრო ძალების შეკრებას. მოკლე ხანში მას მზად ჰყავდა 200 გემი, დიდი სახმელეთო არმია და 140 სპილო.

ასეთი ძალებით სარდალი პასდრუბალი (პანონის შვილი) გადავიდა სიცილიის დასავლეთ სანაპიროზე, ქ. ლილიბეუმთან. აქვე შეაერთა მან სიცილიაში მყოფი სხვა საომარი ძალებიც და შეუდგა მთელი არმიის გაწვრთნას.

რომაელებიც თავის მხრივ დიდი ენერგიით ემზადებოდნენ ხელახალი შეტევისათვის. 254 წელს 220 გემისაგან შემდგარი ფლოტი კონსულების — ავლუს ატილიუსისა და გნეიუს კორნელიუს სციპიონის სარდლობით მიადგა მესანას, სადაც მათ შეიერთეს გასული წლის კატასტროფისაგან გადაარჩენილი 80 ხომალდი. აქედან კონსულები გაემშურენ სიცილიის დიდი ქალაქის პანორმისაკენ. ისინი განაკუთრებული გულმოდგინებით შეუდგენ პანორმის ალყას როგორც ხმელეთიდან, ისე ზღვიდან. საიერიშო და სატყორცნი მანქანების საშუალებით ზღვის ნაპირზე აღმართული მაღალი კოშკი დაანგრიეს და მძაფრი იერიშით პირველად აიღეს ქალაქის ის ნაწილი. რომელსაც „ახალქალაქს“ უწოდებდნენ, ხოლო მეორე ნაწილი — „ძველი ქალაქი“, რომელიც მიუვალ ციხე-სიმაგრეს წარმოადგენდა, ძლიერ ალყაში მოაქციეს და შიმშილით დაიძორჩილეს. პანორმის მოსახლეობას. მის ყოველ მცხოვრებელს რომაელებმა თავისუფლების გამოსასყიდად გარკვეული ხარკის გადახდა დაუწესეს. მხოლოდ 14 000 მცხოვრებელმა შესძლო აღნიშნული გამოსასყიდის გადახდა, ხოლო დანარჩენებს, სულ 13 000 კაცს. გამარჯვებულებმა მონობის ბორკილები დაადეს.

პანორმის ბრძოლიდან ოთხი წლის შემდეგ, 250 წელს, ისევ პანორმთან რომაელებმა კვლავ სასტიკად დაამარცხეს კართაგენელები.

სიცილიაში კართაგენელთა უკანასკნელ თავშესაფარს ლილიბეუმი და დრეპანა წარმოადგენდნენ.

250 წელს ლილიბეუმის წინააღმდეგ დაიძრა დიდძალი რომაული ფლოტი და არმია კონსულების — გაიუს ატილიუს რეგულუსისა (ტყვედჩაჰარდნილის ნათესავი) და ლუციუს მანლიუს ვოლსონის (ტყვედჩაჰარდნილი რეგულუსის კოლეგა აფრიკაში) სარდლობით.

ლილიბეუმი მიუვალ ციხე-ქალაქს წარმოადგენდა როგორც ზღვიდან, ისე ხმელეთიდან. მას გარს ერტყა მაღალი ქვის კედლები და ღრმა თხრილი.

რომაელთა ახლადჩამოსულ ჯარებს სიცილიაში მანამდე მყოფი ძალებიც შეუერთდნენ და დაიწყეს ქალაქის ალყა. ზღვიდან 200 ხომალდი ცდილობდა ჩაეკეტა ის, ხოლო ხმელეთიდან ოთხი ლეგიონი და სიცილიელი მოკავშირეები ერტყმოდნენ გარს. ისინი ქალაქის მოპირდაპირე მხარეზე ორ ბანაკად იყვნენ გამაგრებული. ბანაკებს შორის, ქალაქის ნახევარ წრეზე, გაყვანილი იყო ღრმა, ფართო თხრილი ამადლებული მიწაყრილებით. მაგრამ ლილიბეუმს მრავალრიცხოვანი მო-

სახეობა და 10 000 მეომრისაგან შემდგარი კართაგენელთა გარნიზონი იცავდა მამაცი ჰიმილკონის მეთაურობით.

250 წლის შემოდგომაზე კართაგენელებმა ახალი ფლოტი ჩაუშვეს ზღვაში. მას სათავეში უდგნენ მამაცი და ჭკვიანი ადმირალები ატარბალი და ჰანიბალი. სიცილიის მახლობლად ფლოტი გაიყო. ერთი ნაწილი ატარბალის სარდლობით მიადგა დრეპანას და აქედან გადაუქრა გზები ლილიბეუმთან დაბანაკებულ რომაელებს, ხოლო ჰანიბალი 50 გემითა და 10 000 მეომრით გაეშურა ლილიბეუმისაკენ.

რომაელებისათვის მტრის ახალი ძალების გამოჩენა მოულოდნელი იყო. მათ ვერც კი მოახერხეს ხელი შეეშალათ ჰანიბალის სწრაფი ხომალდებისათვის, რომლებმაც უეცრად გადასერეს რომაელთა სააღყო ხაზი მათ მძიმე გემებს შორის და უვნებლად შევიდნენ ლილიბეუმის ძნელად მისადგომ ყურეში.

აღსაში მოქცეულები გამხნევდნენ, როცა მათ მხარში ამოუდგა ახალი 10 000 მეომარი. ჰიმილკონს ახლა ქალაქის მოსახლეობის გარდა 20 000 რეგულარული ჯარისკაცი ჰყავდა. მან ისარგებლა ქალაქის დამცველთა მორალური ალტყინებით და მათ წინაშე მგზნებარე სიტყვის წარმოთქმისა და საბრძოლო ამოცანების განაწილების შემდეგ დილით ადრე მთელი გარნიზონი გამოიყვანა ქალაქის გარეთ. რომაელებიც მოულოდნენ მათ გამოსვლას და საბრძოლოდ იყვნენ გამზადებული.

ბრძოლა იყო სასტიკი. ეს იყო რომაელთა ყველაზე დიდი მარცხი ზღვაზე.

კართაგენელებმა იტალიის საზღვაო ვაჭრობა გააყოტრეს. ისინი ამ დროს ფინანსურად იმდენად გაძლიერებულან, რომ ეგვიპტისაგან ნასესხები დიდი ვალებიც დაუფარავთ. კართაგენი იმედს არც იმაზე ჰკარგავდა, რომ მალე მოწინააღმდეგეს თავისი სიძლიერით ხმელეთზეც არ ჩამორჩებოდა და უმოკლეს დროში სიცილიიდანაც განდევნიდა მას.



ბარკა. კატულუსი. ზამი.

247 წელს კართაგენიდან სიცილიაში ჩამოვიდა მთავარსარდალი, რომელმაც თავისი ენერგიით, სიმამაცით, სამხედრო და სახელმწიფოებრივი მმართველობის ნიჭით შორს ჩამოიტოვა ყველა მისი კართაგენელი თუ რომაელი თანამედროვე. ეს იყო კამილკარ ბარკა („ე ლ ვ ა“).

ჰამილკარმა სიცილიაში ჩამოსვლა მტერს იმით აგრძნობინა, რომ საზღვაო ფლოტით თავს დაესხა იტალიის სამხრეთ ოლქების სანაპიროებს და საშინლად ააოხრა ისინი. შემდეგ შემობრუნდა ისევ სიცილიაში და ხელში ჩაიგდო პანორმსა და ერიქსს შორის მდებარე

ომის საერთო მსვლელობა

ბრძოლა ექვთიმის კონცხთან



ქართავერის არმიის მოქმედების მიმართულებები
 ჩომბაული არმიის მოქმედების მიმართულებები

პირველი პუნიკური ომი.

პუნქტი ჰეირკტე, რომელიც მდებარეობდა ჰალოზზე, ჰქონდა საუკეთესო მისადგომი ზღვიდან. იგი ამავე დროს წარმოადგენდა მიუვალ ციტადელს და სათვალთვალო საიერიშო პუნქტს როგორც პანორმის, ასევე დრეპანა-ლილიბეუმის მიმართულეებით. აქ გამაგრების შემდეგ ჰამილკარი ავიწროებდა სიცილიაში მოთარეშე რომაელებს, აწყობდა ხშირ თავდასხმებს იტალიის სანაპიროებზე თვით ლაციუმამდეც კი.

ბოლოა ჰამილკარმა კიდევ ახალი ძლიერი საბრძოლო საყრდენი გამოაცალა ხელიდან მოწინააღმდეგეს. მან ხელში ჩაიგდო ერიქსი. ჰამილკარი ნედგრად იგერიებდა ერიქსთან მოვარდნილი მტრის იერიშებს.

ასე გრძელდებოდა უკვე ხუთი წელი.

242 წლისათვის რომაელებს ჰყავდათ კარგად შეიარაღებული და სათანადო საზღვაო ეკიპაჟით გამზადებული 200 სამხედრო გემი.

ზაფხულის დამდეგს ეს ახალი ფლოტი კონსულ გაიუს ლუტაციუს კატულუსის სარდლობით გამოჩნდა სიცილიის სამხრეთ-დასავლეთ სანაპიროზე.

კართაგენშიც აღიჭურვა ახალი საზღვაო ფლოტი და ჰანონის სარდლობით სასწრაფოდ დაიძრა სიცილისაკენ.

ბრძოლა მოხდა კუნძულ ეგუზასთან 241 წლის 10 მარტს.

კართაგენელები სასტიკად დამარცხდნენ. რომაელებმა 50 ფინიკიური გემი ჩასძირეს, ხოლო 70 გემი 10 000 მეომრით ტყვედ ჩაიგდეს.

ეგუზასთან მომხდარმა ბრძოლამ გადაწყვეტი შედეგი მოიტანა. ეს იყო ფინალი 23 წლის განმავლობაში წარმოებული დამქანცველი ომებისა. ძლევამოსილების კვერთხი ხელთ ეპყრა რომს.

ჰამილკარმა, რომელიც ხედავდა, რომ ახლა მისი ქვეყნისათვის ყველაზე უკეთეს გამოსავალს ზავი წარმოადგენდა, დაუყოვნებლივ გამართა მოლაპარაკება კატულუსთან.

ზავი რატიფიცირებულ იქნა შემდეგი შინაარსით: კართაგენს სამხედრო კონტრიბუციის სახით 10 წლის განმავლობაში უნდა გადაეხადა 3 000 ვერცხლის ტალანტი და სიცილიას გარდა უნდა დაეტოვებინა ყველა წვრილ-წვრილი კუნძული იტალიასა და სიცილიას შორის, ტირენის ზღვაზე.

ასე დამთავრდა პირველი პუნიკური ომი, პირველი რომაული ლაშქრობა იტალიის საზღვრებს გარეთ. ასე შეემატა რომის სამფლობელოებს პირველი კონტინენტგარეშე ქვეყანა — სიცილია. ამასთან დაკავშირებით გაჩნდა დაპყრობილი ქვეყნების რომაული მმართველობის ახალი სახე. განსხვავებით იტალიის ოლქების მმართველობის „ფედერაციული“ სისტემისაგან. სიცილიას „პროვინცია“ უწოდეს. სიტყვა

„პროვინცია“ „დავალებას“ ნიშნავს. პირველ რიგში ამ ტერმინის ქვეშ სამხედრო დავალება იგულისხმებოდა. ახლა მისი მნიშვნელობა უფრო ფართო და განსხვავებული შეიქნა. სიცილიის პირველი პროვინციის მმართველობისათვის რომის ხელისუფლების დავალებით ყოველწლიურად იგზავნებოდა უმაღლესი მაგისტრატი, პრეტორი, რომელიც ადგილზე განუსაზღვრელი უფლებებით სარგებლობდა და მისი მართვა-გამგეობის საქმეებით ანგარიშვალდებული იყო სენატისა და სახალხო კრების წინაშე. პროვინციის მოსახლეობა რომის ქვეშევრდომად ცხადდებოდა და მის სასარგებლოდ სისტემატურად გარკვეული რაოდენობის ხარკს იხდიდა, ხოლო პროვინციის მიწა სახელმწიფოებრივ საკუთრებად (ager publicus) ითვლებოდა.

ოცდასამწლიანმა სისხლისღვრამ რომს გამარჯვება მოუტანა. მაგრამ გამარჯვების შედეგი, რომის ხანგრძლივობასთან და აურაცხელ მსხვერპლთან შედარებით, მაინცდამაინც დიდი არ ყოფილა. კართაგენის კოლონიალური იმპერია მაინც იმპერიად რჩებოდა. მისი სამფლობელოების ძვირფას და მრავალფეროვან გვირგვინს მხოლოდ ერთი ძვირფასი თვალი მოაკლდა სიცილიის სახით. აფრიკიდან ჯერ კიდევ მოსალოდნელი იყო ახალი ძლიერი ქარიშხალი. კართაგენი ძნელად თუ შეურიგდებოდა ასეთ მარცხს. მასში მუდამ ჰღვიოდა სარევანშო ბრძოლის ცეცხლი. მალე უნდა დასმულიყო საკითხი მსოფლიოში გაბატონებისა ორი დიდი მტაცებლის პოლიტიკურ და საომარ შეჯახებათა ასპარეზზე.

თავი მეორე

კართაგენი და რომი პირველ და მეორე პუნიკურ ომებს შორის

აჯანყება აფრიკაში

კართაგენის ხელისუფლება ომის დაძვარების შემდეგ ნაკლებად ფიქრობს გაილოს აღთქმული გამოსასყიდი, რომელიც მას წესისამებრ ქირის სახით უნდა მიეცა დაქირავებული მეომრებისათვის: ლიბიელების, ნუმიდიელების, ესპანელების, კელტების, ლიგურების, იტალიელების, ბერძნებისა და სხვათათვის. ის უარს ამბობს მათ მიერ დაღვრილი სისხლის საფასურის გაღებაზე, მით უფრო, რომ კართაგენს რომისათვის დიდძალი სამხედრო კონტრიბუცია ჰქონდა გადასახდელი.

შეუძლებელი იყო მოქირავნეთადმი ასეთი უმადურობა დაუსჯელი დარჩენილიყო. ამის ნიადაგზე აფრიკაში ატეხილმა საომარმა განგაშმა კართაგენი აიძულა დროებით ხელი აეღო რომის წინააღმდეგ სარევანშო ომის სამზადისზე და მთელი ენერჯის დაძაბვით ებრძოლა საკუთარი არსებობის გადარჩენისათვის.

ასე რომ, პირველი პუნიკური ომის დამთავრებისთანავე კართაგენის წინააღმდეგ დაიწყო დაქირავებულ მეომართა აჯანყება, რომელსაც შეუერთდნენ მონები და კართაგენის კირთების ქვეშ მყოფი ლიბიელი (აფრიკული) მოსახლეობა.

აჯანყებას სათავეში უდგნენ კამპანიელი მონა სპენდიუსი და ლიბიელი დაქირავებული მეომარი მათონი.

კართაგენის მდგომარეობა მძიმე შეიქნა. ხმელეთიდან მას გზა მოჭრილი ჰქონდა; ტუნისიდან ჩრდილო-დასავლეთის მიმართულებით ზღვის ნაპირამდე აჯანყებულები ბატონობდნენ.

აჯანყების ჩაქრობის ხელმძღვანელობა კართაგენის ხელისუფლებამ მიანდო ჰანონს, რომელიც, პირველი წარმატების მიუხედავად, აჯანყებულებმა სასტიკად დაამარცხეს.

კართაგენელებმა ჰანონი გადააყენეს და მის ნაცვლად მთავარსარდლად ჰამილკარ ბარკა დანიშნეს.

ამასობაში მათონმა დაიჭირა იმ მაღლობების ყველა გასასვლელი, რომლითაც კართაგენი კონტინენტს უერთდებოდა.

ჰამილკარმა პირველ შეტაკებაში დაამარცხა აჯანყებულთა ის ნაწილი, რომელსაც სპენდიუსი მეთაურობდა.

მაგრამ კართაგენელებს ჯერ კიდევ დიდი ბრძოლები ელოდათ.

სპენდიუსმა და კელტი მეომრების ბელადმა ავტარიტმა ტუნესიდან გამოიყვანეს 8 000 მეომრისაგან შემდგარი ჯარი და შეუდგნენ მაღლობებზე ლაშქრობას და კართაგენელთა არმიასზე თვალთვალს ხელსაყრელ დრომდე თავდასხმისათვის. რა თქმა უნდა, ჰამილკარი-სათვის ხელსაყრელი არ იყო პარტიზანული ბრძოლებით ომის გაჭიანურება, მაგრამ ერთმა შემთხვევამ ისევე მის სასარგებლოდ შემოაბრუნა საქმე. აჯანყებულთა ბანაკი დასტოვა და ჰამილკარის მხარეზე გადავიდა ნუმიდიელი ნარავა თავისი 2 000 ნუმიდიელი მხედრით. გაძლიერებულმა ჰამილკარმა დაუყოვნებლივ დასძრა არმია დასუსტებულ აჯანყებულთა ბანაკისაკენ. ორივე მხარე არაჩვეულებრივი წიშმაძცითა და თავგანწირვით ჩაება ბრძოლაში. გადაწყვეტ მომენტში აშკარა უპირატესობა ისევე მოიპოვეს კართაგენელებმა, რომელთა სასარგებლოდ დიდი როლი ითამაშა მათ რიგებში მებრძოლმა ნუმიდიურმა კავალერიამ და სპილოთა კოლონებმა. ავტარიტი და სპენდიუსი გაიქცნენ ბრძოლის ველიდან. 10 000 აჯანყებული მოკლულ იქნა; 4 000 ტყვედ ჩაგვარდა.

ბოლოს ტუნესიდან სამხრეთ-დასავლეთით, ე. წ. პრიონის („ხერხი“) რაიონში ჰამილკარმა მოახერხა ალყა შემოერთყა სპენდიუსისა და ავტარიტის სარდლობის ქვეშ მყოფი ძირითადი ძალებისათვის. ალყაშემორტყმულ ბანაკში დაიწყო შიმშილი. გაჩნდა კანიბალობა. შიმშილისაგან დაოსებული ადამიანები მოწინააღმდეგესთან მოლაპარაკების გამართვას მოითხოვდნენ. მეთაურები იძულებული გახდნენ ანგარიში გაეწიათ მათთვის და ჰამილკარს აცნობეს მოლაპარაკების სურვილი. ჰამილკარი დათანხმდა:

თვით სპენდიუსი, ავტარიტი, ზარზა და შვიდი კიდევ სხვა, სულ ათი კაცი გამოცხადდა კართაგენელი სარდლის ბანაკში. ჰამილკარმა მათ განუცხადა: თქვენი ბანაკიდან ჩვენ ვირჩევთ ათ კაცს, ხოლო დანარჩენებმა დაპყარონ იარაღი და მხოლოდ ტუნიკებჩაცმულებმა დაუყოვნებლივ დასტოვონ აქაურობა. როცა ამ პირობაზე თანხმობა მიიღო, მან მიუთითა აჯანყებულთა წარმომადგენლებზე და სთქვა: პირობის თანახმად, თქვენ თვითონ რჩებით ჩვენს ხელში. ამგვარად, სპენდიუსი, ავტარიტი და აჯანყებულთა სხვა რჩეული მეთაურები ხელში ჩაუვარდნენ მტერს. ჰამილკარმა უმეთაუროდ დარჩენილთა ბანაკი შემზარავ სასაქლოდ გადააქცია. 40 000 აჯანყებულისაგან სულ მალე სპილოები-

საგან გასრესილი და ნაუწყებად ქცეული ადამიანების გროვათა გარდა აღარაფერი დარჩენილა.

ძლევა მოსილი კართაგენული არმია დაიძრა ტუნესისაკენ, სადაც ამ დროს გამაგრებული იყო თვითონ მათონი. კართაგენელებმა ორი სხვადასხვა მხრიდან ალყა შემოარტყეს ტუნესს. შოალყეთა ერთ ნაწილს სარდლობდა ჰანიბალი, ხოლო მეორეს — თვით ჰამილკარი. კართაგენელებმა კედლებთან მიიყვანეს დატყვევებული სპენდიუსი და მისი ცხრა მხლებლით ჯვარზე გააქრეს. მათონმა ისარგებლა თავის მეომართა გამძაფრებული ბრძოლის უნით და უეცრად დაესხა თავს ჰანიბალს. აჯანყებულები შეიჭრნენ ჰანიბალის ბანაკში და გაანადგურეს ის. ბევრი კართაგენელი მოიხრა. დანარჩენები გაიფანტნენ ან ტყვედ ჩავარდნენ. ტყვედ ჩავარდა თვით ჰანიბალიც. გააფთრებულმა აჯანყებულებმა სპენდიუსი ჯვრიდან ჩამოხსნეს და მის ნაცვლად საშინელი წამების შემდეგ იმავე ჯვარზე გააქრეს ჰანიბალი. ოცდაათი წარჩინებული კართაგენელი სპენდიუსის გვამს მსხვერპლად დააკლეს.

ცალკეულ შეტაკებათა შემდეგ მოწინააღმდეგენი გადამწყვეტ ბრძოლაში ერთმანეთს შეხვდნენ ტუნესის სამხრეთით, აფრიკის სიღრმეში, ქ. ლეპტისის მახლობლად. ორივე მხარე გრძნობდა, რომ ეს ბრძოლა უკანასკნელი, გადამწყვეტი შედეგის მომტანი იქნებოდა. ამიტომ ისინი უაღრესი თავგანწირულებით ჩაებნენ ბრძოლაში. სასტიკმა სისხლის ღვრამ გამარჯვება კართაგენს არგუნა. აჯანყებულთა უმრავლესობა ბრძოლის ველიდან ცოცხალი არ გასულა. ბევრი მათგანი ტყვედ ჩავარდა. კართაგენელებმა ხელში ჩაიგდეს თვით აჯანყების მამაცი ბელადი მათონი.

ზალე ამის შემდეგ ჰამილკარმა და პანონმა აიღეს უტიკა და ჰიპონ ზარიტი.

აფრიკა კვლავ კართაგენის უღელქვეშ მოექცა. კართაგენი ძლივს გადაურჩა თითქმის სამწელიწადნახევრის მანძილზე მძვინვარე სახალხო აჯანყებისაგან წალეკვას; გადაურჩა ისეთ საშიშროებას, როგორც მას რომთან მეოთხედი საუკუნის განმავლობაში წარმოებული ომების პერიოდშიაც კი არ უნახავს. კართაგენელთა ეს ძვირად მოპოვებული გამარჯვება აფრიკის სახალხო გმირის მათონისა და მისი თანამებრძოლების სისხლიანი მსხვერპლშეწირულებით დამთავრდა.

სარდინიის კრიზისი

კართაგენი შეუღდა ოცდაშვიდი წლის მანძილზე წარმოებული ომებისაგან მიღებული ჭრილობების მოშუშებას. მაგრამ მან, საშინლად დაღლილ-დაქანცულმა, სულის მოთქმაც ვერ მოასწრო, რომ ხმელთა-

შუა ზღვიდან კვლავ ახალი ომის საშიშროების ნიავმა დაჰბერა და სანუკვარი მშვიდობიანობის ატმოსფერო ააფორიავა.

აფრიკის აჯანყებამ 240 წლიდან დიდი გამოძახილი ჰპოვა კუნძულ სარდინიაზე. აჯანყებულმა მოქირავნე მეომრებმა სარდინიაში კართაგენელთა ბატონობა დაამხეს. 239 წელს მათ გაანადგურეს კართაგენიდან გაგზავნილი დამსჯელი ექსპედიცია. მაგრამ აჯანყებულებმა იმის ნაცვლად, რომ თავის აფრიკულ თანამოაზრეთა მსგავსად ადგილობრივი მოსახლეობის მხარდაჭერა მოეპოვებინათ, მძარცველობითა და უწყსრიგობით სარდინიის მკვიდრთა მტრობა დაიმსახურეს. როდესაც აჯანყებულებმა შეატყვევეს, რომ მათი თარეში სულ მალე უნდა აღკვეთილიყო, ელჩები გაგზავნეს რომში და დახმარება სთხოვეს მას. ამგვარად, რომს შესაძლებლობა ეძლეოდა თითქმის უომრად ჩაეგდო ხელში ხმელთაშუა ზღვის ეს მეტად მნიშვნელოვანი კუნძულიც. მაგრამ, როგორც ჩანს, რომის ოლიგარქიამ აშკერად მაინც ვერ გაბედა სარდინიისაკენ დაძვრა. ამის მიზეზი უთუოდ ის იყო, რომ აფრიკაში სახალხო აჯანყება ჯერ კიდევ (239 წ.) ძლიერი იყო და სარდინიის წართმევით კართაგენის დასუსტება, რომის მხრივ, აჯანყებულ ჩაგრულთადმი სოლიდარობის გამოცხადებას ნიშნავდა, რაც, როგორც ითქვა, რომის მონათმფლობელთა ინტერესების საწინააღმდეგო საფრთხეს ქმნიდა თვით იტალიაში.

სულ სხვა მდგომარეობა იყო შექმნილი 238 წლის გაზაფხულზე, როცა სარდინიის აჯანყებულებმა ხელმეორედ გაგზავნეს წარმომადგენლები რომში და განმეორებით შესთავაზეს კუნძულის „შევრდომება“. ამ დროს აფრიკის აჯანყება სუსტდებოდა, ხოლო კართაგენი ძალას იკრებდა.

რომის ხელისუფლებას ახლა შეეძლო სარდინიის საკითხი თავის სასარგებლოდ გადაეჭრა.

ამავე წელს რომაელთა ჯარები ჩავიდნენ სარდინიაში და სასწრაფოდ დაიჭირეს ყველა ის პუნქტი, რომლებიც ალრე კართაგენს ეკუთვნოდა.

როცა კართაგენმა აფრიკის აჯანყება ჩააქრო და რამდენადმე წელში გასწორდა, მან კვლავ მიაპყრო თვალი თავისი მფლობელობის ერთ-ერთ ძვირფას მარგალიტს. კართაგენის პორტში ფლოტი მზად იყო სარდინიისაკენ გასამგზავრებლად. მაგრამ კუნძული რომაელებს ეჭირათ...

და, აი, რომის სენატში გამოცხადდნენ კართაგენის ელჩები. მათ „მეგობრისა და მოკავშირის“ წინაშე წამოაყენეს სრულიად სამართლიანი მოთხოვნა სარდინიის განთავისუფლებისა და კართაგენისადმი მისი დაბრუნების შესახებ.

კართაგენი მოუთმენლად ელოდა რომიდან სულგრძელი, დამაკმა-
ყოფილებელი პასუხის მიღებას და რამდენად თავზარდამცემი და აღმა-
შფოთებელი უნდა ყოფილიყო კართაგენელთათვის, როდესაც ელჩებმა
მათ შეატყობინეს: ასეთი „თავხედური“ მოთხოვნისათვის რომი ომს
უცხადებს კართაგენს!

ამგვარად, დადგა კრიზისი. სარდინიის გარშემო ახალი ომის საშიშ-
როება შეიქნა. სარდინიას ახლა იგივე როლი უნდა ეთამაშნა, რაც
სიცილიამ შეასრულა ოცდაშვიდი წლის წინათ, „განწეტილების ვაშ-
ლის“ როლი. გამძლავრებული და სისხლმოწყურებული „მგლის ნაში-
ერნი“¹ ახალ სამკვდრო-სასიცოცხლო ბრძოლაში იწვევდნენ დაუძლურე-
ბული და სისხლისგან დაცლილ „მელკარტის შთამომავალთ“.²

მაგრამ ახალი დუელი არ შედგა, უფრო სწორად, გადაიდო. კარ-
თაგენი იძულებული შეიქნა უდრტვინველად შერიგებოდა სარდინიისა
და მასთან კორსიკის დაკარგვას. რომი ამითაც არ დაკმაყოფილდა და
დაჩოქილ მოწინააღმდეგეს დამატებით გადასახდელად 1200 ტალანტი
დააკისრა. კართაგენმა ესეც უსიტყვოდ მიიღო. განუზომელი შურისძი-
ების ბოღმა გულში ჩაიხვია და ახალი რევანშისტული გეგმების შედ-
გენას გულმოდგინედ შეუდგა.

ამგვარად ჩაიგდო ხელში რომმა სარდინია და კორსიკა, დიდი ეკო-
ნომიური და სტრატეგიული პუნქტები ხმელთაშუა ზღვაში. ეს კუნძუ-
ლები წარმოადგენდნენ კართაგენის სამხედრო დასაყრდენს იტალიაზე
თავდასხმების საწარმოებლად. ახლა ისინი რომის საომარ პლაცდარ-
მებად გადაიქცნენ ყველა მიმართულებით — აფრიკის, ესპანეთის,
ჩრდილოეთ იტალიისა და გალიის მიმართულებით. წინათ სარდინია
და კორსიკა წარმოადგენდნენ კართაგენის ცენტრალურ სავაჭრო პუნ-
ქტებს დასავლეთ ხმელთაშუა ზღვის ყველა მიმართულებით. ახლა
ისინი რომის ეკონომიური სიძლიერის მნიშვნელოვან წყაროდ გადაიქ-
ცნენ. სარდინიამ სულ ზალე გაითქვა სახელი როგორც ძველი მსოფ-
ლიოს მონათვაჭრობის ერთ-ერთმა ცნობილმა ცენტრმა. აქ მონებით
ვაჭრობის ბაზრები ივსებოდა ყველა ქვეყნიდან მორეკილი დამონებუ-
ლი ხალხით. სარდინიიდან უწყვეტ რიგებად მიერეკებოდნენ ბორ-
კილდადებულ ადამიანთა კოლონებს ანტიკური მსოფლიოს მონათ-
მფლობელურ მეურნეობებში მათი სამუშაო ძალდონის საექსპლოატა-
ციოლ.

¹ ლეგენდის მიხედვით რომაელთა წინაპრები და ქ. რომის დამაარსებლები რ. ო-
მ. უ. ს. ი. და რ. ე. მ. ო. მგლის ძუძუნაჰში იყვნენ. ამის გამო, ძალიან ხშირად,
ანტიკურ ხანაში ამბობდნენ, რომ რომაელებს მგლის გაუმძღარი მადა აქვთო. მაგა-
ლთადა, ამას განსაკუთრებით უსვამდა ხაზს პონტოს მეფე მითრიდატე VI (121—63).

² მ. ე. ლ. კ. ა. რ. ტ. ი. — ფინიკიელთა ომერთი ომიანობისა.

კარგა ხნის განმავლობაში სარდინიისა და კორსიკის მოსახლეობა წინააღმდეგობას უწევდა ახალი მბრძანებლების ძალმომრეობას. ეს ბრძოლა მთელი ათი წლის მანძილზე მიმდინარეობდა. ბოლოს, 227 წელს რომმა საბოლოოდ დაიმორჩილა ისინი და გამოაცხადა პროვინციად. „პროვინცია სარდინიის“ მმართველობისათვის რომიდან ყოველწლიურად იგზავნებოდა სპეციალურად არჩეული პრეტორი.

ჩრდილოეთ იტალია რომის ხალხებით

სამხრეთთა და დასავლეთით მოპოვებული დიდი გამარჯვების შემდეგ რომაელებმა თვალი მიაპყრეს ჩრდილოეთ იტალიას.


ჩრდილოეთ იტალიაში მაშინ ორი ოლქი არსებობდა. მის სამხრეთ-დასავლეთ ნაწილში იყო ლიგურია, ხოლო მთელს დანარჩენ ჩრდილოეთ იტალიას რომაელები უწოდებდნენ გალების (კელტების) ქვეყანას. მაგრამ გალებს ალპებს იქითაც ცხოვრობდნენ და ამიტომ რომაელები ამ მთებს გადაღმა ქვეყანას ტრანსალპიურ გალიას (ალპებს იქეთა გალია) უწოდებდნენ. ხოლო ალპების სამხრეთით მდებარეა. ე. ი. ჩრდილოეთ იტალიას. — ცისალპიურ გალიას (ალპებს აქეთა გალია). ამ უკანასკნელს შუაზე ჰყოფდა მდინარე პადუსი (დღევანდელი პო). აქედან მდინარია ჩრდილოეთით მდებარე ქვეყნის ნაწილს ტრანსპადანტური გალია (პადუსს იქეთა გალია) ერქვა, ხოლო სამხრეთს — ცისპადანტური გალია (პადუსს აქეთა გალია).

გალიაში მცხოვრები ტომები ჯერ კიდევ IV—III საუკუნეებში ხშირად იჭრებოდნენ ცენტრალურ იტალიაში, რომელსაც მათი ქვეყნისაგან აპენინის მთები ჰყოფდა. მეოთხე საუკუნის შუა ხანებში რომაელებმა დიდმა გაჭირვებით აიღეს რევანში ალიასთან მიღებული დიდი მარცხისა და მშობლიური ქალაქის დარბევა-აოხრებისათვის. მათ ცისპადანტური გალიის უკიდურეს სამხრეთ-აღმოსავლეთ ნაწილში დაიპყრეს გალ-სენონთა მიწები ზღვის სანაპირო ქალაქ არიმინუმთან ერთად, სადაც ერთადერთი ყველაზე მოსახერხებელი გასასვლელი იყო ცენტრალური იტალიიდან ჩრდილოეთისაკენ.

მაგრამ რომს სრულებითაც არ მიაჩნდა ეს საკმარისად. ის ყოველთვის ფიქრობდა, რომ ხელში ჩაეგდო მდ. პადუსის ნოციერი და მშვენიერი მიდამოები და თავის სამფლობელოთა საზღვრები საბოლოოდ გაეთართოვებინა იტალიის ბუნებრივ საზღვრებამდე, ალპების მთებამდე.

ჩრდილოეთ იტალიის დაპყრობისათვის ბრძოლის დასაწყისი უშუალოდ დაუკავშირდა რომში დემოკრატიულ რეფორმათა გატარების საკითხს. პირველ პუნიკურ ომში გამარჯვების შედეგად მიღებული ტერიტორიები და მატერიალური დოვლათი ძირითადად ერთ მუკა მსხვილ

ნობილებს ჩაუვარდათ ხელში. ხილო ხალხის ძირითადი მასა, რომლის სისხლითაც რომაული ოლიგარქია გამარჯვებას გამარჯვებაზე პოულობდა, ხელცარიელი დარჩა. ამიტომ 232 წელს სახალხო ტრიბუნმა გაიუხს ფლამინიუსმა, სენატისა და, საერთოდ, ოლიგარქიის წინააღმდეგობის მიუხედავად, სახალხო კრებაზე გაატარა კანონი, რომლითაც დამორჩილებულ გალ-სენონთა ქვეყანა, ე. წ. „გალიის მიწები“ (ager Galicus) უნაწილდებოდა თავისუფალ რომაელ მიწათმოქმედ მოსახლეობას.



რომაული მახვილები.

სენონთა ოლქების განაწილება კელტთა ქვეყნების წინააღმდეგ რომაული აგრესიის პირველი ნაბიჯი იყო. ორივე მხარე მზად იყო სამკვდრო-სასიცოცხლო შეტაკებისათვის. კელტების ურდოების წინააღმდეგ რომს იმ დროს უზარმაზარი სამხედრო ძალების გამოყვანა შეეძლო. იტალიას მაშინ 700 000-ზე მეტი ქვეითი მეომრისა და 70 000-მდე მხედრის შეკრების საშუალება ჰქონდა. აქედან 273 000 წმინდა რომაელი მოქალაქე „ქვირიტი“ იყო.

225—224 წლებში რომაელებმა საშინელ ბრძოლებში დაამარცხეს კელტბოიები.

223 წელს კონსულებად არჩეულ იქნენ პუბლიუს ფურციუსი და რომის სახალხო მასების საყვარელი კაცი ცნობილი რეფორმატორი გაიუს ფლამინიუსი. მათ ძლიერი არმიებით გადალახეს მდ. პადუსი და შეიჭრენ ტრანსპადანტურ გალიაში. კონსულთა მიზანს ამჯერად შეადგენდა ძლიერი კელტური ტომის ინსურების დამორჩილება.

222 წელს უკანასკნელი. გადამწყვეტი ბრძოლები გაიმართა. სულ

70 000 კელტი მეომარი ელოდებოდა რომაელებთან ახალ ბრძოლებში ჩაბმას.

ამ წელს კონსულებად იყვნენ გნეუს კორნელიუს სციპიონი და მარკუს კლავდიუს მარცელუსი. განსაკუთრებით ეს უკანასკნელი გამოირჩეოდა სარდლობის ნიჭით, საბრძოლო ხელოვნებით, არაჩვეულებრივი ფიზიკური ძალღონითა და სიმამაცით. მან თავი ისახელა ჯერ კიდევ სიცილიის ბრძოლებში და ყველა სახის შეტაკებაში, განსაკუთრებით კი ორთაბრძოლაში, საომარი შემმართველობისათვის დაიმსახურა სახელწოდება „მარცელუსი“ (სიტყვისაგან *marcialis*, რაც „მეომარს“ ნიშნავს).

222 წლის გაზაფხულზე კონსულებმა გადალახეს პადუსი და შეიჭრენ ინსუბრთა მიწა-წყალზე. პირველად ალყა შემოარტყეს ქ. აცერას. ცოტა ხნის შემდეგ მარცელუსი გამოეყო თავის კოლეგას და შეუტია ქ. კლასტიდიუმთან მოთარეშე კელტთა მრავალრიცხოვან რაზმებს. საბრძოლო ნაღარის დაკვრისთანავე კელტების ბელადმა, გოლიათური აღნაგობისა და ძვირფასი შეიარაღებით აღჭურვილმა ფირიდომა მარადულში გაიწვია კონსული. მარცელუსმა პირველ შეტაკებისთანავე ჩამოაგდო ის ძირს, მოჰკლა და ოქრო-ვერცხლით მოსევეადებული იარაღი აპყარა. კონსულის გამარჯვებამ აღაფრთოვანა რომაელები. მდგრად ეძგერენ ბელადის დალუპვით შემერთალ კელტებს და დაამარცხეს ისინი. შემდეგ მარცელუსი ისევ შეუერთდა თავის კოლეგას; გაერთიანებული ძალებით აიღეს ქალაქი აცერა. მას მოჰყვა ვალთა ყველაზე დიდი ქალაქის მედიონალის დაცემა, რის შემდეგ მთელი ცისალური გალია იძულებული შეიქნა რომაული ბატონობის უღელი ეკისრებინა.

ამგვარად, ჩრდილოეთით რომის საზღვარი ალპებს მიეზღინა.

ილირიული ომები

სანამ ლეგიონები ჩრდილოეთს იმორჩილებდნენ, რომაულმა იარაღმა და დიპლომატიამ ადრიატიკისა და იონიის ზღვებსაც გადააბიჯა. რომის აგრესია აღმოსავლეთისკენაც დაიძრა.

III საუკუნის 40—30-ან წლებში ბალკანეთის ხანგვარკუნძულის ჩრდილო-აღმოსავლეთ ნაწილში უკვე დაშლილ-დაქუცმაცებული და პოლიტიკურად დასუსტებული ბერძნული სამყაროს ჩრდილოეთის საზღვარზე ილირიის სახელმწიფო ბატონობდა. მწირი ილირიის მოსახლეობის დიდი ნაწილი მეკობრეობით ირჩენდა თავს. იმ დროს სწრაფი და მსუბუქი ილირიული კატარღები თავისუფლად დათარეშობდნენ ადრიატიკის, იონიისა და საბერძნეთის ზღვებზე; ძარცვავდნენ და ატყვევებდნენ ყველა ქვეყნის გემებს, რომლებსაც კი მოიხელებ-

დნენ და დაიმორჩილებდნენ; თავს ესხმოდნენ იტალიისა და საბერძნეთის სანაპიროებს, ძარცვავდნენ და იტაცებდნენ მოსახლეობას.

ილირია განსაკუთრებით გაშლიერდა მას შემდეგ, რაც სახელმწიფოს სათავეში ჩაუდგა ქვრივი დედოფალი ტეგტა, მცირეწლოვანი ტახტის მემკვიდრის პინის დედა და რეგენტი. ილირიას ძალას მატებდა მაკედონიის ძლიერ მეფე დემეტრე II-თან კავშირი.

რომს, სანამ მას ჩრდილოეთ იტალიის დამორჩილება დამთავრებული არ ჰქონდა, მანამ ბალკანეთის საქმეებში ჩარევის სურვილიც არ უნდა გასჩენოდა. მაგრამ თვით იტალიის სანაპიროებზე და იტალიის გემებზე ილირიელთა სისტემატურმა თავდასხმებმა რომი გადამჭრელ ღონისძიებათა მიღების გზაზე დააყენეს.

230 წლის შემოდგომაზე ილირიის დედოფლის წინაშე გამოცხადდნენ რომაელი ელჩები, ძმები გაიუს და ლუციუს კორუნკანიუსები. მათ თავისი ხელისუფლების დავალებით მოითხოვეს ილირიელებს დაუყოვნებლივ აენახლაურებიანთ იტალიელ ვაჭართა გემებისათვის ახლახან მიყენებული ზარალი და პირობა დაედოთ, რომ ამიერიდან მსგავსი ყაჩაღობა აღარ განმეორებულყო. ასეთ იმპერატიულ მიმართვას ზვიადმა დედოფალმა უპასუხა: ილირიაში წესად და ჩვეულებად არ არის ვინმეს დაუშვალთ ზღვაზე ნადავლის მოპოვებაო. ლუციუს კორუნკანიუსმა ტევტას ასეთ პასუხზე მიახალა: ჩვენ შევეცდებით ილირიელთა ასეთი ადათ-ჩვეულებანი უკეთესით შევცვალოთო. გაბრაზებულმა დედოფალმა შესწყვიტა მოლაპარაკება, ხოლო უკან დაბრუნებულ ელჩებს, მისი ბრძანებით, მღვერები დაეწივნენ და ლუციუსი მოჰკლეს. ეს სრულიად საკმარისი იყო იმისათვის, რომ რომს ილირიისათვის ომი გამოეცხადებინა (229 წ.).

229 წლის გაზაფხულზე ილირიელთაგან ახლად დაპყრობილ კუნძულ კერკირასთან კონსულ გნეუს ფულვიუს ცენტუმალუსის მეთაურობით გამოჩნდა 200 გემისაგან შემდგარი რომაული ფლოტი. კერკირაზე გაბატონებული ილირიული გარნიზონის უფროსი ბერძენი დემეტრე ფაროსელი მაშინვე რომაელთა მხარეზე გადავიდა და კუნძულიც მათ ჩააბარა. მალე ამის შემდეგ რომს მორჩილება გამოუცხადეს აპოლონიამ, დირაქიუმმა, ისამ და ადრიატიკის ზღვის, მისი აღმოსავლეთ სანაპიროების სხვა ქალაქებმა და კუნძულებმა. ამასობაში ილირიის სანაპიროებს მიადგა მეორე კონსულიც ლუციუს პოსტუმუს ალბინუსი 20 000 ლეგიონერთა და 2 000 მხედრით.

პირველი დარტყმებისთანავე ილირიამ იგრძნო თავისი უძლურება რომაული იარაღის სიძლიერის წინაშე. ტევტა გაიქცა და ქვეყნის სიღრმეში მდებარე ერთ-ერთ ციხე-სიმაგრეში ჩაიკეტა.

ილირიაში ორივე კონსულის ყოფნა საჭიროც აღარ იყო. 229 წლის შემოდგომაზე ფულვიუსი უმეტესი ძალებით დაბრუნდა რომში, ხოლო პოსტუმიუსი 40 გემითა და რამდენიმე მანიპულით მთელი ზამთარი დარჩა ილირიაში.

მომდევნო წლის გაზაფხულზე ტევეტამ საზავო მოლაპარაკების გამართვა ითხოვა. დაიღო ზავი, რომლის ძალით ტევეტა ინარჩუნებდა ილირიის დედოფლობას. ამის საფასურად მას რომისათვის უნდა დაეთმო ადრიატიკის ზღვის სანაპირო ქალაქები და კუნძულები, რომლებიც რომაელებს უკვე ხელთ ეპყრათ; გადაეხადა სამხედრო კონტრიბუცია; ილირიელებს ადრიატიკის ზღვაზე ნაოსნობის უფლება ეძლეოდათ მხოლოდ ქ. ლისამდე და არავითარ შემთხვევაში მის სამხრეთით, თუ ამის შესახებ სპეციალურად რომის ნებართვა არ იქნებოდა.

რომს ჭერჭერობით ილირია პროვინციად არ გამოუცხადებია. ამის ძირითადი მიზეზი უთუოდ კელტებთან ჭერ კიდევ დაუმთავრებელი ბრძოლები და კართაგენთან მოსალოდნელი ახალი დიდი ომი უნდა ყოფილიყო. რომს ჭერჭერობით ლოიალური დიპლომატიით უნდა დაეჭირა აღმოსავლეთის ქვეყნები.

მიუხედავად ამისა, აღმოსავლეთში პირველ შეტევას რომისათვის ზანც კარგი პირი უჩანდა.

ბარკიდეზი ესაანეთში

სანამ რომაელები ჩრდილოეთ იტალიისა და ილირიის საქმეებით იყვნენ გართული, სამხრეთსა და დასავლეთში უდიდესი მნიშვნელობის ამბები კალეიდოსკოპურად აცვლიდნენ ერთმანეთს.

პირველმა პუნიკურმა ომმა და აფრიკის აჯანყებამ კართაგენს ძლიერი დამბლა დასცა. ხმელთაშუა ზღვეთის ეკონომიური და პოლიტიკური მბრძანებლობის სადავეები მას ხელიდან გამოჰგლიჯეს; მსოფლიოს ყველა კუთხიდან მომავალი ფინანსურ სიმდიდრეთა არტერიები გადაუჭრეს; მსოფლიოში გაბატონებულ ძლიერი სტრატეგიული ფორპოსტებიდან სამუდამოდ გააძევეს.

ამ ამბებმა აფრიკის აჯანყების ჩაქრობისთანავე კართაგენში მწვავე სოციალური და პოლიტიკური კრიზისი წარმოშვა. კონსერვატიული ოლიგარქიული მმართველი პარტია, რომელსაც ჰანონი მეთაურობდა, თავს ველარ ართმევდა ქვეყნის შიგნით არსებულ შეხლა-შემოსლას. მას გამოსაჯალი ვერ მოენახა დაღუპვის კართან მისული სახელმწიფოს გამოსაბრუნებლად. ამ ნიადაგზე განსაკუთრებით-გაძლიერდა სახალხო-დემოკრატიული პარტია, ომისა და აქტიური საგარეო პოლიტიკის ძლიერი კავშირი, რომელსაც სახელოვანი ჰამილკარ ბარკა მეთა-

ურობდა. ჰამილკარი, სახალხო მასების მხარდაჭერითა და წაქეზებით ფრთებშესხმული, ენერგიულად ესხმოდა თავს ჰანონის კონსერვატიულობას, ააშკარავებდა ოლიგარქიის სიზანტესა და ამ მიმე დღეებში უკიდურეს დაბნეულობას. კონსერვატორთა ყოველი ცდა, ჰამილკარის ავტორიტეტისა და დიდების შესალახავად, მარცხით დამთავრდა. ხალხის აქტიური ძალები აშკარად მოითხოვდნენ ჰამილკარისათვის განუსაზღვრელი ძალაუფლების გადაცემას.

ოლიგარქია იძულებული შეიქნა დათმობაზე წასულიყო. ჰამილკარი თითქმის განუსაზღვრელი უფლებების მპყრობელ მთავარსარდლად იქნა არჩეული. მას ემორჩილებოდა კართაგენის სამოქალაქო ლაშქარი, ე. ი. მთელი ბრძოლისუნარიანი მოსახლეობა და აფრიკელ სამხედრო წვეულთაგან ახლად შეკრებილი ჯარები.

ხმელთაშუა ზღვის ცენტრალური ეკონომიური და სტრატეგიული ცენტრების: სიცილიის, სარდინიისა და კორსიკის დაკარგვის შემდეგ კართაგენის ძლიერების აღდგენისა და რომის ძალაუფლების დასამხობელი ძირითადი ბაზისის როლის შესრულება ჰამილკარს ესპანეთისათვის უნდა დაეკისრებინა.

პირენეი ცნობილი იყო აურაცხელი სიმდიდრით, ნაყოფიერი ველმინდვრებით, ვენახებითა და ბაღ-ბოსტნებით, გემთშენებლობისათვის საუკეთესო ხე-ტყისა და სხვადასხვა სახის ლითონების (ოქრო, ვერცხლი, რკინა და ტყვია) სიუხვით. ასეთი ქვეყნის დაპყრობით კართაგენელებს შეეძლოთ სწრაფად აღედგინათ თავიანთი სახელმწიფოს ეკონომიური ძლიერება და შეექმნათ მძლავრი საომარი პლაცდარმი რომის წინააღმდეგ გადამწყვეტი სარევიანშო შეტევისათვის. ეს ძალიან კარგად ჰქონდა შეგნებული ჰამილკარ ბარკასა და მის სამხედრო პარტიას.

237 წელს ჰამილკარმა კართაგენიდან გაიყვანა კარგად გაწვრთნილი არმია, სპილოები და საზღვაო ფლოტი.

სახმელეთო არმია თვით მთავარსარდლის მეთაურობით აფრიკის სანაპიროებს დასავლეთისაკენ მიჰყვებოდა, მის პარალელურად მიემართებოდა საზღვაო ფლოტი, რომელსაც სათავეში ედგა ჰამილკარის სიძე (ქალიშვილის ქმარი) და უახლოესი მეგობარი ჰ ა ს დ რ უ ბ ა ლ ი.

მელკარტის სვეტებთან (ჰიბრალტარი) ჰამილკარმა თავისი არმია გემებში ჩასვა და გადაიყვანა ესპანეთში, ქ. გა დ ე ს თ ა ნ.

აქედან დაიწყო კართაგენელთა ენერგიული წინსვლა ესპანეთის დაპყრობისათვის. ჰამილკარი იარაღისა თუ დიპლომატიის მეშვეობით შეუდგა ესპანეთის მამაცი ტომების თანდათანობით დამორჩილებას და ქვეყნის სიღრმეში შექრას.

მაგრამ ჰამილკარს არ დასცალდა მისი გრანდიოზული გეგმების განხორციელება. 228 წელს ესპანელ ტომებთან ერთ-ერთ სასტიკ ბრძოლაში გმირული სიკვდილით დაეცა ჰამილკარ ბარკა.

არმიამ და მისმა უფროსმა შემადგენლობამ ჰამილკარის ნაცვლად მთავარსარდლად გამოაცხადეს დემოკრატის საყვარელი ბელადი ჰასდრუბალი.

ჰასდრუბალის საქმიანობით აღარ იგრძნობოდა მისი სახელოვანი სიმამრის სიკვდილი. ის დაუწყონებლივ შეუდგა პირენეის ოკუპაციის კიდევ უფრო გაფართოებას ესპანეთში კართაგენელთა ძლიერების ცენტრალურ პუნქტად გადაიქცა ჰასდრუბალის მიერ დაარსებული ქალაქი ახალი კართაგენი აღმოსავლეთით, ზღვის სანაპიროზე, მოხერხებულ მიუვალ ხმელეთის ყელზე ნაყოფიერი რაიონებითა და ვერცხლით მდიდარი მთებით გარშემორტყმული.

რომე კვლავ შეაშფოთა კართაგენელთა შეუჩერებელმა წინსვლამ ესპანეთში. 226 წელს ესპანეთში განდგნენ რომაელი ელჩები და მოლაპარაკება გამართეს ჰასდრუბალთან. რომაელები ამჯერად დაკმაყოფილდნენ იმით, რომ ჰასდრუბალი დაითანხმეს არ გადაეხიზებინა მდინარე იბერიის (ებრო) აღმოსავლეთისაკენ. ამგვარად, აღნიშნული მდინარის დასავლეთით კართაგენს უფლება რჩებოდა განეგრძო თავისი აგრესიული პოლიტიკა პირენეის ნახევარკუნძულზე.

221 წელს ჰასდრუბალი პირადი წყენინების საფუძველზე მოკვლა ვილაძე კელტმა. მთავარსარდლის მცველებმა მკვლელი შეიპყრეს და საშინელი წამებით მოკვლეს. მომაკვდავს, საძულველი კართაგენელის მოკვლით აღტაცებულს, სულის ამოხდომამდე პირზე ღიმილი არ მოშორებია.

იმავე დღეს კართაგენელებმა მთავარსარდლად გამოაცხადეს ჰანიბალი.

„სანაშენის ციხისლი“

ჰამილკარ ბარკა ესპანეთში ყოფნის დროს ხშირად წამოიძახებდა: მე რომის დასამშობად სამ ლომის ბოკვერს ვზრდიო. სამი ვაჟი—ჰანიბალი, ჰასდრუბალი და მაგონი—სახელოვანი მამის სამხედრო ბანაკებში იზრდებოდა. იქ ლებულობდნენ ისინი საბრძოლო წრთობას და ეისვეოდნენ რომაელთადმი განუზომელ სიძულვილს. ძმებს შორის განსაკუთრებით გამოირჩეოდა უფროსი, ჰანიბალი.

ჰანიბალის ყრმობის წლები სავსე იყო სამშობლო ქვეყნისა და მშობლიური ოჯახის საშინელ თავგადასავალთა შემადრწუნებელი შთაბეჭდილებებით. პირველი პუნიკური ომის უკანასკნელი წლები... სიცი-

ლიიდან იარაღაყრილი და ბრაზით გამძვინვარებული მამის დაბრუნება... აფრიკის აჯანყების საშინელებანი და ქალაქის შიგნით მძვინვარე შეხლა-შემოხლა... ჰანიბალს მესხიერებისა და აზროვნების გაჩენიდანვე სწამდა, რომ ყველაფერი ამის მიზეზი იყო სადღაც ჩრდილოეთში არსებული საძულველი ქალაქი რომი.

ჰანიბალი ცხრა წლისა იქნებოდა, როდესაც მამამისმა ჯარები შეკრიბა და ესპანეთში გასამგზავრებლად დაიძრა. ის მივარდა მამას და და-



ჰანიბალი.

უწყო ვედრება თან წაყევანა ბრძოლის ველზე. ჰამილკარმა სიხარულით მიიღო შვილის თხოვნა და გამგზავრების წინ სამსხვერპლოს სისხლით შეღებილ საკურთხეველთან ფიცი დაადებინა. ყმაწვილმა შეჰფიცა, რომ იქნებოდა რომის დაუძინებელი მტერი და მის წინააღმდეგ დაუნდობელ ბრძოლას მთელ თავის სიცოცხლეს შესწირავდა („ჰანიბალის ფიცი!“).

მამის დაღუპვის დროს ჰანიბალი უკვე ბრძოლის ქარცეცხლში ნაწრთობი 18 წლის ჰაბუკი იყო. ამის შემდეგ რამდენიმე ხნით მას ჩვენ კართაგენში ვხედავთ. მაგრამ სულ მალე ახალმა მთავარსარდალმა

პასდრუბალმა გაიწვია ესპანეთში თავისი ცოლის ძმა, რასაც ეს უკანას-
კნელი დიდი სიხარულით შეხვდა.

ესპანეთში მეორედ გამგზავრებისა და მრავალ ახალ ბრძოლაში
მონაწილეობის ჰილდების შემდეგ გმირ და ნიკიერ სიძესთან თანამებრ-
ძოლობაში საბოლოოდ დაიხვეწა დიდი სარდალი და გაჰკრიახი სახელ-
წიფო მოღვაწე.

მიუხედავად იმისა, რომ ანტიკური დროის წყაროები ჰანიბალისად-
მი დიდი სიძულელითა და ტენდენციურობით არიან განწყობილი, მათ-
ში მაინც ადვილი ხდება გენიალური ფინიკიელის ნამდვილი სახის აღდ-
გენა: ფიზიკური აღნაგობით ახოვანი და ჰერკულესის ძალ-ღონის
პატრონი; საბრძოლო შემპართებლობით შეუდარებელი, მეთაურთა-
ბრძანებების სიტყვაშეუბრუნებელი მორჩილი ჯარისკაცი და თვით მკაც-
რად მომთხოვნი მეთაური; უპირველესი ქვეითი მეომარი და შეუდარე-
ბელი ჯიგრი, ჰრძოლის დასაწყისში უპირველესი და უკუქცევისას
უკანასკნელი; დაუღალავი მცურავი და დაუმარცხებელი მოკრივე; სიც-
ხე-სიცივის, შიშშილ-წყურვილის, უძილობისა და მძიმე ლაშქრობათა
არაჩვეულებრივად ამტანი; ჯარისკაცთა ჰირისა და ლზინის თანაზიარი;
ძვირფასი ტანსაცმლისა და სამკაულებისადმი გულგრილი, მაგრამ საუ-
კეთესო იარაღისა და ცხენის მოყვარული; მიზნისაკენ თავზეხელაღე-
ბული მსწრაფველი, მაგრამ საფრთხეში მეტად ფრთხილი და წინდა-
ხედული; სხვა ენებისა და კულტურათა გარდა, ბერძნულისა და ლათი-
ნურის საუკეთესო მცოდნე და თაყვანისმცემელი; მოწინააღმდეგის
გეგმისა და განზრახვის არაჩვეულებრივი შემცნობი; ყოველი ახალი
ბრძოლისა და პოლიტიკური ნაბიჯის ნოვატორი და ორიგინალური შე-
მოქმედი. აი, ასეთი იყო 25 წლის ჰანიბალი, როდესაც მას კართაგენე-
ლებმა ერთხმად ჩააბარეს მთავარსარდლობა.

თუ ყველაფერ ამას ზედ იმასაც დაეუმატებთ, რომ კართაგენელთა
ახალი მთავარსარდალი, აგრეთვე, შეუდარებელი იყო მოწინააღმდეგი-
სადმი ზეადამიანური სისასტიკით და შეუბრალებლობით, მაშინ კიდევ
უფრო ნათელი გახდება, როგორ მტერთანაც მიეცა საქმე რომს.

ჰანიბალმა სწრაფი შეტევებით და დიპლომატიური ხერხებით კიდევ
უფრო გააფართოვა კართაგენის სამფლობელოები პირენეისში, ასე
რომ 220 წლის ბოლოსათვის მდ. იბერის დასავლეთით მთელი ესპანე-
თის უდიდესი ნაწილი ჰანიბალს ემორჩილებოდა.

მაგრამ მდ. იბერის სამხრეთით, ზღვის სანაპიროდან ორი კილომეტ-
რის მანძილზე, საუკეთესო ადგილზე მდებარეობდა ქალაქი საგუნ-
ტი, რომელიც ჯერ კიდევ კართაგენს არ ემორჩილებოდა. იგი რომის
„მფარველობის“ ქვეშ იმყოფებოდა.

საგუნტის მოსახლეობა ბერძნებისა და ლათინებისაგან შედგებოდა, და ამდენად რომს მასზე დიდი პრეტენზიების განცხადება შეეძლო. ის ხშირად ერეოდა საგუნტის საქმეებში და ყოველნაირად ცდილობდა ქალაქის სათავეში კართაგენისადმი მტრულად განწყობილი ხელისუფლება მდგარიყო.

საგუნტელები გრძნობდნენ, რომ ჰანიბალი, როგორც კი ესპანელი ტომების დამორჩილებას მორჩებოდა, მაშინვე მათკენ მიმართავდა მახვილს. ამიტომ საგუნტის ხელისუფლებამ არაერთხელ გაგზავნა ელჩები რომში, შეატყობინა მას მოსალოდნელი საშიშროების ამბავი და დახმარება სთხოვა.

220 წლის ბოლოს შორეული ლაშქრობიდან ახალ კართაგენში გამოსაზამთრებლად დაბრუნებულ ჰანიბალს სასლში რომაელი ელჩები დახვდნენ. ისინი სთხოვდნენ და აფრთხილებდნენ მას ხელი არ ეხლო რომის მფარველობის ქვეშ მყოფი საგუნტისათვის და ამავე დროს არ გადაელახა მდინარე იბერი, რომელიც ჰანდრუბალის დროიდან რომისა და კართაგენის სამფლობელოთა საზღვრად იყო აღიარებული. ჰანიბალმა მათ უპასუხა: უმჯობესია, რომაელები არ ერეოდნენ საგუნტის საქმეებში; ამას წინათ ქალაქში მომხდარი აშლილობისას რომაელებმა სრულიად უკანონოდ სიკვდილით დასაჯეს კართაგენის მომხრენი და ქვეშევრდომები. ამიტომ მე ასეთ უსამართლობას დაუსჯელად არ დავტოვებ, რადგან კართაგენი ყოველთვის დაჩაგრულების დამცველი და მოსარჩლეაო. ასეთი პასუხიდან აშკარად ჩანდა კართაგენელის განზრახვა. ის საგუნტზე თავდასხმას აპირებდა, ე. ი. რომს ომის დაწყების საბაბს აძლევდა.

რომი გამალებით შეუდგა ილირიის საქმეთა დასრულებას და კართაგენთან ომის სამზადისს.

219 წლის დამდეგს საგუნტის ელჩები კიდევ გაძოვნდნენ რომის ფორუმზე. ისინი გამოცხადდნენ სენატში და კვლავ აუწყეს მოსალოდნელი უბედურების ამბავი. სანამ სენატი ყოყმანობდა და საქმეს აჭიანურებდა, მოვიდა ახალი შემაშფოთებელი ამბავი: ჰანიბალი თავს დაესხა საგუნტს!

მართლაც, 219 წლის გაზაფხულზე ჰანიბალი 150 000 ჯარისკაცით ხმელეთის სამივე მხრიდან გარს შემოერტყა საგუნტს და დაიწყო მასზე გააფთრებული იერიშების მიტანა.

ბრძოლის ქარცეცხლში მყოფ ჰანიბალს შეატყობინეს, რომ რომიდან ჩამოვიდნენ დესპანები. სარდალმა უარი განაცხადა მათს მიღებაზე და შეუთვალა: თქვენთვის მეტად სახიფათო იქნება ასეთ ადგილზე გამოცხადება, სადაც ამდენი გამხეცებული ხალხი ერთიმეორეს

ელეტს და პასუხისმგებელი არ ვიქნები თქვენი უვნებლობის უზრუნველყოფაზე. იმავე დროს ჰანიბალმა, რომელმაც იცოდა, რომ ასეთი პასუხის შემდეგ რომაელი ელჩები უშუალოდ კართაგენში გაეშურებოდნენ, დაუყოვნებლივ აფრინა კაცები კართაგენში თავისიანებთან (ბარკიდულ-სამხედრო პარტია) და მისწერა მათ, რომ არ დაეშვათ რომაელთა წინაშე ოდნავი დათმობაც კი.

მართლაც, ესპანეთში უწყალო მგზავრობის შემდეგ, სენატისაგან მიცემული ინსტრუქციის თანახმად, რომაელი ელჩები პუბლიუს ვალერიუს ფლაკუსი და ქვინტუს ბებიუს პამფილუსი გაეშურენ აფრიკაში. ისინი გამოცხადდნენ კართაგენის სენატში და მოითხოვეს საგუნტის ომის შეწყვეტა და ჰანიბალის, როგორც ხელშეკრულების დამრღვევის, გადაცემა რომაელთა ხელში.

კართაგენის ხელისუფლებამ, სადაც ახლა ომის პარტიის ხმა ბატონობდა, უარი უთხრა ომის ელჩებს მათი მოთხოვნების დაკმაყოფილებაზე. რომაელები ძალიან უსამართლოდ იქცევიან, თუ ისინი კართაგენთან კავშირს საგუნტელებს არჩევენო, — განუცხადეს დესპანებს.

ამასობაში ჰანიბალი შეუწელებელ იერიშებს აწარმოებდა ნანგრევებით გარშემორტყმულ ქალაქზე.

თითქმის იმავე დროს, როცა რომაელი ელჩები კართაგენიდან დაბრუნდნენ და სენატს ანგარიში მოახსენეს, ესპანეთიდანაც მოვიდა ამბავი ჰანიბალის მიერ საგუნტის დაპყრობის შესახებ.

კართაგენში ისევ გამოცხადდნენ ახალი ელჩები, რომში დიდად პატივცემული სენატორის ქვინტუს ფაბიუს მაქსიმუს მეთაურობით.

ფაბიუს მაქსიმუს ყური არ ათხოვა კართაგენელ სენატორთა დიპლომატიურ სიტყვებს. ამაყად წამოდგა, ამოიწია ტოგის კალთა, ჩაპყო მასში ხელი და შეჰყვირა: „კართაგენელებო, ჩვენ თქვენთვის მოგვიტანია ომი და მშვიდობა (bellum et pax). ამოირჩიეთ ერთ-ერთი, რომელიც გსურთ!“ — „შენ თვითონ ამოირჩიე“ — დაიღრიალეს კართაგენელებმა. მაშინ რომაელმა გააგდო კალთა ხელიდან და თითქოს იქიდან ამოიღო: „მამ, იყოს ომი,“ — წამოიძახა. კართაგენის სენატის უმრავლესობამაც ერთხმად უპასუხეს, რომ ლებულობენ ომს და აწარმოებენ ისეთივე სიმამაცით, როგორც ხვდებიან მას.

ასე გადაწყდა ომის განახლება მოსისხლე მტრებს შორის... ასე დაიწყო მეორე პუნიკური ომი.

თავი მესამე

მეორე პუნიკური ომი

უცხლითა და მახვილით
Ferrum et ignique

ომის დასაწყისი. პირველი ალკიური ლაშქრობა.

218 წლის დამდეგს მოწინააღმდეგენი სრულ მზადყოფნაში იმყოფებოდნენ ომის განახლებისათვის.

რომში ადრევე ჰქონდათ შემუშავებული კართაგენის წინააღმდეგ ბრძოლის სტრატეგიული გეგმა. ეს გეგმა ითვალისწინებდა ერთდროულად დარტყმას ორი მიმართულებით: სამხრეთით — სიცილიის გავლით, უშუალოდ აფრიკაში, და დასავლეთით — ესპანეთში პირდაპირ ჰანიბალის წინააღმდეგ. ასეთი გაბედული და კარგად გამიზნული გეგმა სულ მალე დაიმსხვრა კართაგენელის ღრმად მოფიქრებულ საომარ მონასაზრზე.

ჰანიბალი ითვალისწინებდა ყველა იმ შეცდომას, რომლებიც კართაგენელებს დაშვებული ჰქონდათ პირველ პუნიკურ ომში; ითვალისწინებდა მტრის უპირატესობის, სიძლიერისა და სისუსტის ყოველ მხარეს. მისი სტრატეგიული გეგმა მიზნად ისახავდა: ჯერ ერთი, მტკიცედ ჩაეგდო ხელში სწრაფი შეტევების ინიციატივა და არ დაეთმო ის მოწინააღმდეგისათვის; მეორე, მოწინააღმდეგის სამხედრო ძალთა უპირატესობის პარალიზებისათვის, მისი მორალური განადგურებისა და, რაც მთავარია, რომის მბრძანებლობით შექმნილი იტალიის „კავშირის“ დანგრევის მიზნით, კართაგენელები უნდა შეჭრილიყვნენ თვით აპენინის ნახევარკუნძულზე და გადაეჭციათ ის ომის საშინელებათა ძირითად ასპარეზად; ჩამოეცილებინათ რომისათვის ყველა მისი „მოკავშირე“ დამორჩილებული. იტალიელი ხალხები, ამგვარად დაენგრიათ რომის ძლიერების ბაზა და შემდეგ მარტოდ გარიყული ქალაქი თავისი ნებისათვის დაემორჩილებინათ; მესამე, თვით აფრიკისა და ესპანეთის უშიშროების უზრუნველყოფის შემდეგ იტალიაზე თავდასხმა უნდა

მომხდარიყო არა სამხრეთიდან და ზღვებიდან, არამედ ჩრდილოეთიდან, რომისადმი მტრულად განწყობილი კელტების ქვეყნებიდან.

ასეთი იყო ჰანიბალის გეგმა.

ომის დაწყებამდე ორივე მხარე ცდილობდა კარგად გაწვრთნილი შპიონაჟისა და დემაგოგიის მეოხებით განხეთქილება შეეტანათ მოწინააღმდეგის პოლიტიკური გავლენის ქვეშ მოქცეულ ხალხებში, განეწყოთ ისინი მბრძანებლის წინააღმდეგ და გადაებირებინათ თავის მხარეზე. ამ მხრივაც ჰანიბალი აშკარად სჯობნიდა მოწინააღმდეგეს. მას ადრევე ჰყავდა გაგზავნილი თავისი მსტოვრები მთელს გალიაში, ჩრდილოეთ იტალიაში; გაბმული ჰქონდა ურთიერთობა კელტურ ტომებთან, ჰქონდა ცნობები რომაელთადმი მათს მტრულ განწყობაზე, ქვეყნის გეოგრაფიულ-ბუნებრივ პირობებზე, ხალხის ბრძოლისუნარიანობაზე და ადათ-ჩვეულებებზე; ინფორმირებული იყო, იტალიაში ლაშქრობის მარშრუტებზე, ალპების გადასასვლელებზე და სხვ. ასე რომ, როდესაც კართაგენიდან ესპანეთსა და გალიაში ჩამოსულმა რომაელმა ელჩებმა ადგილობრივ მოსახლეობაში კართაგენის წინააღმდეგ აგიტაცია გამართეს (ასე ჰქონდათ დავალებული ფაბიუს მაქსიმუსსა და მის მხლებლებს), ისინი ყველგან მტრულ განწყობასა და აბუჩად აგდებას შეხვდნენ. მაგალითად, ესპანეთში ოლცინიების ტომისაგან მათ ასეთი პასუხი მიიღეს: როგორ არ გრცხვენიათ, რომაელებო, გვიჩიოთ, რომ კართაგენელებთან კავშირს თქვენთან მეგობრობა ვამჯობინოთ, როცა თქვენ, საგუნტის მოკავშირეებმა, თქვენი გულგრილობითა და ლალატით მეტი საშინელება მიაყენეთ ამ უბედურ ქალაქს, ვიდრე კართაგენელებმა. ამიტომ გირჩევთ, რომ მოკავშირეები ეძიოთ იქ, სადაც ჯერ კიდევ არ იციან საგუნტის ტრაგედიის შესახებ; საგუნტის ნანგრევები ჩვენთვის იქნება საუკეთესო გაკვეთილი იმისა, რომ არავინ არ მიენდოს რომაელთა მფარველობასა და კავშირს. ასევე გალიაშიც რომაელები შეხვდნენ, რომ ჰანიბალს იქ თავის დროზე წარმატებით გაუშართავს აგიტაცია რომის წინააღმდეგ. კელტები მათ ზოგან დაცინვითა და სტვენით პასუხობდნენ, ზოგან კი, უკეთეს შემთხვევაში, ნეიტრალიტეტის დაცვასაც ძლივს აღუთქვამდნენ. უთუოდ იყვნენ კელტთა ისეთი ტომებიც, რომლებიც მტრულად უყურებდნენ როგორც ერთ, ისე მეორე მხარეს.

ჰანიბალი ითვალისწინებდა ალპებზე ლაშქრობის სიძნელეებსაც. მას მოკავშირე გალებისაგან დაწვრილებითი ცნობები ჰქონდა ალპების გადასასვლელებზე. იცოდა, რომ ალპებზე ლაშქრობა მეტად მძიმე იქნებოდა, მაგრამ არავითარ შემთხვევაში დაუძლეველი. ამიტომ ის ყურს არ უგდებდა ზოგიერთი თანამებრძოლის პესიმისტურ-

სკეპტიკურ მოსაზრებებს¹ და ამ უმძიმეს პუნქტს გაბედულად ხაზავდა ვრძელ და ხანგრძლივ ლაშქრობათა ეკლიან გზაზე.

ჰანიბალმა ესპანეთის მმართველობისათვის, მის შესანარჩუნებლად და ახალი საბრძოლო რეზერვების მოსამზადებლად დასტოვა თავისი ძმა ჰასდრუბალი და 218 წლის მაისის დამდეგს 90 000 ქვეითი მეომრით, 12 000 მხედრითა და 37 სპილოს თანხლებით გამოვიდა ახალი კართაგენიდან და სწრაფი მარშით დაიძრა ჩრდილო-აღმოსავლეთისაკენ. პირენეის მთებთან არც კი იყო მისული, რომ არმიაში მყოფი მეომრების ნაწილმა უკვე დაიწყო ღრტვინვა შორეული ლაშქრობის სიძნელისა და ხანგრძლივობის გამო. ჰანიბალმა გაითვალისწინა, რომ ასეთი დემორალიზებული მეომრები არც შემდგომ ბრძოლებში გამოდგებოდნენ და სხვა დისციპლინირებული არმიის ნაწილებზეც გამხრწნელ გავლენას მოახდენდნენ. ამიტომ მან ისინი გამოჰყო არმიიდან და გააბრუნა თავიანთ სახლებში.

ამგვარად, პირენეის მთები გადალახა და გალიაში (დღევანდელ საფრანგეთში) ფეხი შედგა ჰანიბალის 50 000 ქვეითმა ჯარისკაცმა და 9 000 მხედარმა. მაგრამ ესენი იყვნენ მრავალ ბრძოლაში ნაცადი და შესანიშნავად გაწვრთნილი ბარკიდული ვეტერანები.

რამდენადაც სწრაფად მოქმედებდა ჰანიბალი, იმდენად ნელა და ზანტად იძვროდნენ რომაელები. მათ, როგორც ჩანს, ჯერ კარგად არც იცოდნენ ჰანიბალის გეგმების შესახებ.

მხოლოდ ზაფხულის დამდეგს გაეშურენ კონსულები თავთავისი მიმართულებით. პუბლიუს კორნელიუს სციპიონი ორი ლეგიონითა და 60 გემით გაემართა ჩრდილო-დასავლეთის მიმართულებით, ესპანეთისაკენ, სადაც მას, მისი ვარაუდით, უნდა მიესწრო ჰანიბალისათვის. მეორე კონსული ტიბერიუს სემპრონიუს ლონგუსი თავისი ლეგიონებითა და 160 გემისაგან შემდგარი ფლოტით დაიძრა სიცილიისაკენ, საიდანაც მას კართაგენზე თავდასხმა უნდა მოეწყო.

სციპიონი მივიდა მასილიაში და აუჩქარებლად შეუდგა ჯარების გადასხმას. აქ მას აცნობეს: ჰანიბალმა უკვე გადმოლახა პირენეის მთები. მაგრამ კონსული დარწმუნებული იყო, რომ კელტური ტომებით დასახლებულ ქვეყანაში მტერი დიდხანს ვერ გამოაღწევდა.

¹ პოლიბიოსთან დატულია ცნობა იმის შესახებ, რომ ერთ-ერთ სამხედრო თათბირზე, სადაც ალკებზე გადასვლისა და იტალიაში ლაშქრობის საკითხს იხილავდნენ, ჰანიბალს მისმა ერთ-ერთმა ახლო თანამებრძოლმა ვინმე ჰანიბალ მონომახოსმა უთხრა: იტალიაში შეჭრისათვის საჭიროა მებრძოლები წინასწარ ადამიანის ხორცის ჭამას მიეჩვიონო. მაგრამ ასეთი თქმისათვის სარდალს ყურადღება არ მიუქცევია.

მალე მასილიაში შეკრივები მოვიდნენ და მოიტანეს დაუჯერებელი ამბავი: ჰანიბალმა მდინარე რონა გადმოლახა. კონსულის განცვიფრებას საზღვარი არ ჰქონდა, როცა მას ადგილზე კართაგენელთა დაცარიელებული სანგრები და მხოლოდ ცეცხლის ნაშთები—ნაცარილა დახვდა და შეიტყო: ჰანიბალი თავისი არმიით უკვე სამი დღის წინ წასულა ჩრდილოეთისაკენ. მხოლოდ ახლა მიხვდა სციპიონი, თუ რა სურდა ჰანიბალს! ის შეუჩერებლად მიისწრაფოდა იტალიისაკენ! საჭირო იყო მტრის ამ განზრახვის აღკვეთისათვის ზრუნვა.

სციპიონმა არმია ორ ნაწილად გაჰყო და გემებში ჩასხა. მან თავისი ძმის გენუს სციპიონის მეთაურობით არმიის ერთი ნაწილი ესპანეთში გაგზავნა იქიდან ჰასდრუბალის გასაძევებლად და რომაელთა დასამკვიდრებლად. არმიის მეორე ნაწილს თვითონ ჩაუდგა სათავეში და სასწრაფოდ დაძრა ჩრდილოეთ იტალიისაკენ. ის მივიდა ლიგურიაში და ქ. გენუასთან ვადმოსხა ჯარები. აქედან გაეშურა მდ. პადუსისაკენ; ჰლატენციის მახლობლად შეიერთა იქ მდგარი ორი ლეგიონი; რომლებსაც პრეტორი მეთაურობდა, და დაუწყო ლოდინი ჰანიბალის ჯარებს.

სექტემბრის დამდეგს, რონის გადმოლახვის ადგილიდან 15 დღის ლაშქრობის შემდეგ, ჰანიბალი შეუდგა ალპების ციცაბოებს. პირველი დიდი დაბრკოლება. რომელიც კართაგენელებს წინ დახვდათ, იყო კელტები, მთიელი ალობროგები; რომლებიც კარგა ხნის ყოყმანის შემდეგ თავს დაესხნენ უკვე ლაშქრად გასულ კართაგენელებს. ამ პირველმა სამთო შეტაკებამ ჰანიბალს, მიუხედავად იმისა, რომ მან მოწინააღმდეგე სულ მალე სასტიკად დაამარცხა და ვაჰთანტა, მაინც საგრძობი ზარალი მიაყენა, განსაკუთრებით ცხენებისა და სატვირთო საქონლის. სახით. დაჭრილი და ბარბაროსთა მგრგვინავი ყიყინისა და გამაყრუებელი ეხოსაგან დამფრთხალი ცხოველები უფსკრულები-საკენ მიექანებოდნენ და თან მხედრებსაც ჩაიყოლებდნენ ხოლმე.

ოთხი დღის შემდეგ, როდესაც არმია მიადგა ერთ-ერთ, მეტად ვიწრო და საშიშ საცალფეხო გასასვლელს, რომელიც უზარმაზარი კლდის ძირში მიემართებოდა და, თავის მხრივ, თავს დაჰყურებდა უძირო უფსკრულს. უეცრად ყოველი მხრიდან წამოიშალნენ ჩასაფრებული მთიელები და მიესივნენ კართაგენელებს. ბარბაროსებმა ავანგარდზე თავდასხმა ვერ განავეითარეს მათთვის უცხო და საშინელი ცხოველების — სპილოების შიშით, ხოლო ზურგში, სადაც მათ განსაკუთრებით ძლიერი იერიშები მიჰქონდათ, თვით ჰანიბალი თავისი ქვეითი მეომრების თანხლებით არაჩვეულებრივი სიმამაცით იგერიებდა მტერს. ბარბაროსები მაინც არ ცხრებოდნენ. ისინი მთელი დღის განმავლობაში გადადიოდნენ იერიშებზე; მთებიდან უზარმაზარ ლო-

დღეს აგორებდნენ და გამაყრუებელი ღრიალით აფრთხობდნენ და უძირო ქარაფებისაკენ მიერეკებოდნენ საქონელს.

მეორე დღის დამდეგს ჰანიბალმა საბოლოოდ დაამარცხა დამხვდურნი. ზარალი მაინც საგრძნობი იყო; განსაკუთრებით ბევრი სატვირთო საქონელი და ცხენოსნები დაჰკარგეს. კართაგენელებმა დიდი ვაი-ვაგლახით გადაიარეს ხეობა. ამის შემდეგ კელტები მხოლოდ თარეშის ხასიათის თავდასხმებით აწუხებდნენ ჰანიბალს; გადამწყვეტ ბრძოლაში მასთან შებმას გაურბოდნენ.

მეცხრე დღეს კართაგენელთა არმიის ძირითადმა ნაწილმა მიაღწია უმაღლეს და უკანასკნელ უღელტეხილს, რის იქითაც იწყებოდა დაღმართი იტალიისაკენ. სარდალმა აქ ჯარები ორი დღით დააბანაკა, რათა დადლილ-დატანჯულ მეომრებს დაესვენათ და ჩამორჩენილი და გზადაბნეული თანამებრძოლებისათვის დაეცადათ.

ალბები უკვე თოვლით იყო დაფარული. განუწყვეტლივ თოვდა. ჰანიბალმა შენიშნა, რომ მეომართა შორის ამდენი დაუსრულებელი ტანჯვა-წამებისაგან აპათია და ღრმა პესიმიზმი მკვიდრდებოდა. მესამე დღეს სარდალმა შეკრიბა ჯარები და კვლავ სცადა მათი გამხნეება: კართაგენელები ალბების მწვერვალებიდან, როგორც ცადატყორცნილი კრემლიდან, თავს დასცქერიან იტალიას, ალბების ძირში ჩანს მდინარე პადუსის მშვენიერი, თბილი და მდიდარი ველები; იქ ცხოვრობენ კართაგენელთა მეგობრები, ვალები, უფრო ქვემოთ — რომი: ალბების გადასვლით კართაგენელები თვით რომის კედლებზე გადადიან; იტალიის ველებზე დაშვებისთანავე პირველი ან, უკიდურეს შემთხვევაში, მეორე შეტაკების შემდეგ უეჭველად დაეუფლებიან რომს და მთელ იტალიას...

დაიწყო ალბებიდან დაშვება. ეს კიდევ უფრო ძნელი და ზიანის მომტანი შეიქნა, ვიდრე მასზე ასვლა. მებრძოლები და ცხოველები მაღალ, თოვლით დაფარულ, მეტისმეტად ვიწრო და გაუვალ ხეობებში ველარ არჩევდნენ გზის სისწორეს და შეუკავებლად მიექანებოდნენ ქარაფებისაკენ.

ბოლოს, 218 წლის სექტემბრის დამლევის, დიდი ვაი-ვაგლახით კართაგენელებმა ფეხი ჩადგეს მდ. პადუსის ველზე. 15 დღის განმავლობაში გრძელდებოდა ჰანიბალის ალბური ლაშქრობა. 15 დღის მანძილზე ის, მის თანამოლაშქრეებთან ერთად ებრძოდა მიუვალ კლდე-ღრეებს, უძირო უფსკრულებს, გამჭვალავ ყინვა-ქარიშხალს, აუტანელ შიმშილ-წყურვილსა და მამაცი მთიელების თავდასხმებს. ჰანიბალის ლაშქრობა ახალი კართაგენიდან იტალიამდე 5 თვე გაგრძელდა. მოვიგონოთ, რომ ახალი კართაგენიდან მან 102 000 მეომარი (90 000 ქვეითი და 12 000 ცხენოსანი) გამოიყვანა; პირენეის მთების

გადმოლაზვისას 59 000 მებრძოლი (50 000 ქვეითი და 9 000 ცხენოსანი) ჰყავდა; ხოლო ამათგან მდ. რონას გადალაზვისას 46 000 კაცი (38 000 ქვეითი და 8 000 ცხენოსანი) ახლდა; ბოლოს, ალპების დამორჩილების შემდეგ იტალიაში 20 000 ქვეითი ჯარისკაცი და 6 000 მხედარი ჩამოიყვანა, ე. ი. სულ 26 000 კაცი (აქედან 12 000 აფრიკელი, 8 000 ესპანელი და 6 000 მხედარი).

რა თქმა უნდა, ამ ლეგენდარული ლაშქრობის მსხვერპლი დიდი იყო, მაგრამ ჰანიბალის გეგმის პირველი, მეტად მნიშვნელოვანი ნაწილი განხორციელებულია: მან იტალიის კარიბჭე გადალახა და მის ზღურბლზე შედგა ფეხი...

მაშ, „იჩინა თუ არა თავი ესპანეთის წიაღში პუნიკური ომის საშინელმა სტიქიონმა და გაიელვა თუ არა საგუნტის ცეცხლმა, რაც უკვე დიდი ხნის გამზადებული იყო რომისათვის, მსწრაფლ მოულოდნელად ატყდა საშინელი ავდარი. მან გადალახა ალპების მთების თოვლით შემოსილი მწვერვალები და ცით მოვლენილი დაეშვა იტალიაზე“.¹

ბიციონსი და ბრავია

ახლა მივუბრუნდეთ რომაელებს. ზემოთ ითქვა, რომ კონსულმა პ. კორნელიუს სციპიონმა მასილიიდან თავისი არმიის უდიდესი ნაწილი ესპანეთში გაგზავნა ჰასდრუბალის წინააღმდეგ. ხოლო თვითონ დანარჩენი ძალებით გადავიდა ჩრდილოეთ იტალიაში. აქ მან შეერთა პრეტორების ხელქვეით მყოფი ორი ლეგიონი. რომლებიც მანამდე აჯანყებული გალ-ბოიების წინააღმდეგ იყვნენ გაგზავნილი, და მათი თანხლებით პლაცენციის დასავლეთით გადალახა მდინარე პადუსი, გადავიდა მის მარცხენა სანაპიროზე.

რომისათვის სრულიად მოულოდნელი იყო ამბავი, რომელიც მას იტალიაში დაბრუნებულმა სციპიონმა აცნობა. კიდევ უფრო მოულოდნელი და თავზარდამცემი იყო მრისხანე მტრის მიერ ალპების დამორჩილება და იტალიაში ჩამოსვლა. რომაელები დღით-დღე ელოდნენ ერთი მხრიდან ესპანეთის დამორჩილების ამბავს, მეორე მხრიდან კართაგენის ალყას, მის დანგრევას და სულ მოკლე დროში ომის ძლევამოსილად დამთავრებას. მაგრამ ნათელი შეიქნა, რომ მოვლენები ახლა სულ სხვანაირად წარიმართა. მეტად საშიშმა ფრონტმა თვით იტალიაში გაშალა ფრთები, ამიტომ რომის წინასწარი სტრატეგიული გეგმა მთლიანად შეიცვალა. შეტევა ჯერ თავდაცვის გენერალური ხაზით უნდა შეცვლილიყო. საჭირო იყო მთელი ძალების კონცენტ-

¹ ფლორუსი, II, 6.

რაცია ჩრდილოეთ იტალიაში, სადაც ალპებიდან საშინელი ქარიშხლის მომპაწავებელი ფინიკიური ღრუბლები ჩამოწვნიენ.

სენატმა დაუყოვნებლივ გაუგზავნა ბრძანება სიცილიაში მყოფ კონსულ ტ. სემპრონიუს ლონგუსს რაც შეიძლება სწრაფად წამოეყვანა მთელი თავისი ძალები და შეერთებოდა ჩრდილოეთ იტალიაში ჰანიბალის წინააღმდეგ მდგარ სციპიონის ჯარებს.

ამ დროს ჰანიბალი მის მოკავშირე კელტურ ტომებში, ინსუბრებში, თავის დადლილ-დაქანცულ ჯარებს ასვენებდა, მათ რიგებს გალებით ავსებდა და ყოველნაირი შესაძლებლობით ძალას იკრებდა. მაგრამ ყველა კელტური ტომი არ დამეგობრებია კართაგენელებს. ზოგი მათგანი ყოყმანობდა, ზოგიც მტრულად ხვდებოდა მათ. ამ მხრივ განსაკუთრებით მტრულ პოზიციაზე დადგნენ ინსუბრთა მოსისნლე ტავრინები. ჰანიბალს მათთან დიპლომატიური კატა-თაგვობანას თამაშის დრო აღარ ჰქონდა: ის უეცრად დაესხა თავს ტავრინთა მთავარ ქალაქ ტურინს და სამ დღეში აიღო იგი, მისი მოსახლეობის უმრავლესობა ამოჟლიტა და ამით მეზობელ გალურ ტომებს თავზარი დასცა. ამის შემდეგ გალების დიდი ნაწილი, რომლებიც მანამდე ყოყმანობდნენ, კართაგენელთა სამსახურში ჩადგნენ.

გალების ნაწილი რომაელებს უჭერდა მხარს, ხოლო მათმა უმრავლესობამ არ იცოდა ვის მხარეზე დამდგარიყო, რადგან ვინ იკის ვისკენ გადაიხრებოდა გამარჯვების სასწორი. როგორც ჰანიბალიც, ასევე სციპიონმა, კარგად იცოდნენ, რომ მთელი გალია მოუთმენლად ელოდა მათ შებმას და ეს ქვეყანა მაშინვე იმის მხარეზე დადგებოდა. ვინც გადაწყვეტ ბრძოლაში გამარჯვებას მოიპოვებდა. ამიტომ ორივე მხარე დაუყოვნებლივი ბრძოლის ცეცხლით იყო შეპყრობილი.

ჰანიბალი პადუსის მარცხენა სანაპიროზე, მის ზემო წელზე იყო დაბანაკებული. სციპიონმა თავისი არმია სპეციალურად გაწყობილი პონტონური ხიდების მეშვეობით გადაიყვანა პადუსის ჩრდილო შენაკადზე, მდ. ტიციუსზე (Ticinus — დღ. ტიჩინო) და ბანაკი დასცა მის მარცხენა სანაპიროზე.

ბრძოლის დღე შობლოვდა. ოქტომბერი იდგა...

სციპიონმა ცხენოსანთა და შუბოსანთა საკმაოდ დიდი რაზმები გამოიყვანა და მტრის პოზიციების დასაზვერად სამხრეთისაკენ დაიძრა. და აი, ტიციუსის მარჯვენა სანაპიროს გაშლილ ველზე, შორს სამხრეთისაკენ, რომაელებმა შენიშნეს ზეცად ავარდნილი მტრის კორიანტელი. ეს ჰანიბალი იყო. სწორედ იმავე მიზნით ჰანიბალსაც გამოეყვანა მხედართა ესკადრონები და სწრაფი მარშით მიჰქროდა ჩრდილოეთისაკენ. სციპიონმა სასწრაფოდ განამზადა საბრძოლველად თავისი ჯარი; წინ დააყენა ქვეითი მეომრები და გალების კავალერია, ხოლო უკან,

მეორე რიგში, რომაულ-იტალიური ცხენოსანი კოჩკუსები ჩამწყვრივა. ჰანიბალმა ც შენიშნა მტრის მოახლოება და სენტიში დაყენებულ ჯაშუვდა რეგულარული აფრიკული მხედრობა, ხოლო ფლანგებზე მსუბუქი და სწრაფი ნუმიდური კავალერია.

იმ დროს, როდესაც კონსულს თავისი ჯარი აუჩქარებელი, დინჯი ნაბიჯით მიჰყავდა, კართაგენელები ელვისებური სისწრაფით ეძებრენ მას. სუსტი ყიყინა აღმოხდა რომელთა ფრონტს. მოწინავეებმა მხოლოდ თითო სათხედის გასროლა მოასწრეს და შევარდნეივით, მოქროლავ მტერს უმაღვე ზურგი აქციეს. ჰანიბალის შეტევა იმდენად სწრაფი და ძლიერი იყო, რომ მისი რაზმები დაჯახებისთანავე რომაელთა მეორე, მომდევნო რიგებში შეიჭრენ. მხედართა ერთი ნაწილი მოწინააღმდეგის დარტყმისთანავე ძირს ჩამოვარდა, ნაწილი კი ბრძოლის უფრო მოხერხებულად წარმოებისათვის თვითონ სტებოდა ძირს. მალე ცხენოსანთა შეტაკება ქვეითთა ხოცვა-ჟლეტად იქცა. ბრძოლა, არაჩვეულებრივად თავგანწირული და ცხარე, მთელ დღეს გაგრძელდა. გადამწყვეტ მომენტში, როცა რომაელებმა კვლავ მოახერხეს საბრძოლო წესრიგის აღდგენა, ჰანიბალის ბრძანებით ფლანგებიდან სწრაფად დაიძრენ ნუმიდური მხედრები და ზურგიდან დაეცნენ მოწინააღმდეგეს. რომაელები ყოველი მხრიდან ალყაში მოექცნენ. მაგრამ ალყაშემორტყმულთ მხნეობა მაინც არ დაუკარგავთ, სანამ თვით სციპიონი მძიმედ დაჭრილი არ დაეცა ძირს. უეჭველი სიკვდილის საფრთხეში მყოფი კონსული გადაარჩინა მისმა ჩვიდმეტი წლის შვილმა პუბლიუსმა, რომელიც შეუდარებელი სიმამაცით იბრძოდა მამის გვერდით¹. მზის ჩასვლისას დაჭრილი კონსულის გარშემო მკიდროდ შეკრულმა რომაელებმა დიდის გაჭირვებით მოახერხეს რკალის გარღვევა და ბრძოლის ველიდან გაქცევა. დაღამებისას მათ, დიდად დაზარალებულებმა და გაჩანაგებულებმა, მიაღწიეს თავიანთ ბანაკს.

სციპიონმა იგრძნო მოწინააღმდეგის კავალერიის აშკარა უპირატესობა, განსაკუთრებით მდ. პადუსის მარცხენა მხარის გაშლილ ველებზე. ამიტომ მან ღამით ბრძანება გასცა ბანაკი აეყარათ; რომაელები უკანვე გადავიდნენ მდ. ტიციუსზე და შეუდგნენ პადუსის სამხრეთ ნაპირზე გადასვლას. ჰანიბალის მფრინავი რაზმები დაედევნენ მათ, მაგრამ მიუსწრეს მხოლოდ მაშინ, როცა სციპიონი მთელი თავისი ძალებით უკვე ჰდინარის მარჯვენა სანაპიროზე იყო გადასული, ხოლო მისივე ბრძანებით ხიდიც ინგრეოდა, რათა მასზე კართაგენელები არ გადასულიყვნენ: მაგრამ კართაგენელი მღევრები ხელცარიელი მა-

¹ ისტორიკოს ცელიუსის აზრით, დაჭრილი სციპიონი გადაარჩინა მონა ლიურმა (ახ. ტიტელიუსი, XXI, 46).

ინც არ დაბრუნებულან. მათ ხელთ იგდეს მოწინააღმდეგის 6 000 მეომარი, რომლებიც ხიდის დანგრევას მეთვალყურეობდნენ.

ავადმყოფმა კონსულმა გადარჩენილი არმია ფრთხილად დასძრა პადუსის სამხრეთ შენაკადის ტრებიას მარჯვენა სანაპიროსაკენ, სადაც მას სრული უშიშროების უზრუნველსაყოფად საუკეთესო პოზიციები და ერთგული მოკავშირეები ეგულებოდა. მან გადალახა ტრებია და დაბანაკდა. ერთ-ერთ მალლობზე, რომელსაც ღრმა თხრილები და მიწაყარილები შემოავლო. აქ განაგრძო მან ლოდინი მეორე კონსულის სემპრონიუსისადმი და გულმოდგინედ შეუდგა ახალი ლაშქრობით გართულებული ჰრილობების მოშუშებას. იგი ძალზე მოწყურებული იყო როგორმე პირადად მიეღო მონაწილეობა ჰანიბალთან მომავალ ბრძოლაში.

ჰანიბალმა მოწინააღმდეგის მოპირდაპირედ, ტრებიას მარცხენა სანაპიროზე დასცა ბანაკი.

სიცილიაში კონსული ტ. სემპრონიუს ლონგუსი უკვე მზად იყო აფრიკაში სალაშქროდ, რომ ამ დროს მიიღო სენატის ბრძანება: დაუყოვნებლივ წამოსულიყო მთელი თავისი არმიით და შეერთებოდა ჩრდილოეთ იტალიაში ჰანიბალის პირისპირ მდგარ სციპიონს. სემპრონიუსმა სიცილიისა და სამხრეთ იტალიის სანაპიროების დაცვა დაავალა თავის ლეგატს, თვითონ კი თავისი ლეგიონებით ჩრდილოეთ იტალიაში შეუერთდა სციპიონის არმიას. აქ კონსულებმა გამართეს მსჯელობა ბრძოლის გეგმათა შესახებ. სემპრონიუსი მოითხოვდა ბრძოლის დაუყოვნებლივ გამართვას, ხოლო სციპიონი, რომელსაც მტრისაგან კარგი გაკვეთილი ჰქონდა მიღებული, ჯერჯერობით სასტიკი წინააღმდეგი იყო გენერალური ბრძოლის გამართვისა.

სემპრონიუსმა არ იცოდა, რომ ჰანიბალისათვის უკვე ყველაფერი ნათელი იყო. კართაგენელი სარდალი მშვენივრად იცნობდა მოწინააღმდეგის შტაბში არსებულ აზრთა სხვადასხვაობას, იცნობდა სციპიონს. მშვენივრად აუღო ალღო ახლად მოსული კონსულის დაუკვირვებლობას, სიჩქარეს, პატივმოყვარეობისაგან შორსმკვრეტელობის დახშელობას. სციპიონი მართალი იყო: ჰანიბალს გენერალური ბრძოლის გამართვა ეჩქარებოდა.

ახლა ფინიკიელმა კარგად იცოდა: ერთი მოხერხებულად ნასროლი ანკესი და... სემპრონიუსიც უმაღვე წამოეგებოდა მას... ბრძოლაც დაჩქარდებოდა.

ჰანიბალმა თავის თანაშემწეთა თანხლებით წინასწარ დაათვალიერა და შეისწავლა მოწინააღმდეგე ბანაკთა შორის არსებული ლანდშაფტი. ყურადღება ჰიაქცია ერთგან, მდინარის მარცხენა ნაპირზე ამალმებულ ჭაობიან, ლერწმის ტყით დაფარულ რაიონს და მიმარ-


თა თავის უმცროს ძმას, ბავშვობიდანვე ბრძოლებში ნაწრობ და მამაცობით განთქმულ მაგონს: აი, ეს ადგილი უნდა დაიჭირო შენ; საამისოდ აარჩიე ცხენოსნებსა და ქვეითებს შორის 100 — 100 კაცი და მათთან ერთად დაღამებისას ჩემთან გამოცხადდი. ახლა კი ძალების მოკრებას შევეუდგეთო. დანიშნულ დროზე მაგონი 100 მხედრითა და 100 ქვეითი მეომრით გამოცხადდა სარდლის კარავში. ჰანიბალმა შეაქო მოსულები და უბრძანა: თითოეულმა თქვენგანმა 9—9 კაცი აირჩიოს ცხენოსანთა და ქვეითთა რაზმებშიო; შეძლე მაგონი თქვენ გიწვენებთ საფარს; თქვენი მტრები იმდენად ბრძმები არიან, რომ ასეთ რამეს ვერ მოიფიქრებენო. სარდლის ბრძანება შესრულებულ იქნა. ამგვარად, მაგონი, ჰანიბალისაგან სათანადო ინსტრუქციის მიღების შემდეგ, 1 000 ცხენოსნითა და 1 000 ქვეითი მეომრით ნავახშმევს გაეშურა მისთვის მიჩნეულ საფარში.

გარიყრაყზე ჰანიბალმა სასწრაფოდ შეკრიბა ნუმიდიელი ცხენოსნები. მიმართა მათ მოკლე სიტყვით, ჩვეულებრივ აღუთქვა დიდი ჭილდოები და უბრძანა: დაუყოვნებლივ გადაელახათ მდინარე ტრებიო, თავს დასხმოდნენ რომაელთა ბანაკს და გამოეწვიათ ისინი საბრძოლველად მანამ, სანამ რომაელები ისაუზნებდნენ და საბრძოლო წესრიგში ჩადგებოდნენ.

როგორც კი ნუმიდიელებმა ვაქუსლეს, ჰანიბალმა განკარგულება გასცა, რომ მთელი ბანაკი ფეხზე დაშლგარბყო. ცეცხლი გაეჩაღებინათ, რათა მებრძოლები კარგად გამთბარიყვნენ (დეკემბრის სუსხიანი დღე იდგა; თოვლჭყაპი მოდიოდა). საუზმე მიეღოთ. ტანი ზგიით დაეზილათ, საბრძოლო საჭურველი გაემზადებინათ. ცხენებისათვის საკვები მიეცათ და შეეკაზმათ.

რომაელებს ჯერ კიდევ ეძინათ. როცა ნუმიდიელებმა მდინარე გადალახეს და მათ ბანაკს ისრებისა და შუბების წვიმა დაუშინეს. ატყდა განგაში. სემპრონიუსმა თავდამსხმელთა წინააღმდეგ მთელი კავალერია გამოიყვანა. მას მიჰყვა 6 000 შუბმტყორცნელისაგან შემდგარი ქვეითი ჯარი, ხოლო სულ მალე კონსულმა მთელი არმია წამოჰყარა და გაძოიყვანა ბანაკს გარეთ. ნუმდიელებმა ზურგი აქციეს მტერს და უკანვე გადალახეს მდინარე. რომაელები თან მიჰყვნენ გაქციულ მოწინააღმდეგეს; შეცვივდნენ წყალში. მდინარე ხშირი წვიმებისაგან და თოვლჭყაპისაგან აღიდებული იყო; ყინულივით ცივი წყალი მეომრებს მკერდამდე სცემდა. ასე რომ, როდესაც რომაელები მდინარის მეორე მხარეს გავიდნენ, მშვირგები და სიცვიისაგან აძიგძიგებულნი ხელში იარაღს ძლივს იჭერდნენ; კართაგენელები კი დანაყრებულნი, გამთბარნი, ძალამოკრებილნი, იარაღასხმულნი და ცხენებშეკაზმულნი სრულ საბრძოლო მზადყოფნაში ელოდებოდნენ მტრებს.

პანიბალმა სასწრაფოდ დარაზმა თავისი არმია. წინ გამოიყენა 8 000 ალყარელი შუბოსანი, ხოლო მათ უკან აფრიკელთაგან, ესპანელთაგან



ბრძოლა მდ. ტრეზიასთან.

და კელტთაგან შემდგარი ქვეითი ჯარები, სულ 20 000 კაცი. ფლანგებზე დააყენა 10 000 მხედრისაგან შემდგარი კავალერია, ხოლო სულ ბოლოს, კავალერიის წინ, სპილოები.

სემპრონიუსმა უკან გაიწვია შორს წასული გაბნეული კავალერია და თვითონაც საბრძოლო წესრიგში ჩააყენა არმია. ცენტრში იდგნენ ქვეითი ლეგიონები, სულ 36 000 მეომარი (16 000 რომაელი და 20 000 იტალიელი), ხოლო ფლანგებზე — 4 000 მხედარი.

ამგვარად, ზოწინააღმდეგეებს თითქმის ერთნაირი ძალები ჰყავდათ:

თითოეულ მათგანს 40 000 მეომარი. კართაგენელთა უპირატესობა მის ძლიერ კავალერიაში მდგომარეობდა, რომაელებისა კი — ქვეით არმიაში. საქმე ის იყო, თუ როგორ გამოიყენებდნენ მოწინააღმდეგენი თავიანთ უპირატესობას.

კონსულმა ნელი ნაბიჯით დასძრა თავისი არმია მოწინააღმდეგისაკენ, ჰანიბალმა კი ჩვეულებრივი სისწრაფით. როგორც კი მოწინავე რიგებმა, შუბისმტყორცნელებმა ერთიმეორეს შეუტიეს, ბალეარელებმა აშკარად დასჯაბნეს მოწინააღმდეგე, რადგან რომაელი შუბოსნები უკვე დაქანცული იყვნენ ნუმიდიელებთან ბრძოლით, შიმშილით, სიცივით (ასევე იყო სემპრონიუსის მთელი არმია) და სათხედების მარაგიც დაზარალებული ჰქონდათ. ბრძოლა განსაკუთრებით გახურდა, როცა მოწინააღმდეგეთა ძირითადი ძალები, მძიმედ შეიარაღებული ქვეითი არმიები შეებნენ ერთურთს. მაშინ ჰანიბალმა ფლანგებიდან მძლავრად დასძრა კავალერია. რომაელთა მხედრობა დამარცხდა და მათი უკან დახევისას ქვეითი არმიის ფლანგები გაშიშვლებული დარჩა. კვლავ დაწინაურდნენ ბალეარელი შუბოსნები და ნუმიდიურ კავალერიასთან ერთად მძლავრად დაჰკრეს მოწინააღმდეგის განსნილ ფლანგებს. კარგახანს მანაც ძნელი გასარჩევი იყო, საით უნდა გადახრილიყო გამარჯვების სასწორი. სწორედ ამ დროს საფრიდან წამოიშალა 2 000 მეომარი მაგონის მეთაურობით და საშინელი ყოყინით თავს დაესხა რომაელთა ზურგს. ამგვარად, სემპრონიუსის არმია რკალში მოექცა. კონსულს ერთხანს კელტთა სარეზერვო ძალების იმედი ჰქონდა, მაგრამ როცა ჰანიბალმა მათ წინააღმდეგ სპილოები გაგზავნა და ისინი გაჰფანტა, რომაელებმა საბოლოოდ დაჰკარგეს გამარჯვების იმედი. როგორც იქნა, კონსულმა 10 000 კაცის თანხლებით მოახერხა ალყის გარღვევა და გაქცევა. ბანაკში დაბრუნება მათ აღარ შეეძლოთ. მოვარდნილი წვიმისაგან და ჭარიშხლისაგან მდინარე მეტისმეტად იყო ადიდებული. მისი გადალახვის ძალ-ღონე აღარ შესწევდათ. რომის არმიის დანარჩენი ნაწილები ბრძოლის ველზე დაეცა. ტყვედ ჩაუარდა, უკან დახევისას მდინარეში ჩაიხრჩო, სპილოებისაგან გაისრისა ან გაიფანტა. პლაცენციაში სემპრონიუსს შეუერთდნენ განადგურებულ ლეგიონთა მცირე ნაშთები და ბანაკში დარჩენილი სციპიონი თავისი მცირე რაზმებით.

კართაგენელთა მსხვერპლი შედარებით მცირე იყო. უმეტეს წილად ბრძოლაში დაიხოცნენ კელტები. მაგრამ საშინელი ყინვებისაგან სამხრეთელთა არმია მანაც ზიანდებოდა. იხოცებოდნენ ცხენები და გამწევი საქონელი; დაიხოცა ყველა სპილო, გარდა ერთისა.

მიუხედავად ამისა, ტრებიასთან დიდი ბრძოლის მოგებამ დიდი სარგებლობა მოუტანა ჰანიბალის ბანაკს. ამ ბრძოლას დიდი მატერიალური და მორალური მნიშვნელობა ჰქონდა. ჩრდილოეთ იტალია ჰანიბალის

სამხედრო გეგმების შეზღოვი წინსვლის ძლიერ პლაცდარმად იქცა. ყველგან ჰანიბალის ლეგენდარული პიროვნების შესახებ ლაპარაკობდნენ¹. წყაროები ვადმოგვცემენ, რომ ჰანიბალის საბრძოლო დროშის ქვეშ 60 000 ქვეითი და 4 000 ცხენოსანი კელტი მეომარი გამოცხადდა რომის წინააღმდეგ საბრძოლველად. ამგვარად, რომის წინააღმდეგ მუდმივად საოპრად განწყობილი კელტური ტომების უდიდესი ნაწილი კართაგენელებს შეუერთდა. ცისალპიური ვალიიდან რომელებს მხოლოდ ცენომანები და ვენეტები უჭერდნენ მხარს.

მოვიგონოთ, რომ ფინიკიელი სარდლის საომარი გეგმა აპენინის ნახევარკუნძულზე შეჭრისას მიზნად ისახავდა განხეთქილება შეეტანა რომისა და იტალიელი ტომების ფედერაციაში და, ამგვარად, ძირი გაქოთხარა მოწინააღმდეგის ძლიერებისათვის; დაეშალა ის მძლავრი პატერიალური და პოლიტიკური ბაზისი, რომელიც იტალიის ერთიანობის სახით რომის სიმძლავრის დაუშრეტელ წყაროს წარმოადგენდა. ამ მხრივ დამახასიათებელია ჰანიბალის მოპყრობა სამხედრო ტყვეებისადმი, რომელთა რიცხვი, განსაკუთრებით ტრებიასთან ბრძოლის შემდეგ, დიდი იყო კართაგენელთა ბანაკში. სარდალმა ტყვედჩავარდნილთაგან ცალკე გამოპყო ჰევიდრი რომელი მოქალაქენი და მონობის საშინელ პირობებში ჩააყენა ისინი. ხოლო დანარჩენი ტყვეები, რომლებიც წარმოშობით იტალიური ოლქებიდან იყვნენ, გაათავისუფლა და თავიანთ სამშობლოში გაუშვა. მათ უნდა გაეგრცელებიათ ჰანიბალის მიზანი და განზრახვა: ის მოსულია მხოლოდ რომელებთან საომრად და შიზნად აქვს დასახული მათი ძალმომრეობისაგან და კირთებისაგან გაათავისუფლოს მთელი იტალია! ამრიგად, კართაგენელი სარდალი ყველა იტალიელს მოუწოდებს იარაღი არსხან და შეუკავშირდნენ მას მთელი ქვეყნიერებისათვის, საძულველ „მგლის ნაშიერთა“ წინააღმდეგ საბრძოლველად!

რომის ხელისუფლებისათვის ახლა, ე. ი. ძალიან გვიან, ყველაფერი ნათელი შეიქნა. სემპრონიუსის ცნობა, რომელიც იტყობინებოდა, რომ ბრძოლა არ წავგივია, არამედ მხოლოდ შევწყვიტეთ ცუდი ამინდის გამო, მალე ყალბი გამოდგა: არმიები აღარ არსებობდნენ; ვალია მტერს ემორჩილებოდა; ჰანიბალის საშინელი გეგმა იტალიის „კავშირის“ დანგრევის შესახებ ცნობილი იყო. პანიკით მოცული ხალხი დღე-დღეზე ელოდა რომის კედლებთან თვით ჰანიბალის გამოჩენას.

¹ ჰანიბალისადმი ასეთ ინტერესს კიდევ უფრო აძლიერებდა მისი საიდუმლოებით მოცული „მეტამორფოზები“. მას სხვადასხვა სახის პარიკები, გრიმები და ტანსაცმელი ჰქონდა. ხან როგორც ღრმა მოხუცი გამოცხადებოდა ხალხს, ხან ვაბუკი; ხან სარდალი იყო, ხან უბრალო მეომარი, ხან მსტოვარი, ხან კიდევ მათხოვარი.

კარგი ამბები არ მოდიოდა არც ესპანეთიდან, სადაც პასდრუბალის წინააღმდეგ საბრძოლველად გაგზავნილი იყო გნეუს კორნელიუს სციპიონი, კონსულის ძმა. მართალია, მან ხელში ჩაიგდო რამდენიმე ოლქი იბერსა და პირენეის მთებს შორის, მაგრამ მაინც ვერ ბედავდა გადაეღობა მდ. იბერი, რომლის დასავლეთით ჰანიბალის ღირსეული ძმა მტკიცედ ინარჩუნებდა თითქმის მთელ ნახევარკუნძულს და ახალ რეზერვებს ამზადებდა იტალიაში გასაგზავნად.

ამრიგად, 218 წლის დასასრულს რომში მორალური და ცემულობისა და სრული გულგატეხილობის ატმოსფერომ დაისადგურა. რელიგიის მსახურნი, „წინასწარმეტყველნი“, ქადაგად დავარდნილნი, მკითხავეები და ათასნაირი მეზღაპრენი თავზარდამცემ ამბებს ავრცელებდნენ ღვთის მოშიშ ხალხში და ამით კიდევ უფრო აფორიაქებდნენ ისედაც უიმედობისა და შემადრწუნებელი კომპარის მორევში ჩაძირულ ადამიანებს.

სემპრონიუსი და სციპიონი ძლივს ინარჩუნებდნენ პლაცენციას და კრემონას, სადაც ისინი მცირედი რაზმებით გამოსაზამთრებლად იყვნენ დაბანაკებული. პლაცენციის მახლობლად კართაგენელები ხშირად გამოიჭრებოდნენ და მოსვენებას არ აძლევდნენ მოწინააღმდეგეს. ჰანიბალი სუსხიან ზამთართან ბრძოლის პირობებში სამხრეთისაკენ სალაშქროდ ემზადებოდა.

ტრაზიმენის ტბა

რომმა მალე დააღწია თავი პირველი ძლიერი დარტყმისაგან მიღებულ დაზნეულობას. ის დიდი ენერჯით შეუდგა საომარ სამზადისს მომავალი წლისათვის. ახალ წელს საბოლოოდ უნდა აღეკვეთა კართაგენული საშიშროება იტალიაში და საერთოდ ევროპაში.

დაიწყო ჯარების შეკრება. ჰანიბალის გამარჯვებასთან დაკავშირებით რომის ხელისუფლება ითვალისწინებდა კართაგენისაგან მოსალოდნელ თავდასხმებს სარდინიაში, სიცილიასა და ტარენტუმში. ამიტომ ყველა ამ პუნქტში დაგზავნეს სამხედრო ძალები. მზად იყო 60 გემისაგან შემდგარი საზღვაო ფლოტი. რომაელებმა დახმარება სთხოვეს სირაკუზის მეფე ჰიერონს, რომელმაც 500 კრეტელი და 1 000 ბერძენი მემომარი გაუგზავნა მათ. მზადდებოდა ყოველგვარი სახის საჭურველი და სურსათ-სანოვავე.

217 წლისათვის კონსულებად აირჩიეს გნეუს სერვილიუსი და გაიუს ფლამინიუსი, ჩვენთვის უკვე ცნობილი სახალხო ტრიბუნი (232 წ.) და ყოფილი კონსული (223 წ.). როგორც ზემოთ ითქვა, ფლამინიუსი მისი დემოკრატიულ-რეფორმატორული მოღვაწეობისათვის ძალიან სძულდა სენატს და საერთოდ რომაულ არისტო-

კრატის, ხოლო ხალხთა მასებს მეტად უყვარდათ ის, როგორც თავისი პირმშო და მისი ინტერესებისათვის თავდადებული მებრძოლი. ამ წელსაც სწორედ დემოკრატიულ მასათა მოძივნით იქნა ის არჩეული კონსულად. ფლამინიუსი შიშობდა, რომ ხრიკები არ მოეწყოთ მის გავლენიან მოწინააღმდეგეებს. ამიტომ თვით რომში კონსულობის მიღების ცერემონიებს მოერიდა და გაეშურა არმინიუმში, სადაც მას სემპრონიუსის ჯარის ნაწილები ელოდებოდა. აქ მან მიიღო კონსულობისათვის საჭირო ყველა ატრიბუტი. მალე აქვე ჩამოვიდა გენუს სერვილიუსიც და სციპიონის ჯარები ჩაიბარა.

არმიონუმში რომაული არმიების შესაჯრები პუნქტი შეიქნა. აქ თავი მოიყარა 13 ლეგიონმა.

ახალი საომარი გეგმის მიხედვით სერვილიუსი უნდა დარჩენილიყო არმინიუმში და ჩაეკეტა ეს მეტად მნიშვნელოვანი გასასვლელი ჩრდილოეთიდან ცენტრალური იტალიისაკენ. ხოლო ფლამინიუსი თავისი არმიით დაიძრა აპენინის მთების ცენტრალური უღელტეხილის დასაცავად, არეციუმისაკენ.

ამგვარად, რომაელებს ეჭვი არ ეპარებოდათ, რომ ჰანიბალი სამხრეთისაკენ გასაჭრელად მხოლოდ ამ ორი მოსახერხებელი გზიდან (არეციუმში და არმინიუმში) უსათუოდ ერთ-ერთს აირჩევდა. მაგრამ რომაელები კიდევ მოტყუვდნენ.

ჰანიბალმა იცოდა, სადაც იდგნენ მოწინააღმდეგის არმიები და რას ემყარებოდა მტრის ახალი საომარი გეგმა. ამიტომ მან შუა იტალიაში შესაჭრელად აირჩია ის გზა, რომელზეც რომაელები სრულებით არაფერს ფიქრობდნენ. ეს გზა მიემართებოდა ბონონიიდან, გადაივიდა აპენინს, პისტორიას, ფლორენციას და მდ. არნოს ველის გადაჭრის შემდეგ შედიოდა ცენტრალურ ეტრურიაში. ჰანიბალმა წინასწარ შეიტყო, რომ ეს გზა მეტად ძნელი სავალი იყო. მაგრამ მას სურდა მოულოდნელად შეჭრილიყო შუა იტალიაში და სანამ რომაული არმიები გაერთიანდებოდნენ, ბრძოლაში ჩაეთრია ერთ-ერთი კონსული, სახელდობრ არეციუმთან დაბანაკებული ფლამინიუსი, რომელიც, მართალია, მამაცი ჯარისკაცი იყო, მაგრამ ამავე დროს ფიცხი, აჩქარებული და წინდაუხედავი სარდალა. ასეთი მხედართმთავარი ადვილად უნდა წამოჰგებოდა ცბიერი ფინიკიელის მიერ ნასროლ ანკესზე. შემდეგ კი ჰანიბალის უახლოეს ამოცანად სერვილიუსის განადგურების საკითხი იდგა.

გაზაფხულის დამდეგისთანავე ჰანიბალმა 50 000 მეომრისაგან შემდგარი არმიითა და ფურაყით გადალახა აპენინის მთების დასავლეთი მთაგრეხილი და ეტრურიაში შევიდა. არმიის საავანგარდო ნაწილები აფრიკელებისა და ესპანელებისაგან შედგებოდა; მათ მოჰყვებოდნენ კელტები, ხოლო სულ ბოლოს ცხენოსანი კავალერია მაგონის მეთაურობით.

არიერგარდში მდგარ მაგონს ევალეზოდა თვალყური ედევნებინა შუაში მოქცეული კელტებისათვის, რომლებიც, როგორც ჩანს, უკმაყოფილო ყოფილან ჰანიბალის მიერ არჩეული ძნელადსავალი გზით და შესაძლო იყო მათთვის ჩვეული მერყეობის საფუძველზე ლაშქრობიდან გაქცევაც მოეფიქრებინათ.

ქ. პისტორიის გავლის შემდეგ კართაგენელებმა ფეხი შესდგეს მდინარე არნოს ველზე. გაზაფხულის წვიმებისაგან და გამდნარი თოვლისაგან აღიდებული მდინარის ფართო ველი მთლიანად ჭაობებით იყო დაფარული. ოთხი დღისა და სამი ღამის განმავლობაში კართაგენელები მკერდამდე მიაპობდნენ საშინელ ლაქაშს. ჰანიბალი ჩქარობდა. ქანც-გაწყვეტილი მეომრები შეუჩერებლივ მიიწევდნენ წინ. ისინი ლუკმის გადასაყლაპავად და ჩასათვლემად რამდენიმე წუთს თუ ჩაიმუხლებდნენ დახოცილ პირუტყვთა გვამებზე და ალაღზე. უძილობისა და დაქანცულობისაგან გატეხილი ადამიანები ეცემოდნენ და ჭაობებში იძირებოდნენ. განსაკუთრებით ბევრი დაიღუპა კელტი მეომრები. თვით ჰანიბალი, რომელიც ერთადერთად გადარჩენილ სპილოზე ამხედრებული წინ მიუძღოდა გაწამებულ არმიას, ძლივს გადარჩა დაღუპვას. საშინელ ციებ-ცხელებიან კლიმატში მას თვალების ანთება დაემართა. მას არ სურდა ერთი წუთიც კი დაეკარგა მკურნალობისათვის და ამგვარად ცალი თვალი მთლიანად დაუბრმავდა.

კართაგენელებმა არნოს ჭაობებს თავი დააღწიეს და ხმელეთზე ამოსვლისთანავე დაბანაკდნენ. სანამ არმია ისვენებდა, ჰანიბალმა მზვერავთა საშუალებით კარგად გამოიკვია ფლამინიუსის ბანაკის პოზიციები, თვით კონსულისა და მისადმი რომის ხელისუფლების დამოკიდებულების ამბები, ცენტრალური ეტრურიის ბუნებრივი პირობები, სიმდიდრე და სალაშქრო გზები. როგორც ვთქვით, ჰანიბალს სურდა, რაც შეიძლება მალე ჩაეთრია ბრძოლაში ფლამინიუსი, სანამ მას მეორე კონსული შეუერთდებოდა.

კართაგენელთა არმია დაიძრა სამხრეთისაკენ. მათ მხარმარცხნივ ჩამოიტოვეს არეციუმი, სადაც ფლამინიუსი იყო დაბანაკებული. კართაგენელები ძარცვავდნენ და აოხრებდნენ ეტრურიის მდიდარ და მშვენიერ ველ-მინდვრებს, იტაცებდნენ დოვლათს, მიერეკებოდნენ საქონელს. რომაელთა შესახედავად და კონსულის მოთმინებიდან გამოსავანად ცეცხლს უკიდებდნენ და ნაცარ-ტუტად აქცევდნენ სოფლებს. ასე, ჰანიბალი ცეცხლითა და მახვილით მიიწევდა სამხრეთისაკენ.

კართაგენელის ვარაუდი გამართლდა: ფლამინიუსმა გადასწყვიტა დაუყოვნებლივ შებმოდა მტერს.

ფლამინიუსის განზრახვა მის ბანაკში მყოფი ფრთხილი სამხედრო მეთაურების წინააღმდეგობას წააწყდა. ისინი ურჩევდნენ, რომ დაეცა-

დათ სერვილიუსისათვის და გაერთიანებული არმიებით დაერთყათ მტრისათვის, ხოლო მანამდე მის წინააღმდეგ მფრინავი თავდასხმებზე ეწარმოებინათ. მაგრამ კონსული სარგებლობდა ჯარისკაცების მხარდაჭერით და საშინლად გააგულისებულ უარყოფდა სამხედრო საბჭოს წევრთა თათბირს.

ბოლოს ბრძანება გასცა მომზადებულიყვნენ სალაშქროდ. იგი 30 000 ლეგიონერთა და 3 000 ცხენოსნით დაედევნა მტერს.

ეტრურის ადგილობრივი მოსახლეობა დიდი ამბით შეხვდა ფლამინიუსის გამოსვლას. ეჭვი არავის ეპარებოდა, რომ უცხოელები იტალიაში სულ მალე ჰპოვებდნენ აღსასრულს. ხალხი ბორკილებითა და თოკებით მისდევდა არმიას კართაგენელთა გასაბაწრავად და მონებლად წასაყვანად.


ჰანიბალმა სასწრაფოდ განსაზღვრა ბრძოლის ადგილი და დრო: ტ რ ა ზ ი მ ე ნ ი ს ტბა; 217 წლის 5 აპრილი.

არეციუმიდან მომავალი გზა გადიოდა ტრაზიმენის ტბის ჩრდილოეთ სანაპიროზე, რომელიც ვიწრო დაბლობს წარმოადგენს. ამ დაბლობის ზოლს ჩრდილოეთიდან მაღალი მთები აკრავს, დასავლეთიდან შესასვლელი ვიწრო ხეობას წარმოადგენს, ხოლო აღმოსავლეთისაკენ გასასვლელი — ციცაბო ფლატეს. ამგვარად, ბუნებას ის თითქოს განგებ ჩასაფრებისა და თავდასხმის ადგილად გაუჩენია.

ჰანიბალმა ღამით ტბის სანაპირო ველზე შესასვლელ ხეობასთან კავალერია ჩაასაფრა; გასასვლელთან, აღმოსავლეთით — მსუბუქად შეიარაღებული მეომრები, ხოლო ჩრდილოეთით, მთებში ჩასაფრდნენ კართაგენელთა ძირითადი ქვეითი ნაწილები.

გარიჟრაჟისას, ტბიდან ამდგარი ნისლით შებურვილ დაბლობზე რომაელებმა სრულიად არხეინად, ყოველგვარი დაზვერვის გარეშე დაიწყეს შესვლა. როცა რომაულმა არმიამ ვიწრო ველი მთლიანად გაავსო და მისი მოწინავე რაზმები უკვე აღმოსავლეთის კარს მიუახლოვდნენ, გაფანტულ ნისლში მხოლოდ მამინ შენიშნეს ამ ადგილზე ჩასაფრებული მტერი. მაგრამ უკვე გვიან იყო. ჰანიბალმა შეტევის ნიშანი მისცა. კართაგენელები გრილით წამოიშალნენ და სამივე მხრიდან თავს დაესხნენ მოწინააღმდეგეთ. მოულოდნელობით დაბნეული და პანიკით მოცული რომაელები ანგარიშიუცემლად აირივნენ ერთმანეთში. გაჩაღდა არნახული ხოცვა-ჟლეტა. ფლამინიუსი მიხვდა, რომ მთელი არმია საშინელ სასაკლაოზე მოიყვანა. მაგრამ ის არაჩვეულებრივ სულიერ მხნეობას და სიმამაცეს ინარჩუნებდა, ყოველნაირად ცდილობდა დაბნეულობიდან გამოეყვანა, წესრიგში ჩაეყენებინა გონდაკარგული ჯარები. კონსული რაზმიდან რაზმში დაჰქროდა და ამხნევებდა ყველას:

მტკიცედ და მამაცურად იბრძოლოს ყოველმა მეომარმა, რადგან აქედან ცოცხალი გასვლა შეიძლება არა ვედრებით და ღმერთებისადმი ლოცვა-კურთხევით, არამედ სიმამაცისა და მთელი ძალღონის დაძაბვით. მაგრამ საშინელ ხმაურში, იარაღის ელარუნში, საბრძოლო ყიყინაში, მომაკვდავთა ღრიალსა და ცხენების თქარათქურში აღარავის არაფერი ესმოდა¹. ყველაზე სახიფათო შეტაკებებში ჩაბმული ფლამი-



ბრძოლა ტრაზიმენის ტბასთან.

ნიუსი იცნო კელტ-ინსუბრმა, სახელად დუკარიუსმა და შესძახა: „აი, ის კაცი, რომელმაც გაანადგურა ჩვენი ჯარები და ააოხრა ჩვენი ქალაქი და ველ-მინდვრები². მე ასლავე შევსწირავ მას მის მიერ შეუბრალებლად დახოცილ ჩემს თანამემამულეთა აჩრდილებს!“. ამ სიტყვებით ის გაექანა ფლამინიუსისაკენ, ძირს ჩამოაგდო მისი საჭურველმტვირთავი, რომელმაც სცადა გადასდგომოდა წინ, და შუბის დარტყმით განგმირა კონსული. მამაცი სარდლის დაღუპვამ კიდევ მეტი არევ-დარევა გამოიწვია რომაელთა შორის. სამსაათიანი შემზარავი სისხლისღვრა სასაკლაოზე მოყვანილი საქონლის ხოცვას უფრო დაემსგავსა, ვიდრე თანასწორთა ბრძოლას. ზოგიერთი სიკვდილს გადაარჩე-

¹ ზოგიერთ წყაროში იმასაც ვკითხულობთ, რომ ბრძოლის დროს მომხდარა ძლიერი მიწისძვრა, რომელსაც მრავალი დასახლებული პუნქტი და მთები დაუნგრავია, მაგრამ ბრძოლაში მეტისმეტად თავდავიწყებაში წასულ მეომრებს ეს არც კი შეუნიშნავთ.

² იგულისხმება ფლამინიუსის კონსულობა 223 წ. და მის მიერ ინსუბრთა ქვეყნის აოხრება.

ნილი და ბრძოლის საშინელებით შეძრწუნებული რომაელი მეომრები, როცა სხვა გასაქცევი გზა არ იყო, გარბოდნენ შავ ტბაში, იქ იარაღითა და ტანსაცმლით დამძიმებულნი იხრჩობოდნენ ან ხელებაპყრობილნი და სიცოცხლის შენარჩუნების მძალადებელნი უწყალოდ იღუპებოდნენ მათზე დადევნებული კართაგენელი მხედრებისაგან, ან კიდევ ერთიმეორეს ხოცავდნენ, რომ გახელებული მტრისაგან წამებას გადარჩენილიყვნენ.

მთელი რომაული არმიიდან ტრაზიმენის სასაკლავოს თავი დააღწია მხოლოდ 6 000 მეომარმა, რომლებმაც საუკეთესო ორგანიზებულობით გაარღვიეს აღმოსავლეთის გასასვლელი და თავი შეაფარეს მახლობელ სიმაგრეს. ჰანიბალს არც მათი წასვლა გამოჰპარვია მხედველობიდან. დაუყოვნებლივ დაადევნა მათ ცხენოსანთა და ქვეითთა რაზმები მაჰარბალის მეთაურობით. მაჰარბალმა ალყა შემოარტყა სიმაგრეს და მალე შიშვლით შეწუხებული რომაელები სიცოცხლის შენარჩუნების პირობის მიღების შემდეგ დანებდნენ მტერს.

ამგვარად, ტრაზიმენის ტბასთან დიდი რომაული არმია მთლიანად მოისპო. 15 000 რომაელი ესვენა საბედისწერო ბრძოლის ადგილზე; ამდენივე ტყვედ იყო ჩავარდნილი. ჰანიბალმა მხოლოდ 1 500 კაცი დაჰკარგა და ისინიც უმეტეს წილად კელტები.

გამარჯვებულმა სარდალმა შეკრიბა ყველა სამხედრო ტყვე და მათ წინაშე წარმოსთქვა სიტყვა რომის ძალმომრეობისა და გაუმაძღრობის წინააღმდეგ. ამის შემდეგ, ჩვეულებრივად, ყველა რომაელ ტყვეს ბორკილი დაადო და სასტიკი ზედამხედველობის ქვეშ დააყენა, ხოლო ლათინები და სხვა იტალიელი მეომრები გაათავისუფლა. ამით კართაგენელმა კვლავ აუწყა, რომ ის მოსულია რომის ძალაუფლების დასამზობად და მისგან. იტალიის ხალხთა გასათავისუფლებლად. შემდეგ ბრძანება გასცა მიწისათვის მიეზარებინათ ყველა წარჩინებული მეომარი. მისივე ბრძანებით დახოცილთა შორის დიდხანს ეძებეს ფლამინიუსი, რომლის პატივით დაკრძალვას ფიქრობდა ჰანიბალი, მაგრამ კონსულის გვამი ვერ იპოვნეს.

ჰანიბალმა სამხედრო საბჭო მოიწვია და ახალი საბრძოლო გეგმის შემუშავებას შეუდგა.

ლიჯაბორი — „კუნაბაბორი“

საშინელი მარცხის ამბავი სწრაფად მიეჭრა რომის კარიბჭეს. ჯერ კარგად არავინ იცოდა საქმის ნამდვილი შინაარსი. მხოლოდ ხმები დიდი უბედურების შესახებ ელვისებური სისწრაფით ვრცელდებოდა მოსახლეობაში. ხალხი, კაცი, ქალი თუ ბავშვი, პანიკით მოცული ერთმანეთს ეხეთქებოდნენ ქალაქის ქუჩებში; ერთუროს ეკითხებოდნენ

კორი იყო თუ სწორი მათ მიერ მოსმენილი თავზარდამცემი ამბავი. და-
იხსებრა ურყევი რწმენა მტრის უეჭველი განადგურებისა. სენატი,
რომელსაც უკვე სარწმუნო ცნობები ჰქონდა ტრაზიმენის ტრაგედიის
შესახებ; თავის სხდომაზე მთელი დღის განმავლობაში არჩევდა შემ-
დგომ ღონისძიებათა საკითხებს. მზის ჩასვლისას, როცა სენატის სხდო-
მები ჩვეულებრივ უნდა დასრულებულიყო, ხალხი გამაყრუებელი
ჩოჩქალითა და ღრიალით მიაწყდა სენატორთა შეკრების პუნქტს და
მოითხოვეს სინამდვილის გამოქვეყნება. მაშინ ტრიბუნაზე ავიდა პრე-
ტორი მარკუს კომპონიუსი და ხმამაღლა განაცხადა: „ჩვენ
დაემარცხდით დიდ ბრძოლაში!“ ეს მოკლე განცხადება საკმარისი იყო
ხალხი ისე აღელვებულაყო, როგორც მძლავრი ქართველისაგან ფა-
ფარაყრილი ზღვა. საშინელი მოთქმა-გოდება, ღრინაგული, ბავშვების
ტარილი, რომელი მატრონების ისტერიული კივილი მთელი დღე-ღამის
განმავლობაში აყრუებდა ქალაქს. შემთხვევით სიკვდილს გადაჩე-
ნილი და ქალაქში დაბრუნებული საშინელი სახის თითო-ოროლა მე-
ომრები დაწვრილებით აღწერდნენ შემადრწუნებელი ბრძოლის სურა-
თებს. კონსულის დაღუპვას, მთელი არმიის განადგურებას, შემზარავ
ჩეხვას.

სენატი ამაოდ ცდილობდა ხალხის მხნეობის აღდგენას. მაგრამ ერთ-
ხანს სენატმაც დაჰკარგა სიმტკიცე; როცა რომს, ტრაზიმენის ამბები-
დან მესამე დღეს, კიდევ ახალი უბედურების ამბავი ეწვია.

ეს გახლდათ ის, რომ როცა კონსულმა სერვილიუსმა ეტრურიაში
ჰანიბალის შეჭრისა და მის წინააღმდეგ ფლამინიუსის გამოსვლის ამბავი
შეიტყო; სასწრაფოდ გამოიყვანა თავისი არმია არმიინუმიდან და გაე-
შურა კოლეგის მისახმარებლად. მან გაიანგარიშა, რომ მთელი არმიით
ვერ მიუსწრებდა ბრძოლის დაწყებას. ამიტომ გამოჰყო 4 000 მხედარი
პროპრეტორ გაიუს ცენტენიუსის მეთაურობით და უბრძანა მათ სწრა-
ფი მარშით დაძრულიყვნენ ფლამინიუსისათვის მისამველებლად, სანამ
თვითონაც მთელის არმიით მიუსწრებდა ბრძოლის ველს. მაგრამ ტრა-
ზიმენის კატასტროფა უკვე დამთავრებული იყო, როცა ჰანიბალმა
სერვილიუსის ამ ღონისძიების შესახებ შეიტყო. მან ცენტენიუსთან
შესახვედრად სასწრაფოდ გაგზავნა მაჰარბალი ცენოსანი და შუბოსანი
რაზმებით. პირველსავე შეტაკებაში კართაგენელებმა 2 000 რომელი
მხედარი დახოცეს, დანარჩენები კი დაატყვევეს და ხელ-ფეხშეკრული
ჰანიბალს მიჰგვარეს.

სერვილიუსმა ველარ გაბედა გამარჯვებით გალაღებულ მტერთან
შეხვედრა.

ახლა რომში ყველას სჯეროდა, რომ ჰანიბალი დღეს თუ ხვალ ქალა-
ქის კედლებთან გამოჩნდებოდა. ამიტომ უმძიმესმა მოსალოდნელმა

პერსპექტივამ რომელი ხალხი კვლავ ამოიყვანა სულიერი დაცემულობის ჰაობიდან. ქალაქის მოსახლეობა დიდის ენერგიითა და ენთუზიაზმით შეუდგა თავდაცვისათვის სამზადისს. ამავრებდნენ კედლებს, ანგრევდნენ ტიბრზე აგებულ ხიდებს, იარაღდებოდნენ ღრმადმოხუცებულებიც კი. იარაღი გამოჰქონდათ ტაძრებიდან, სადაც ის მანამდე ეწყო, როგორც გამარჯვების ტროფეუმი და სამკაული. ასეთი დიდი საფრთხის წინაშე, როგორც ზემოთ ითქვა, რომაელები ექვსი თვის ვადით ირჩევდნენ დიქტატორს, რომლის ხელშიაც, საშიშროების აღსაკვეთად, თავს იყრიდა სახელმწიფოს მთელი მართვა-გამგეობისა და საბრძოლო შესაძლებლობათა ხელმძღვანელობა. ახლაც საშინელი „ფინიკიური ჭირის“ გასანადგურებლად და სახელმწიფოს გადასარჩენად რომაელებმა აირჩიეს დიქტატორი.

ეს იყო ქვინტუს ფაბიუს მაქსიმე, ჩვენთვის ცნობილი რომაელი ელჩების ბელადი კართაგენში მეორე პუნიკური ომის დასაწყისში. ფაბიუს მაქსიმე, პატრიციანული გვარის შთამომავალი, ხუთჯერ კონსულად ნამყოფი და არაერთგზის ტრიუმფატორი, პატივცემული სენატორი და სახელმწიფო საქმეთა საუკეთესო გამგებელი, ჰკვიანი, აუჩქარებელი, შორსმჭვრეტელი სარდალი და მამაცი მეომარი დიდი ავტორიტეტით სარგებლობდა რომაელთა და მათ ქვეშევრდომთა შორის. აი ეს კაცი, იმ დროს უკვე ხანში. შენული, 60 წელს გადაცილებული, მაგრამ ჯერ კიდევ ახალგაზრდული ჯანღონით სავსე, ჰარმაგი შეიქნა რომის დიქტატორი.

დიქტატორის მოადგილედ, ანუ იგრევე კავალერიის უფროსად დაინიშნა პლბეური ფენის წარმომადგენელი მარკუს მინუციუს რუფუსი. დიქტატორი ექვსი ლეგიონით დაიძრა ჰანიბალი-საკენ.

ტრაზიმენთან მოპოვებული ბრწყინვალე გამარჯვების შემდეგ კართაგენელთა ბანაკშიც არავის ეპარებოდა ეჭვი, რომ ჰანიბალი პირდაპირ რომზე მიიტანდა იერიშებს. მაგრამ სარდალი ძალიან კარგად გრძნობდა, რომ რომზე თავდასხმა ჯერ კიდევ ნაადრევი იყო. ჯერ კიდევ, როცა იტალიის ეკონომიურ-პოლიტიკური ერთიანობა თავის სახეს ინარჩუნებდა და ის სიუზერენ რომის მძლავრ ეკონომიურ-პოლიტიკურ ბაზისს წარმოადგენდა, რომზე თავდასხმა სრული უაზრობა იყო. ამიტომ ჰანიბალი მტკიცედ იდგა თავისი სტრატეგიული გეგმის გენერალურ ხაზზე: გადაეჭრა რომის სასიცოცხლო არტერიები, დაენგრია მისი ძლიერების საძირკველი და ამის საფუძველზე ყველასაგან მიტოვებული და ყოველმხრივ გაკოტრებული საძულველი ქალაქის არსებობისათვის საბოლოოდ დაედო ზღვარი.

ჰანიბალმა მხარმარჯვნივ ჩამოიტოვა რომი და უმბრიასა და

პიციენუმი გადავიდა. მებრძოლები ჭრილობებს იშუშებდნენ, ღრეობდნენ, მხიარულობდნენ, ქეცით დაავადებულ ცხენებს პიციენუმის ძველი ღვინოებით ბანდნენ.

შემდეგ ჰანიბალი აპულიაში შევიდა და ქ. არპისთან დაბანაკდა. ფაბიუს მაქსიმეც აპულიისაკენ დაიძრა. ის მიუახლოვდა კართაგენელთა ბანაკს და თვითონაც დაბანაკდა ქ. არპის მახლობლად მდებარე ერთ-ერთ მალლობზე.

მტრის გამოჩენით მეტად ნასიამოვნებმა ჰანიბალმა სასწრაფოდ გამოიყვანა არმია, საბრძოლოდ გამზადებული მიუახლოვდა რომაელთა ბანაკს და გაიწვია ისინი ბრძოლის ველზე. მაგრამ რომაელები ადგილიდან არ იძროდნენ. ბრძოლას მოწყურებული კართაგენელები ათასგვარი შეურაცხმყოფელი სიტყვებით შეპყვიროდნენ რომაელებს, უწოდებდნენ მათ ლაჩრებს, რომ მათ დაჰკარგეს „მარსის მეომრული სული“, ძალ-ღონე აღარ შესწევთ კართაგენელებთან შებრძოლებისა და სხვა ამდაგვარი. მაგრამ ფაბიუსი ყურადღებას არ აქცევდა თავისი მეომრების გაცეცხლებას, მათ დაეინებით მოთხოვნას ბრძოლაში დაუყოვნებლივ ჩაბმის შესახებ, და მტკიცედ იდგა თავის განზრახვაზე. ჰანიბალი მწარედ ჩაფიქრდა.

საქმე იმაში იყო, რომ ამიერიდან რომაული სამხედრო სტრატეგია და ტაქტიკა იცვლებოდა. ჰანიბალს, ფაბიუს მექსიმეს სახით, ძლიერი მოწინააღმდეგე გამოუჩნდა. დიქტატორის მიერ შედგენილი სტრატეგიული გეგმა ითვალისწინებდა ომის გაჭიანურებას, ხოლო ტაქტიკა — მფრინავი და პარტიზანული ხასიათის ბრძოლებს. რომაელი სარდალი სამართლიანად ზომავდა მტრის უპირატესობას, მისი არმიის სიძლიერესა და განსაკუთრებით კავალერიის შეუდარებელ გაწვრთნილობას. მაგრამ ის იმასაც კარგად ხედავდა, რომ მტრის ეს ძლიერი არმია დღითიდღე სუსტდებოდა და ძალას ჰკარგავდა; შორეულ ქვეყანაში ღრმა ზურგს მოწყვეტილი არმია გაჭიანურებულ ომს ვერ გაუძლებდა, თუ ის ყოველდღიურად ახალ შევსებას არ მიიღებდა ან იმ ქვეყნიდან, საიდანაც ის წამოვიდა, ან კიდევ იქიდან, სადაც მას ამჟამად ფეხი ედგა. ამიტომ ფაბიუს მაქსიმეს გადაწყვეტილი ჰქონდა მცირე მოულოდნელი თავდასხმებით დაესუსტებინა მტერი, არ დაეშვა მასთან ახლოს რეზერვების შეერთება, დაეცვა იტალიელი მოკავშირენი და მტრისათვის საშუალება არ მიეცა ამ უკანასკნელთა გადაბირებისათვის; ამავდროს მორიდებოდა გენერალურ ბრძოლას და შეენარჩუნებინა არმია. ფაბიუს მაქსიმე ჯერ კიდევ კონსულ ფლამინიუსს ურჩევდა ჰანიბალის წინააღმდეგ ასეთი ტაქტიკით ბრძოლის წარმოებას. შენ მოერიდე კართაგენელებთან გადაწყვეტ ბრძოლაში ჩაბმას, დაკმაყოფილდი მასზე მცირე მასშტაბის, მაგრამ ხანგრძლივი, უეცარი თავდასხმებით და

ჰანიბალის გამარჯვებათა ნაყოფი იხე გაჰქრებიან, როგორც გამდნარი სანთელი. მაგრამ ბედკრულმა კონსულმა არ დაიჯერა, ფაბიუსი კი მართალი აღმოჩნდა.

მაგრამ არც რომაელთა და არც კართაგენელთა ბანაკში არ გრძნობდნენ ფაბიუსს მაქსიმუსს საომარი გეგმის უპირატესობას. მას გრძნობდა მხოლოდ ერთი კაცი... ეს იყო ჰანიბალი: მას მშვენიერად ესმოდა ჰეკეიანი რომაელის გეგმათა ღრმა აზრი და შორსმჭკრეტელობა. იგი დაწვდუნებული იყო, რომ ახლა მის წინააღმდეგ იდგა არა ფლამინიუსის და სემპრონიუსის მსგავსი მცმუკავი სარდალი, არამედ დინჯი და წინდახედული მხედართმთავარი. ერთი რამ ყველაზე კარგად ესმოდა ჰანიბალს: იხე როგორც თვითონ სურდა რომის გარიყვა, გაკოტრება და შემდეგ მისი დამორჩილება, ასევე სურდა ფაბიუსს მაქსიმუსს კართაგენელთა არმიის ძლიერების საფუძვლის მოშლა, სისხლისაგან დაწრეტა და შემდეგ მოსპობა. ამიტომ საჭირო იყო, რომ ჰანიბალს როგორმე გამოეყვანა მოწინააღმდეგე ამ საშიში თავშეკავებულობისაგან და ჩათარია ის გადამწყვეტ ბრძოლაში.

ამ მიზნით ჰანიბალი შეუდგა რომის „მოკავშირე“ იტალიური ოლქების აოხრებას. თუ ფაბიუსი იტალიელებს არ მიეშველებოდა, ეს გამოიწვევდა რომისადმი მათ უკმაყოფილებას და შესაძლოა კართაგენელთა მხარეზე გადასვლასაც:

მაგრამ ჩანდა, რომ იტალიელები, ვალეებისაგან განსხვავებით, კართაგენელებს უფრო მტრულად ხედებოდნენ და ჯერჯერობით საჭიროებას არ ხედავდნენ რომაელთათვის ელაღატნათ და შორეული, უცხო და სასტიკი გადამთიელების უღელში გაეყოთ თავი.

ამრიგად, როცა ჰანიბალი იტალიის ოლქების აოხრება-აწიოკებასა და ძარცვას შეუდგა და რომაელთა არმიას ყოველი ძალით გადამწყვეტ ბრძოლაში იწვევდა, ფაბიუსს მაქსიმეს შორიახლო მისდევდა მას, ყოველთვის ხელსაყრელ პოზიციებს იჭერდა, შესაძლებლობის მიხედვით მფრინავი თავდასხმებით აწუნებდა, სასურსათო ალაღს უსპობდა, მაგრამ ჰანიბალის გამოწვევას არ ღებულობდა.

მთელს იტალიაში ხმა გაეარდა: დიქტატორს ჰანიბალის ეშინია. ის გაურბის მასთან შეხვედრას, აყოვნებს კართაგენელებთან გენერალური ბრძოლის გამართვას და მათს სრულ განადგურებას. სწორედ ამის ნიადაგზე ფაბიუსს მაქსიმეს ზედმეტ სახელად უწოდეს „კუნქტატორი“, რაც დამაყოვნებელს, შემანელებელს ნიშნავს. ჯარისკაცები დასცინოდნენ თავის სარდალს, უწოდებდნენ მას „ჰანიბალის ბიძას“; მის წინდახედულობას სიზანტედ თვლიდნენ, ხოლო სიფრთხილეს — სიმზაღედ; ნამდვილ მთავარსარდალად აღიარებდნენ დიქტატორის მოადგილეს, კავალერიის უფროსს მარკუსს მინუციუსს რუ-

ფუსს, რომელიც აშკარად გამოდიოდა მთავარსარდლის „კუნქტატორობის“ წინააღმდეგ და მოითხოვდა ჰანიბალთან გადამწყვეტ ბრძოლას.

მაგრამ ფაბიუსი ასეთ ძაგებას აინუნშიაც არ აგდებდა და მტკიცედ განაგრძობდა თავის პოზიციებზე ღვომას. მის მისამართით წარმოთქმულ საძაგებელ სიტყვებს ის ასე პასუხობდა: მე უფრო მშიშარა ვიქნებოდი, ვიდრე ახლა მთელიან, რომ სასაცილოდ აგდებისა და ლანძღვის შიშით უარი მეთქვა ჩემს გეგმაზე. სამშობლოსათვის შიშში სამარცხვინო არაფერიაო.

ასე განაგრძობდა ფაბიუსი თავისი გეგმის განხორციელებას. ამაოდ ცდილობდა ფეხმარდი ფინიკიელი ჭარმაგი „კუნქტატორის“ წონასწორობიდან გამოყვანას. ხან აქ, ხან იქ დაუხვდებოდა და დაეცემოდა ხოლმე კართაგენელი რომაელს, მაგრამ ეს უკანასკნელი პირველის პროვოკაციას ყურადღებას მაინც არ აქცევდა.

ჰანიბალმა აპულიის ჩრდილოეთ რაიონების დალაშქრის შემდეგ სამნიუმში გადაინაცვლა. 50 წელზე მეტი ხანი გავიდა, რაც იტალიის ამ მდიდარ ოლქს ომი არ ენახა და აყვავებულ ბაღად ქცეულიყო. კართაგენელებმა აიღეს და გაძარცვეს სამნიუმის მდიდარი ქალაქები, ვენუზია, ბენევენტუმი და მრავალი სხვა დასახლებული პუნქტი. შემდეგ ჰანიბალმა, როცა ნახა ფაბიუსი მას კვლავ ფეხდაფეხ მისდევდა, მაგრამ ბრძოლას მაინც ვერ უბედავდა. ვზა განაგრძო იტალიის უმდიდრესი და უმშვენიერესი ოლქისაკენ — კამპანიისაკენ. ჰანიბალის ამ განზრახვას ხელი შეუწყო აგრეთვე მის ბანაკში მყოფი რამდენიმე კამპანიელი მხედრის თათბირმაც. ესენი კართაგენელ სარდალს არწმუნებდნენ, რომ კამპანიის მთელი მოსახლეობა, განსაკუთრებით მათი მთავარი ქალაქი კაპუა, რომის ბატონობისადმი მეტად მტრულად არის განწყობილი და როგორც კი კართაგენელთა არმია იქ შეიჭრება, ადგილობრივი მცხოვრებლები დაუყოვნებლივ თქვენს მხარეზე დადგებიანო.

ჰანიბალი შეიჭრა კამპანიის ჩრდილოეთ ნაწილში მდინარე ვოლტურნის ნაყოფიერ ველებში. კართაგენელთა ვარაუდები არ გამართლდა: მოსახლეობა შიშით შეხვდა მათ ტერიტორიაზე საომარი ასპარეზის გახსნას. ფაბიუს მაქსიმე თავისი არმიით ფეხდაფეხ მიჰყვა მტერს და ერთ-ერთ მოხერხებულ მალღობზე დაბანაკდა. ის იქიდან ხედავდა, თუ როგორ ძარცვავდნენ, აოხრებდნენ და სწვავდნენ ჰანიბალის ჯარები კამპანიის მდიდარ სოფლებს და მათ საშველად ძირს ჩამოსვლას არ ფიქრობდა. ის, მინუციუსისა და მის გარშემო შემოკრებილი სამხედრო ტრიბუნების მიერ გამოთქმული უკმაყოფილების პასუხად მხოლოდ იმით დაკმაყოფილდა, რომ მტრის პოზიციების დასაზვერად გაგზავნა 4 000 ცხენოსანი ახალგაზრდა ლუციუს

პოსტილიუს მანცინუსის მეთაურობით. ჰანიბალმა, როგორც კი ეს შეიტყო, მანცინუსთან შესახვედრად გაუშვა ნუმიდელ კავალერისტთა რაზმი კართალონის მეთაურობით. კართალონმა მოწინააღმდეგე სასტიკად დაამარცხა. რომაელ მზვერავთა უმეტესი ნაწილი ნუმიდელელებმა დახოცეს, დანარჩენები კი გაფანტეს. ფაბიუს მაქსიმეს ახალი საბუთი მიეცა თავისი გეგმის სამართლიანობის დასამტკიცებლად.

შემოდგომის მიწურულში აურაცხელი ალაფით და ნაძარცვით დატვირთული კართაგენელთა არმია კამპანიიდან ისევ ადრიატიკის ზღვისაკენ დაიძრა. იქ, აპულიაში, უნდა გაეტარებინა მას ზამთარი და მომზადებულიყო მომავალი წლის ბრძოლისათვის.

ჰანიბალმა იტალიელ გამყოლებს უბრძანა არმიას გასძლოლოდნენ კაზინუმისაკენ (დღ. ქ. კაზინო), რომელიც კამპანიიდან სამნომისაკენ ყველაზე კარგ გასასვლელად იყო ცნობილი. მაგრამ მალე კართაგენელთა არმია კაზინუმის მაგივრად კაზილინუმის ტაფობში აღმოჩნდა. ძნელი სათქმელია, მართლა იტალიელ მეგზურებს კარგად ვერ გაეგოთ ფინიკიური აქცენტით ნაბრძანები „კაზინუმი“ და მის ნაცვლად „კაზილინუმი“ გაიგონეს, როგორც ამას წყაროებში ვკითხულობთ, თუ ეს მეგზურები რომაელთა მოსყიდულნი იყვნენ ან საერთოდ კართაგენელთადმი მტრულად განწყობილნი მათ ხაფანგში გაბმას ფიქრობდნენ. ერთი რამ ცხადი იყო: ფაბიუს მაქსიმემ იცოდა, რომ ჰანიბალის არმია კამპანიიდან სამნიუმისაკენ უსათუოდ კაზილინუმის ხეობას გაივლიდა. ამიტომ მან აქ, მთაგრეხილთა შორის მდებარე ერთადერთი გასასვლელი 4 000 რჩეული ლეგიონერთი ჩაჰკეტა, ხოლო თვითონ მთელი დანარჩენი არმიით მახლობელ მთაზე დაბანაკდა.

ჰანიბალი ჩიხში მოემწყვდა. მან მეგზურები ჯვრებზე გააკრა და ხაფანგიდან თავის დასაღწევი გზის მოფიქრებას შეუდგა...

ჰანიბალის ბრძანებით ღამით კამპანიიდან გამორეკილი 2 000 ხარი შეკრიბეს, ზქებზე მამხალეები, ფიჩხის კონები მიაკრეს და ზედ ცეცხლი წაუკიდეს. ამ სახით ანთებული ნახირი მთისაკენ გარეკეს და თან გაჰყვინენ შუბოსანთა რაზმები, რომელთაც მალლობი უნდა დაეკავებინათ. იმავე დროს ჰანიბალმა ბრძანება გასცა მთელი არმია და ალალი გასასვლელისაკენ ჩუმად დაძრულიყო.

ხეობაში ჩასაფრებულმა რომაელებმა შენიშნეს მთაზე შეფენილი სწრაფად მიმავალი ჩირადნებები. მათ იფიქრეს, რომ ეს კართაგენელთა არმია გარბის თავის დასაღწევად. ამიტომ ისინი საფრიდან წამოიშალნენ, გასასვლელი მიატოვეს და მთებზე შესეულ „მტრებს“ გამოედევნენ. მათს განცვიფრებას და დაბნეულობას საზღვარი არ ჰქონდა, როცა

ადგილზე მიაღწიეს და იქ ცეცხლისაგან გაშმაგებული ხარები დახვდნენ! სწორედ ამ დროს მათ თავს დაესხნენ კართაგენელი შუბოსნებიც. ახლა რომაელებს ეგონათ, რომ მოწინააღმდეგის მთელი არმია იყო მათ წინააღმდეგ ჩასაფრებული. მაგრამ ისინი მაინც მხნედ დაუხვდნენ მტერს. სიბნელის გამო ბრძოლა მალე შეწყდა. ორივე მხარე გათენებას ელოდებოდა.

ამასობაში ჰანიბალის მთელმა არმიამ სრულიად არხეინად გაიარა მიტოვებული ხეობა. ფაბიუს მაქსიმე თავისი კარვიდან ხედავდა მოპირდაპირე მთებში მორიალე ცეცხლებს. იგი ფიქრობდა, რომ ეს მოხერხებული მოწინააღმდეგის რაღაც საოძარი ხრიკი იყო, მაგრამ ბანაკიდან აყრა და მტერზე თავდასხმა მაინც არ უცდია.

გათენებისთანავე ჰანიბალმა მთებზე გაგზავნილ თავისიანთა მისახმარებლად გაგზავნა სამთო ბრძოლებში გაწაფული ესპანელი მეომრები. ფიცხელ და თავგანწირულ შეტაკებაში რომაელებმა 1 000 კაცი დაჰკარგეს და ბრძოლის ველი დასტოვეს. გამარჯვებულ ესპანელთა რაზმები კვლავ შეუერთდნენ ჰანიბალის არმიას.

რომაელთა, განცვიფრებას და უკმაყოფილებას საზღვარი არ ჰქონდა. დიქტატორმა მტრის განადგურების კარგი შესაძლებლობა ასე სამარცხვინოდ გაუშვა ხელიდან: ის ასე გაამასხარავა ცბიერმა ფინიკიელმა.

„ჰანიბალის ბიძის“ უმოქმედობას მისი პოლიტიკური მოწინააღმდეგენი უკვე ეპვის თვალთ უცქერდნენ. ეს ეპვები კიდევ უფრო გაძლიერდა მას შემდეგ, რაც ჰანიბალმა აპულიის ველმინდვრების აოხრებისას ფაბიუს მაქსიმეს მფლობელობაში მყოფ მამულებს განგებ არ ახლო ხელი.

ფაბიუს მაქსიმე გულთან არ იკარებდა თანამოქალაქეთაგან მიღებულ დაცინვას და შეურაცხყოფას. „კუნქტატორი“ თავს ინუგეშებდა სტოიკური ფილოსოფიის ცნობილი დებულებით: „კარგი, პატიოსანი კაცი შეურაცხყოფაზე უფრო მალა დგას“.

ამ დროს ბევრი რამ საინტერესო ხდებოდა ესპანეთში.

ძმებმა პუბლიუსმა და გნეუსმა იმავე 217 წელს წარმატებით გადალახეს მდ. იბერი. მაგრამ ჰასდრუბალი ჯერ ისევ მძლავრად იყო პირენეებზე ფეხმოკიდებული და უთვალთვალებდა ხელსაყრელ დროს რომაელთა სრული განდევნისა და იტალიაში ჰანიბალისადმი დასახმარებლად.

ჰამილკარ ბარკას „ლომის ბოკვერთა“ და მათ თანამოაზრეთა წინაშე ესპანეთის მნიშვნელობის საკითხი ახალი, კიდევ მეტი სიგრძესიგანით წამოიმართა; განსაკუთრებით მას შემდეგ, რაც ჰანიბალმა კართაგენიდან დახმარებაზე უარი მიიღო! საქმე იმაში იყო, რომ ფაბიუს მაქსიმე კუნქტატორის გაცვიანებული ომის ნიადაგზე

ჰანიბალმა ბევრი მეომარი დაჰკარგა. მისი არმია სისხლისაგან იცლებოდა; იტალიაში გალაშქრების შემდეგ მას დამხმარე ძალის სახით არც კართაგენიდან, არც ესპანეთიდან ერთი მეომარიც კი აღარ მიუღია, მაშინ როცა რომის უზარმაზარი არმია, რომელიც „ქუნქტატორის“ პოლიტიკის მეოხებით თითქმის ხელუხლებელი იყო, კიდევ ახალ-ახალი ძალებით ივსებოდა. ომის გაჭიანურებით კართაგენში ჰანონიდების კონსერვატიული პარტია სარგებლობდა და ჰანიბალის „ავანტიურის“ წინააღმდეგ ხმას იმაღლებდა. როცა ჰანიბალი იტალიიდან თავისი ბრწყინვალე გამარჯვებების ამბებს იტყობინებოდა და თან ახალ საბრძოლო ძალებს და ფინანსებს ითხოვდა, ის მწარე ირონიით აღსავსე პასუხს ღებულობდა: კართაგენის ხელოსუფლებას არ ესმის, თუ რატომ ითხოვს ჰანიბალი დამხმარებას. გამარჯვებულები ხომ ფულს არ ითხოვენ, პირიქით, მას სამშობლოს უგზავნიან; ჰანიბალი იწერება, რომ გამარჯვებას გაძარჯვებაზე აღწევს და იმავე დროს ჯარებსა და ფულს ითხოვს!

ამიტომ ჰანიბალი ამიერიდან მთელ იმედებს ესპანეთზე ამყარებდა. ის სწერდა ჰასდრუბალს, რომ როგორმე გაზაფხულისათვის გადმოესხა ჯარები ჩრდილოეთ იტალიაში და ორმხრივი ძლიერი დარტყმით მოესპოთ რომი.

კანე. „ნამგალა მთხარე“

ორი წელი გავიდა საომარ მოქმედებათა დაწყებიდან. ორი წლის განმავლობაში კართაგენელი სარდალი უძლეველად იდგა აპენინზე და იტალიური ფედერაციის სიმტკიცითა და გაჭიანურებულ ომით შეშფოთებული ახალი გენერალური ბრძოლის მოგებაში ეძებდა ბარკიდების ძველთაძველი ანდერძის განხორციელებას.

სანამ გამოსაზამტრებლად დაბანაკებული მოწინააღმდეგეთა არმიები ერთიმეორის პირისპირ იდგნენ, რომში მომავალი წლის საომარი საძზადისისა და მისი წარმართვის საკითხებზე მწვავე სოციალური ბრძოლა იყო. არისტოკრატია და დემოკრატია ერთმანეთს განსაკუთრებული სისასტიკით ებრძოდნენ კონსულ-მთავარსარდალთა პოსტებზე თავიანთი წარმომადგენლების არჩევანზე. ბოლოს, როგორც იქნა გადაწყდა და კვლავ კომპრომისული შეთანხმება მოხდა: კონსულებად აირჩიეს დემოკრატის კანდიდატი გაიუს ტერენციუს ვარონი და სენატის კანდიდატი ლუციუს ემილიუს პაველე.

ტერენციუს ვარონი ხორციით მოვაჭრის შვილი იყო. პლებეურ მასებს ის ძალიან უყვარდათ, როგორც მათი წარმომადგენელი და მათი ინტერესებისათვის სენატორთა წინააღმდეგ მებრძოლი.

ძოლი, ვარონი მტკიცე ხასიათის, ცოცხალი, მოძრავი და მამაცი კაცი იყო. იგი თავიდანვე ეწინააღმდეგებოდა ფაბიუს მაქსიმეს „ქუნქტატორულ“ პოლიტიკას და მოითხოვდა მრავალრიცხოვანი არმიით ჰანიბალთან გადამწყვეტი ბრძოლის დაჩქარებას. ვარონი ხშირად გაიძახოდა სახალხო კრებებზე: კართაგენელებთან ომი მანამ არ დამთავრდება, სანამ რესპუბლიკა მთავარსარდლებად ფაბიუსების დანიშვნას არ შესწყვეტსო.

სრულიად სხვა ხასიათისა და მრწამსის კაცი იყო მეორე კონსული, ემილიუს პავლე, ბრწყინვალე პატრიციული გვარის შთამომავალი და კონსერვატიულ-არისტოკრატიული ბანაკის ერთ-ერთი ბელადთაგანი. პავლემ ჯერ კიდევ 219 წელს, მისი პირველი კონსულობის დროს გაიტქვა სახელი ილირიელებისა და დემეტრე ფაროსელის წინააღმდეგ ომებში. ის ფაბიუს მაქსიმეს ტიპის სარდალს წარმოადგენდა; მის მსგავსადვე ჰანიბალთან გაჰიანურებული ომის ტაქტიკის თვალსაზრისზე იდგა. პავლე ყურადღებით უსმენდა აწ გადამდგარ „ქუნქტატორს“, რომელიც მას ასე აფრთხილებდა: სამშობლოსათვის ბრძოლა, პავლე. პირველ რიგში უფრო ტერენციუს ვარონთან მოგახდება, ვიდრე ჰანიბალთან; ორავენი იჩქარებინ გენერალური ბრძოლის გამართვას; ტერენციუსი იმიტომ ჩქარობს, რომ მან არ იცის თავისი ძალები, ხოლო ჰანიბალი იმიტომ, რომ მან იცის თავისი სისუსტე. გახსოვდეს, პავლე, ჰანიბალს. რომელსაც მე უკეთ ვიცნობ. ვიდრე ტერენციუსი, თუ აწ წელს გადამწყვეტ ბრძოლას, არ გავუმართავთ. ის ან სრულიად დაიღუპება, ან სულ გადაიხვეწება იტალიაში: მართალია, ჰანიბალი დღემდე გამარჯვებულად ითვლება, მაგრამ იტალიელთაგან მაინც არაფერს მიმხრობია და კართაგენიდან ჩამოყვანილი მისი არმიიდან მხოლოდ ერთი მესამედილა დარჩა.

პავლე აღუთქვამდა ფაბიუს მაქსიმეს, რომ რამდენადაც შესაძლებლობა ექნებოდა, შეეცდებოდა მისი საომარო ტაქტიკით მოქმედებას.

216 წლის გაზაფხულის მაწურულში კონსულები დიდი არმიებით გავიდნენ რომის კარიბჭიდან. ისინი კარვად დიდ მანძილზე გააცილეს თავიანთ პარტიათა წარმომადგენლებმა: პავლე — სენატორებმა, ტერენციუს ვარონი — პლებებმა.

კონსულებმა შეიერთეს აპულიაში დაბანაკებული ლეგიონებიც და, ამგვარად, სულ რვა ლეგიონისაგან შედგარი არმიით გაემუჩნენ კანეს მიმართულებით. ორ კილომეტრზე მიუახლოვდნენ კანეს და დაბანაკდნენ. რომაელთა არმიის უდიდესი ნაწილი დაბანაკებული იყო მდ. აუფიდუსის მარჯვენა სანაპიროზე, რამდენადმე ამაღლებულ ადგილზე, ხოლო მის პირდაპირ მდინარის მარცხენა ნაპირზე განლაგებული იყო რომის არმიის ერთი მესამედი ნაწილი.

ჰანიბალი გრძობდა ბრძოლის სიახლოვეს და ფიქრობდა, რომ მოწინააღმდეგეს კანეს გარშემო მდებარე ველზე შეხვედროდა.

ჯერ დაბანაკებული არც კი იყვნენ, რომ კონსულებს შორის განხეთქილება ჩამოვარდა ბრძოლის ადგილისა და დროის დანიშვნასთან დაკავშირებით. ემილიუს პავლე არწმუნებდა თავის კოლეგას მორიდებოდნენ ბრძოლის გამართვას ფართო ველზე, განსაკუთრებით კი აუფილდუსის მარცხენა სანაპიროზე, სადაც ჰანიბალს შესაძლებლობა ექნებოდა მისი შესანიშნავი კავალერიის მანევრირებისათვის, და შებრძოლებოდნენ სხვა დროს, როცა ხელსაყრელი პოზიციები სააზისო საშუალებას მისცემდა. ვარონი კი მოითხოვდა დაუყოვნებლავ გადაეყვანათ მთელი არმია მდინარის მარცხენა სანაპიროზე და შებმოდნენ მტერს. მას სრული რწმენა ჰქონდა, რომ ასეთი უზარმაზარი არმიით ადვილად გასრესდა ორჯერ უფრო მცირერიცხოვან მოწინააღმდეგეს.

ტერენციუს ვარონს თავისი განზრახვის სისრულეში მოსაყვანად ერთი და გადამწყვეტი შესაძლებლობა ჰქონდა: დაეწყო შეტევა იმ დღეს, როცა მას რიგით მოუწევდა მთავარსარდლობა (კონსულები დღეგამოშვებით, რიგრიგობით მთავარსარდლობდნენ).

ჰანიბალმა იცოდა, რომ მის მოწინააღმდეგეს ორი სხვადასხვაგვარად მოაზროვნე თავი ედგა. ამიტომ მას ადვილად შეეძლო თავისი განზრახვის განხორციელება. პირველად ჩვეულებრივ საბრძოლო ხრიკებს მიმართა: მსუბუქი კავალერიით რამდენჯერმე დაესხა თავს რომაელთა ბანაკს და მტრის შემოგებებისთანავე უკუიქცა. ვარონს სჯეროდა, რომ მოწინააღმდეგე მათ ძალებს სინჯავდა და შეშინებული უკან გარბოდა. ის ყველას თანდასწრებით, მთელი არმიის წინაშე ლანძღავდა ემილიუს პავლეს. ბრძოლას მოწყურებული არმიის უდიდესი ნაწილიც ვარონს უჭერდა მხარს.

ბოლოს, ტერენციუს ვარონის მთავარსარდლობის დღეს, ემილიუს პავლეს მტკიცებისადმი ანგარიშგაუწევლად გადაწყდა გენერალური ბრძოლის გამართვა.

216 წლის 2 აგვისტო, სახელოვანი ბრძოლა კ ა ნ ე ს თ ა ნ.

მზე კარგად არც კი ამოწვერილიყო, რომ პატარა ბორცვზე მდგარი ახლო თანამებრძოლებით გარშემორტყმული ჰანიბალი მოწინააღმდეგის ბანაკში ატეხილ საომარ ფაციფუტს გასცქეროდა. აი, ამოძრავდნენ ალისფერი რომაული საბრძოლო დროშები; აბრწყინდნენ ლეგიონთა ვერცხლის არწივები; საომრად მოკაზმული და ამხედრებული ტერენციუს ვარონი წინ მოუძღვის უკვე ბანაკიდან გამოსულ არმიას. რომაელებმა გადალახეს მდინარე და გადავიდნენ მის მარცხენა სანაპიროზე. აქვე დაიწყო არმიის საბრძოლო განლაგება: მარჯვენა ფლანგზე,


მდინარის ახლოს, დადგნენ მძიმედ შეიარაღებული რომაელი ცხენოსნები; მარცხენა ფლანგზე დაეწყვიენ იტალიელ მოკავშირეთა მხედრობა; ცენტრში დალაგდნენ რომის არმიის ძირითადი ნაწილები, მძიმედ შეიარაღებული ქვეითი ლეგიონები; ისინი მკიდრო მანიპულებად იდგნენ ერთიმეორის ზურგში და მტკიცე, გაურღვეველ, გრძელ და განიერ კორპუსს ჰქმნიდნენ; მთელს წინა ხაზზე ჩამწკრივდნენ მსუბუქად შეიარაღებული ქვეითი მეომრები, რომელთაც უნდა დაეწყობოთ ბრძოლა. ფლანგებს სარდლობდნენ კონსულები: მარჯვენას — ემილიუს პაულე, მარცხენას — ტერენციუს ვარონი; ცენტრის სათავეში უდგნენ გასული წლის კონსულები გნეუს სერვილიუსი და ატილიუს რეგულუსი.

ეს იყო უზარმაზარი არმია, როგორც რომს მანამდე ერთ ბრძოლაში არასოდეს გამოუყვანია. სულ 80 000 ქვეითი მეომარი და 6 000 ცხენოსანი. ხოლო ჰანიბალი თავის ბანაკში ორჯერ ნაკლებ საომარ ძალებს ითვლიდა: 40 000 ქვეითი და 10 000 მხედარი. ამიტომაც, ბუნებრივი უნდა ყოფილიყო ის პირველი შეკრთომა, რომელიც უგრძვნია კართაგენელთა შტაბს მოწინააღმდეგის უზარმაზარი. მრისხანე არმიების დანახვისას. ამის შესახებ ერთი წყარო, პლუტარქე, შემდეგს გადმოგვცემს. როცა ჰანიბალი თავისი თანაშემწეებით მოწინააღმდეგის საბრძოლო განლაგების პროცესს ხედავდა, ერთმა მისმა მხლებელმა, სახელად გი ს კ ო ნ შ ა, მეტად მამაცმა მეომარმა, ვაკვირვება გამოთქვა რომაელთა მრავალრიცხოვნობაზე; ჰანიბალმა შუბლი შეიკმუხნა და ჰკითხა: „სხვა ვერაფერი შენიშნე საკვირველი, გისკონ?“ „სახელდობრ რა?“ — იკითხა თავის მხრივ გისკონმა. „ის, რომ რომაელთა მთელს ამ მასაში არ მოიძებნება არავინ, რომელსაც შეიძლება და გისკონი რქმეოდა“ — უპასუხა ჰანიბალმა. სარდლის ასეთმა ხუმრობამ, მტრის სიძლიერისადმი მისმა გულგრილობამ, საერთო მნიარულება გამოიწვია. მალე ჰანიბალის ეს სიტყვები კართაგენელთა მთელმა არმიამ იცოდა. ყველა მხნედ ელოდა ბრძოლის დაწყებას.

ჰანიბალმაც სასწრაფოდ გადაიყვანა თავისი არმია მდინარის მარცხენა სანაპიროზე და საბრძოლოდ განალაგა ის. მარცხენა ფლანგზე, მდინარის ახლოს დადგნენ კელტი და ესპანელი ცხენოსნები; მარჯვენა ფლანგზე — ნუმიდელი მხედრები; ცენტრში — მთელი ქვეითი არმია: პირველ რიგში კელტები და ესპანელები, მეორე რიგში — რომაულ ყაიდაზე შეიარაღებული აფრიკელი მეომრები. ჰანიბალის მთელი არმია დაწყობილი იყო ნ ა მ გ ა ლ ა მ თ ვ ა რ ი ს მსგავსად, რომლის ამოხნეკილი ნაწილი, ცენტრში შედარებით სქლად განლაგებული ქვეითი მეომრებით, ზიმართული იყო მოწინააღმდეგის ცენტრისაკენ. „ნამგალა მთვარის“ წვეროები, სადაც კავალერიის ნაწილებიც

ედგნენ. თანდათანობით უკან იხრებოდნენ. ჰანიბალი ვარაუდობდა, რომ „ნამვალა მთვარე“ შეტაკებისას შეიზნიჩებოდა, თანდათანობით შებრუნებულ სახეს მიიღებდა და ბოლოს წრედ შეიკვრებოდა.

კართაგენელთა ცხენოსანთა ესკადრონებს, ე. ო. ფლანგებს სარდლობდნენ: მარცხენას — ჰ ა ს დ რ უ ბ ა ლ ი, მარჯვენას — მ ა ჰ ა რ ბ ა



ბრძოლა კანესთან.

ლი, ხოლო ცენტრს — ჰანიბალის ძმა მაგონი. აგრეთვე ცენტრისა და მთელი არმიის ხელმძღვანელი, ჩვეულებრივ, თვით ჰანიბალი იყო.

ჰანიბალს გათვალისწინებული ჰქონდა, აგრეთვე, საომარი ველის, ლანდშაფტისა და კლიმატის ყოველი წვრილმანი. ის დაკვირვებული იყო, რომ კანეს ოლქში, მდ. აუფიდუსის სიციხიან ველზე, შუა დღის დადგომამდე თითქმის ყოველდღე რეგულარულად ადრიატიკის ზღვი-

დან ძლიერი ქარი ქროდა და საშინელი მტერის ბული თან მიჰქონდა. ჰანიბალის არმიას ქარი ზურგიდან სცემდა, ხოლო რომაელებს შიგ სახეში უტევდა.

ყველაფერი ისე წარიმართა, როგორც კართაგენელთა სარდალს ჰქონდა გათვალისწინებული.

გაისმა საბრძოლო ნაღარის ხმა. მოწინააღმდეგენი გამაყრუებელი საბრძოლო ყიყინითა და იარაღის ზათქით ეკვეთნენ ერთუკრთს. ბრძოლა გასხნეს მოწინავე, მსუბუქად შეიარაღებულმა მეომრებმა. რამდენიმე ხანს ორივე მხარე არაჩვეულებრივი სიმძაფრითა და თავზუნელადებით იბრძოდა და უკან დახევას არც ერთი მათგანი არ ფიქრობდა. სწორედ ამ დროს ელვის სისწრაფით დაიძრა კართაგენელთა მარცხენა ფლანგი (ჰასდრუბალი), კელტი და ესპანელი მხედრობა, და ეკვეთა რომაელთა მარჯვენა ფლანგს (ემილიუს პავლე). შეტაკებისთანავე ბრძოლამ დაჰკარგა საკავალერიო ბრძოლის სახე. მოწინააღმდეგენი არ ფიქრობდნენ ჩვეულებრივი ცხენოსნური მანევრირებისათვის მიემართათ; ისინი ერთმანეთს უკანდაუხეველად ებმებოდნენ, ეჭიდებოდნენ. ცხენებიდან ცვიოდნენ და მიწაზე დაგორებულნი ერთიმეორეს ზედ აკვდებოდნენ. განსაკუთრებით ცხენოსნობაში ნაკლებად გაწვრთნილი რომაელები ამჯობინებდნენ ასეთი სახის ბრძოლას. ამასვე ხელი შეუწყო იმანაც, რომ პირველ შეტაკებისთანავე ცხენიდან გადმოვარდა თუ გადმოზტა თვით კონაული ემილიუს პავლე. მას მიჰბაძეს მისი ამაღის წევრებმა და ბოლოს მთელმა მარჯვენა ფლანგმა. როცა ჰანიბალმა შეიტყო, რომ კონსულმა თავის მეომრებს უბრძანა დაქვეითებულობა, წამოიძახა: „ჩემთვის უფრო სასიამოვნო იქნებოდა, მას რომ ისინი ხელ-ფეხშეკრული გადმოეცა“. მართლაც. მეტად მწარე და მძაფრი ხოცვა-ყლეტის შემდეგ რომაელთა მარჯვენა ფლანგი დამარცხდა. მათი უმრავლესობა დაიხოცა. დანარჩენებს კი ჰასდრუბალი მდინარის გასწვრივ მიერეკებოდა და სჩხნდა.

ამასობაში ბრძოლა ცენტრში კიდევ უფრო გახურდა. კარგა ხანს კელტი და ესპანელი ქვეითები მამაცურად უმკლავდებოდნენ რომის მრისხანე ლეგიონების მიწოლას. მაგრამ ბოლოს მაინც გატყდნენ და დაიწყეს უკან დახევა. რომაელთა სქლად და ღრმად შეკრული „სწორკუთხედი“ თანდათანობით ზნეჟავდა კართაგენელთა „ნამგალა მთვარეს“ და შეუკავებლად მიიწევდა მასში. აი, მათ უკვე გააძღვიეს მოწინააღმდეგის მოწინავე ხაზი, ფორმა შეუტევალეს მის უცნაურ წყობას; წარმატებით გამხნევებული რომაელები „უახლოვდებიან“ გაძარკეებას... და ამ დროს ჰანიბალმა მათ წინ აღმართა აფრიკელ „ლეგიონერთა“ მტკიცედ დარაზმული ხაზი. ცხარე ბრძოლისაგან, სა-

შინელი სიცხე-პაპანაქებისაგან და მტერის კორიანტელისაგან უკვე დაღლილ რომაელებს წინ გადაუდგნენ სრულიად ახალი, დასვენებული და ბრძოლის ცეცხლით ანთებული, ყველაზე საუკეთესოდ გაწვრთნილი ჯარები. ჩანდა, რომ ჰანბალი მაშინ იწყებდა ბრძოლას, როცა ის რომაელებს დამთავრების პირზე მისული ეგონათ...

ბრძოლა ახალი სიშმაგით გაჩაღდა. როცა აფრიკელ მეომართა ცენტრალური ნაწილი მოწინააღმდეგის თავგანწირულ დაწოლას აკავებდა, მისი ფლანგები თანდათან მიიწვედნენ წინ და მჭიდრო რკალად ეკვროდნენ რომაელთა გვერდებს. მთელი რომაული არმია რკინისებურ სალტეში მოექცა. აღარსად გასასვლელი, აღარსაიდან დახმარება საშინელი ტომრიდან თავდასალწვეად. რომაელებმა დაჰკარგეს თავიანთი უპირატესობის — რიცხობრივი სიმრავლისა და ბრძოლისუნარიანობის ძალა. მათ, ამ პირობებში, კიდევ უფრო ხელს უშლიდა და აბრკოლებდა მათი მრავალრიცხოვნობა; ღრმად და სქლად ჩაწყობილი რაზმები ერთმანეთს ხელს უშლიდნენ, მტერთან იარაღით ჩაბმასაც ვერ ახერხებდნენ. ამის საშუალება მხოლოდ სანაპირო ხაზებზე მყოფთ ჰქონდათ, ხოლო თვითონ ისინი, შუაში მოქცეულნი, ყოველმხრივ გარშემორტყმულნი და წინააღმდეგობის საშუალებას მოკლებულნი უწყალოდ იელიტებოდნენ, თუნდაც ალაღბედზე ნასროლი მტრის ისრებისაგან, სათხედებისაგან, შუბებისაგან, ქვებისაგან.

ამ დროს ჰასდრუბალმა მთლიანად გაანადგურა რომაული კავალერია და ამგვარად სრული გამარჯვება მოიპოვა მტრის მარჯვენა ფლანგზე. აქ მას მტერი უკვე აღარ ჰყავდა. ამიტომ შეამჭიდროვა თავისი მხედრები, ზურგიდან ჩაუქროლა ალყაშემორტყმულ რომაელ ქვეითთა არმიას და მოულოდნელად ზურგიდან თავს დაესხა მოწინააღმდეგის მარცხენა ფლანგს, იტალიურ კავალერიას, რომელსაც კონსული ტერენციუს ვარონი სარდლობდა.

კონსულის სარდლობის ქვეშ მყოფი მარცხენა ფლანგი, რომელსაც ჯერ კიდევ ბრძოლის დასაწყისში შეეჩანა ნუმიდიური კავალერია (მაჰარბალი), უკვე დაღლილი და დეზორგანიზებული იყო; ეს უმეტესად საკავალერიო ბრძოლის იმ ხერხებით და მეთოდებით, როგორც ნუმიდიელებს სჩვეოდათ, სახელდობრ, ნუმიდელები თავიანთი პატარა, მაგრამ გამძლე, შიმშილ-წყურვილისა და სიცხე-სიცივის ამტანი და ელვასავით სწრაფი ცხენებით, არწივებივით დაუქროლებდნენ მტერს, გაიტყუებდნენ დევნაში, აშლიდნენ მის რიგებს, ტყუილუბრალო ჭირითში და კენწლაობაში დაღლიდნენ, კვლავ მიუხდებოდნენ და ა. შ. სწორედ ამ სახით დაექანცათ მაჰარბალის ნუმიდელებს მხედრებს იტალიელთა კავალერია იმ დროისათვის, როცა მათ ზურგში ჰასდრუბალის კელტი და ესპანელი მხედრობა გამოჩნდა.

ორივე მხრიდან ძლიერი დარტყმების ქვეშ მოქცეულმა ტერენციუსის კავალერიამ საბოლოოდ დაჰკარგა გამარჯვებრს რწმენა. იტალიელთა რიგები მთლიანად აირივნენ და სასოწარკვეთილნი გალაღებული მტრების იერიშებს ზვარაკად ეწირებოდნენ. მათი უდიდესი ნაწილი გაიქვლიტა, ხოლო დანარჩენები გაიქცნენ და დიდის ვაი-ვაგლახით დაღწიეს თავი ნუმიდიელთა დევნას.

ჰასდრუბალმა მეორედ შეჰკრიბა და შეამჰიდროვა თავისი მხედრობა. მოწინააღმდეგის კავალერია მთლიანად განადგურებული იყო. რომაელთა ფლანგები აღარ არსებობდნენ. ახლა ჰასდრუბალი მთელი თავისი მხედრობით უკვე ალყაში მოქცეული რომაული ლეგიონების ზურგს მიესია. ნუმიდიელთა კავალერიის ნაწილი ალყის გარშემო დაჰქროდა და სიცოცხლეს ასალმებდა ყველას, ვინც იქიდან ფეხის გამოდგმას მოახერხებდა.

ახლა ბრძოლის მთელი მსვლელობა ერთ ადგილზე იყო კონცენტრირებული, საშინელ სალტეში. ბრძოლა, რაც დასასრულს უახლოვდებოდა, მით უფრო სასტიკი და მძაფრი ხდებოდა. თვით ჰანიბალი თავისი სიმამაცითა და მხნეობით ცეცხლს უკიდებდა თავისიანებს და იმ უბანზე, სადაც ის გამოჩნდებოდა, შიშის ზარს სცემდა რომაელებს. რომაელთა სარდლებიც, სერვილიუსი, რეგულუსი და თვით კონსული ემილიუს პავლე, რომელმაც მასზე გაპიროვნებული მხედრობა ჰასდრუბალის იერიშებს შეაყლიტა და თვითონ ქვეითი არმიის რიგებში საბრძოლველად გადავიდა, თავიანთი პირადი მაგალითითა და გამამხნეველები შეძახილებით ამაგრებდნენ უფსკრულისაკენ მიმავალ ჯარებს. მაგრამ კატასტროფა ახლოვდებოდა. ჰანიბალმა პირველ შეტაკებაში გაფანტული კელტი და ესპანელი ქვეითები ისევ შეამჰიდროვა და ახალი ძალით მიუსია მტერს ყოველი მხრიდან. ტომარაში მოქცეულები უკანასკნელი სისხლის წვეთებისაგან იცლებოდნენ. საშინელი სალტე თანდათან ვიწროვდებოდა, უკან შემზარავ სისხლის გარემოს სტოვებდა. გადარჩენილ რომაელთაგან იარაღის დაყრაზე არავინ ფიქრობდა. მხოლოდ უმნიშვნელო ნაწილმა რაღაც მანქანებით მოახერხა თავის დაღწევა. მოსალამოვდა. ათსაათიანი, არნახულა სიმძაფრითა და მძინვარებით წარმოებული ხოცვა-ჟლეტა დასრულდა. ძღვევამოსილებით დამთვრალი და სისხლით გამძღარი ფინიკიელი ამყად დაჰყურებდა დახოცილ აღამიანთა გროვებით სავსე სასაკლაოს.

რომაელებმა მანამდე არნახული დამარცხება და ზარალი ნახეს. უზარმაზარი რომაული არმია ესვენა კანეს ველზე. დახრცილი იყო ყველა სარდალი და უფროსი მეთაურები, მათ რიცხვში წინა წლის კონსულები სერვილიუსი და რეგულუსი. თვით ტერენციუს ვარონმა.

ამ საბედისწერო ბრძოლის მოთავემ, 50 თუ 70 კაცის თანხლებით მოახერხა გაქცევა და კატასტროფისაგან თავის დაღწევა. ხოლო კონსულმა ემილიუს პავლემ სიცოცხლე შესწირა ბრძოლას, რომლის ზოგების იმედი მას არ ჰქონია და მისი სასტიკი წინააღმდეგიც იყო. პავლე მაშინ როცა ბრძოლის ჩარხი უკვე რომაელთათვის უკუღმა ტრიალდებოდა. თავში მძიმედ დაჭრილი და სისხლით შეღებილი ქვაზე მისვენებული უნახავს ერთ-ერთ სამხედრო მეთაურს, ახალგაზრდა პატრიცაუსს ვნ. კორნელიუს ლენტულუსს. ის სასწრაფოდ ჩამომხტარა ცხენიდან და იგი მიურთმევია. სასიკვდილოდ განწირული კონსულისათვის; უთხოვნია მასზე შეჭდომა და გაქცევა, რათა ეს „დამარცხება უფრო არ გაშავებულდეს კონსულის სიკვდილით. უამისოდაც საკმაო დარდი და ცრემლიო“. მაგრამ პავლემ გაქცევაზე უარი სთქვა. მან მადლობა გადაუხადა ლენტულუსს და უბრძანა ესარგებლა დარჩენილი წუთებით, გადაერჩინა თავი და გადაეცა სენატისათვის, რათა ეზრუნათ ქალაქის გამაგრებისა და ქვეყნის ხსნისათვის; თან გადაეციო ფაბიუს მაქსიმუსს, რომ მე თავგამოდებით ვიცავდი მასზე მიცემულ სიტყვას. „მაგრამ დავმარცხდი ჯერ ვარონისაგან, შემდეგ ჰანიბალისაგან.“ ამ სიტყვების თქმა ძლივს მოასწრო, რომ მოაწყდნენ მტრის რაზმები და ემილიუს პავლე ისრებით განგმირული დაეცა ძირს. ბრძოლაში დაიღუპნენ ორივე კონსულის ქვესტორები, 29 სამხედრო ტრიბუნი. მრავალი უმაღლეს მაგისტრატურაგავლილი კონსულიარი, მათ შორის გასული წლის კავალერიის უფროსი, ფაბიუს მაქსიმუს მეტოქე მარკუს მინუციუსი; ამათ გარდა ბრძოლაში სიკვდილი ჰპოვა 80 სენატორმა, რომლებიც მოხალისეებად იყვნენ არმიაში ჩაწერილი. სულ 80 000-ანი არმიიდან რომაელებმა მარტო მოკლულთა სახით 70 000 კაცი დაჰკარგეს; დანარჩენები ტყვედ ჩავარდნენ ან გაიფანტნენ. ჰანიბალის ზარალი 6 000 კაცსაც არ აღწევდა და აქედანაც 4 000 კელტი მეომარი იყო.

რომაელთა ზარალი მეორე დღეს კიდევ გაიზარდა. ჯერ ბრძოლის დაწყებამდე რომაელთა დიდ (მდინარის მარჯვენა სანაპიროზე) და მცირე (მარცხენა სანაპიროზე) ბანაკებში 10 000 ჯარისკაცისაგან შემდგარი გარნიზონი იდგა. 2 აგვისტოს ღამით მათ უკვე იცოდნენ ბრძოლის საბედისწერო შედეგები. ბანაკში საშინელი კოშმარი ჩამოწვა. უმეთაუროდ დარჩენილმა მეომრებმა აღარ იცოდნენ როგორ მოქცეულიყვნენ. ერთხანს შიკრიკები ბანაკიდან ბანაკში გადაბოდნენ და გაერთიანებას მოითხოვდნენ, რათა, სანამ გამარჯვებითა და ღრეობით დაღლილ მტერს ღრმად ეძინა, გაერთიანებული ძალებით ეშველათ თავისათვის. ბოლოს, როგორც იქნა 6 000 კაცმა სამხედრო ტრიბუნ პუბლიუს სემპრონიუს ტუდიტიანუსის მეთაურობით გაბედა ბანაკიდან

გამოსვლა და ნუმიდიელ გუშაგთა „ცეცხლის საზიდან“ ორგანიზებულად თავის დაღწევა. მათ როგორც იქნა მიაღწიეს ბრძოლის ველიდან რამდენიმე კილომეტრზე მდებარე ციხე-სიმაგრე კანუზიუმამდე.

მეორე დღეს, გათენებისთანავე, კართაგენელები შეუდგნენ გამარჯვების ნაალაფევით შეგროვებას, დახოცილთა იარაღისა და ამუნიციის აყრას და რომაელთა ორივე ბანაკის ალებისათვის სამზადისს. თვით შეუბრალებლობით განთქმულ ფინიკიელთათვისაც შემზარავი იყო სასაყლაო. სადაც ადამიანთა სისხლის ტბა ჯერ კიდევ არ შეშრობოდა დედამიწას. ბრძოლის ველი ჯერ კიდევ გმანავდა. ზოგიერთი მძიმედ დაჭრილი, გრძნობადაკარგული ადამიანი დილის სიოს და გრილ ჰაერს გამოეცოცლებინა. ისინი შეელას ითხოვდნენ ან წყქვლა-კრულვას უთვლიდნენ ყველას და ყველაფერს. სისხლში მოსვრილნი და დაფლეთილნი წამოდგომას ან ზედდახვავებულ მკვდართა გვამებიდან გამოდრომას ცდილობდნენ, მაგრამ უღმობელი მტერი სიცოცხლეს უსწრათებდა მათ. ზოგს ნახულობდნენ ფეხებ და თეძოებ დასხეპილ-დამსერეულთ, სისხლისაგან დაკლილთ და ნახევრად ცოცხლებს. ისინი ილადრავდნენ ყელს და ზედწამდგარ მტრებს ეხვეწებოდნენ გამოედინათ მათთვის უკანასკნელი სისხლის წვეთები. რათა სამუდამოდ დაესვენათ ჯოჯოხეთური წამებისაგან. ზოგს, მძიმე ჭრილობებით გამწვარებულს ფრჩხილებით გაეთხარა მიწა და შოგ თავდაღმაჩამხობილს შეეწყვიტა სუნთქვა. ერთგან იპოვნეს ჯერ კიდევ ცოცხალი კბვირ და ყურებდაქმული ნუმიდიელი. მას ზედ დასწოლოდა ხელებდაჭრილი მკვდარი რომაელი, რომელსაც გაშმაგებისაგან სულის ამოხდომამდე კბილებით უბრძოლია თავის მტერზე.

იმაჯე დღეს პანიბალი მიადგა რომაელთა მცირე ბანაკს მდინარის მარცხენა სანაპიროზე და ალყა შემოარტყა მას. პანიკით შოცული და სულიერად დაცემული გარნიზონი უბრძოლველად დანებდა მტერს. სანამ კართაგენელები ახალი ნადავლის შეგროვებას და ტყვედჩავარდნილთა შებორკვას აწარმოებდნენ, მდინარის მარჯვენა ნაპირიდან, რომაელთა დიდი ბანაკიდან 4 000 ქვეითმა მეომარმა და 200 მხედარმა მოასწრო გაქცევა. ზოგმა ორგანიზებულად, ზოგმაც დაქსაქსულად, დიდის ვაი-ვაგლახით მიაღწია კანუზიუმს და იქ შეუერთდა ღამით გაქცეულ რომაელებს.

პანიბალმა მალე ჩაიბარა რომაელთა მთავარი ბანაკიც. ამგვარად, გენერალური ბრძოლის მეორე დღეს კართაგენელებმა ხელთ იგდეს 5 200 ტყვე და მდიდარი დავლა. პანიბალმა მტრის ორივე ბანაკი თავის ჯარისკაცებს მისცა საძარცვავად. ტყვედჩავარდნილნი წარმოშობისა და ხარისხების მიხედვით დაჰყო და მათზე გამოსასყიდი ფასები დააწესა. შემდეგ მან ბრძანება გასცა პატივით დაესაფლავებიათ მი-

სი არმიიდან დახოცილი ყველა მეომარი. ხოლო რომაელთაგან მისი ბრძანებით მიწას მიაბარეს კონსული ემილიუს პაველ.

განადგურებული და გაფანტული რომაული არმიის ერთმა ნაწილმა, დაახლოებით 1300-მდე კაცმა, როგორც ითქვა, კანუზიუმში მოიყარა თავი. მათი ერთი ნაწილი, განსაკუთრებით ახალგაზრდები, მორალურად დაცემულნი და დაფანტულნი. რომში დაბრუნებასაც აღარ ფიქრობდნენ. ასეთებს სათავეში ედგა ლუციუს ცეცილიუს მეტელუსი. ის თანამოაზრეებს მოუწოდებდა დაეტოვებინათ იტალია და თავი შეეფარებინათ რომელიმე ქვეყნის მეფისათვის. მაგრამ ეს განზრახვა შეიტყო კანუზიუმის თავმჯდომარეებულთა უფროსად არჩეულმა სამხედრო ტრიბუნმა პუბლიუს კორნელიუს სციპიონმა, ჩვენთვის ცნობილმა გმირმა, რომელმაც ტიციანუსის ბრძოლაში უექველსიკედ იღიჯდა გადაარჩინა თავისი მამა. ახალგაზრდა სციპიონი მახვილამოწვდილი შეიჭრა მეტელუსის კარავში, სადაც იტალიიდან გასაქცევად გამზადებულთა თათბირი მიმდინარეობდა, და შეჰყვირა: ვფიცავ. მე არ დავტოვებ ჩემს ხალხს და ქვეყანას და ამის ნებას არ მივცემ არც სხვა რომაელ მოქალაქეს. თუ მე შეგნებულად დავარღვევ აქ ფიცს, მაშინ შენ, ყოვლისმძლე იუპიტერო, გამანადგურე მე, ჩემი სახელი, ჩემი ოჯახი. ჩემი ქონება. მე მოვითხოვ ფიცს ამავე ფორმულით შენგან, ლუციუს ცეცილიუსო, და ყველა აქ დამსწრეთაგან, ხოლო ვინც არ მოიხურვებს ფიცის დადებას, მან იცოდეს, რომ ეს მახვილი გაშიშვლებულაა მის გასაგმირავადო.

შეთქმულები ისე შეშინდნენ, „თითქოს მათ თავიანთ წინაშე იხილეს ძლევა მოსილი ჰანნიბალი“. ყველამ შეჰფიცა, რომ არ მიატოვებდნენ მშობლიურ ქვეყანას ასეთ მძიმე დღეებში, როცა ყოველი მებრძოლი სამშობლოსათვის დაუფასებლად ძვირი იყო.

გაფანტულთა მეორე ნაწილი კონსულ ვარონის მეთაურობით თავს აფარებდა ქ. ვენუზიას, მდ. აუფილუსის ზემო წელზე. ვარონის გარშემო თანდათანობით შეგროვდა 4500-მდე კაცი. როცა მან მიიღო სციპიონის შეთავაზება, ის გაეშურა კანუზიუმში და შეიერთა იქ დაბანაკებულნი. ამგვარად, კონსულის ხელში დაახლოებით ერთმა ლეგიონმა მოიყარა თავი.

კანეს სისხლიანი ტრაგედიის ამბავმა საშინელი თავზარი დასცა რომს. არც ერთ მანამდელ დიდ დამარცხებებს, თვით „ალიას დღესა“ და ტრაზიმენის კატასტროფასაც, არ შეეძლოთ რომისათვის იმდენად მძიმე დარტყმის მიყენება, როგორც კანეს დარტყმა იყო. ასეთ საშინელებას არავინ მოელოდა რომში. ამ რამდენიმე დღის წინ ყველა დიდის ოპტიმიზმითა და გამარჯვების სრული რწმენით აცილებდა უზარმაზარ არმიას მტრის გასასრესად. ყველა გულდამშვიდებით მოელო-

და ამ არმიის ძლევამოსილად დაბრუნებას, დიდებულ ტრიუმფებს... და აი, თითქოს მოწმენდილ ცაზე მენმა დაიკექაო, რომს თავს დაეცა საშინელი ამბავი: ორივე კონსული დაიღუპა. უზარმაზარი არმიიდან არც ერთი კაცი ცოცხალი არ დარჩენილა; აპულია და სამნიუმი ჰანიბალს ემორჩილება; მქენვარე ბტერს აღაჩაფერი აბრკოლებს დღეს თუ ხვალ მთელის საშინელებით თავს დაატყდეს თვით რომს. შიში, დაბნეულობა, სასოწარკვეთილება და სრული მორალური დაცემულობა გამეფდა ქალაქში.

პრეტორებმა პუბლიუს ფურიუს ფილუსმა და მარკუს პომპონიუსმა სასწრაფოდ მოიწვიეს სენატი. გაჩაღდა ბჭობა, თუ რა ექსტრაორდინალური ღონისძიებები მიეღოთ ქალაქში შექმნილი დაბნეულობა-დაცემულობისა და კარზე მომდგარი საშინელი უბედურების თავიდან ასაცილებლად. მოხუცი ფაბიუს მაქსიმეს წინადადებით დადგენილ იქნა სასწრაფოდ გაეგზავნათ ცხენოსანი რაზმები ქალაქიდან, შეეტყოთ მომხდარი ამბების სინამდვილე. თვითონ სენატორები გამოვიდნენ ქალაქის ქუჩებში და მოედნებზე, შლიდნენ შიშით აქოთქოფებული ბრბოების ჯგუფებს, სახლებში აბრუნებდნენ ატირებულ ქალებს და ბავშვებს, ამშვიდებდნენ ხალხს, ავალებდნენ ყველას, რომ ყოველი ახალი ცნობა დაუყოვნებლივ შეეტყობინებინათ სენატისათვის. ქალაქს კარიბჭეებთან დაყენებულ იქნენ შეიარაღებული მცველები, რომელთაც არავისათვის არ უნდა მიეცათ ქალაქიდან გასვლისა და გაფანტვის უფლება.

ამასობაში მოვიდა კონსულ ტერენციუს ვარონის წერილიც, რომელშიც ყველაფერი სინამდვილით იყო გადმოცემული: მოკლულია კონსული ემილიუს პავლე, განადგურებულია მთელი არმია, ხოლო თვითონ, არმიის ნაშთებით, კანუზიუმში იმყოფება. აქედანვე ჩანდა, რომ ჰანიბალი ჯერ არ დასდგომია რომისაკენ მიმავალ გზას. კონსულის წერილის შინაარსი გააცნეს ხალხს. მოსახლეობა კვლავ საშინელმა გლოვამ და გოდებამ მოიკვა. არ იყო არც ერთი სახლი, არც ერთი ოჯახი, რომელსაც ბრძოლაში დაღუპული მამა, შვილი, ძმა ან სხვა ახლობელი არ ჰყოლოდეს. სენატის დადგენილებით 30-დღიანი გლოვა გამოცხადდა, რის შემდეგ აკრძალული იყო ყოველგვარი ვაი და ვიში. საჭირო იყო სულიერი მხნეობა და მთელი ენერჯის დაძაბვა ქალაქზე ჰანიბალის თავდასხმის უქუსაგდებად. თავდასხმისა, რაშიც ეჭვი არავის ეპარებოდა.

მაგრამ ჰანიბალმა ყველასათვის, როგორც რომაელთა, ასევე კართაგენელთა განსაკვიფრებლად, კვლავ უარი სთქვა უშუალოდ რომის წინააღმდეგ გალაშქრებაზე.

როცა ბრძოლა დასრულდა და ძლევამოსილმა ჰანიბალმა სამხედრო

საბჭო მოიწვია, არც ერთ მის გენერალს და რიგით მეომარს ექვი არ ეპარებოდა. რომ ეს საბჭო რომისაკენ ლაშქრობის საკითხს მიეძღვნებოდა. მაჰარბალი მზად იყო კიდევ იმავე წუთში თავისი სწრაფი, ნუმიდური კავალერიით დაძრულიყო რომისაკენ. „მეხუთე დღეს შენ კაპიტოლიუმში ინადიმებ, ძლევა მოსილო!“ — უთქვამს მას ჰანიბალისათვის. მაგრამ სარდალმა ერთგული თანამებრძოლი ასეთი გაბედულებისათვის მხოლოდ შეაქო, მაგრამ დასძინა. რომ ის ჯერ კიდევ შეუძლებლად თვლის რომზე გალაშქრებას. მაშინ გულდაწყვეტილ მაჰარბალს უთქვამს: „როგორც ჩანს, ღმერთები ერთსა და იმავე ადამიანს ყველაფრით არ აჯილდოვებენ: გამარჯვება შეგიძლია, ჰანიბალო. მაგრამ გამარჯვებით სარგებლობა კი არ შეგძლებია!“

ეს ცნობილი დიალოგი და ჰანიბალის „უცნაური“ გადაწყვეტილება—კანეს დიდი გამარჯვებიდან უშუალოდ რომზე გალაშქრების უგულებელყოფა—მრავალჯერ ყოფილა მსჯელობის საგანი როგორც თანამედროვეთა, ასევე შემდეგი დროის ისტორიკოსთა და სამხედრო თეორეტიკოსთა შორის. მაგრამ ყოველთვის ის მოსაზრება რჩებოდა გაბატონებულად. რომელიც ჰანიბალის გადაწყვეტილებას სამართლიანად მიიჩნევს. გენიალური სარდალი მტკიცედ იდგა თავისი ერთხელ და სამუდამოდ აღებული სტრატეგიული გეგმის საფუძველზე. მან იცოდა, რომ ჯერ კიდევ არ იყო განხორციელებული ის წინაპირობები, რომლებიც უსათუოდ წინ უსწრებდნენ რომზე უშუალო ლაშქრობას. ჰანიბალის გეგმაში ქ. რომის დაპყრობა საბოლოო პუნქტი იყო. გრანდიოზული ლაშქრობის უძვირფასესი, მაგრამ უმძიმესი გზით მოსაპოვებელი გვირგვინი... ჯერ კიდევ მაშინ, როდესაც იტალიური ფედერაცია, რომის სიძლიერის ძირითადი საფუძველი, დაურღვეველი იყო. და კანეს ბრძოლის შედეგიც იმ სახით, როგორსაც ჰანიბალი მოელოდა. შეუცნობელი იყო. უდიდესი ავანტიურისტობა და დაღუპვის მომასწავებელი რისკი იქნებოდა ხალხმრავალ, მამაც და მტკიცე ციხე-ქალაქ რომზე თავდასხმა. მოულოდნელობის ფაქტორიც არ გამოდგებოდა რომის დასაჩოქებლად. კაპიტოლიუმში სადილის მირთმევას რომ თავი დავანებოთ, ჰანიბალის მთელი არმია კანედან რომის კედლებამდე ხუთი დღის განმავლობაში მაინც ვერ მიაღწევდა, ამას ათი-თორმეტი დღე მაინც დასჭირდებოდა. რაც მთავარია, ჰანიბალის არმიას არ შეეძლო რომის აღება, ყველა იმ აუცილებელი წესისა და საშუალების საფუძველზე, რასაც მძლავრი ქალაქის აღყა და იერიში მოითხოვს. კანეს მეორე დღეს კართაგენელთა საბრძოლო დროშების ქვეშ მხოლოდ 35 000 მეომარი იდგა; აქედან ერთი მესამედი ცხენოსნები და მსუბუქად შეიარაღებული იყვნენ, ე. ი. ისეთი ნაწილები. რომლებიც ალყისა და კედლებზე იერიშისათვის ნაკლებად გამოსადეგი

არიან; შემდეგ ის 20 000 ტყვე. რომლებიც კართაგენელთა ხელში იყო, სპეციალურ საყარაულო რაზმებს მოითხოვდა; ბოლოს, ჰანიბალის არმიის მნიშვნელოვანი ნაწილი შედგებოდა კელტი მეომრებისაგან, რომლებიც, მართალია, ბრძოლაში მამაცი იყვნენ, მაგრამ საალყო საძსახურისათვის გულარძნილნი და უვარგისნი, განსაკუთრებით კი ისეთი ხანგრძლივი ალყისათვის, რასაც უსათუოდ მოითხოვდა რომისებრ მიუვალი ციხე-სიმაგრე. გარდა ამისა, ბრძოლის ადგილიდან რომამდე გაჭიმულ 300-კილომეტრიან გზაზე მრავლად იყო ძლიერი ციხე-ქალაქები, რომლებიც ჯერ ისევ რომისადმი ერთგულებას ინარჩუნებდნენ და მძულვარებით ეკიდებოდნენ გადამთიელ სასტიკ მოძულურებს. ამიტომ იტალიის ამ მწარე მიწაზე ლაშქრობისას ჰანიბალის ისედაც მცირერიცხოვან არმიას საკმაო მსხვერპლი უნდა გაეღო ყოველი მხრიდან წარმოებული დარტყმებისათვის... საერთოდ ჰანიბალი შორს იყო ისეთი ავანტიურზომისაგან, როგორც ჰქონდა მეფე პიროსს. რომაელებთან პირველი წარმატების შემდეგ.

ჰანიბალი კანეს გამარჯვების მოპოვებით თავისი ძლიერების მწვერვალზე იდგა. თუ მისი გეგმა ოდესმე უნდა განხორციელებულიყო, საამისოდ ყველაზე დიდი შესაძლებლობა სწორედ ახლა არსებობდა. მართალია, იტალიის ზოგიერთი ოლქი და ქალაქი, როგორც ქვეშოთ ვნახავთ, ჰანიბალის მხარეზე დადგა, მაგრამ ეს იტალიის ფედერაციის დანგრევას ჯერ კიდევ მაინც არ ნიშნავდა. ჰანიბალი უსათუოდ გრძნობდა, რომ მისი ვარაუდი რომის ძლიერების ძირის გამოთხრის გზებზე არც ისე სწრაფად მართლდებოდა. ამას დიდო, გაჭირანურებული ომები და კოლოსალური ძალები სჭირდებოდა, ხოლო ჰანიბალს არც ერთისა და არც მეორის შესაძლებლობა არ ჰქონია. ამიტომ მან. თავისი ძლივეამოსილების მწვერვალზე მყოფმა. ნიადაგი მოსინჯა: ხომ არ შეიძლებოდა დაძარცხებულ მოწინააღმდეგესთან საზავო მოლაპარაკების გამართვა?!

როგორც ყოველთვის, ჰანიბალმა ახლაც იტალიელი სამხედრო ტყვეები რომაელთაგან გამოჰყრა და სათანადო დემაგოგიური ახსნა-განმარტების შემდეგ უსასყიდლოდ გაუშვა თავიანთ სახლებში, ხოლო მკვიდრი რომაელი მოქალაქენი შეკრიბა და მანამდე უჩვეულო. ტკბილი სიტყვით მიმართა: მე რომთან სამკედრო-სასიციოცხოოდ არ ვაწარმოებ ომს, — ამბობდა იგი, — არამედ ვედავები მას ჰეგემონობისა და დიდებისათვის. სრულებით არ მაინტერესებს რომაელთა ამოყლეტა და განადგურება. ამიტომ მე შესაძლებლად ვთვლი, თქვენ, რომაელმა ტყვეებმა თავი გამოისყიდოთ. თან აწესებდა გამოსასყიდ ფასებსაც: ყოველი მხედრისათვის 500 დენარი, ქვეითი ლეგიონერისათვის 300 დენარი და მონისათვის 100 დენარი. ტყვეები აღფრთოვანებით შეხვ-

დნენ ფინიკიელის ასეთ „წყალობას“. თვითონ ამოირჩიეს სენატში ამ საკითხზე მოსალაპარაკებლად გააგზავნი წარმომადგენლები ათი კაცის შემადგენლობით. ჰანიბალმა ყოველ მათგანს გამგზავრების წინ ჩაჰოატოვა ფიცი, რომ რომში მოგზაურობის შემდეგ ისინი უსათუოდ დაბრუნებულიყვნენ უკანვე, ტყვეობაში. ამით ჰანიბალს სურდა ფულიც აედო (რაც მას ძალიან ესაჭიროებოდა), ზედმეტი საყარაულო ტვირთიც მოეშორებინა თავიდან და, რაც მთავარია, რომსა და მას შორის მოლაპარაკების შესაძლებლობისათვისაც გაესვა ხაზი. ამასთან დაკავშირებით, უფრო მნიშვნელოვანი ის არის, რომ რომში გაგზავნილ ტყვეებს თან გააყოლა თავისი უახლოესი პირი, კართალონი, რომელსაც დაეაღებული ჰქონდა რომის ხელისუფლებისათვის საზავო პირობები წაეყენებინა იმ შემთხვევაში, თუ სენატი აქეთკენ მიდრეკილებას გამოავლენდა.

ამასობაში რომმა გაძრო სამგლოვიარო თაღები და კვლავ დიდის ენერჯიით შეუდგა მტრის წინააღმდეგ კონტროლისძიებათა გატარებას. პირველ რიგში ქვეყნის გადარჩენისა და თავდაცვისათვის ბრძოლის ორგანიზაციას სათავეში ჩაუყენეს მრავალ ბრძოლაში ნაცადი პრეტორი მარკუს კლავდიუს მარცელუსი, რომელიც ამ



მარცელუსი.

თანამემამულეთა და მტრების ყურადღებას. ჯარისკაცებს ძლიერ

დროს ნავსადგურ ოსტიაში, ტიბრის შესართავთან, ფლოტის სათავეში იდგა და სიცილიისაკენ სალაშქროდ ემზადებოდა. მარცელუსი, 222 წ. კონსული, ყველასათვის ცნობილი სახელოვანი სარდალი იყო. განსაკუთრებით მას იცნობდნენ გალიის წინააღმდეგ წარმოებული უკანასკნელი ომებით, როცა ის მტრის ბელადებს ორთაბრძოლაში ხოცავდა და მათს საჭურველს რომის წმინდა ტაძრებს სწირავდა. მან ჰაბუკობის წლებიდან გაითქვა სახელი და არაჩვეულებრივი სიმამაცისათვის მრავალჯერ დაიტვირთა გამარჯვების ჯილდოებით. მტკიცე ნებისყოფით, მოსაზრებულობით, ჯანსაღი სხეულითა და მძიმე მუშტით თავიდანვე იპყრობდა ის ყურადღებას. ჯარისკაცებს ძლიერ

უყვარდათ სარდალი; მათ მტრისაგან მიყენებული ჭრილობაც კი ისეთ ტკივილს ვერ აყენებდა, როგორც მარცვლუსის საყვედური.

მარცვლუსმა სენატის ბრძანების მიღებისთანავე ფლოტის სარდლობა და სიცილიაში გამგზავრება დაავალა პრეტორ პუბლიუს ფურტიუს ფილუსს. ფლოტიდან წინასწარ გამოიყვანა 1 500 მეომარი და გაგზავნა რომში ქალაქის დაცვაში მონაწილეობის მისაღებად. თვითონ ერთი ლეგიონით. რომელიც აგრეთვე სიცილიაში სალაშქროდ იყო გათვალისწინებული, დაუყოვნებლივ გაემართა კანუზიუმისაკენ, სადაც მას მთავარსარდლობა და ყველა სამხედრო ძალა უნდა მიეღო კონსულ ტერენციუსისაგან.

ხალხის ზორალური სიმტკიცის უფრო ამდლებისათვის ზელისუფლებამ მრავალი რელიგიურ-საკრალური ღონისძიების გატარებასაც მოჰკიდა ხელი. ყველას სჯეროდა, რომ ამდენი უბედურება ღმერთების წყრომის შედეგად ატყდებოდა ქალაქს. ამიტომ მთელი მოსახლეობა გართული იყო „ვამწყრალ ღმერთდამი“ მსხვერპლშეწირულებით. ლოცვებით, მისტერიებითა და სხვ.

რომში გაცხოველებით ამზადებდნენ ახალ არმიებს. ეს საქმე დასაერთოდ, ახალი მძიმე მდგომარეობის თავიდან აცილების ხელმძღვანელობა რომაელებმა ჩააბარეს ახლად დანიშნულ დიქტატორს მარკუს იუნიუს პერას; მის მოადგილედ, კავალერიის უფროსად დაინიშნა ტიბერიუს სემპრონიუს გრაქხუსი. დაიწყო გაწვევა. არმიაში იწვევდნენ 17-წლიან და ხშირად უფრო მცირეწლოვან ქაბუკებაც. გამზადდა ოთხი ლეგიონი და 1 000 ცხენოსანი. აგრეთვე მოკავშირე იტალიელთაგან ახალი საბრძოლო ძალები შეიკრიბნენ. სახელმწიფოს ხარჯზე შეძენილ იქნა 8 000 ჯანსაღი, ბრძოლისუნარიანი მონა და მათგან ახალი საჯარისო ნაწილები შექმნეს. ტარებიდან და დარბაზიდან გამოჰქონდათ იქ შეწირული საჭურველი და აიარაღებდნენ მეომრებს. იარაღის სახელოსნოებში დღედაღამ სჭედდნენ საბრძოლო საჭურველს.

რომმა საშინელი საფრთხის პირობებში დროებით დაივიწყა ის სოციალური წინააღმდეგობანი, რომლებიც მუდამ თან ახლდა მას არსებობის მთელს მანძილზე. ამის კარგი გამოხატულება იყო ინსცენირება, რომელიც მოაწყო სენატმა კონსულ ტერენციუს ვარონთან შეხვედრის დროს. მას შემდეგ. რაც მარცვლუსმა მთავარსარდლობა ჩაიბარა, დარცხენილი და მორალურად დაცემული ტერენციუსი მცირე ამაღლის თანხლებით მიუახლოვდა რომის კარიბჭეს. რამდენად უნდა განცვიფრებულიყო ის, როდესაც ქალაქიდან, რომელსაც მან ამდენი ვნება მიაყენა და საიდანაც ის საშინელ შერცხვენასა და მსჯავრ-

დებას მოელოდა. უეცრად გამოეგება მთელი ხალხი. მათ დიდებულნი წყობითა და სახით წინ მიუძღოდა მთელი სენატი. სენატორები მიეხლენ ამხედრებულ კონსულს, გადაუხადეს მას მადლობა და შეასხეს ქება, რომ მას „არ დაუყარგავს ქვეყნის გადარჩენის იმედი“, მიუხედავად იმისა, რომ ქვეყანა დაღუპვის პირზეა. იგი დაბრუნდა, რათა სათავეში ჩაუდგეს სამშობლოს გადარჩენისათვის ბრძოლის სამზადისს...

როდესაც კართალონმა სამხედრო ტყვეთა წარმომადგენლებთან ერთად რომის გარეუბანს მიაღწია, მას წინ შეხვდა ლიქტორი და ლიქტატორის განკარგულებით უბრძანა დალამებამდე გასცლოდა ქალაქის რაიონებს. ამგვარად რომმა კატეგორიულად უარი სთქვა პანიბალის ელჩის მიღებაზე და მასთან საზავო მოლაპარაკებაზე.

ტყვეთა წარმომადგენლობას ლიქტატორმა ნება დართო სენატში აუდიენციაზე. აქ სიტყვა წარმოსთქვა წარმომადგენელთა მეთაურმა მარკუს იუნიუსმა. ის გულისამაჩუყებელი სიტყვებით ითხოვდა რომაელ მოქალაქეთა შეერდომებასა და საშინელი ტყვეობისაგან დახსნას. ხალხი ღრიალით შემოეხვია კურიას, სადაც სენატის სხდომა მიმდინარეობდა. და მოითხოვდნენ სიკვდილს გადარჩენილი შვილების, ძმების, ქმრებისა თუ სხვა ახლობლების გამოხსნას. სენატში ორი აზრი ებრძოდა ერთმანეთს. ერთნი მოითხოვდნენ განწირულთა შესყიდვას, მეორენი — უარის თქმას. ამ უკანასკნელი აზრის მოთავე შეიქნა ტიტე მანლიუს ტორკვატუსი, ლეგენდარული მრისხანე ტორკვატუსის¹ შთამომავალი და უკიდურესი რიგორიზმით სახელდებული. მან მკაცრი საბრალდებულო სიტყვა წარმოსთქვა ტყვედჩავარდნილთა წინააღმდეგ; უწოდა მათ მშიშარები, უვარგისნი როგორც ბრძოლაში, ასევე მშვიდობიანობაში; შეარცხვინა ისინი, რომ საზიზღარ ტყვეობას სიკვდილი არ ამჯობინეს და სხვ. გადაწყდა უარი ეთქვათ ტყვეთა გამოხსნაზე. განწირულთა დეპუტაცია მოთქმა-გოდებით მიაცილეს ქალაქის კარიბჭემდე. მათ საბოლოოდ დასტოვეს რომი².

* ასეთი იყო რომის პასუხი პანიბალის გრანდიოზულ გამარჯვებაზე.

¹ რომა და ლათინურ ქალაქებს შორის ომის დროს (ე. წ. ლათინური ომები. 340 — 338) კონსულმა ტიტე მანლუს ტორკვატუსმა თავი მოქვეყნა საკუთარ შვილს, რომელმაც სარდლის ნებადაურთველად მიიღო მტრის გამოწვევა ორთაბრძოლაში.

² გადმოგვეყვან. რომ ერთი მათგანი, რომელმაც პანიბალის ბანაკიდან გამგზავრების წინ რაღაც მოიმოხეზა. ბანაკში შებრუნდა და ამით ფიცისაგან „თავი გაითავისუფლა“. რომიდან დაბრუნებას აღარ აპირებდა. ეს კაცი სენატის ბრძანებით და გუშაგთა თანხლებით მიჰგვარეს პანიბალს.

კანეს შემდეგ პანიბალის მთავარ საზრუნავს წარმოადგენდა ახალი გრანდიოზული ძალების მოკრება, ურომლისოდაც მძლავრი მოწინააღმდეგის წაქეცვა შეუძლებელი იყო. ის ცდილობდა ოთხი ძლიერი ძალა გაეერთიანებინა რომთან საომრად: აფრიკა, ესპანეთი, იტალია და ბერძნულ-მაკედონური სამყარო, სადაც ამ დროს მეფე ფილიპე V მძლავრ სამხედრო პლაცდარმს ჰქმნიდა იტალიისაკენ სალაშქროდ. ამგვარად. საომარ მოქმედებაში უნდა ჩაბმულიყო მთელი ხმელთაშუა ზღვის აუზი. ეს იქნებოდა ანტიკური სამყაროს მსოფლიო ომი...

პანიბალმა, კანეს ბრძოლისა და სამხრეთ იტალიის ოლქებში ლაშქრობის შემდეგ, კართაგენში გაგზავნა თავისი ძმა მაგონი. მაგონი გამოცხადდა სენატში. სადაც მან მოახსენა კართაგენის ხელისუფლებას: განადგურებულია მტრის ექვსი არმია; მტრის ექვსი მთავარსარდლიდან მოკლულია ხუთი და დაჭრილია ერთი. ნახევარი იტალია ჩვენთან კავშირშია. ამასთან. მაგონმა სენატორების წინაშე ერთიანად დაახვევა იტალიიდან ჩამოტანილი ძვირფასი ოქროს ბეჭდები, რომლებიც კართაგენელებმა ხელიდან წააძვრეს ბრძოლებში დახოცილ და ტყვედ წამოყვანილ მტრებს. ოქროზე დახარბებული ფინიკელები ალტაცებაში მოვიდნენ. უფრო დიდი შთაბეჭდილების მოსახდენად მაგონმა სთქვა, რომ ასეთ ბეჭდებს რომაელთა შორის მხოლოდ წარჩინებული მხედრები ატარებენ. მაგრამ. — დაძინა მაგონმა, — რომ დიდებულად დაწყებული ომი ასევე დიდებულად დამთავრდეს და ჩვენი საქულველი მტერი საბოლოოდ მოისპოს, საჭიროა პანიბალს გაუფგზავნოთ სურსათი. ფინანსები, საომარი ძალები. ჭარები.

სენატის უმრავლესობით მიღებულ იქნა გადაწყვეტილება გაეგზავნათ პანიბალისათვის 4 000 ნუმიდიელი მხედარი. 40 სპილო და ფული ჭარისკაცთა ხელფასისათვის. გარდა ამისა, ესპანეთში გაგზავნილ იქნა მაგონი. რომელსაც პასდრუბალთან ერთად სასწრაფოდ უნდა შეეგროვებინა 20 000 ქვეითი მეომარი, 4 000 ესპანელი მხედარი და გადაესროლათ ისინი იტალიაში პანიბალთან შესაერთებლად.

მაგრამ გადაწყვეტი მნიშვნელობა მაინც იტალიური ოლქების პოზიციას ენიჭებოდა.

ამ დროს პანიბალის მხარეზე იყვნენ: ბრუტიები, სადაც პანიბალმა აღრევე გაგზავნა თავისი ძმა მაგონი; ლუკანების დიდი ნაწილი; პირპინები; თითქმის მთელი სამნიუმი. რომელიც იტალიაში ოდითგანვე ყველაზე უფრო მტრულად იყო რომისადმი განწყობილი; განსაკუთრებით დიდი როლი კართაგენელებთან სოლიდარობისა და რომთან ბრძოლის საქმეში შეასრულა კ ა პ უ ა მ, კამპანიის მდიდარმა და მშვე-

ნიერმა მთავარმა ქალაქმა, რომელიც თავის თავს რომზე ნაკლებად არ სთვლიდა და მუდამ ეტოქებოდა მას იტალიაში ჰეგემონობაზე.

კაპუასთან კავშირის დადებისთანავე ჰანიბალმა ბრძოლის ფრონტი კამპანიის ტერიტორიებზეც გაშალა. მან ჯერ კიდევ კაპუაში შესვლამდე სცადა კამპანიის მეტად მნიშვნელოვანი ნავსადგურის ნეაპოლის ხელში ჩაგდება, მაგრამ ნახა, რომ ამ კარგად გამაგრებული ქალაქის აღება ძალიან დიდხანს დააყოვნებდა და ჯერჯერობით კაპუაში მოპოვებული გამარჯვებით დაკმაყოფილდა.

კაპუის დახმარებით, რომელსაც შეეძლო 30 000 ქვეითი მეომარი და 4 000 წხედარი გამოეყვანა, ჰანიბალს სურდა მთლიანად ჩაეგდო ხელში კამპანიის ოლქი. მან განაახლა იერიში ნეაპოლზე, მაგრამ ავლავ უშედეგოდ.

215 წლის გაზაფხულზე ჰანიბალმა კაპუიდან გამოიყვანა არმია, რომელიც ფუფუნებაში გატარებული ზამთრისაგან გაზანტებული აღარ ჰგავდა ძველ ფოლადისებრ ნაწრობ არმიას. სარდალმა ისევ გამოაფხიზლა თავისი მეომრები. როცა მან იერიშები განაახლა მდ. ვოლტურის უსის ზემო წელზე მდებარე ქ. კაზილინუმზე. ქალაქი მდინარის ორივე მხარეზე მდებარეობდა და კართაგენელებმაც ორივე მხრიდან მოაქციეს იგი მტკიცე ალყაში. ვერც კონსული გრაქუსი და ვერც პრეტორი მარცელუსი, რომლებიც თავიანთი არმიებით კაზილინუმის მახლობლად იდგნენ, ვერ ბედავდნენ ჰანიბალთან შებმას. ქალაქში დაიწყო საშინელი შიმშილი. ხალხი სჭამდა ყველაფერს, რასაც კი მოახელებდა, ბალახს, ფოთოლს, ნეკერს, ხაფსს, ხარშავდნენ ტყავებს, რომლებსაც აძრობდნენ საბრძოლო ფარებს და სხვ. რომაელები ერთ ხანს ღამით მდინარეში ყრიდნენ პურიც სავსე კასრებს და ალყაშემორტყმულნი იჭერდნენ მათ. მაგრამ ეს საშუალებაც მოისპო, როცა კართაგენელებმა ესეც შენიშნეს. ჰანიბალმა შეიტყო, რომ ხალხი ქალაქის შიგნით ბოლოკს სთესდა და ამგვარად ალყის გახანგრძლივების პირობებში ახალი წინააღმდეგობისათვის ემზადებოდა. „ნუთუ, აქ მანამდე უნდა ვიჯდე; სანამ ეს ბოლოკი არ გაიზრდებაო“ — წამოუძახნია გაცოფებულ ჰანიბალს. მან ახალი გადამწყვეტი იერიში მიიტანა ქალაქზე. ბოლოს, მცხოვრებლები იძულებული გახდნენ დათანხმებულიყვნენ: ჩაებარებინათ ქალაქი და თვითეული მოქალაქის სიცოცხლის შესანარჩუნებლად კართაგენელთათვის გადაეხადათ გარკვეული რაოდენობის გამოსასყიდი. ჰანიბალმა კაზილინუმში 700 მეომრისაგან შემდგარი გარნიზონი ჩააყენა.

ჰანიბალს ჯერ კიდევ კანეს ბრძოლის შემდეგ ჰქონდა ურთიერთობა მაკედონიის ძლიერ მეფე ფილიპე V-თან, რომელიც მანამდე დიდის

გულისყურით ადევნებდა თვალს ორი მძლავრი სახელმწიფოს თავგამეტებულ ჰიდილს და თავის სიმპათიებს მუდამ ფინიკიელთა საარდღოს მიმართ ამქლავნებდა.

215 წლის ადრიან გაზაფხულზე ფილიპე მაკედონელმა ელჩები გაგზავნა ჰანიბალთან. ისინი მოერიდნენ ტარენტუმთან და ბრუნდობრუმთან გადასვლას, რადგან ამ პუნქტებთან რომაელები ფხიზლად დარაჯობდნენ, და იტალიაში აპულიის გზით შევიდნენ. კამპანიაში, ლუციერის მახლობლად, მაკედონელი ელჩები ხელში ჩაუვარდათ რომაელებს, პრეტორ მარკუს ვალერიუს ლევიუსს. მაგრამ დაკითხვის დროს ელჩთა მეთაურმა მოხერხებულმა ბერძენმა ქსენოფანემ მშვიდად განაცხადა, რომ ისინი ფილიპესაგან გამოგზავნილი არიან რომის სენატორთან და ხალხთან კავშირ-მეგობრობის დასადებად. გახარებულ რომაელ პრეტორს ოდნავი ეჭვიც არ შეჰპარვია ქსენოფანეს თვალთმაქცობაში. მან დიდის პატივით გააცილა ელჩები და ასწავლა მათ გზა რომისაკენ.

აღგვარად, მალე ელჩები გამოცხადდნენ კართაგენელთა ბანაკში, ჰანიბალმა სიამოვნებით მიიღო სასურველი სტუმრები. მოლაპარაკების შედეგად შეთანხმდნენ და შეჰფიცეს: მტკიცედ გაერთიანებულიყვნენ რომის წინააღმდეგ საბრძოლველად; არც ერთ მათგანს, არც ფილიპეს და არც ჰანიბალს სეპარატიულად არ უნდა გაემართათ რაიმე მოლაპარაკება რომთან. მაკედონელი ვალდებულებას კისრულობდა დაუყოვნებლივ გაეგზავნა 200 გემისაგან შემდგარი ფლოტი იტალიის ნაპირებისაკენ და სისტემატურად ეწარმოებინა ომი რომაელთა წინააღმდეგ როგორც ზღვაზე, ისე ხმელეთზე. როდესაც გაერთიანებული ძალებით რომს დაამხობდნენ, მთელი აპენინის ნახევარკუნძული, რომი, იტალია, რჩებოდა ჰანიბალის მფლობელობის ქვეშ, ხოლო ამის შემდეგ კართაგენელები თავის მხრივ უნდა დაემარებოდნენ ფილიპეს ბალკანეთის ნახევარკუნძულზე გაბატონებისათვის ბრძოლაში.

ასეთი პირობებით გამოვიდნენ მაკედონელი ელჩები კართაგენელი სარდლის კარვიდან. მათ, თვით მეფესთან ამ კავშირის განმტკიცების მიზნით, ჰანიბალმა თავისი ელჩებიც გააყოლა. ყველა ისინი კვლავ რომაელებს ჩაუვარდათ ხელში.

შომდეგო 214 წლისათვის რომში კონსულებად აირჩიეს ფაბიუს მაქსიმუსი და პეტრუსი (მეოთხედ) და მარკუს კლავდიუს მარცელუსი (შესამედ). პირველი — „ფარი“ რომისა, მეორე — „მახვილი“ მისი.

ამ წელს რომს 18 ლეგიონი, ე. ი. დაახლოებით 110 000 მეომარი ჰყავდა ზხად.

214—212 წლებში საომარ მოქმედებათა ერთ-ერთ საყურადღებო ასპარეზად კვლავ სიცილია გადაიქცა.

უკვე ითქვა, რომ სირაკუზის ახალმა ტირანმა ჰიერონიმემ რომაელებთან ურთიერთობა გასწყვიტა და კართაგენის მოკავშირე შეიქნა. ამას მოჰყვა სიცილიის ცალკეულ ქალაქთა ისევ კართაგენელთა და სირაკუზელთა მხარეზე გადასვლა. ჰიერონიმემ პირველ რიგში ხელში ჩაიგდო სირაკუზის ჩრდილო-დასავლეთით მდებარე მნიშვნელოვანი პუნქტი. ქ. ლეონტინი, რომელიც მანამდე რომაელებს ეკუთვნოდათ.

მაგრამ ახალგაზრდა სირაკუზელი ტირანის მმართველობა დიდხანს არ გაგრძელებულა. დემოკრატიული წესწყობილებისათვის თავგამოდებით მებრძოლ ბერძნულ მოსახლეობას არ შეეძლო დიდხანს მოეთმინა თვითნება. თავგასული ჰიერონიმეს მბრძანებლობა. სირაკუზელთა აღშფოთებას საზღვარი არ ჰქონდა, როცა ჰიერონიმე, თეთრცხენებიან ოქროს ეტლში მჯდომარე, ბრწყინვალე ამალით გარშემორტყმული, ქალაქის ქუჩებში დაჰქროდა. ყველას აბუჩად იგდებდა და აწიოკებდა.

მალე ჰიერონიმე შეთქმულების მსხვერპლი შეიქნა. თავისი მმართველობის ერთი წლის თავზე ის ქ. ლეონტინში შუბებით დაცხრილეს.

მაგრამ ამ ამბავს სიცილიის საკითხი რომის სასარგებლოდ მინც არ შეუცვლია. პირიქით, სირაკუზი, რომლის ხელისუფლების სათავეში ახლა იდგნენ ჰანიბალის თაყვანისმცემლები — ჰიპოკრატე და ეპიკიდე. კიდევ უფრო აქტიურად შეუდგა რომაელთა წინააღმდეგ ბრძოლას და კართაგენელებთან კავშირიც უფრო მეტად გააძლიერა.


ამგვარად, რომისათვის შეიქმნა საშიშროება, რომ მთელი სიცილია ისევ კართაგენს უვარდებოდა ხელში. ამგვარად, სამხრეთიდან იქმნებოდა მძლავრი პლაცდარმი, საიდანაც იტალიაში ფეხმოდგმულ ჰანიბალს ახალი დამხმარე რეზერვი უნდა მიეღო.

რომში კარგად შეაფასეს სიცილიიდან მოსალოდნელი საფრთხე. 214 წლის გაზაფხულზე სამხრეთისაკენ დაიძრა ძლიერი რომაული არმია და ფლოტი კონსულ მ. კლავდიუს მარცელუსის სარდლობით.

სიცილიაში ჩამოსულ მარცელუსთან გამოცხადდნენ კანეს ბრძოლის მონაწილე სამხრეთში გადასახლებული ლეგიონერები: ევედრებოდნენ სარდალს მიეღო ისინი არმიაში, რათა საშუალება ჰქონოდათ თავგახწირული ბრძოლით გამოესყიდათ თავიანთი „დანაშაული“. მარცელუსმა ამის შესახებ აცნობა სენატს და თვითონაც ითხოვდა დაეკმაყოფილებინათ პატივყარილ თანამოქალაქეთა თხოვნა. მაგრამ მან სენატისაგან ასეთი პასუხი მიიღო: რომს სახელმწიფოს დაცვისათვის მშობრები არ სჭირდება; მარცელუსს შეუძლია გამოიყენოს და იმსახუროს ისინი. მაგრამ მათ იმედი არ უნდა ჰქონდეთ, რომ დაიმსახურებენ გამარჯვების

გვირგვინებს, ჯილოებს „მამაცობისათვის“ და მიიღებენ თავისუფლებას. მარცელუსი დიდად ნაწყენი დარჩა სენატის აეთი პასუხით და შემდეგ, გვიან, როცა ის რომში დაბრუნდა, მუდამ გამოსთქვამდა ამ მხრივ უკმაყოფილებას. სენატმა, მიუხედავად ამდენი დამსახურებისა, საშუალება არ მომცა შემემსუბუქებინა მძიმე მდგომარეობა ამდენი თანამემამულისათვისო, — გულისტკივილით იტყოდა ხოლმე მარცელუსი.

პირველად მარცელუსი თავს დაესხა ლეონტინს და იერიშით აიღო ის. მოსახლეობის უდიდესი ნაწილი, განსაკუთრებით ახალგაზრდობა,



„ლესანტი“.

რომაელებმა ერთიანად ამოუღიტეს. შემდეგ მარცელუსი და პრეტორი აპიუს კლავდიუს პულხერი მთელი არმიითა და ფლოტით მიადგნენ სირაკუსს. მისი აღება ლეონტინის მსგავსად ერთი იერიშით შეუძლებელი აღმოჩნდა; რომაელები შეუდგნენ სირაკუსის ალყას. ისინი ფიქრობდნენ, რომ ხუთი დღით მაინც დაიკონდებოდნენ ქალაქის ალყით. მაგრამ ესეც ცუდი ფიქრი იყო.

სირაკუსს, ბუნებრივად მიუვალ ციხე-ქალაქს, გარს ერტყა ისედაც მაღალ კლდეებზე აღმართული ქვის სქელი კედლები. მასზე ამაოდ მიჰქონდათ იერიშები სახელოვან ათენელ მეზღვაურებსა და ჰოპლიტებს. მას შემდეგ ორასმა წელმა განვლო და ახლა რომაული ლეგიონები და საზღვაო ესკადრები იდგნენ სირაკუსის ვარშემო. რაც ვერ შესძლეს

ბერძნებმა, ფიცხელმა ალკიბიადემ და დინჯმა ნიკიასმა¹, მის განხორციელებას ფიქრობდა რომის „მახვილი“ მარკუს კლავდიუს მარცელუსი.

სირაკუზის მოსახლეობა არაჩვეულებრივი სიმამაცითა და ორგანიზებულობით იყო თავდაცვისათვის მომზადებული. ამ მხრივ განსაკუთრებული ყურადღების ღირსია გენიალური ადამიანი, რომელმაც თავისი მეცნიერული ნიჭი და მოსაზრებულობა მშობლიური ქალაქის გმირულ დაცვას მოახმარა. ეს იყო სახელოვანი მათემატიკოსი არქიმედე. უდიდესი წავლულის აზრი მედგრად დაუხვდა უხეშ რომაელთა სიკვდილისმთესველ მახვილს.

არქიმედემ ჭერ კიდევ ჰიერონის დროს გამოამქლავნა თავისი ნიჭი და ხელოვნება ყველა საბრძოლო სახის — როგორც შეტევითი, ასევე თავდაცვითი მანქანების, მექანიკური იარაღების, ქვის სატყორცნი კატაპულტებისა და სხვა „ჯადოსნური“ დანადგარების გამოგონებაში. ახლაც, როცა მარცელუსმა სირაკუზზე ზღვიდან და ხმელეთიდან იერიშები შიიტანა, ქალაქის შიგნიდან სეტყვასავით წამოვიდა უზარმაზარი მეგალოთები, ხის ნამორები, კუნძები, ლითონისა და ტყვიის გუნდები და ბასრი ისრების „ცეცხლი“. რომაელთა სამოცი გემისაგან შემდგარი ფლოტის შეტევა, რომელსაც უშუალოდ კონსული სარდლობდა, უმალვე დაიშხვრა. მარცელუსი აძიოდ ცდილობდა თავი აერიდებინა ქალაქიდან მომავალი ქვისა და ლითონის სეტყვისათვის და ისე მიახლოვებოდა მის კედლებს. მან უფრო მტკიცე და ურყევი იერიშებისათვის ერთად შეჰკრა რვა გემი, მოაწყო მათზე საიერიშო მანქანა, ე. წ. „სამბუკა“, მის გარშემო დარაზმა მთელი ფლოტი და დაიძრა ქალაქისაკენ. მაგრამ არქიმედემ კედლებზე აღმართა სრულიად უცნაური მანქანები, რომელთაც შორს გაეწვდინათ სწრაფად მოძრავი კაუჭები და „ტორეები“. ისინი უეცრად დაეშვნენ და მოწინააღმდეგის გემებს „ხელი ჩასჭიდეს“ შიგ ცხვირებში და ააწიეს. ზოგი მათგანი მალლა ჰაერში მიეჭანებოდა: შიშისაგან შეძრწუნებული რომაელები ერთიმეორეს ზედ ეხეთქებოდნენ, წყალში ცვივოდნენ და იხრჩობოდნენ; ამას ხელს უწყობდა ისიც, რომ ეს უცნაური „რვაფეხა“ მანამ აჯანჯლარებდა ხელში ჩაბლუჯულ გემს, სანამ ეკიპაჟისაგან მთლიანად არ გასცილიდა, შემდეგ კი გაუშვებდა და მალლიდან დაცეპული, გადაყირავებული გემი იძირებოდა; ან ზოგ ხომალდს, ზევით აწევამდე, წინიდან ააყირავებდა და თავის ეკიპაჟიანად ჩასძირავდა.

არანაკლები ზიანი ნახა აპიუს კლავდიუს პულხერმა, რომელიც ხმელეთიდან უტევედა სირაკუზს.

¹ ალკიბიადე და ნიკიასი იყვნენ ათენის საზღვაო ექსპედიციის მეთაურები სირაკუზის წინააღმდეგ (415—413) პელოპონესის ომების დროს (431—404).

მარცელუსმა უკან დახევის ბრძანება გასცა. მან მოიწვია სამხედრო საბჭო, თათბირი გაძარტა, თუ რა ღონისძიება გაეტარებინათ ამ უცნაურ, მანამდე არნახულ „ჯადოსნურ“ საშინელებათა წინააღმდეგ. ერთი რამ ყველას შეემჩნია: არქიმედეს მექანიკური იარაღები, ჩანდა, მხოლოდ შორს მანძილზე აზიანებდა მტერს, რადგანაც ამ „არტილერიას“ ქურავების გასასროლად გრძელი მანძილი ესაჭიროებოდა. ამიტომ გადაწყდა, რომ ღამით იღუმალ მიჰპარვოდნენ ქალაქის კედლებს და ახლო მანძილიდან მოეწყობოთ იერიში. ასეც მოიქცნენ.

მაგრამ, ეტყობოდა, რომ დიდ მექანიკოსს ესეც გათვალისწინებული ჰქონდა და ახლოს მოსული მტრის იერიშითა უვნებელსაყოფად სხვა სპეციალური მანქანებიც გამოუგონებია. როგორც კი რომაელები ქალაქს მიაღწენ, არქიმედემ კედლებში, დაბალზე, ადაშიანის სიმაღლეზე გამოჭრილი ხვრელებიდან გახსნა „ცეცხლი“. ამავე დროს, კედლების ზემოდან, ვერტიკალურად ეშვებოდნენ ქვის უზარმაზარი ლოდები. რომაელები იძულებული შეიქნენ ისევ უკანდახევა დაეწყობოთ. გაქცეულ მტრებს სირაკუზელებმა ისევ შორსშროლები „არტილერია“ დაუშინეს. რომაელები დიდად დაზარალებული შეეფარენ ბანაკებს.

შეშფოთებული მარცელუსი მწარედ დასცინოდა თავის „ინჟინერებს“, ტექნიკოს-მექანიკოსებს და ამბობდა: „ხომ არ შევწყვიტოთ ბრძოლა მათემატიკის ცენტრთანა?¹ ის ზღვიდან იტაცებს ჩვენს გემებს, დაცინვით ძირავს ჩვენს სამბუჯებს, გვიშენს საშინელ, მომაკვდინებელ სეტყვას, ხოლო თვითონ უვნებლად იტოვებს მითოლოგიურ ასხელებიან გოლიათებსო“. მარცელუსი იძულებული იყო ანგარიში გაეწია თავისი დაშინებული მეომრებისათვის, რომლებიც უბრალო ბაგირის, ნატყორცნი ქვისა თუ ისრის დანახვაზეც კი შიშისაგან თრთოდნენ.

ასე გაგრძელდა მთელი წელი. სირაკუზის აღების იმედი მარცელუსს რაიმე შემთხვევითობაზე უნდა დაემყარებინა. ის იძულებული გახდა მხოლოდ სუსტი ალყა განეგრძო ამაყი ქალაქის წინააღმდეგ. სიცილიაშიც, ისე როგორც იტალიის ფრონტზე, ომი წინაურდება.

214 წლის გაზაფხულზე ჰანიბალმა დასტოვა ზამთრის ბანაკები და აპულიიდან ისევ კამპანიაში გადავიდა. აქ ის კვლავ უნაყოფოდ ცდილობდა ზღვის სანაპირო ზოლის ხელში ჩაგდებას. სამხრეთ კამპანიაში მისი ყოფნის დროს რომაელებმა ხელში ჩაიგდეს ქ. კაზილინუმი. კონსულმა ფაბიუს მაქსიმე კუნქტატორმა სამნიუმში კართაგენელებს წაართვა რამდენიმე ქალაქი, ხოლო ტიბერიუს გრაქსმა მონებისაგან შემდგარი ლეგიონებით ქ. ბენევენტუმთან დაამარცხა კართაგენელთა ჯარე-

¹ ცენტრის მითოლოგიით ასხელიანი და ორმოცდაათთავიანი გოლიათი.
7. ანტიკური ქვეყნების ისტორია.

ბი, რომელთაც ჰანონი მეთაურობდა. გამარჯვებულებმა ზეიმითა და ღრობით გადასთელეს ბენევენტუმის ქუჩები.

214 წელს მიიწერა. ჰანიბალი ისევ აპულიაში გაეშურა გამოსაზამთრებლად. კამპანიაში მას მხოლოდ ქ. კაპუა რჩებოდა ხელთ. არც ერთი მხრიდან არ მოსდიოდა ჰანიბალს მაშველი ძალები. ერთხანს ფილიპე მაკედონელი გამოჩნდა მოიმედვე ვარსკვლავად, მაგრამ სუსტი მეტეორივით ეს იმედიც უმაღვე ჩაქრა. ფილიპე შეიჭრა ილირიაში, აიღო ქალაქი ორიკუმის¹ და გაჩნდა აპოლონიასთან, მაგრამ პრეტორმა მარკუს ვალერიუს ლევიუსმა დაამარცხა და განდევნა ის ილირიიდან.

213 წელს კონსულებად არჩეულ იქნენ ტიბერიუს სემპრონიუს გრაქუსი (მეორედ) და ახალგაზრდა ქვინტიუს ფაბიუს მაქსიმე, კუნქტატორის შვილი. არც ერთი მათგანი არჩევნებს არ ესწრებოდა. მოხუცი კონსული ფაბიუს კუნქტატორი თვითონ გაეშურა თავისი შემცვლელის, შვილის ბანაკში, სადაც ის მანამდე ლეგატის სახელწოდებით სარდლობდა ერთ ლეგიონს. კუნქტატორი ცხენზე ამხედრებული უახლოვდებოდა ახლად არჩეულ კონსულს; ეს დაუშვებელი იყო. მაგრამ მამა-შვილს შორის ჩამწყრივებული ლიქტორები ვერ ბედავდნენ „ჩამოხე!“ ეთქვათ დიდებული მოხუცისათვის. მაშინ კონსულმა უბრძანა მეთორმეტე ლიქტორს, რომელსაც უკვე გაუსწორდა კუნქტატორი, შეესრულებინა მისი მოვალეობა. ახალგაზრდა ფაბიუსის ბრძანება შესრულდა. კუნქტატორი ჩამოხტა ცხენიდან, მივახლა შვალს და უთხრა: „შვილო ჩემო, მე მხოლოდ მსურდა გამომეცადე, თუ რამდენად შეგიძლია კონსულის მოვალეობა შეასრულო“.

213 წელიც უფერულად და უშედეგოდ წავიდა. ჰანიბალი სამხრეთ იტალიაში ტარენტუმის ოლქებში დათარეშობდა. რომაელებმა ხელში ჩაიგდეს აპულიის ქალაქი არპი. იტალიაში საერთო მდგომარეობა თითქმის არ იცვლებოდა. ამავე დროს სიცილიაში სირაკუზის ალყა რომაელებს ჭერჭერობით არაფერ შედეგს არ აძლევდა. მაგრამ მარცელუსმა მანც ჩაიგდო ხელში სიცილიის რამდენიმე ქალაქი, მათ შორის დიდი ქალაქი ჰენა. მან რამდენჯერმე დაამარცხა კართაგენელთა საზღვაო და სახმელეთო ძალები, რომელთაც ჰიმილკონი მეთაურობდა.

მოვლენათა მრავალფეროვნებით გასულ სამ წელს სჯობნიდა 212 წელი; რომელიც პირველად რომაელთათვის მეტად უსიამოვნო ამბებით დაიწყო, თუნდაც იმით, რომ ორი დღე-ღამის განმავლობაში რომში საშინელი ხანძარი მძვინვარებდა და ქალაქის რამდენიმე უბანი დაიწვა

¹ მეტად საინტერესოა, რომ ორიკუმის და ილირიის კიდევ სხვა ორი ქალაქი (პოლა || კოლაჟი და კოლხინიუმის), პლინიუს უფროსის ცნობით, კოლხების მიერ დაარსებული ქალაქები ყოფილა.

გაუთავებელი ომებით დაქანცული მოსახლეობა ხშირად უიმედობის ქაობში ეშვებოდა. ცხოვრება აუტანელი და უცნაური სდებოდა. ხალხის ფიქრით, „თვით ღმერთებიც სხვანაირი წეიქნენ“. ამის ნიადაგზე თავს იჩენდა მრავალი სხვადასხვა სახის რელიგიური ცრუ ქადაგება, „წინასწარმეტყველება“, მაგიური ფანატიზმი.

ახალმა კონსულებმა, გაიუს ფულვიუს ფლავუსმა (მესამედ) და აპიუს კლავდიუს პულხერმა აღკვეთეს ქალაქში



ტარენტუმი.

არსებული უწესრიგობა და ახალი ჯარების შეკრებას შეუდგნენ. ამ წელს რომის საბრძოლო დროშების ქვეშ 23 ლეგიონი იდგა, ე. ი. დაახლოებით 140 000 მეომარი.

ამავე წელს რომაელთათვის ძლიერ დარტყმას წარმოადგენდა სამხრეთ იტალიის დიდი საზღვაო ქალაქის — ტარენტუმის დაკარგვა.

რომი ყოველთვის უნდობლად უცქერდა ტარენტუმისა და ზეორე ბერძნული ქალაქის — თურიუმის ერთგულებას. ეს განსაკუთრებით მას შემდეგ, რაც ხმა დაიჩაბა, რომ ჰანიბალს ურთიერთობა აქვს გაბმული ტარენტუმის მოსახლეობის დიდ ნაწილთან, რომელიც კართაგენული ორიენტაციის გზაზე იდგა და ქალაქში ჩაყენებულ რომაულ გარნიზონს მტრულად უყურებდა. ჰანიბალი უკანასკნელ ხანებში ტარენტუმის ოლქებს არ შორდებოდა და უცდიდა ხელსაყრელ დროს, რათა ხელში ჩაეგდო ეს მეტად მნიშვნელოვანი ზღვის სანაპირო ქალაქი, საიდანაც მას საშუალება ექნებოდა მჭიდრო ურთიერთობა გაეხა აფრიკასთან, სიცილიასთან და მაკედონიასთან. ამიტომ რომაელებს მუდამ ჰყავდათ ტარენტუმისა და თურიუმის მძევლები, მათი წარჩინებული მოქალაქენი და მმართველ ოჯახთა შვილები.

ერთ დღეს ხმა გავარდა, რომ მძევლებს რომიდან გაქცევა მოუხერხებიათო. მაგრამ ისინი მღევარმა მალე შეიპყრო. გასამართლების შემდეგ ჭერ სასტიკად გაროხგეს და შემდეგ ცნობილი კაპიტოლიუმის ტაძრის გვერდით ტარპეუმის კლდეზე გადასჩეხეს.

სანამ რომაელები ახალ მძევლებს მოითხოვდნენ, ტარენტუმის მოსახლეობამ თავისი განზრახვა სრულეში მოიყვანა. ტარენტუმიდან საძი დღის სავალზე დაბანაკებულ ჰანიბალთან საიდუმლო მოლაპარაკებას აწარმოებდა ქალაქის ერთ-ერთი გავლენიანი მოქალაქე ფილემენე, რომელიც ხალხის ფართო მასების მხარდაჭერით სარგებლობდა. იგი, რომელთა და მათი მომხრეების თვალის ასახვევად, იარაღსხმულა, ძაღლების თანხლებით მიდიოდა ქალაქგარეთ; სანადიროდ მივდივარო, — ასე ავრცელებდა ხმას. ასეთი კონსპირაციული წესით ხვდებოდა ჰანიბალს და თათბირობდა მასთან. საღამოს ფილიმენე ნანადირევით დატვირთული, რაშიაც კართაგენელებიც ეხმარებოდნენ. ბრუნდებოდა ქალაქში და ნანადირევის დიდ ნაწილს რომელთა გარნიზონის უფროსს გაიუს ლივიუსს მიართმევდა. ჰანიბალი თანახმა გახდა ტარენტუმისაგან მიეღო ისეთივე პირობები, როგორც კაპუსთან შეთანხმებით ჰქონდა: ტარენტუმი ინარჩუნებდა სრულ ავტონომიას და კართაგენელთაგან ჩაურევლობას, სამაგიეროდ ჰანიბალს გადასცემდნენ რომაულ გარნიზონს და ერთგული კავშირით შეეკვროდნენ ერთურთს. გადამწყვეტ დღეებში ხმა გავარდა, რომ ჰანიბალი ავად გამხდარა და ლოგინად არის ჩავარდნილიო. ამან კიდევ უფრო მოადუნა რომელთა გარნიზონის სიფხიზლე.

დანიშნული დღისათვის ჰანიბალმა თავისი არმიიდან ამოარჩია 10 000 ყველაზე მამაცი ქვეითი და ცხენოსანი მეომარი. ყველაფერი შესანიშნავად იყო გათვალისწინებული და გააზრებული. იმ დღეს შეთქმულებმა ნადიმობა გამართეს და გარნიზონის უფროსი გაიუს ლივიუსი თავისი უახლოესი თანამებრძოლებით უგრძობლად დაათვრეს. გვიან ღამით ჰანიბალი შეუმჩნევლად მიადგა ქალაქის აღმოსავლეთის კარებს და სინათლით სიგნალი მისცა შეთქმულებს. მათ, საპასუხო ნიშნის მიცემისთანავე, კარებთან მდგარი გუშაგები დახოცეს და ალაყაფის კარი გააღეს. კართაგენელები შეიჭრენ ქალაქში. ამასობაში ტარენტუმის მეორე, დასავლეთის კარებთან რომელმა გუშაგმა გაიგონა ჩვეულებრივი სტვენა და ძახილი; ეს ფილემენე ეძახდა მას: ჩამოდი, კარი გამიღე, ნანადირევი მოვიტანეო. გუშაგმა, სრულიად დაარხინებულმა, გააღო კარები და, როგორც კი მან ნანადირევს ცნობისმოყვარეობით დაუწყო სინჯვა, ზურგიდან მას ხანჯალი დასცეს. 1 000 კაცისაგან შემდგარი კართაგენელთა რაზმი აქედანაც შეიჭრა ქალაქში.

გარეთ, ქალაქის კედლებთან, ჰანიბალმა დასტოვა 2 000 მხედარი,

რომელთაც თავიდან უნდა აეცილებინათ გარედან ზოსალოდხელი ყოველგვარი საფრთხე. ყველა დანარჩენ ნაწილებს მან თავი მოუყარა ქალაქის ცენტრში, მოედანზე. აქ სარდალმა გაანაწილა ჯარები; ყველას მიუჩინა თავისი ამოცანა, დაიკავა ყველა გასასვლელი და აცნობა ქალაქს, რომ მოსულია რომაელთა გასანადგურებლად და მათგან ტარენტუმის გასანთავისუფლებლად. ის ამშვიდებდა მცხოვრებთ, ცდილობდა ქალაქში პანიკა არ გავრცელებულიყო. მართლაც ასე მოხდა. დილით ყველა დაშოშმინებული იყო. ქუჩებში ეყარნენ დახოცილი, იარაღაყრილი რომაელები. პანიბალმა ბრძანება გასცა ტარენტუმის მცხოვრებთა ყველა სახლზე აღენიშნათ სიტყვა „ტარენტუმელი“ (სიკვდილით დასჯებოდა, ვინც მოტყუებას შეეცდებოდა), რათა ყველა დანარჩენი სახლი, ე. ი. რომაელებისა, დაენგრიათ.

გარნიზონის ძირითადი ნაწილი, ახლადგამოუზიზღებელი ლივიუსის მეთაურობით, თავს აჯარებდა ქალაქის აკროპოლისს, რომელიც ზღვიდან შესავალს ჰკეტავდა. კართაგენელებმა ქალაქის მცხოვრებლებთან ერთად დაიწყეს აკროპოლისის წინააღმდეგ დიდი თბრლის გაქრა და მიწაყრილების აღმართვა. რომაელებმა ერთ-ორჯერ სცადეს ხელი შეეშალათ სმელეთიდან ბლოკადისათვის, მაგრამ პანიბალმა ისინი სასტიკად დაამარცხა და იძულებული გახდა უკანვე შებრუნებულიყვნენ. მალე კართაგენელებმა ამ მხრიდან კედელიც აღმართეს და აკროპოლისი ზღვიდანაც ხომალდთა ესკადრებით ჩაჰკეტეს.

პანიბალმა ტარენტუმში გარნიზონი დასტოვა. ხოლო თვითონ წინანდელ ბანაკში გაეშურა. მალე ამის შემდეგ პანიბალს მხარეზე გადავიდნენ ზღვის სანაპირო ქალაქები: თეროუმი, მეტაპონტი და ჰერაკლეა.

კონსულები მიზნად ისახავდნენ ალყაში მოექციათ და რაც შეიძლება მალე ჩაეგდოთ ხელში კაპუა. პანიბალს ესმოდა თუ რას მოაწავებდა კაპუის მოსალოდნელი დაცემა. ამიტომ ყოველნიარად ცდილობდა არ დაეშეკა კონსულთა განზრახვის განხორციელება. მან მტრის უზარმაზარ, მაგრამ იტალიის სხვადასხვა ოლქებში გაფანტულ არმიებზე ახალი გამარჯვებები ჰპოვა. აპულიაში მთლიანად გაანადგურა სამხედრო ტრიბუნის ცენტენიუსის 8 000 მეომრისაგან შემდგარი მოხალისეთა ჯარი; ბრძოლაში დაიღუპა თვით ცენტენიუსი. იმავე ოლქში პანიბალმა სასტიკად დაამარცხა პრეტორ გენუს ფულვიუსის დიდი არმია. 18 000 მეომრიდან მხოლოდ 2 000 რომაელი გადარჩა. ასევე, კართაგენელებმა ლუკანიაში გაანადგურეს მამაცი პროკონსული ტიბერციუს სემპრონიუს გრაქუსისი, რომელმაც ერთ-ერთი ლუკანიელის შოღალატური რჩევით მტერს საშუალება მისცა საფარში შეეტყუებინათ ის. გრაქუსისის მეომართაგან ცოცხალი აღარავინ დარჩენილა.

უკანასკნელი დაეცა თვით ვრაცხუსი. პანიბალმა დიდის პატივით დაკრძალა მამაიკი მტერი.

ამ ბედკრულ წელს რომაელებმა მხოლოდ სიცილიიდან მიიღეს სასიხარულო ამბავი.

212 წლის განათხულებზე მარცელუსი ახალი ენერგიით შეუდგა სირაკუზის აღსას. მის ბანაკში გამოცხადებული ზოგიერთი სირაკუზელი-საგან ის დიდი გულსისუროთ სწავლობდა ყოველ დეტალს. ასე, მაგალითად. მან შეამჩნია, რომ ქალაქის დასავლეთი კედლის ერთი ნაწილი შედარებით დაბალი, აღვილად გადასალახავი და ნაკლებად დაცული ჩანდა. მარცელუსმა ისიც შეიტყო, რომ მალე სირაკუზელები არტემიდეს¹ სახელობის დღესასწაულით გაერთობოდნენ. ამასთან დაკავშირებით სირაკუზელები სამი დღის განმავლობაში ღვინის განუზომელი სმითა და ღრეობით თავდავიწყებას მიეცემოდნენ. სწორედ ამ დროისათვის მარცელუსმა თავისი არმია რამდენიმე რაზმულად დაჰყო და ნაწილ-ნაწილ საიდუმლოდ დასძრა ქალაქისაკენ. შუადამისას კედლის აღნიშნულ ნაწილზე რომაილოთ მოწინავეებმა საიერიშო კიბეები მიაღ-



არქიმედე.

ეს და ქალაქში ჩავიდნენ. სულ მალე კედელს გადაღმა გადავიდა მთელი არმია. ქალაქში ბრძოლა და სისხლისღვრა რამდენიმე კვირა გაგრძელდა. ეს იყო ერთ-ერთი უსაშინელები ხოცვა-ჟლეტა, რომელიც კი სამხედრო ისტორიის საშინელებებს მუდამ თან ახლავს. რომაელებმა მათთვის ჩვეული სიმხეცის შეუდარებელი მაგალითები აჩვენეს ისტორიას. არ ინფობდნენ არავის, კაცსა თუ ქალს, მოხუცსა თუ ჩვილ ბავშვს. მშვენიერი ბერძნული ქალაქი, ანტიური კულტურის შესანიშნავი ტაძარი მთლიანად სისხლის მორევში და ნანგრევებში ჩაიძირა. თვით მარცელუსი ამაოდ ცდილობდა შეეჩერებინა მეომართა სიმხეცე; მას ყურს არავინ უგდებდა. სისხ-

ლით მოსვრილი მძვინვარე ლეგიონერები საშინელი ღრიალით

¹ არტემიდე (ბერძნულთა) იგივე დიანა (რომაელებთან) — ნადირობის ქალღმერთი, აპოლონის და

ელექტრობოდნენ ყველას, ვინც კი შეეცდებოდა ხოცვა-ჟლეტაზე და ძარცვა-გლეჯაზე მათს შეყენებას. იტაცებდნენ ყველაფერს, რაც კი ხელთ მოხვდებოდათ და წაღება შეიძლებოდა; ანადგურებდნენ ყველაფერს, რის მოტაცება და წაღება შეუძლებლად ეჩვენებოდათ.

აურაცხელ მსხვერპლთა შორის იყო უძვირფასესი — არქიმედე. იგი მიწაზე მჯდარი ღრმად იყო გართული მის მიერვე სილაზე დახაზული გეომეტრიული ფიგურების, რაღაც თეორემების ამოხსნით, როცა თავს წაადგა როზელი მეომარი გასისხლიანებული მახვილით და უბრძანა მას — სამხედრო ნადავლს — წამომდგარყო ფეხზე. „ხელს ნუ მიშლი ამოცანას ამოხსნაში!“ — შეჰყვირა თავის აზრებში ღრმად ჩაფლულმა არქიმედემ. ეს იყო მისი უკანასკნელი სიტყვები. იღვრა მახვილმა და გენი-ალური მათემატიკოსის თავი მისსავე თეორემით შეთხზულ ნახაზზე დაეცა.

რომაელებმა სირაკუზში აურაცხელი ნადავლი ჩაიგდეს ხელში. ბერძნული ხელოვნების, კულტურის მრავალი ძეგლით აავსო ძარცვულსმა რომის ტაძრები.

სირაკუზის დაცემის შემდეგ რომაელებმა აიღეს აგრიგენტუმი და მომდევნო წელს მთელი სიცილია კვლავ გასწმინდეს კართაგენელთაგან.

ამგვარად, ჰანიბალმა ისევ დაჰკარგა სამხრეთის ძლიერი პლაცდარმი და ხიდი აფრიკიდან იტალიისაკენ.

„ჰანიბალი კარინაზეა!“

იტალიაში 212—211 წწ. საომარ მოქმედებათა ცენტრალურ პუნქტს ქ. კაპუა წარმოადგენდა. თუ ჰანიბალი ამ უმნიშვნელოვანესი ქალაქის შენარჩუნებას შესძლებდა, ეს იმას ნიშნავდა, რომ იტალიის ფედერაციის დაშლას თუ მთლიანად ვერ მიაღწევდა, მას იმ სახით მაინც დაინარჩუნებდა, როგორადაც მოპოვებული ჰქონდა. ხოლო, თუ კაპუას, რომელთა ალყისა და აღებისაგან ვერ გადაარჩენდა, რასაც უთუოდ მისი მკაცრად დასჯაც მოჰყვებოდა, მოსალოდნელი ხდებოდა, იტალიის ის ქალაქები, რომლებიც მას მხარს უჭერდნენ, ზურგს შეაქცევდნენ და ისევ რომთან შერიგების გზაზე გადავიდოდნენ.

ამიტომ კაპუის გარშემო მოწინააღმდეგენი დიდი სიმძლავრით ებრძოდნენ ერთურთს. რომელი კონსულები 212 წელს შეუდგნენ კაპუის ალყას. ქალაქის გარშემო ოლქები მთლიანად აოხრებული. და გაპარტახებული იყო. ალყაში მოქცეულებს შიმშილით დაღუპვა ელოდა, ხოლო დანებების შემთხვევაში — საშინელი ნგრევა-განადგურება. ისინი, კართაგენელთა გარნიზონთან ერთად, თავგამოდებით იცავდნენ ქალაქს, ხშირად გარეთაც გამოიჭრებოდნენ და თავგანწირულ ბრძოლებს უმართავდნენ მტრებს. ხშირად მოწინააღმდეგეთა მხარე-

ებიდან ფალავნებიც გამოდიოდნენ და ორთაბრძოლებს მართავდნენ. რომაელები ქალაქის გარშემო ღრმა თხრილებსა და მაღალ მიწაყრილებს ავლებდნენ. კაპუის მცხოვრებლები ჰანიბალთან ზედიზედ გზავნიდნენ შიკრიკებს და თავიანთი გაჭირვების ამბავს ატყობინებდნენ, დახმარებას სთხოვდნენ.

ჰანიბალმა პირველად გაგზავნა თავისი ერთ-ერთი სარდალი ჰანონი და უბრძანა მიშველებოდა კაპუას, პირველ რიგში მისთვის მიეწოდებინა სურსათ-სანოვავე. მაგრამ ჰანონმა ვერ მოახერხა დავალების შესრულება. იგი რომაელებთან ერთ-ერთ შეტაკებაში დამარცხდა და ისევ სამხრეთისაკენ გაბრუნდა. მაშინ ჰანიბალი, რომელმაც დაასრულა ტარენტუმის ხელში ჩაგდება, თვითონ გაეშურა კაპუის გადასარჩენად. როგორც კი კონსულებმა მრისხანე მტრის მოახლოება შეიტყვეს, სასწრაფოდ მოხსნეს ალყა და ჩრდილოეთისაკენ გადაინაცვლეს. მაგრამ ჰანიბალს მთელი არმიით არ შეეძლო დიდხანს დარჩენილიყო აოხრებულ და დამშუელ კამპანიის ოლქში. მან პურის მარაგი დაუტოვა კაპუის მცხოვრებლებს, გაამხნევა ისინი, რჩევა-დარიგებანი მისცა გარნიზონის უფროსებს ბოსტარსა და ჰანონს და თვითონ ისევ სამხრეთისაკენ გაეშურა.

211 წლისათვის ქვინტუს ფულვიუს ფლაკუსსა და აპიუს კლავდიუს პულხერს, ყოფილ კონსულებს, რომაელებმა პროკონსულთა უფლებები მიანიჭეს და უბრძანეს განეგრძოთ კაპუის ალყა. მართლაც, როგორც კი ჰანიბალი კამპანიიდან წავიდა, ფულვიუსი და აპიუსი ახალი გაზრდილი ძალებით კვლავ რკინისებურ წრედ შემოერტყნენ კაპუას. ქალაქში დაიწყო აუტანელი შიმშილი. დიდის გაჭირვებით მოხერხდა ჰანიბალთან კაცის გაგზავნა და მისთვის ხმის მიწვდენა. კართაგენელმა შეატყო, რომ, თუ არ იჩქარებდა, კაპუა დღეს თუ ხვალ მისი აღარ იქნებოდა. ამიტომ მან არმიიდან აღოარჩია ყველაზე უფრო სწრაფი ქვეითი და ცხენოსანი მეომრები და „მგლურით“ დაიძრა კამპანიისაკენ. ის შეუმჩნეველად მივიდა ტიფატის მთაზე, რომელიც ზემოდან დაჰყურებდა კაპუას. აქედან მოულოდნელი დარტყმით ხელში ჩაიგდო იქვე მდებარე ერთ-ერთი ციხე-სიმაგრე და იქიდან გამოდევნა რომაული გარნიზონი; მაშინვე აცნობა კაპუის დამცველებს თავისი მოსვლა და დაუნიშნა დღე, როდის უნდა გამოსულიყვნენ ქალაქის შიგნიდან რომაელთა წინააღმდეგ (იმ დროს, როცა თვითონ გარედან დაჰკრავდა მტერს).

ჰანიბალის ახალმა გამოჩენამ ძრწოლა მოჰგვარა რომაელთა ბანაკებს. მაგრამ სარდლებს ამჯერად ალყის მოხსნა არ უფიქრიათ. მათ გაინაწილეს ბრძოლის ხელმძღვანელობა: აპიუს კლავდიუსი თავისი ლეგიონებით შეებრძოლებოდა ქალაქიდან გამოსულ კაპუელებს; ფულ-

ვიუსი კი დაუხვდებოდა ჰანიბალს. ამავე დროს, პრეტორი კლავდიუს ნერონი ერთი ლეგიონით (მე-6 ლეგიონი) უნდა გამოსულიყო ბანაკს გარეთ და პირველი ბრძოლა გაემართა ჰანიბალთან, ხოლო ლეგატი ფულვიუსი (არაპროკონსული) იტალიური მხედრობით უნდა შეებოდა ნუმიდელ ცხენოსნებს.

ბრძოლის დაწყებისთანავე ჰანიბალმა მძლავრი იერიშებით სასტიკად დაამარცხა ნერონისა და ლეგატის ჯარები. ისინი იძულებული შეიქნენ ისევ ბანაკებისათვის შეეფარებინათ თავი. ჰანიბალი ნუმიდური კავალერიით დაჰქროდა რომაელთა ბანაკების გარშემო; ისრის სეტყვას უშენდა და ბრძოლაში იწვევდა მათ, მაგრამ რომაელებმა მტკიცე გადაწყვეტილება მიიღეს: არავითარ შემთხვევაში არ გამოსულიყვნენ ჰანიბალთან გაშლილ ველზე საბრძოლველად, სადაც მათ უეჭველი დამარცხება ელოდათ, ხოლო კართაგენელებს რომაელთა ბანაკში შეჭრა არ შეეძლოთ.

ჩაფიქრდა ჰანიბალი. ბანაკიდან მოწინააღმდეგის გამოტყუება არ ხერხდებოდა, არც მათში შეჭრა; ისიც მოსალოდნელი იყო, რომ ახალ კონსულთა არმიები მოვიდოდნენ და თავის მხრივ ალყაში მოაქცევდნენ ჰანიბალს; კაპუა კი დაღუპვის კარზეა მისული; საჭიროა როგორმე იხსნას ტანჯული ქალაქი, რომლის დაცემასაც მისთვის, შესაძლოა, მრავალი უსიამოვნო შედეგი მოჰყვეს.

და აი, პირველად მთელ თავის ლაშქრობათა პერიოდში, ჰანიბალმა აიღო გეზი ამ ლაშქრობათა საბოლოო მიზნისაკენ, რომისაკენ! რასაკვირველია. მას სრულებით არ უფიქრია, რომ ახლა ასეთ პირობებში მოხერხდებოდა რომის ხელში ჩაგდება. ეს ხომ მას არ უფიქრია ტრანიმენისა და, განსაკუთრებით. თავისი ძლიერების მწვერვალზე ყოფნის დროსაც. კანეს ბრძოლის შემდეგ. ჰანიბალის რომზე ლაშქრობის მიზანი ამჯერად წმინდა პროვოკაციული ხასიათისა იყო: ამით მას სურდა თავზარი დაეცა რომისათვის და აეძულებინა იგი მოეხსნა კაპუის მოალყე არმიები საკუთარი თავის დასაცავად. ამგვარად კაპუა გადარჩებოდა. ამიტომაც ჰანიბალის განზრახვა სრულებით არ ატარებდა საიდუმლო ხასიათს. პირიქით, იგი, კამპანიაში ჩამოსვლიდან მეხუთე დღეს, საქვეყნოდ ყველასათვის, და განსაკუთრებით რომისათვის, აშკარად დაიდრა პირდაპირ რომისაკენ.

ჰანიბალმა პირველ რიგში ეს ამბავი შეატყობინა კაპუას, რათა მას კართაგენელთა მოულოდნელი წასვლით მხნეობა არ დაეკარგა და იარაღი არ დაეყარა; შეატყობინა კაპუელებს, თუ რა მიზანს ისახავდა მისი წასვლა კამპანიიდან.

ჰანიბალმა არაჩვეულებრივი სისწრაფით გაიარა სამნიუმი, გადაუხ-

ვია ჩრდილო-დასავლეთით და დაადგა რომისაყენ მიმავალ ე. წ. „ლათინურ გზას“ (via Latina).

ფულვუსმა დაუყოვნებლივ მისწერა სენატს ჰანიბალის რომისაყენ წასვლის ამბავი. ხალხისაგან საიდუმლოდ შეიკრება სენატის სხდომა. გაიმართა კამათი, თუ როგორ მოქცეულიყვნენ ამ მოულოდნელი და თავზარდამცემი საფრთხის თავიდან ასაცილებლად. სენატორთა ერთი ჯგუფი შოითხოვდა სასწრაფოდ მოეხსნათ კაპუის ალყა და იქ მდგარი არმიები გადმოესროლათ რომის დასაცავად. მოხუცი ფაბიუს მაქსიმე კუნქტატორი კი გაიძახოდა: ძნელი დასაჯერებელია, რომ ჰანიბალმა ახლა, როცა მან კაპუასთან ვერავითარ წარმატებას ვერ მიაღწია, გაბედოს რომზე წამოსვლა მაშინ, როცა მან ეს ვერ გაბედა კანესთან უბრაწყინვალესი გამარჯვების შემდეგო. ხოლო, თუ ის მართლა რომზე მოდის, მაშინ ეს მისი, რაღაც ჩვეულებრივი ხრიკი იქნება და სხვა არაფერიო. ბოლოს ისევ კომპრომისული წინადადება მიიღეს: უნდა გაეღზავნათ ბრძანება კაპუის მოალყე არმიების ბელადებისათვის ერთი მათგანი თავისი არმიით დარჩენილიყო ალყის გასაგრძელებლად, ხოლო მეორე არმია თავისი სარდლით სასწრაფოდ წამოსულიყო რომში. ასეც მოხდა. კაპუასთან დარჩა აბიუს კლავდიუსი, რომელსაც უკანასკნელ ბრძოლაში მიღებული ჭრილობისაგან მგზავრობა არ შეეძლო, ხოლო ფულვიუსი 15 000 ლეგიონერთა და 1 000 ცხენოსნით მოკლე გზებით სწრაფი მარშით გაეშურა რომისაყენ. მას უნდა ჩაესწრო ჰანიბალისათვის რომში.

გზადაგზა ჰანიბალი საშინლად აოხრებდა ახლომახლო ოლქებს. პანიკით მოცული მცხოვრებთა ბრბოები მიაწყდა რომის კარიბჭეებს და თავშესაფარებლად შეიპურენ მასში. ჰანიბალი ექვსი კილომეტრის მანძილზე მიუახლოვდა რომს და ბანაკი დასცა. რჩეული ნუმიდიური ესკადრონებით ის ელვის სისწრაფით გაჩნდა ქალაქის ჩრდილოეთ-აღმოსავლეთ კარიბჭესთან, კოლონის კარებთან.

არასოდეს რომს ასეთი შიში და ძრწოლა არ უგრძენია. მის კედლებთან იდგა უსაშინელესი მტერი, რომლის სახელის სხენებაც კი თავზარსასცემდა ყოველ რომაელს. „ჰანიბალი კარიბჭეზეა!“ (Hannibal ante portas!), „ჰანიბალი კარიბჭეზეა!“¹ განუწყვეტლივ ყვიროდნენ ქალაქის ყოველ კუთხეში. ქუჩებში, სახლებსა თუ ტაძრებში ისმოდა ხმამაღალი გოდება, ისტერიული ტირილი, ღმერთებისადმი ღალადი და ლოცვა-ვედრება. ქალები მუხლებზე ეცემოდნენ საკურთხევლების წინაშე, ხელებს იწვდიდნენ ზეცისაკენ, თმებით წმენდდნენ, ხეხავდნენ

¹ ეს გამოთქმა ახლაც ფართოდაა გავრცელებული. როცა რაიმე საფრთხე შეიქმნება, იტყვიან: „ჰანიბალი კარიბჭეზეა“.

ტაძრების იატაკებს და შესასვლელებს, ღმერთებს ავედრებდნენ თავი-
ანთ შვილებს.

მაგრამ, ამავე დროს, ხელისუფლებას არასოდეს არ გამოუჩენია-
ისეთი ორგანიზებულობა და მხნეობა, როგორც ახლა. უკიდურესი საფ-
რთხის პირობებში. სენატი დღე-ღამეების განმავლობაში იდგა ფორუმ
რომანიუმზე და განკარგულებებს აძლევდა მაგისტრატებს, რაზმავდა
ხალხს ქალაქის კედლებისა და კარიბჭეების გასამაგრებლად. რომაელ-
თა საბედნიეროდ. სრულიად შემთხვევით იმ დროს ქალაქში აღმოჩნდა
ოთხი ლეგიონი; იმ დღეებში კონსულებს ჭარების შეკრება ჰქონდათ.
ნაბრძანები და ჰანიბალიც სწორედ მაშინ მოვიდა, როცა რომაელთა-
ლეგიონები უკვე ფორმირებული იყვნენ. ამას ზედ ემატებოდა კაპუ-
რიდან ფულვიუსის მიერ ჩამოყვანალი არმია და რომის მრავალრიცხოვა-
ნი მცხოვრებნი, ყველანი იარაღასხმულნი მშობლიური ქალაქის გადა-
სარჩენად.

ჰანიბალისათვის საკვირველი არც უნდა ყოფილიყო რომის მომზა-
დებული დასვედრა. მისთვის ყველაზე დიდი საფიქრებელი ის იყო,
რომ მისმა ხერხმა ნაყოფი არ გამოიღო: კაპუა კვლავ ალყაში რჩებოდა.
იქ დარჩენილ რომაულ არმიას სრული შესაძლებლობა ჰქონდა წარ-
მატებით მოეგერიებინა ყოველგვარი თავდასხმა ქალაქის შიგნიდან
იქნებოდა ის, თუ გარედან.

ბრახმორეულმა ფინიკელმა ხელი მიჰყო რომის გარეუბნების
აოხრებას. კონსულებმა, გ ნ ე ი უ ს ფ უ ლ ვ ი უ ს ც ე ნ ტ უ მ ა ლ უ ს-
მ ა და პ უ ბ ლ ი უ ს ს უ ლ პ ი ც ი უ ს გა ლ ბ ა მ, რამდენჯერმე გა-
მოიყვანეს არმიები კართაგენელებთან საომრად. მაგრამ მცირედი შე-
ტაკებებისა და გაკენწლავების შემდეგ ისევ ქალაქში შევარდებოდნენ
და კარებს ჰკეტავდნენ.

ჰანიბალი ამაოდ დაჰქროდა მის მიერვე ნაცარტუტად ქცეულ ველ-
ზე. რომის სრულ სიძლიერესა და დაარსებულობაში ის კიდევ
უფრო დარწმუნდა, როცა შეიტყო, რომ რომაელებმა, ასეთი საფრთხის
პირობებში, არმიის ნაწილი ესპანეთში საომრად გაგზავნეს. ჩანდა,
რომ ისინი აინუნშიაც არ აგდებდნენ დაუპატიებელი სტუმრის უეც-
რად მოვარდას, რომელიც, თურმე, არც ისე საშიში ყოფილა... ჰანიბა-
ლის გაოცებას საზღვარი არ ჰქონდა, როცა მან სხვა უცნაური ამბავიც
შეიტყო: რომში ახლა გაუყიდიათ მიწის ის რაიონი, სადაც კართა-
გენელთა ბანაკები იყო განლაგებული! ამის გამგონე ჰანიბალმა თვი-
თონაც საქვეყნოდ გამოაცხადა, რომ ის ჰყიდის რომის ფორუმთან
მდებარე ოქრო-ვერცხლის ნივთთა მაღაზიებს.

დიდხანს ასე ვერ გაგრძელდებოდა. ჰანიბალმა ბანაკი აპყარა და
სასწრაფოდ დასტოვა ლაციუმში. ის კვლავ სამხრეთისაკენ გაეშურა. კონ-

სულებმა გამოიყვანეს არმიები და ფეხდაფეხ დაედევნენ მტერს. როცა ჰანიბალი საბოლოოდ დარწმუნდა, რომ კაპუის ალყა ისევ გრძელდებოდა და მისი ხსნის იმედებიც ამოწურული იყო, გაცოფებულმა უეცრად შემოაბრუნა არმია და სრულიად მოულოდნელად შეუტია დადევნებულ კონსულებს. კვლავ იელვა მრისხანე ფინიკიელის ძლევა მოსილმა მახვილმა. რომაელები სასტიკად დამარცხდნენ და დიდად დაზარალებული უკუიქცნენ.

ჰანიბალმა საბოლოოდ დასტოვა კამპანიის ველები; კაპუის ხსნის ფიქრზეც საბოლოოდ აიღო ხელი. ის დაეშვა სამხრეთით, ბრუციუმისაკენ.

ამგვარად ჩაჰკრა სუსტი, მაგრამ მეტად საშიში ნაპერწკალი, რომელიც პუნიკურმა გრიგალმა ტიცინიუს-ტრებიუსა, ტრაზიმენისა და კანეს ზეცადატყორცნულ ხანძართაგან აიტაცა და ძლივს მიიტანა რომის კარიბჭესთან. ჰანიბალმა მხოლოდ დაჰყნოსა მტრის „ჯადოსნური“ უძლეველობა და საშინელი კომმარით შეპყრობილი უმაღვე უკუიქცა, რის შემდეგაც უკვე გავლილი, დაწყევლილი გზით ხელახლა აღაარსოდეს გაივლიან. მან საბოლოოდ დასტოვა რომი, სადაც მის შესახებ დარჩა მხოლოდ საშინელი შეძახილი: „ჰანიბალი კარიბჭეზეა!“ რითაც შემდეგ რომელი მატრონები და გადიები ახირებულ, გააზიზებულ და ატირებულ ბავშვებს აშინებდნენ.

კაპუის მოსახლეობამ საბოლოოდ დაჰკარგა ჰანიბალისაგან დახმარებისა და საერთოდ ხსნის ყოველგვარი იმედი. ალყა კიდევ უფრო მძიმე შეიქნა. როცა ფულვიუს ფლაკუსი ისევ დაბრუნდა რომიდან და თავისი არმიით მოაღყეებს შეუერთდა. საშინლად დამშეული ხალხი მოედანზე იკრიბებოდა და სენატისაგან რაიმე ღონისძიებების გატარებას მოითხოვდა, ზოგი რომთან შერიგების წინადადებას აყენებდა, ზოგიც სიკვდილამდე ბრძოლის განგრძობის მომხრე იყო. ქალაქის ხელმძღვანელობა. სენატი ვეღარ ართმევდა თავს მეტისმეტად დამძიმებულ მდგომარეობას. ყველაზე გავლენიანმა სენატორმა, რომაელთა უდიდესმა მოძულემ და მათ წინააღმდეგ უპირველესმა მებრძოლმა ბიბიუს ვარიუსმა ვრცელი სიტყვა წარმოსთქვა ხალხის წინაშე. იგი ყველას მოუწოდებდა არ ეფიქრათ რომთან შერიგებაზე, ეს შეუძლებელიც იყო, და ებრძოლათ მანამ, სანამ არ დაიხოცებოდნენ. შემდეგ ბიბიუსმა ყველა სენატორი, რომელსაც კი არ სურდა რომაელთა სამარცხვინო ტყვეობაში ჩავარდნილიყო, მიიწვია თავის სახლში, ვახშამზე, რათა იქ, ნადიმის შემდეგ, ყველას თვითმკვლელობით დაესრულებინა სიცოცხლე. მართლაც, 27 მთვრალმა სენატორმა საწამლავით საგვს თასები დასცალეს. ბოლოს ერთმანეთს გადაეხვივნენ, დაღუპული სამშობლო დაიტირეს და სიკვდილს მინებდნენ. ზოგიერთი

მათგანი ეზოში სპეციალურად გამზადებულ კოცონზე დასწვა მსახურ-
მა. ასეთი იყო ბიბიუსის ანდერძი. ზოგი კი, ვინც მოისურვა, თავიანთ
ოჯახებში დაბრუნდნენ და იქ დალიეს სული.

სენატორთა უმრავლესობა რომთან შერიგების იმედს არ ჰქარავ-
და. მათ გაგზავნეს ელჩები რომაელთა ბანაკში და, სიცოცხლის შე-
ნარჩუნების საფასურად, ქალაქის ჩაბარება შესთავაზეს.

მეორე დღეს კაპუის ალაყაფი გაიღო და ფულვიუს ფლაკუსი ერთი
ლეგიონითა და ცხენოსანთა ესკადრონებით შეიჭრა მასში. მან ძლიერი
ყარაული დააყენა კარიბჭეებთან, რომ ქალაქიდან არც ერთი კაცი არ
გასულიყო, და მოითხოვა იარაღის დაყრა. რომაელებმა პირველად
ჩაიბარეს დატყვევებულ კართაგენელთა გარნიზონი მათი მეთაურებით,
ბოსტარითა და პანონითურთ. ყველას ბორკილები დაადეს და მონებად
აქციეს. ფულვიუსს, მისი ბრძანებისამებრ, სასწრაფოდ მიართვეს 70
გირვანქა ოქრო და 3 200 გირვანქა ვერცხლი. შემდეგ მან ტყვეობის
ბორკილები დაადო კაპუის 53 სენატორს; აქედან 28 გაგზავნეს ტეა-
ნუმში, ხოლო 25 — კალესში (ორივე კამპანიის ქალაქია).

პროკონსულები კაპუის სენატორთა დასჯაზე სხვადასხვა აზრისა-
ნი იყვნენ. ფულვიუსი მოითხოვდა დაუყოვნებლივ დაესაჯათ ისინი სიკ-
ვდილით, ხოლო აპიუს კლავდიუსი აცხადებდა მათ დასჯაზე თავი შე-
ეკავებინათ მანამ, სანამ ამ საკითხს რომში არ გაარჩევდნენ და მასთან
დაკავშირებით სენატიდან რაიმე ბრძანება არ მოვიდოდა.

როდესაც ფულვიუსი დარწმუნდა იმაში, რომ მისი კოლეგა მას არ
უთმობდა. ღამით, 2 000 მხედრის თანხლებით სასწრაფოდ გაქუსლა ტე-
ანუმში. დილით მივიდა იქ და ბრძანება გასცა მის წინაშე მოეყვანათ
დატყვევებული კაპუელი სენატორები. მისივე ბრძანებით ისინი სას-
ტიკად გაჯობეს, შემდეგ თავები დააყრევინეს. აქედან ფულვიუსი გა-
ეშურა კალესისაკენ. და აი, როცა ის მოსამართლის სკამზე იჯდა და ის
იყო სამარცხვინო ბოძებზე მიკრული კაპუელი სენატორებისათვის
სიცოცხლე უნდა მოესწრაფებინათ, რომიდან მოვარდა აქაფებულ
ცხენზე ამხედრებული შიკრიკი, რომელმაც პროკონსულს გადასცა
სენატის წერილობითი ბრძანება. ფულვიუსი მიხვდა, რომ წერილში
ნაბრძანები იყო განწირულთა დასჯის გადადება. ამიტომ წერილი გა-
უხსნელად ჩაიღო ჯიბეში და ლიქტორებს უბრძანა განეგრძოთ თავისი
საქმე. როცა ყველა კაპუელ სენატორს თავები გააგდებინეს, ფულვიუს-
მა განსნა წერილი და გამოაცხადა ის, რასაც მოელოდა: დასჯილები
შეწყალებულები იყვნენ. ის იყო პროკონსული ტრიბუნიდან წამოდგა,
ხალხის რიგები გაიპო და გამოიჭრა კამპანიელთა შორის არაჩვეუ-
ლებრივი სიმამაცითა და პატიოსნებით სახელგანთქმული ცერინუს
ვიბელიუს ტავრეა. ის აღშფოთებული მივარდა პროკონსულთან

და შესძახა: „უბრძანე, მეც მომკვეთონ თავი, რათა შენ შესაძლებლობა გექნეს დაიკვეხო, რომ სიცოცხლეს გამოასალნე კაცი, გაცილებით შენზე უფრო ღირსეული“. — „შენ ჭკუაზე არ უნდა იყო, ტავრეა. მე რომ შენი სურვილი შევასრულო, ამის საშუალებას არ მაძლევს სენატის ახლანან მიღებული ბრძანება“, — უპასუხა მას ფულვიუსმა. მაშინ გაშმაგებულმა კამპანიელმა შეპყვირა: — „მამ, როცა ჩემი სამშობლო მტრების ულუფად იქცა, როცა ჩემი მეგობრები და ნათესავები დაიღუპნენ, როცა მე ჩემივე ხელით დავკალი საკუთარი ცოლ-შვილი, რომ საბუნებრივად მტრის შეურაცხყოფისაგან მეხსნა, მე წართმეული მაქვს შესაძლებლობა გავინაწილო თანამოქალაქეების მწარე ბედი; დაე, ჩემმა გაბედულებამ მისხნას საზიზღარი სიცოცხლისაგან“. ამ სიტყვებით ტავრემ იძრო კაბის ქვეშ დამალული ხანჯალი, მძლავრად ჩაიკა გულში და უსულოდ დაეცა გულქვა რომაელის ფეხებთან.

ამგვარად, 80 კაპუელი სენატორი გამოესალმა სიცოცხლეს. 300-მდე წარჩინებულ მოქალაქეს საპატიმროებში ამოჰხადეს სული. კაპუის მოსახლეობის უმრავლესობა მონებად გაჰყიდეს. რომში დიდხანს იყო ბჭობა იმის შესახებ, თუ როგორ მოქცეოდნენ თვითონ ქალაქს: დაენგრაოთ ის, თუ დაეტოვებინათ მკაცრი ქვეშევრდომობის პირობებში. ბოლოს დადგინდა ეს უკანასკნელი აზრი. კაპუა დაუნგრეველი დარჩა, მაგრამ მას წაერთვა ყოველგვარი თვითმმართველობის უფლება — აღარც სენატი, აღარც სახალხო კრება; მისი ოლქები მთლიანად რომის სახელმწიფო საკუთრებად გამოაცხადეს. კაპუის ყოველგვარი საქმეების საწარმოებლად რომიდან ყოველწლიურად იგზავნებოდა სპეციალურად არჩეული პრეფექტი.

კაპუის დაცემამ და დასჯამ როგორც მტრებზე, ისე მეგობრებზე უდიდესი შთაბეჭდილება მოახდინა. ცხადი ხდებოდა, ჰანიბალს უნარი აღარ შესწევდა დაეცვა თავისი მოკავშირენი. ამიტომ ამ უკანასკნელებმა დაიწყეს ფიქრი რომთან შერიგებაზე. ჰანიბალი რომიდან გამობრუნებისთანავე ცდილობდა გაექარწყლებინა კაპუის დაცემით გამოწვეული საყოველთაო შთაბეჭდილება. ის შეიჭრა იტალიის უკიდურეს სამხრეთის რაიონებში და უეცრად დაეცა ქ. რეგიუმს. მაგრამ მისი აღება მაინც ვერ შესძლო.

როში თანდათან თავისკენ მძლავრად ეზიდებოდა წარმატებათა სადავეებს. ამ მხრივ მის ყველაზე დიდ მონაპოვარს, კაპუის დაცემის შემდეგ, წარმოადგენდა ტარენტუმის ხელახალი აღება.

ტარენტუმის დაბრუნება. მარცველუსის აღსასრული

ეს მოხდა 209 წელს, როცა კონსულის ტოგა მეხუთედ მოისხა მოხუცმა ფაბიუს მაქსიმე კუნქტატორმა. მან შეუთვალა თავის კოლე-

გას ქვინტუს ფულვიუს ფლავუსს (კონსული მეოთხედ) და პროკონსულ მარკელუსს რადაც არ უნდა დასჯდომოდათ ხშირი თავდასხმებით შეებოქათ ჰანიბალი მანამ, სანამ თვითონ ჩაიგდებდა ხელში ტარენტუმს.

ფაბიუსმა ალყა შემოარტყა ტარენტუმს. ხუთი დღის ალყის შემდეგ მოახერხა „ციხის შიგნიდან გატეხვის“ გზით ჩაეგდო ქალაქი ხელში. ტარენტუმში ჰანიბალს დატოვებული ჰყავდა ბრუტელთაგან შემდგარი გარნიზონი. წყაროთა ცნობით, ამ გარნიზონის უფროსს ძლიერ უყვარდა ქალაქში მცხოვრები ერთი ახალგაზრდა ქალი, რომლის ძმაც ფაბიუსის არმიაში მსახურობდა. სარდალმა შეიტყო ეს ამბავი და ქალის ძმა, სათანადო ინსტრუქტირების შემდეგ, საიდუმლოდ შეგზავნა ქალაქში. აქ მან თავისი დის მეოხებით მოახერხა თავდავიწყებამდე მისული გარნიზონის უფროსის გადმობირება. შეთანხმდნენ შეტევის დღისა და კედლის იმ ნაწილის დანიშვნაზე, სადაც რომაელებს ქალაქში გადასვლა უნდა მოეწყოთ. მართლაც, დანიშნული დღისათვის ფაბიუსმა არმიიდან გამოჰყო ძლიერი რაზმები და მოლაღატე კომენდანტის მიერ ნაჩვენებ კედელთან ჩაასაფრა. როცა მთელი ქალაქის გარშემო როგორც ხმელეთიდან, ისე ზღვიდან, რომაელებმა ძლიერი საბრძოლო ყიყინით იერიშები მიიტანეს და ალყაში შოჭყეულნი მათ წინააღმდეგ თავდაცვითი ომით გაერთვნენ, ფაბიუსმა ქალაქიდან სათანადო ნიშნის მიღებისთანავე, კედელი გადალახა და ქალაქში შეიჭრა. დრო იშოვნა აკროპოლისში ჩაეტილმა რომაულმა გარნიზონმა, რომელიც ქუჩებში საბრძოლველად სასწრაფოდ გამოიყვანა მისმა უფროსმა მარკუს ლივიუსმა. სულ მალე ტარენტუმი, ბრწყინვალე და მდიდარი ქალაქი, რომელთა ძარცვა-ნგრევის კერძად იქცა. ფაბიუსმა ჯარისკაცებს უფლება მისცა მთლიანად გაეძარცვათ ქალაქი. უზარმაზარი დავლა დაგროვდა. 3 000 ტალანტი (= 4 500 000 მან.) შეემატა რომის ხაზინას. ტარენტუმის 30 000 მცხოვრები რომაელებმა მონებად აქციეს. ერთადერთი, რაც ფაბიუსს ტარენტუმიდან არ გაუტანია, იყო ღმერთთა ქანდაკებანი; „დავეუტოვოთ ტარენტუმელებს მათი განრისხებული ღმერთებიო,“—დაცინვით უთქვამს მოხუც კუნქატორს. მაგრამ მან მაინც წაიღო ჰერაკლეს¹ უზარმაზარი ქანდაკება და დიდებული ტრიუმფის შემდეგ კაპიტოლიუმის ტაძარში თავისი, ცხენზე ამხედრებული ქანდაკების გვერდით დადგა.

მარკუს ლივიუსი ცდილობდა ფაბიუსისათვის წაერთმია ტარენტუმის ალების პატივი; „ტარენტუმის ალების მიზეზი — ეს მე ვარ“, —

¹ ჰერაკლე (ბერძნებთან), იგივე ჰერკულესი (რომაელებთან) — ბერძენთა უდიდესი მითოლოგიური გმირი.

უთქვამს მას სენატის სხდომაზე. „შენ მართალი ხარ: რომ შენ ტარენტუმი არ დაგეკარგა, მე მისი ხელახლა აღება აღარ დამჭირდებოდაო“ — სიცილით უპასუხნია ჭკვიან მოხუცს.

ჰანიბალი იგერიებდა მასზე დადევნებულ ფულვიუსისა და მარკელუსის ჯარებს და გამწარებით მიიწევდა ტარენტუმის გადასარჩენად. ის სულ რამდენიმე კილომეტრზე მიუახლოვდა ქალაქს, როცა მისი ღაცემის ამბავი შეიტყო. „რომაელებს ჰყავთ თავისი ჰანიბალი; ჩვენ დავკარგეთ ტარენტუმი იმავე გზით, რა გზითაც ავიღეთ ის,“—წამოიძახა მძიმედ ჩაფიქრებულმა ჰანიბალმა.

მაგრამ უკვე სისხლისაგან დაცლილმა ფინიკიელმა ამ წლებში კიდევ შესძლო რამდენიმე გამარჯვების მოპოვება. ჯერ კიდევ ტარენტუმის აღებამდე, 210 წელს, მან აპულიაში სასტიკად გაანადგურა რომაელთა დიდი არმია, რომელსაც პროკონსული გნეუს ფულვიუს ცენტუმალუსი სარდლობდა. ბრუციუმში მყოფ ჰანიბალს მისმა მსტოვრებმა აცნობეს, რომ ფულვიუსი მზად იყო თავდასხმა ზოეწყო აპულიის ქალაქ ჰერდონეაზე, რომელიც კანეს ბრძოლის შემდეგ კართაგენელებს ემორჩილებოდა. მსტოვრები იმასაც იტყობინებოდნენ, რომ ჰერდონეის მცხოვრებნი კაპუის ღაცემის შემდეგ მერყეობდნენ და დღეს ან ხვალ თუ საჭირო ზომები არ იქნებოდა მიღებული, რომაელებს გაუღებდნენ კარს. ამიტომ ჰანიბალი სრულიად მოულოდნელად, ისე რომ ამის შესახებ ხმამ გავრცელებაც კი ვერ მოასწრო, არაჩვეულებრივი სისწრაფით გაჩნდა აპულიაში, სწორედ იმ დღეს, როცა ფულვიუსი ქალაქზე თავდასასხმელად აწყობდა ჯარებს.

ფულვიუსი მოულოდნელად მოვარდნილ მტერს მედგრად დახვდა. სასტიკ, თავგანწირულ შეტაკებათა მოწინავე რიგებში დაქროდა ჰანიბალი და მოაგონებდა თავისიანებს, რომ ამ ორი წლის წინ ამავე ოლქში მათ გაანადგურეს სხვა ფულვიუსი და ახლა მისი თანამოსახელეც გაჰყვება მის კვალს. რომაელთა ლეგიონერები ჩვეულებრივი მხნეობითა და ხელოვნებით ამსხვრევდნენ კართაგენელთა მძლავრ იერიშებს. ჰანიბალმა ნიშანი მისცა და სწრაფად დაიძრენ ნუმიდელ მხედართა ესკადრონები. და მაშინ, როცა რომაულ ლეგიონთა საბრძოლო დროშები დაუხრელად მიაპობდნენ მოწინააღმდეგის რიგებს, ზურგიდან მოისმა ცხენების თქარათქური და გამაყრუებელი ყიყინა. რომაელები ალყაში მოექცნენ. ეს იყო „მცირე კანე“. სალტეში მოქცეულთაგან ცოცხალი აღარავინ გადარჩენილა. 13 000 რომაელი დაეცა ბრძოლის ველზე, მათ შორის თვით პროკონსული ფულვიუსი და თერთმეტი სამხედრო ტრიბუნი. კართაგენელებს დიდძალი დავლა ჩაუვარდათ ხელში.

ჰანიბალმა, იცოდა რა ჰერდონეა რომაელთა მხარეზე გადასვლას აპირებდა, მისი მოსახლეობა აპყარა და სამხრეთში, ქ. თურიუმში გადასახლა, ხოლო თვით ქ. ჰერდონეა ცეცხლს მისცა.

რომში ახალი გლოვა და ვაი-ვიში გამოიწვია ჰერდონეას მარცხმა. მარცელუსი, რომელიც ამ დროს მეოთხედ იყო კონსულად არჩეული, სამნიუმთან წერდა სენატს: ნუ გეშინიათ, მე, რომელსაც შემძლია გავანელო ჰანიბალის საბრძოლო ცეცხლი, სულ მალე ავიღებ დაღუპულ რომაელთა სისხლსო.

208 წელს მარცელუსი მეხუთედ აირჩიეს კონსულად. მას გადაწყვეტილი ჰქონდა სადმე გენერალურ ბრძოლაში ჩაეთრია თავისი დიდი მოწინააღმდეგე და მისი განადგურებით საბოლოოდ დაემკვიდრებინა უპირველესი სარდლისა და უმამაცესი მეომრის სახელი.

მარცელუსმა შეიერთა მეორე კონსული, ქ ვ ი ნ ქ ც ი უ ს კ რ ი ს პ ი ნ უ ს ი, და გაეშურა აპულიაში ჰანიბალთან შესახვედრად. ქ. ვ ე ნ უ ზ ი ი უ მ ი ს მახლობლად რომაელები სამ კილომეტრზე მიუახლოვდნენ კართაგენელთა ბანაკებს და თვითონაც დაბანაკდნენ.

მოწინააღმდეგეთა შორის ტყით დაფარული მდლობი იყო აღმართული. ჰანიბალმა აქ ჩაასაფრა მსუბუქად შეიარაღებულ მეომართა რაზმები.

ორივე კონსული, მარცელუსი და კრისპინუსი, 220 მხედრის თანხლებით თვითონ გაეშურნენ მდლობის დასახვერავად. როგორც კი ისინი ხეობაში შევიდნენ, უეცრად მათ გარს შემოერთყნენ ჰანიბალის ზეომრები. საშინელ შეტაკებაში მარცელუსი მძიმედ დაიჭრა გვერდში და ცხენიდან გადმოვარდა. ის ერთ ხანს კიდევ მხნედ იგერიებდა მტრის თავდასხმებს, მაგრამ მალე მას მკერდში რამდენიმე სათხედი მოხვდა და გულგანგმირული დაეცა დახოცილ თანამებრძოლთა გვაძებზე. ორგან მძიმედ დაიჭრა მეორე კონსულიც, კრისპინუსი. დაიჭრა, აგრეთვე, მარცელუსის შვილიც, რომელიც მამაკურად იბრძოდა მამის გვერდით. მათ მცირერიცხოვანი რაზმით ძლივს დააღწიეს თავი ბრძოლის ველს. 40 იტალიელი დარჩა საბედისწერო ხეობაში, 15 ლიქტორი და 18 ცხენოსანი ჩაიგდეს კართაგენელებმა ტყვედ. რამდენიმე დღის შემდეგ მძიმე ჭრილობებისაგან გარდაიცვალა კრისპინუსი. ამგვარად, ამ მცირე შეტაკებაში ორივე კონსული დაიღუპა, რაც მანამდე რომის ისტორიამ არც კი იცოდა.

ჰანიბალი დიდხანს დასცქეროდა მის წინ გაშხლართულ ვეება ვაჟკაცს, რომაელთა დიდებასა და იმედს, რომის „მახვილად“ წოდებულ მარცელუსს. ჰანიბალმა ხელიდან წააძრო მას გერბიანი ბეჭედი და შემდეგ ხოტბა შეასხა ღირსეული მოწინააღმდეგის მეომარულ სიმამაცეს, მაგრამ გაჰკიცხა როგორც დაუკვირვებელი სარდალი. მან დაფიქსირა ანტიკური ქვეყნების ისტორია.

ნის გვირგვინით შეამკო მარცელუსის თავი, კონსულის ძოწეულ მანტიში შეახვია მისი გვამი და დიდის პატივით დასდო კოცონზე. მისი ფერფლით ავსებული ძვირფასი ურნა ჰანიბალმა ოქროს გვირგვინით შეამკო და ასე გაუგზავნა მის შვილს, ახალგაზრდა მარცელუსს, რომელმაც, თვითონ დაქრილმა, ვერ მოახერხა ბრძოლის ველიდან ღირსეული მამის გაყვანა, როგორც ეს შესძლო ახალგაზრდა სციპიონმა ტიცი-ნუსის ბრძოლაში.

ახლა ვნახოთ რა ხდებოდა ესპანეთში, საიდანაც ჰანიბალი ამ სიხლიანი ათი წლის მანძილზე ელოდებოდა იტალიაში ახალი არმიის ჩამოყვლას. მანამდე იგი იძულებული იყო სამხრეთ იტალიაში ჩაეკტილიყო და მასზე მისეული მამაცი „მგლის ნაშიერნი“ მოეგერიებინა.

ესპანეთის აჯაჯი. სციპიონი

217 წლიდან ძმები სციპიონები, პუბლიუსი და გნეუსი, ესპანეთში წარმატებით ებრძოდნენ ჰასდრუბალ ბარკას.

სციპიონებმა რამდენიმე გამარჯვების მოპოვებისათვის რომაული დიპლომატიის ასპარეზი აფრიკაში გადაიტანეს. აქ იმ დროს რომაელთათვის ხელსაყრელი პირობები შეიქმნა. კართაგენის სამხრეთით მდებარე ნუმიდია, საიდანაც კართაგენელები საუკეთესო კავალერიას ღებულობდნენ, 215 წლისათვის ორ ნაწილად იყო გათიშული: აღმოსავლეთში განაგებდა მეფე გალა, ხოლო დასავლეთში — ახალგაზრდა მთავარი სიფაქსი. სიფაქსმა უარი განაცხადა კართაგენელთა წინაშე ქედის მოხრახლე და ურთიერთობა გააბა რომაელებთან.

სციპიონების მიერ გაგზავნილი ელჩები, ცენტურიონები, გამოცხადდნენ სიფაქსთან და მოუწოდეს მას კართაგენის წინააღმდეგ ბრძოლისაკენ, სამაგიეროდ რომთან მეგობრობისა და მასთან სრული მხარდაჭერის პირობა დაუდეს.

214 წლის გაზაფხულზე სიფაქსი შეიქრა კართაგენელთა სამფლობელოებში. მან სასტიკად დაამარცხა კართაგენის სახელდახელოდ შეკრებილი არმია. ამგვარად, კართაგენს ახალი საშიშროება მიადგა კარს. სენატმა სასწრაფოდ გამოიძახა ჰასდრუბალი ესპანეთიდან.

ჰასდრუბალ ბარკა ესპანური ჯარებით გაჩნდა აფრიკაში და შეუდგა სიფაქსის წინააღმდეგ ბრძოლას. ამ საქმეში მას დიდი დახმარება გაუწია აღმოსავლეთ ნუმიდიის მეფის გალას შვილმა მასინისამ, რომელიც მაშინ 17 — 18 წლისა იყო. მასინისა, რომელმაც შემდეგ რომისა და აფრიკის ურთიერთობათა საქმეში დიდი როლი ითამაშა, ცნობილი იყო როგორც ახოვანი, შესანიშნავი სილამაზის, ფიზიკური ძალღონისა და შეუდარებელი სიმამაცის მქონე კაცი. გადმოგვცემენ, რომ მას დღე-ღამეების განმავლობაში მშვიერ-მწყურვალს შეეძლო ცხენით ჯირითი,

მთელი დღის განმავლობაში ერთ ადგილზე გაუნძრევლად დგომა ან ჯდომა. ის ბერძნულ კულტურაზე იზრდებოდა და კართაგენში დიდი ხნის ცხოვრებით ჯერჯერობით მისდამი პატივისცემასაც ინარჩუნებდა. ამჯერად მისთვის, აღმოსავლეთ ნუმიდიის უფლისწულისათვის, ხელსაყრელი არ იყო სიფაქსის გაძლიერება და ამიტომ ის მრავალრიცხოვანი შესანიშნავი კავალერიით სიამოვნებით დადგა ჰასდრუბალ ბარკას საბრძოლო დროშის ქვეშ.

სიფაქსი სასტიკად დამარცხდა და იძულებული გახდა ისევ კართაგენის მბრძანებლობას დამორჩილებოდა.

212 წლის მიწურულში ჰასდრუბალი თავისი არმიისა და მასინისას თანხლებით დაბრუნდა ესპანეთში. აქ მან ნახა, რომ მოწინააღმდეგეს ამ სამი წლის მანძილზე კიდევ მეტი წარმატებებით უწარმოებია დასავლეთისაკენ წინსვლა. მას ხელში ჩაუვდია ქ. საგუნტი და 20 000 კელტიბერი თავის საბრძოლო დროშათა ქვეშ დაუყენებია.

211 წელს სციპიონებსა და ბარკიდებს შორის გადამწყვეტი ბრძოლები მოხდა. ამ დროისათვის კართაგენელებს ესპანეთში სამი არმია ჰყავდათ. ერთ მათგანს სათავეში ედგა თვით ჰასდრუბალ ბარკა, ხოლო დანარჩენ ორს, რომლებიც ერთიმეორის გვერდით იდგნენ, სარდლობდნენ მაგონი და ჰასდრუბალ გისკონის-ძე.

სციპიონებმა თავისი არმია ორად გაინაწილეს. ისინი ითვალისწინებდნენ მოწინააღმდეგის არმიათა ერთდროულ და ცალ-ცალკე განადგურებას. პუბლიუსი, რომელსაც ჰყავდა არმიის ორი მესამედი ნაწილი, გაეშურა მაგონისა და ჰასდრუბალ გისკონის-ძის წინააღმდეგ, ხოლო გნეუსი დანარჩენი ჯარებით — ჰასდრუბალ ბარკასკენ.

როგორც კი გნეუსი სციპიონი ჰასდრუბალ ბარკას არმიას მიუახლოვდა და დაბანაკდა. მისმა ესპანელმა მოკავშირეებმა სასწრაფოდ დაიწყეს ბანაკის დატოვება: ჰასდრუბალს დროზე გაუგზავნია მათთან მათივე თანამოძმენი და შეუთვლია სასწრაფოდ დაეტოვებინათ რომაელთა ქვეშევრდომობა, კვლავ კართაგენელთა არმიას შეერთებოდნენ, თუ სურდათ დიდი ჯილდოები მიეღოთ. წინააღმდეგ შემთხვევაში, სულ მალე, რომაელთა უექველი განადგურების შემდეგ, სასტიკად დაისჯებოდნენ. გნეუსმა ვერ შესძლო შეეჩერებინა ბარბაროსები, რომლებიც ასე ადვილად დალატობდნენ როგორც ერთ, ისე მეორე მხარეს. ისინი სარდლის შეკითხვაზე მხოლოდ იმას პასუხობდნენ, რომ ჩვენ არავის მხარეზე არ გვსურს ვიომოთ, ჩვენ ჩვენს სახლებში მივდივართო. 20 000 კელტიბერმა დასტოვა მისი არმია. ამის შემდეგ გნეუსი სციპიონს ფიქრიც აღარ შეეძლო ჰასდრუბალთან გენერალური ბრძოლის გამართვაზე. ის სასწრაფოდ შეუდგა უკან დახევას აღმოსავლეთისაკენ. კართაგენელები ფეხდაფეხ მისდევდნენ მას.

აპვე დროს მაგონისა და ჰასდრუბალ გისკონის-ძის მახლობლად დაპანაკებულმა პუბლიუს სციპიონმა შეიტყო, რომ მოწინააღმდეგესთან შესაერთებლად 7 500 ესპანელი მეომრით მოემართებოდა მათი ბელადი ი ნ დ ი ბ ი ლ ი ს ი. პუბლიუსმა ბანაკის გასამაგრებლად მცირე გარნიზონით დასტოვა ლეგატი ტ ი ტ ე ფ ო ნ ტ ე უ ს ი, თვითონ კი ღამით მთელი არმიით გაეშურა ინდიბილისთან შესახვედრად, რათა გენადგურებინა ის, სანამ მოწინააღმდეგეს შეუერთდებოდა. მართლაც, სწრაფად მიმავალი პუბლიუსი წინ შეეყარა მას და მაშინვე გაუმართა ბრძოლა. მაგრამ კარგად დაწყებული საქმე მალე უკულმა დატრიალდა. პუბლიუსმა ანგარიში ვერ გაუწია იმას, რომ მაგონი და ჰასდრუბალ გისკონის-ძე ფეხდაფეხ მისდევდნენ მას. მალე რომაელთა არმიას ძლიერად დაარტყეს კართაგენელებმა. პუბლიუსი თავის ლეგიონებთან ერთად მაინც არ ჰკარგავდა მხნეობას. კართაგენელთა არმია შედრკა კიდევ და ის იყო მტკიცედ შეკრული რომაული კოპორტების შეტევისაგან დაშლილი მათი რიგები უკანდასახვევად ემზადებოდნენ, რომ პუბლიუსის არმიის ფლანგებს მძლავრი იერიშებით. თავს დაესხა ნუმიდური კავალერია, რომელსაც მასინისა სარდლობდა. კართაგენელები გამხნევდნენ და ახალი ენერგიით მიესივნენ მტერს. რომაელთა არმია რკინისებურ ალყაში მოექცა. პუბლიუსი პირადი სიმამაცითა და მხნეობით ცდილობდა თავისიანთა სიმტკიცის შენარჩუნებას. მაგრამ როცა გმირი რომაელი სარდალი მარჯვენა გვერდში მტრის შუბისაგან სასიკვდილოდ დაიჭრა, ცხენიდან უსულოდ გადმოვარდა და მისი სიკვდილის ამბავი ელვის სისწრაფით გავრცელდა, რომაელებმა საბოლოოდ დაჰკარგეს გამარჯვების იმედი. მათმა მნიშვნელოვანმა ნაწილმა მოახერხა სალტის გარღვევა, მაგრამ მრავალი მათგანი გაქცევისას ნუმიდელმა მხედრებმა აჰკაფეს. მხოლოდ მცირე რაზმებმა მოახერხეს თავის გადარჩენა, ისიც უკვე ჩამომდგარი ღამის წყალობით.

გამარჯვებული მაგონი და ჰასდრუბალ გისკონის-ძე თავიანთი არმიებით გაეშურნენ მთავარსარდლისაკენ და შეუერთდნენ მას. გნეუს სციპიონმა არაფერი იცოდა მისი ძმის უბედურების შესახებ, მაგრამ საშინელი ეჭვები აღედგა, როცა დაინახა, რომ მტრის სამივე არმია გაერთიანებული იდგა მის წინააღმდეგ. რა თქმა უნდა, იგი დარწმუნებული იყო იმაში, რომ, კარგი ამბავი რომ ყოფილიყო, პუბლიუსი არ დაუშვებდა მოწინააღმდეგის ჯარების ასეთ მოულოდნელად გაერთიანებას. საშინელი წინათგრძნობებით შეპყრობილ გნეუს სციპიონს მაინც არაფერი დარჩენოდა გარდა იმისა, რომ კვლავ განეგრძო უკანდახვევა მდ. იბერიისაკენ. ერთი ღამის განმავლობაში მან მოახერხა შორს ჩამოეტოვებინა მტრის ბანაკები, მაგრამ დღის ბოლოს წამოეწივნენ ნუმიდელ მხედართა რაზმი და სწრაფი თავდასხმებით დაუწყეს მას აფორიაქება.

ერთ-ერთ მაღლობზე რომაელებს წამოეწივნენ მტრის ქვეითი ჯარებიც. მაღლობი, სადაც რომაელებს თავდაცვა უნდა მოეწყოთ, ურომლისოდაც მტრის გამკლავება შეუძლებელი იყო, წარმოადგენდა მთლიანად შიშველსა და კლდოვან ადგილს. ასე რომ მათ არ შეეძლოთ არც სანგრების გათხრა, არც მიწაყრილებითა და ხეებით თავდაცვითი ზღუდების მოწყობა. ამიტომ გნეუსმა ბრძანება გასცა აეგოთ ბარიკადები ყველაფრით, რაც ხელში მოხვდებოდათ, ალალით, სურსათის ტომრებით, ამუნიციით, ქვითა და სხვ. მაგრამ, რასაკვირველია, ასეთი თავდაცვა დიდხანს ვერ შეაჩერებდა მრავალრიცხოვანი მტრის იერიშებს. კართაგენელები შეიპტრენ მოწინააღმდეგის პოზიციებში. რომაელთა უპირატესობა, მიუხედავად მათი ჩვეულებრივი სიმედგრისა და სიმამაცისა, მთლიანად გაიჟლიტა, მხოლოდ მცირე რაზმებმა გაასწრეს სიკვდილს და შეუერთდნენ პუბლიუსის პირველ ბანაკს, სადაც თავს აფარებდა ლეგატი ტიტე ფონტეუსი.

ბრძოლაში დაიღუპა თვით გნეუსი. ეს მოხდა მე-29 დღეს მისი ძმის, პუბლიუსის დაღუპვის დღიდან.

რომაულ არმიათა ნაშთები შეაერთა და შეამკიდროვა გნეუს სციპიონის აღზრდილმა მხედარმა ლუციუს მარციუსმა. მან შესანიშნავი ორგანიზებულობით გადმოიყვანა გადარჩენილი მეომრები მდ. იბერის აღმოსავლეთ სანაპიროზე. ის ცდილობდა რაღაც არ უნდა დასჯდომოდა რომიდან ახალი ჯარების ჩამოსვლამდე შეენარჩუნებინა უკანასკნელი პლაცდარმი პირენეის ნახევარკუნძულზე — ოლქი იბერსა და პირენეის მთებს შორის.

ამრიგად, რაღაც ერთი თვის მანძილზე ესპანეთში საბრძოლო მდგომარეობა ძირფესვიანად შეიცვალა. რომელებმა, დღე არმიებთან და მამაც სარდლებთან ერთად, მთლიანად დაჰკარგეს ის შესანიშნავი პოზიციები, საიდანაც უმოკლეს ხანში უნდა მოესკოთ კართაგენელთა ბატონობა ესპანეთში და ამით საბოლოოდ აღეკვეთათ იტალიაში მრისხანე ლაშქრობის განმეორების საფრთხე. ყველაფერი პირაღმა შეტრიალდა. იტალიის ცის თაღზე კვლავ დაეკიდა თავზარდამცემი პუნიკური „დამოკლეს მახვილი“.¹

211 წლას შემოდგომაზე, კაპუის დაცემის შემდეგ, ესპანეთში და-

¹ „დამოკლეს მახვილი“ — ყოველ წუთს მოსალოდნელი საფრთხე. გადმოცემის თანახმად, სირაკუზის ტირანმა დიონისე უფროსმა (V ს. ძვ. წ.) მდიდრული ნადიმის დროს თავის ტახტზე დასვა მისი უახლოესი პირი დამოკლე. რომელიც შეესტრფოდა ტირანის ბეჭს და შურით იჯსებოდა მის მიმართ. განცხრომაში მყოფმა დამოკლემ ზემოთ აიხედა და დაინახა მის პირდაპირ, ჰერზე, ერთ ღეროცხენის ძუაზე ჩამოკიდებული ბასრი მახვილი. შიშით შეპყრობილი დამოკლე ყოველ წამს მოელოდა ძუის გაწყვეტას და მომავდინებელი მახვილის თავში დაცემას.

კარგული მდგომარეობის აღსადგენად ორი ლეგიონით — 12 000 ქვეითი და 1 100 ცხენოსანი მეომრით — გაიგზავნა პროპრეტორი გაიუს კლავდიუს ნერონი, რომელმაც სახელი გაითქვა კაპუის ალყისა და აღების დროს. მან მარციუსისაგან შეიერთა ესპანეთში განადგურებულ არმიათა ნაშთები და კვლავ გადალახა მდ. იბერი. ის ცდილობდა დაებრუნებინა ყველა ოლქი, რომლებიც სციპიონებს ეკირათ მათს დაღუპვამდე. მაგრამ ნერონმა ეს ვერ შესძლო. ის მხოლოდ ხელს უშლიდა კართაგენელთა შემდგომ წინსვლას აღმოსავლეთისაკენ. მოხერხებული ჰასდრუბალი ყოველ გადამწყვეტ მომენტში ადვილად ახერხებდა მამაცი. მაგრამ გულუბრყვილო ნერონის მოტყუებას და მის წარმატებათა გაპათილებას. ასეთ მაგალითად წყაროებში მოტანილია აშბავი, რომელიც მოხდა იბერის დასავლეთ სანაპიროს მახლობლად, ე. წ. „შავი ქვის“ ხეობაში. აქ ნერონმა მოახერხა ხეობაში ჩაექცა ჰასდრუბალის არმია ისე, რომ მას გასასვლელი არსაით ჰქონოდა. მაშინ ჰასდრუბალმა მოლაპარაკება გამართა რომაელ სარდალთან. თუ მოვრიგდებით და არმიას ამ ჩიხიდან გამომაშვებინებ, ესპანეთს სულ მივატოვებთ და აფრიკაში დავბრუნდებითო, — ჰპირდებოდა ცბიერი ფინიკიელი. ნერონის სიხარულს საზღვარი არ ჰქონდა. მაგრამ მან ვერ შენიშნა, რომ სანამ ჰასდრუბალი რამდენიმე დღის მანძილზე მოლაპარაკებას აჭიანურებდა, ლამეების განმავლობაში ხეობიდან თითო-თითოდ და რაზმეულებად მთელი კართაგენული არმია გაიპარა. რა თქმა უნდა, ასეთი სარდალი ესპანეთიდან მოსალოდნელ საფრთხეს ვერ აღკვეთავდა.

ჰანიბალის მიერ რომის წინააღმდეგ მოწყობილი პროვოკაციული ლაშქრობის შემდეგ განსაკუთრებით ნათელი შეიქნა, რომ ის ამიერიდან ნაკლებ საშიში იყო. მას, სისხლისაგან დაცლილს, აღარ შეეძლო კანეს განმეორება. ახლა რომისათვის ყველაზე საშიში ესპანეთის ფრონტი იყო და სწორედ იქ უნდა მომხდარიყო ძირითად ძალთა კონცენტრაცია, რომელსაც სათავეში უნდა ჩასდგომოდა ყველაზე უფრო ნიჭიერი და პოპულარული სარდალი. ვინ უნდა ყოფილიყო ასეთი ღირსეული რომაელი, რომლისთვისაც სვებედნიერ ფორტუნას უნდა მიენიჭებინა რომის გადარჩენის ხელმძღვანელობა საშინელი ფინიკიური „ჰანდორასაგან?“¹

¹ ჰანდორა — ბერძნული მითოლოგიით: როცა პრომეთემ ზევსს ცეცხლი მოსტაცა და ხალხს მოუტანა, განრისხებული ზევსის ბრძანებით ჰეფესტომ (მკვდელი ღმერთი) შექმნა ქალწული, რომელსაც ღმერთებმა თავის მხრივ ყველამ რაღაც მისცეს (აქედან: „ჰან დორა“, რაც ყველასაგან ბოძებულს ნიშნავს): ათინამ — ქალური მოხერხებულობა, აფროდიტემ — სილამაზე, მომიხიზველობა და ცნობისმოყვარეობა. პერმენსმა — გაბედულება და ცბიერება. ამის შემდეგ, ზევსის სურვილით. ჰანდორა გაჩნდა პრომეთეს ძმასთან, ეპიმეთესთან, რომელიც გაფრთხილებული იყო (პრო-

210 წლის ბოლოს ესპანეთის პროკონსულის, მთავარსარდლის არჩევისათვის მარსის ველზე შეიკრიბა რომის ხალხმრავალი კომიციები. კონსულმა გახსნა სახალხო კრება და მოუწოდა კანდიდატებს. მაგრამ ვერავინ ბედავდა მეტად საპაუზისმგებლო პოსტზე თავისი თავის წამოყენებას. როგორც წყაროები გადმოგვცემენ, არც სენტს, არც კონსულებს ესპანეთის პროკონსულის კანდიდატურად არავინ ჰყავდათ გათვალისწინებულნი. აჩრქოლებული ხალხი კარგახანს მოუთმენლად უცქერდა ცარიელ ამალღებულ ადგილს, სადაც უნდა მდგარიყვნენ თეთრ ტოგაში გახვეული კანდიდატები¹. უეცრად იქ გამოჩნდა მაღალი, მშვენიერი, მამაცური შესახედაობის გრძელხუჭუჭთმიანი, ჰკვიანი გამომეტყველების ახალგაზრდა კაცი. ეს იყო 25 წლის პუბლიუს კორნელიუს სციპიონი. მან მტკიცედ განაცხადა სურვილი ესპანეთის პროკონსულობისა და მთავარსარდლობის მიღებაზე.

ახალგაზრდა სციპიონი კარგად ნაცნობი და საქმოდ პოპულარული კაცი იყო რომში. იგი ადრიდანვე იპყრობდა ყურადღებას როგორც მამაცი მეომარი, რომელმაც თავი გამოიჩინა ტიცინუსის შეტაკებაში, სადაც გაშმაგებულ მტერს ხელიდან გამოგლიჯა მძიმედ დაჭრილი მშობელი. შემდეგ ახალგაზრდა სამხედრო ტრიბუნი სციპიონი რომელთა შორის ერთადერთი კაცი იყო, რომელმაც კანეს კატასტროფისას შეინარჩუნა არაჩვეულებრივი სიმტკიცე, მხნეობა და წინდახედულობა; ამპსთან, ხალხი მას იცნობდა როგორც უადრესად განათლებულს. ელინურ კულტურაზე აღზრდილს, ნამდვილი რომაული სიამაყისა და სიმტკიცის განსახიერებას, ყველას მიმართ ზედმიწევნით თავაზიანს, მგობართა თავყანისცემისა და მშვენიერ ქალთა ტრფობის საგანს, მაგრამ ამ უკანასკნელთა მიმართ ზედმიწევნით თავდაპერილსა და ზომიერს; სულგრძელ რაინდსა და თავის „ბედის ვარსკვლავის“ უტყუარობაში განუზომლად, რელიგიურ-მისტიკურად თვითდარწმუნებულს; *Κρημν* ის არ იყო სამხედრო გენია, რომელიც. თუნდაც მის უმაღლეს მწვერვალზე ყოფნის დროსაც ვერ გასწორებია ჰანიბალის უბადლო ტა-

მეთესაგან) არაფერი მიეღო ზევსისაგან საჩუქრად. მაგრამ ეპიმეთე წინდაუხედავი და გულმეფიწყია. მას არ ახსოვს ძმის დარიგება. მან შილო პანდორა, რომელმაც ეპიმეთეს სახლში თავი მოჰხადა რაღაც ყუთს. საიდანაც ელვის სისწრაფით ამოფრინდნენ უთვალავი უბედურებანი, ავადმყოფობანი, მწუხარებანი და გავრცელდნენ ხალხში. როცა პანდორამ ყუთს ხუფი ისევ დაჰხურა. მასში მოემწყვდა იმედი. ამგვარად, პანდორა ყოველგვარი უბედურების სიმბოლოდ იქცა.

¹ ლათინური სიტყვა *candidatus* თეთრ ტანსაცმელში ჩაცმულს ნიშნავს. წარმოსდგება სიტყვისაგან *candidus*, რაც ქათქათა თეთრს ნიშნავს. რომში უმაღლესი მაგისტრატურის დასაკავებლად დასახელებულ პირს, კანდიდატს, თეთრი ტოგა (*toga candida*) უნდა ჰქონოდა მოსხმული.

ლანტს. მაგრამ სციპიონის კარიერას ეს ხელს ვერ შეუშლიდა, რადგან რომმა ჯერ კიდევ არ იცოდა თავისი პირმშო გენიალური სარდლები. ამჯერად ყველას ისევ ახალგაზრდა სციპიონი სჯობდა. ✓

სციპიონმა მანამდე მხოლოდ სამხედრო ტრიბუნისა და ედილის თანამდებობები გაიარა, რადგან იგი უმაღლესი მაგისტრატურის მიღებისათვის ჯერ ისევ მცირეწლოვანი იყო. ამიტომაც მოხდა, რომ, როცა ჯერ კიდევ 212 წელს მას ედილად არჩევისას ხალხი მხარს უჭერდა, მაგრამ ტრიბუნები უარს ეუბნებოდნენ ასაკის, ცენზის არასაკმარისობის გამო. მან განაცხადა: „თუ ქვირიტებს სურთ, რომ ედილი ვიქნე, მაშინ მე საკმოდ ასაკოვანი ვყოფილვარ ამ თანამდებობისათვის“.

ახლაც, როცა ის თავის თავს ესპანეთის პროკონსულობისა და მთავარსარდლობის კანდიდატურად აყენებდა, აქა-იქ გაისმა კიდევ წინააღმდეგობის ხმები: თუ მხედველობაში იმას არ ვღებულობთ, რომ სციპიონების გვარი საშინელი ტრაგედიების სიმბოლოს წარმოადგენს, ის მაინც უნდა გავითვალისწინოთ, რომ ახალი კანდიდატურა უმაღლესი მაგისტრატურისათვის უასაკაოა. მაგრამ სახალხო კრებამ ერთიანად მისცა ხმა სციპიონის დანიშვნას.

ამგვარად, სციპიონი გაეშურა ესპანეთში, საიდანაც ჰანიბალმაც სწორედ 25 წლის ასაკში მყოფმა დაიწყო თავისი სახელოვანი სამხედრო ისტორია. ორივემ. დიდმა სარდლებმა და დიდმა მტრებმა, 25 წლის ასაკში დაიწყეს თავისი საშხედრო კარიერა, ორივემ უცხო ქვეყანაში, ორივემ ესპანეთში.

სციპიონმა 209 წლის დასაწყისში 30 გემისაგან შემდგარი ფლოტით ესპანეთში ჩაიყვანა ახალი არმია, რომელიც 10 000 ლეგიონერისა და 1000 ცხენოსნისაგან შედგებოდა. მას თანაშემწედ თან ახლდა მ ა რ კ უ ს ი უ ნ ი უ ს ს ი ლ ა ნ უ ს ი, გამოცდილი სარდალი და პროპრეტორი (რომელსაც უნდა შეეცვალა ნერონი) და ფლოტის ადმირალი, სციპიონის უახლოესი მეგობარი გ ა ი უ ს ლ ე ლ ი უ ს ი.

ტარაკონის მახლობლად, მდ. ებროს (იბერი) ჩრდილოეთით თავი მოიყარა ყველა რომაულმა ჯარმა. სციპიონის ხელქვეით დაახლოებით 32 000 მეომარი დადგა.

გაზაფხულზე სციპიონმა მდ. იბერის სანაპიროების დასაცავად 3 000 ქვეითისაგან და 300 ცხენოსნისაგან შემდგარი ჯარით დასტოვა სილანუსი. თვითონ კი 25 000 ლეგიონერთა და 2 500 ცხენოსნით დაიძრა ახალი კართაგენისაკენ.

ახალ კართაგენს, როგორც ბარკიდთა ბატონობის ცენტრალურ დასაყრდენს ესპანეთში, უდიდესი სტრატეგიული და ეკონომიური მნიშვნელობა ჰქონდა. აქ იყო ზაზინა, საომარ საქურველთა არსენალი. სურსათ-სანოვავის საწყობები, მექანიკური მანქანები და ესპანელ

ტომთა მძევლები. იგი წარმოადგენდა შესანიშნავ ნავსადგურს, საიდანაც ყოველთვის შეიძლებოდა აფრიკასთან ან ხმელთაშუა ზღვის სხვა ქვეყნებთან მოხერხებული ურთიერთობა. ყველაფერ ამას ისიც ემატებოდა, რომ ეს ქალაქი რჩებოდა ბარკიდთა ძლევამოსილების ურყევ სიმბოლოდ.

სციპიონი შეიდი დღის ლაშქრობის შემდეგ მიადგა ახალ კართაგენს. ქალაქი მდებარეობდა მაღლობ ადგილზე, რომელიც ზღვაში იყო შეჭრილი და კონტინენტს ვიწრო ყელით უკავშირდებოდა. სციპიონმა ჩრდილოეთიდან სწორედ ამ ყელზე დაიბანაკა და ამგვარად გადაუჭრა მას ხმელეთიდან მისასვლელი. ამავე დროს ლელიუსის მეთაურობით ზღვიდან ქალაქს მტკიცედ შემოეკრა საზღვაო ფლოტი.

კართაგენელთა სამი არმიიდან არც ერთი არ იდგა ახალი კართაგენის მახლობლად. სწორედ ამიტომ აირჩია სციპიონმა ასეთი გაბედული ნაბიჯი ნაცვლად იმისა, რომ მთიან ქვეყანაში ედევნა კართაგენელებისათვის. ქალაქს იცავდა მხოლოდ 1 000 კაცისაგან შემდგარი გარნიზონი, ვილაც მაგონის (არა ჰანიბალის ძმა) მეთაურობით. მან სასწრაფოდ შეაიარაღა მოქალაქენი; 2 000 კაცი რომაელთა სახმელეთო ბანაკის პირისპირ დააყენა; გარნიზონიდან 500 მეომარი აკროპოლისში ჩააყენა, ხოლო 500 კიდევ — ქალაქის აღმოსავლეთით მდებარე მაღლობზე; დანარჩენ მოქალაქეებს უბრძანა მზად ყოფილიყვნენ და მიშველებოდნენ იქ, სადაც ყველაზე უფრო მძიმე მდგომარეობა შეიქნებოდა.

სციპიონმა დილით, ბრძოლის დაწყების წინ, მისთვის ჩვეული მჭერმეტყველებით წარმოსთქვა სიტყვა და ბრძანება გასცა დაეწყათ შეტევა როგორც ხმელეთიდან, ისე ზღვიდან. ქალაქი არაჩვეულებრივი სიმამაცითა და თავგანწირვით შეეგება რომაელთა იერიშებს. კედლებიდან ისრების სეტყვა მოდიოდა, ამიტომ იერიშზე გადასული ლეგიონების წინ მიმავალ სციპიონს წინ მიუძღოდა და ფარებით იფარავდა სამი ახალგაზრდა მეომარი. მაგონის ბრძანებით ქალაქის ალაყაფის კარი გაიღო, გაიჭრნენ და მტერს შეებნენ მცირერიცხოვანი რაზმები. მაგრამ ცხარე შეტაკებაში რომაელებმა უკუაქციეს ისინი და აიძულეს ისევ კედლებისათვის შეეფარებინათ თავი. დაიწყეს საიერიშო კიბეების მიდგმა, მაგრამ ქალაქის მაღალ კედლებზე გადასვლა დამცველთა თავგანწირული წინააღმდეგობის მეოხებით შეუძლებელი შეიქნა. ასევე უშედეგო იყო იერიშები ზღვიდან.

სციპიონი დაჭრილ და დაქანცულ მეომრებს ახალ-ახალი რაზმებით სცვლიდა და იერიშებს ერთი წუთითაც არ ასუსტებდა. ამით მას სურდა, რომ ქალაქის დამცველთა მთელი ყურადღება კონცენტრირებული ყოფილიყო იმ პუნქტებზე, რომლებზეც ასეთ თავგანწირულ შეტევებს

აწარმოებდა. ამავე დროს მას გაგებული ჰქონდა, რომ ქალაქის დასავლეთით არსებული ყურე თითქმის დაბალ ტბას წარმოადგენდა და რეგულარულად. ყოველ ნაშუადღევს, ჩრდილოეთიდან მოვარდნილი ქარის მეოხებით წყლის უუქუქევის დროს კიდევ უფრო თხელ ფონად იქცეოდა. სციპიონმა სწრაფად მოისაზრა, თუ როგორ უნდა მოქცეულიყო. მან შეარჩია 500 მამაცი მეომარი და მათი თანხლებით წყლის უუქუქევისას შევიდა ზღვაში; წყალი წელამდე და ზოგან მხოლოდ მუხლამდე სწვდებოდათ. სციპიონმა ასე მიიყვანა ისინი ქალაქის იმ კედელთან, რომელიც დაცვისაგან სრულიად მიტოვებული იყო. სარდალმა სთქვა: აქ ჩვენ თვითონ ნებტუნმა¹ მოგვიყვანაო, და ბრძანა იერიში. ისინი დაუბრკოლებლად გადავიდნენ კედელზე.

ამგვარად, სციპიონი შეიჭრა ქალაქში. მტრის მოულოდნელად შემოჭრამ თავზარი დასცა ქალაქის დამცველთ. რომაელმა სარდალმა ისარგებლა საერთო დაბნეულობით და ელვის სისწრაფით დაესხა ზურგიდან მტრის იმ ნაწილებს, რომლებიც ალაყაფის კარებს იცავდნენ. სულ მალე შიგნიდან და გარედან ერთდროული დარტყმისა და ქალაქის დამცველთა დამარცხების შედეგად ყურთამდე გაიღო კარიბჭეები. ქალაქში ნიაღვარივით შეიჭრენ რომაელთა კოჰორტები. დაიწყო საშინელი ზოცვა-ჟღერა. შიშით ზარდაცემული მოსახლეობა ორი მიმართულებით გარბოდა — ქალაქის აღმოსავლეთით გამაგრებული მალღობისაკენ და აკროპოლისისაკენ, სადაც 500 მეომრითა და საკუთარი ოჯახით თავს აფარებდა მაგონი. სციპიონმა ჯარების ერთი ნაწილი მალღობის ასაღებად გაგზავნა, თვითონ კი დანარჩენებით დაიძრა აკროპოლისის წინააღმდეგ. მაგონი, ერთ ხანს კვლავ მედგარ წინააღმდეგობას ეწეოდა, მაგრამ როცა დაინახა, რომ ქალაქის ყველა პუნქტი და აღმოსავლეთის სიმაღლეც უკვე მტერს ეჭირა, დანებდა სციპიონს. ბრძოლა შეწყდა. მაგრამ ეს მოხდა მაშინ, როცა ქალაქის მოსახლეობის უდიდესი ნაწილი უკვე მოისრა; რომაელებმა თითქმის ყველა მოზრდილი მამაკაცი, ბრძოლისა და შრომისუნარიანი მოქალაქე, სიცოცხლეს გამოასალმეს; მდიდარი და მშვენიერი ქალაქი მთლიანად გაძარცვეს და დაანგრირეს, უზარმაზარი დოვლათი ჩაიგდეს ხელთ. მათ ხელში გადავიდა მტრის 80 სამხედრო და 63 სატვირთო გემი, რომელთაგან უმრავლესობა დატვირთული იყო სურსათ-სანოვავით. საბრძოლო საკუთრებით, სპილენძით, რკინითა და საიალქნე ტილოს ქსოვილებით. დაისაკუთრეს ქალაქის არსენალები, ასეულობით სხვადასხვა სახის საფორტიფიკაციო მანქანები, კატაპულტები, ბალისტები,

¹ ნებტუნი (რომაელებთან) იგივე პოსეიდონი (პერძებთან)—ზღვითა მზრანებელა ღმერთი, ზევისი (იუპიტერი) ძმა.

74 საბრძოლო დროშა. სციპიონმა ჩაიბარა 276 ოქროს თასი, რომელთაგან. არც ერთი ერთ გირვანქაზე ნაკლებს არ იწონიდა; მრავალი ვერცხლის თასი, სულ 18 300 გირვანქის წონისა. ყველაფერი ეს რომის ხაზინისათვის გასაგზავნად აღნუსხა და ჩაიბარა გაიუს ფლამინიუსმა, ტრაზიმენის ტბასთან დაღუპული კონსულის შვილმა, რომელიც სციპიონის არმიაში ქვესტორად მსახურობდა. უამრავი სურსათ-სანოვანის საწყობებიც რომაელთა ფურაეს შეუერთდა.

ახალი კართაგენის 10 000 მოქალაქე ტყვედ ჩავარდა. სციპიონმა მათი ნაწილი გაათავისუფლა, ხოლო 2 000 ხელოსანი რომის სახელმწიფოს მონებად გამოაცხადა. მათ ევალებოდათ თავიანთი ოსტატობა მოეხმარათ სციპიონის სამხედრო საჭიროებისათვის. დანარჩენი ახალგაზრდა მცხოვრებნი და ქალაქის მონები რომაელმა სარდალმა გემებზე გადაიყვანა და მით საზღვაო ეკიპაჟი გააძლიერა. ის დიდის, თავაზიანობით და პატივისცემით ეპყრობოდა იმ ესპანელი ტომების მძევლებს, რომლებიც აგრეთვე რომაელთა ხელში ჩავარდნენ.

ახალი კართაგენის კომენდანტობა სციპიონმა ჩააბარა ფლოტის უფროსს, გაიუს ლელიუსს, თვითონ სახმელეთო არმია დასასვენებლად ბანაკებში დააბრუნა. მეორე დღეს მან შეკრიბა ჯარები, მსხვერპლი შესწირა ღმერთებს, შეაქო და მადლობა გადაუხადა ჯარისკაცებს და შეუდგა მათ დაჯილდოვებას. პირველ რიგში უხვად დააჯილდოვა ისინი, ვინც პირველად გადალახეს ქალაქის კედლები ხმელეთიდან თუ ზღვიდან; გადასცა მათ კედლის გადალახვისათვის სპეციალურად დაწესებული ოქროს გვირგვინები. ყველაზე დიდი ჯილდო და სარდლის ქება-დიდება წილად ხვდა გაიუს ლელიუსს, რომელიც სციპიონმა ამ ბრძოლაში დამსახურებისათვის თავის სწორად აღიარა; ამიტომაც ის შეამკო ოქროს გვირგვინით და თან 30 ხარიც აჩუქა.

შემდეგ სციპიონმა ბრძანა, რომ მის წინ მიეყვანათ ესპანელი მძევლები, სულ 300-მდე კაცი. მან ტუბილი სიტყვით აუწყა, რომ რომაელები ძალდატანებით არ ჩარიცხავდნენ მათ თავიანთ რიგებში კართაგენელებთან საომრად; რომაელებს არ სურთ ესპანელთა დაჩაგვრა და დამორჩილებაო. თან ბრძანება ვასცა ესპანელ ტყვეებს მოქცეოდნენ დიდის პატივით, განსაკუთრებით კი მათ შორის მყოფ ქალებს. ამავე დღეს მიეწერება გადმოცემა: სციპიონს მიჰგვარეს არაჩვეულებრივი სილამაზისა და მომხიბვლელობის მქონე ტყვე ესპანელი ქალწული. მან სარდლის კითხვაზე უპასუხა ვისი შვილი იყო ის და, სხვათაშორის, ისიც გამოიჩინა, რომ ეს ქალი საცოლე ყოფილა ერთი წარჩინებული კელტიბერის ალუციუსისა. სციპიონმა საწრაფოდ მოიწვია ქალის მშობლები და საქმრო. დაუბრუნა მათ ქალი და სამაგიეროდ დაკმაყოფილდა მხოლოდ იმით, რომ აღუციუხი რომაელთა მეგობარი

უნდა გამხდარიყო. მოულოდნელი სიხარულით აღტაცებულმა მშობლებმა, სანამ სასიძო თავის ბედნიერებას სციპიონისადმი უსაზღვრო თაყვანისცემით გამოხატავდა, სარდლის ფერხთა წინაშე ოქროთი საყსე ქურკელი დასდგეს. სციპიონმა აიღო ის, მოიხმო ალუციუსი და გადასცა მას შემდეგი სიტყვებით: „იმ მზითვეს, რომელსაც შენი სამამრი თავის ქალს გამოატანს, მიუმატე ეს ოქროც, როგორც მზითვეი პირადად ჩემგანო“. საერთო აღტაცებას საზღვარი არ ჰქონდა. ამგვარად, სციპიონი მახვილის გვერდით ესპანეთში მოხერხებულად იყენებდა რომაულ დემაგოგიასა და დიპლომატიას. ეს მშვენივრად შეეძლო ესწავლა მას, თუნდაც თავისი ძლიერი მოწინააღმდეგისაგან: ჰანიბალიც ხომ ასეთივე პოლიტიკით უდგებოდა გალებსა და იტალიეებს!

ასეთი დიპლომატიისა და რაინდული სცენების გათამაშებით სციპიონს მალე ვაუფარდა სახელი მთელს ესპანეთში. თვით ალუციუსი ავრცელებდა ხმებს, რომ ესპანეთში გამოცხადდა „ღმერთების მსგავსი კაბუჯი, რომელიც ყველას ამარცხებს იარაღით, ასევე სულგრძელობითა და ქველმოქმედებით“. თვითონ ალუციუსი 1 500 მხედრით გამოცხადდა სციპიონის სამსახურში.

რამდენიმე დღის შემდეგ სციპიონმა გამარჯვების მახარობლად რომში გაგზავნა გაიუს ლელიუსი, რომელსაც თან გაატანა დატყვევებული მაგონი და 15 კართაგენელი სენატორი. ახალი კართაგენის დაცემის ამბავმა და სციპიონის ბრწყინვალე გამარჯვებამ დიდი სახალხო ზეიმი გამოიწვია რომში. სციპიონი დიდი სარდალი შეიქნა; მას განუსაზღვრელი ვადით ვაუგრძელეს ესპანეთის პროკონსულობა და მთავარსარდლობა (ასეთი დარღვევა რომის კონსტიტუციამ ჯერ არც იცოდა!).

სციპიონი კიდევ რამდენიმე დღე დარჩა ახალი კართაგენის კედლებთან. იგი ერთ წუთსაც არ ჰკარგავდა ტყუილებრალოდ; წვრთნიდა ჯარისკაცებს, აწყობდა სასწავლო ლაშქრობებს, ხელმძღვანელობდა საზღვაო ბრძოლის ხელოვნებათა სწავლას და სხვ.

მაგრამ იგი ერთი წუთითაც არ ივიწყებდა ძირითად ამოცანას: არ დაეშვა ჰასდრუბალის გაქრა იტალიისაკენ. სწორედ ამ მიზნით ის ახალ კართაგენში გარნიზონის ჩაყენების შემდეგ თავისი არმიით გაეშურა ისევ ტარაკონში, მდ. იბერის ჩრდილოეთით, და შეუდგა კართაგენელთა წინააღმდეგ ახალი დარტყმის სამზადისს. აქ მასთან ცხადდებოდნენ ესპანელ ტომთა ბელადები და სთავაზობდნენ კავშირს. ესპანელები ზედოზედ ტოვებდნენ კართაგენელთა ბანაკებს და რომაელთა არმიებში ერიცხებოდნენ.

ზამთრის (209—208) განმავლობაში სციპიონი ახალ არმიებს აკომპლექტებდა: მან მთელი საზღვაო ეკიპაჟები სახმელეთო ნაწილებს შეუერთა. გაზრდილი არმიებით სციპიონს სურდა ერთდროულად ორი

ამოცანა განეხორციელებინა, იბერ-პირენეის ხაზიც დაეცვა. რომ მტერი იტალიისაკენ არ გაქრილიყო და პასდრუბალის სრული განადგურებით ესპანეთიც მთლიანად დაეპყრო.

208 წლის გაზაფხულზე, როცა გაიუს ლელიუსი რომიდან დაბრუნდა, სციპიონი მასთან ერთად დიდი არმიით დაიძრა სამხრეთ-დასავლეთის მიმართულებით, სადაც უნდა შეხვედროდა პასდრუბალს. მართლაც, სამხრეთ ესპანეთში, მდინარე ბეტისის (დღ. გვადალკვივირი) ზემო წელზე, ქ. ბეკულის მახლობლად, მოხდა ბრძოლა სციპიონსა და პასდრუბალს შორის. კართაგენელებს შესანიშნავი პოზიციები (ტერასებად აღმართული მდლობი) ეჭირათ, მაგრამ რომაელები რიცხობრივად სჭარბობდნენ მტერს. სასტიკმა ბრძოლამ გადამწყვეტი მიმართულება მიიღო მათ შორის, როცა რომაელებმა ფლანგებიდან—მარჯნიდან ლელიუსმა, მარცხნიდან თვით სციპიონმა ძლიერად დაარტყეს კართაგენელებს. პასდრუბალმა შენიშნა თავისი მებრძოლების შედრკომა და, არძიის გადარჩენის მიზნით, სასწრაფოდ დასტოვა ბრძოლის ველი. ის წამოეწია წინასწარ გაგზავნილ რაზმს, რომელსაც მისი ხაზინა და სპილოები მიჰყავდა, და სწრაფი მარშით გაეშურა ჩრდილოეთისაკენ.

რომაელებმა ხელში ჩაიგდეს მტრისაგან მიტოვებული ბანაკი. პასდრუბალის არმიიდან ტყვედ ჩავარდა 10 000 ქვეითი და 2 000 ცხენოსანი. მათგან ესპანელები სციპიონმა სასყიდლის გარეშე გაათავისუფლა, ხოლო აფრიკელები ღონებად აქცია. აღფრთოვანებული ესპანელები მას მიესალმნენ როგორც მეფეს. „ჩემთვის მთავარსარდლის სახელი, ხალხის მიერ მონიჭებული, — სთქვა სციპიონმა, — უმაღლესი და ყველაზე საპატიო ტიტულია; მეფის ტიტულს სხვა ხალხებში ძალიან დიდი პატივი აქვს, მაგრამ რომაელთათვის ის აუტანელია; ამიტომ, თუ თქვენ ფიქრობთ, რომ მე მეფური სულით ვარ დაჯილდოებული, დაე, შეინახეთ ეს თქვენს გულში, მაგრამ მე კი მეფე არ მიწოდოთ“. მართლაც, ესპანელებს ნაკლებად ესმოდათ, თუ რამდენად მიუღებელი იყო მეფის, „ტირანის“ მოხსენიება რომის რესპუბლიკური კონსტიტუციისათვის, და ამიტომ ისინი სციპიონის განცხადებას უფრო მის თავმდაბლობას მიაწერდნენ, ვიდრე რომაული პოლიტიკური წყობილები-საგან „ტირანიის“ შეზღუდულობას.

დატყვევებულთა შორის აღმოჩნდა მასინისას მცირეწლოვანი ძმისწული მასივია. რომელსაც ბიძისაგან მალულად იარაღი აუჩხამს, ცხენზე შემჯდარა და ბრძოლაში ჩაბმულა. მაგრამ პირველსავე შეტაკებაში ყმაწვილი ცხენს გადმოუგდია და რომაელების ხელში ჩავარდნილა. / სციპიონმა მასივა უხვად დაასაჩუქრა, გადასცა მას ცხენი, ტანსაც-

მელი, ოქროს ბეჭედი და მისი სურვილისამებრ გაუშვა ისევ მასინისას-თან. ✓

შემდეგ სარდლის შტაბში დაიწყო ბჭობა, თუ როგორ მოქცეულიყვნენ: დასდევნებოდნენ ჰასდრუბალს. თუ განეგრძობთ ლაშქრობა სამხრეთისაკენ. ბოლოს, სციპიონმა გადასწყვიტა ხელი აეღო ჰასდრუბალის დევნაზე, რადგან მასთან ქვეყნის სიღრმეში შეჭრა, როცა მტრის ყველა სარდალს უკვე თავი მოეყარა, მეტად სახიფათოდ მიიჩნია. მას ეჭვი არ ეპარებოდა, რომ იბერ-პირენეის ხაზზე დაბანაკებული რომაელები ჰასდრუბალს იტალიისაკენ არ გაუშვებდნენ. მაგრამ „ღვთაებრივი ჭაბუკი“ მწარედ მოსტყუვდა.

ჩრდილო-აღმოსავლეთის მიმართულებით წასულ ჰასდრუბალს მალე შეუერთდნენ მაგონი და ჰასდრუბალ გისკონის-ძე. ხანმოკლე თათბირის შემდეგ გადაწყდა, რომ მაგონი თავის არმიას გადასცემდა ჰასდრუბალ გისკონის-ძეს და თვითონ სათანადო ფინანსებით გაეშურებოდა ახალი ჯარების შესაკრებად ბალეარის კუნძულებზე (რადგან ესპანელთა იმედი ნაკლებად ჰქონდათ); მასინისა თავისი ნუმიდიური კავალერიით კვლავ განაგრძობდა რომაელებზე თავდასხმებს. ერთი სიტყვით, სამივეს ევალებოდა სციპიონის წინააღმდეგ ბრძოლა. თვითონ ჰასდრუბალ ბარკა თავისი არმიით გაიჭრებოდა იტალიისაკენ.

მართლაც, ჰასდრუბალმა 208 წლის ბოლოს სწრაფი მარშით გაიარა მდ. იბერის ზემო წელი და ბისკაის ყურის მახლობლად, იქ, სადაც რომაელთა დაცვა არც არსებობდა. გადალახა პირენეის მთები. ამრიგად, სციპიონმა ვერ გადასჭრა მასზე დაკისრებული ძირითადი ამოცანა. 207 წლის დასაწყისში ჰანიბალის ღირსეული ძმა სწრაფად მიაბიჯებდა ტრანსალპიურ გალიაზე, პირდაპირ ალპებისაკენ.

ამგვარად მოწყდა იტალიის ცის თაღზე „დამოკლეს მახვილი“, კვლავ ახალა წყეულმა „ჰანდორამ“ ხუფი საშინელებათა ყუთს.

ჰანიბალი იტალიაში
ჰანიბალის უპანასწავლი იხადი

207 წლის გაზაფხულზე ჰასდრუბალმა იმავე გზით, რა გზითაც 11 წლის წინათ ჰანიბალმა, გადალახა ალპები და შეიჭრა ჩრდილოეთ იტალიაში. დაახლოებით 40 000 მეომარი ჩაიყვანა ცისალპიურ გალიაში. იგი ჰანიბალის მსგავსად ვარაუდობდა, რომ ახალ-ახალ ძალებს მიიღებდა გალებისაგან ან სხვა იტალიელი ტომებისაგან. საამისოდ, დიპლომატიისა და იარაღის ძალის გარდა, ჰასდრუბალს თან მოჰქონდა 4 000 გირვანქა ოქრო. ამის მეოხებით მან შესძლო გალების ქვეყნიდან რამდენიმე ათასეული მეომრით შეეესო არმია. ასე რომ ჩრდილოეთ იტალიაში სამხრეთისაკენ სალაშქროდ მზად ჰყავდა 60 000 მეომრისაგან

შემდგარი არმია. გარდა ამისა, 8 000 ლიგურიელი, როგორც რომში მიღებული ცნობიდან ჩანს, დღეს თუ ხვალ შეუერთდებოდა კართაგენელებს.

მიუხედავად იმისა, რომ წინა წლის დასასრულისათვის როგორც რომმა, ასევე ჰანიბალმა იცოდნენ ჰასდრუბალისაგან პირენეის მთების გადმოლახვის ამბავი, მაინც არცერთი მათგანი არ მოელოდა, რომ კართაგენელთა ახალი არმია ალპებს ასე მალე გადაივლიდა და იტალიაში გაჩნდებოდა. ჰასდრუბალის ასეთ სისწრაფეს უსათუოდ ხელს უწყობდა გალიაში და ალპებზე მცხოვრები ტომების მშვიდობიანი შეხვედრა, ტომებისა, რომლებიც ადრე ჰანიბალს მტრულად შეხედნენ, მაგრამ ახლა დარწმუნებული იყვნენ, რომ რომსა და კართაგენს შორის ატეხილი ბრძოლა მათ ნაკლებად ეხებოდათ. ამიტომაც მათმა ნეიტრალობამ ხელი შეუწყო ჰასდრუბალის დაუბრკოლებლივ წინსვლას იტალიისაკენ.

მიუხედავად ამისა, რომს სრული შესაძლებლობა ჰქონდა მზად დახვედროდა ახალ დიდ საფრთხეს, რომლის ნამდვილი არსი მას მთელი სიგრძე-სიგანით ჰქონდა წარმოდგენილი. იგრძნობოდა, რომ ახლოვდებოდა ხანგრძლივი, დაქანცველი ომების საბედისწერო ფინალი.

რასაკვირველია, რომისათვის, რომელსაც იმ წელს იარაღქვეშ 23 ლეგიონი — 140 000 მეომარი ჰყავდა, ჰასდრუბალის 50 000-იანი არმია, ბრძოლის უნარიანობითაც გაცილებით დაბალ საფეხურზე მდგომი, ვიდრე რომისა, თავისთავად დიდ საშიშროებას არ წარმოადგენდა, მაგრამ საშიში იყო ფინიკიელ ძმათა საომარი გეგმა, რაც მათ გაერთიანებაში მდგომარეობდა. ამიტომ რომს რაღაც უნდა დასჯდომოდა არ უნდა დაეშვა ჰასდრუბალის არმიის შეერთება სამხრეთში მდგომ ჰანიბალთან.

ამგვარად, ფინიკიელთა გეგმა იყო უბრალოდ, მარტივად მოფიქრებული, მაგრამ მტრისათვის მეტად სახიფათო. ასევე, მის საწინააღმდეგოდ რომაული გეგმაც იყო უბრალო და მარტივი, მაგრამ მეტად საპასუხისმგებლო.

207 წლისათვის ახალი დიდი საფრთხის ლიკვიდაციისათვის საჭირო იყო კონსულებად გამოცდილი სარდლების არჩევა. ასეთად მაშინდელ რომში პირველ რიგში მიჩნეული იყო გაიუს კლავდიუს ნერიონი, კაპუისა და ესპანეთის ბრძოლების გმირი, ენერგიული, მამაცი და თავგანწირული მეომარი, მაგრამ მეტად ფიცხი და ხშირად ავანტიურისტი სარდალი. სწორედ ამ სიფიცხისა და ხშირი წინდაუხედაობის გამო რომაელებმა გადასწყვიტეს ნერონისათვის კოლეგად აერჩიათ დინჯი, მოფიქრებული და შორსმხედველი კაცი. ასეთად ცნობილი იყო მარკუს ლივიუს სალინატორი, რომელმაც პირველი კონსულობის დროს (219 წ.) ლუციუს ემილიუს პავლესთან (კანესთან

დაღუპული სარდალი) ერთად სახელი გაითქვა ილირიის ომში. მაგრამ პირველი კონსულატის დასასრულს მის წინააღმდეგ პავლეს მიერ აღძრული საქმისადმი სენატისა და სახალხო კრების მსარდაქერის გამო განაწყენებულმა სალინატორმა დასტოვა რომი. ამის შემდეგ იშვიათად თუ გამოჩნდებოდა რომის ქუჩებში სამგლოვიარო თალხებში გახვეული და წვერ-ულვაშ გაბურძმვნილი. ის სოფელში ცხოვრობდა და სახელმწიფო საქმეებს სრულიად ჩამოშორებული იყო. ცენზორებმა არაერთხელ სცადეს კვლავ შეეყვანათ სენატორთა სიაში გაპოცდილი სახელმწიფო მოღვაწე: მაგრამ გაგულისებული სალინატორი ყოველთვის უარს ამბობდა. ბოლოს იგი ერთ-ერთი თავისი მეგვარე (ლივიუსი) ნათესავის საქმეზე იძულებული შეიქნა სიტყვა წარმოეთქვა სენატში და სახალხო კრებაზე. ამ სიტყვამ, რომელიც მას ბრწყინვალედ, დიდის ხელოვნებითა და მოსაზრებულობით წარმოუთქვამს, ალტაცება გამოიწვია ხალხში. ყველას მოაგონდა ლივიუს სალინატორი, ილირიის ბრძოლათა სახელგანთქმული გმირი და ჰეკვიანი სარდალი. ნერონის გვერდით 207 წლისათვის ერთხმად აირჩიეს მ. ლივიუს სალინატორი.

კონსულებმა სასწრაფოდ დაიწყეს ახალი ჯარების შედგენა: უზარმაზარი არმიები მზად იყვნენ ფინიკიელთა წინააღმდეგ გადაწყვეტი ღარტემებისათვის. ცხრაღლიანი ლოცვა-კურთხევისა და მსხვერპლშეწირულების შემდეგ კონსულებმა გაინაწილეს არმიები — თითოეულ მათგანს 40 000 მეომარი ერგო — და გაეშურენ მათდამი განკუთვნილ საბრძოლო ფრონტებზე: ნერონი სამხრეთით, ჰანიბალის წინააღმდეგ, ხოლო ლივიუსი — ჩრდილოეთით, ჰასდრუბალისაკენ. ამგვარად, გადაწყვეტილი იყო ფინიკიელთა ცალ-ცალკე განადგურება.

ჰანიბალი ბრუციუმიდან ჩრდილოეთისაკენ დაიძრა. მას წინ გადაეყარა რომაელთა არმია ნერონის სარდლობით. მაგრამ ნერონმა ჯერჯერობით ვერ გაბედა მასთან შეხება. ამიტომ ის მხოლოდ თან სდევდა ჩრდილოეთისაკენ. მიმავალ კართაგენელებს და მცირე თავდასხმებით ცდილობდა მათი წინსვლის შეფერხებას. ასე გაგრძელდა მანამდე, სანამ მოწინააღმდეგეთა არმიებმა არ მიაღწიეს აპულიის ქალაქ კანუზიუმს. აქ ჰანიბალმა დაიბანაჯა. დაბანაჯდნენ რომაელებიც. ჰანიბალმა აქ დაუწყო ლოდინი ძმისაგან გამოგზავნილ. შიკრიკებს და ბარათს იმის შესახებ, თუ სად უნდა შეერთებოდნენ ისინი ერთმანეთს: მოუთმენლად ელოდა ძმის მალემსრბოლებს—ამას ხომ გადამწყვეტი მნიშვნელობა ჰქონდა. მაგრამ ჰანიბალი ტყუილუბრალოდ ელოდა მათ.

ჰასდრუბალმა, რომელიც ერთ ხანს მდ. პადუსის სანაპიროზე ქალაქ პლაცენციის აღებას ცდილობდა, დაინახა თუ არა, რომ აქ დიდხანს დაყოვნდებოდა, ხოლო ეს ძირითად საომარ გეგმას ჩაშლიდა, მოხსნა ალყა და დაიძრა სამხრეთისაკენ. წინასწარ გამოჰყო ექვსი შიკრიკი

(ოთხი კელტი და ორი ნუმიდიელი), ჩააბარა მათ ბარათები და სასწრაფოდ გაგზავნა ჰანიბალთან სამხრეთისაკენ. მაგრამ შიკრიკებმა ვერ მიაგნეს ჰანიბალის ადგილსამყოფელს. ისინი ტარენტუმის ოლქში მივიდნენ, როცა ჰანიბალის არმია რომაელთა არმიის პირდაპირ უმოქმედოდ იდგა აპულიაში. სრულიად შემთხვევით შიკრიკები ხელში ჩაუვარდნენ ტარენტუმის რაიონების საძარცვევად გამოსულ რომაელებს. ისინი მიჰვარეს პრეტორს, რომელიც გაჩხრეკისას დარწმუნდა, თუ რა დიდი მნიშვნელობის ამბავთან ჰქონდა საქმე. მან ორი ესკადრონის თანხლებით სასწრაფოდ გაგზავნა ტყვეები აპულიაში, კონსულ კლავდიუს ნერონთან.

ნერონმა გახსნა ჰანდრუბალის წერილები. ის წერდა ჰანიბალს, რომ უკვე გამოვიდა „ფლამინიუსის გზაზე“, უმოკლეს დროში გაივლის აპენინებს, შევა უმბრიაში და აქ, მის სამხრეთ ნაწილში, მდ. ტიბრის შუა წელთან, ქ. ნარნიას მახლობლად დაელოდება მას.

ნერონისათვის ყველაფერი ნათელი შეიქნა. ის მიხვდა, რომ ახლა ბედნიერი შემთხვევა მას და მის ქვეყანას საუკეთესო შესაძლებლობას აღუვლდა შედარებით იოლად მოესპო ის საშიშროება, რომელთან ბრძოლა მრავალ სახიფათო და მეტად რთულ სამხედრო-ხლართებთან იყო დაკავშირებული. ამიტომ ნერონმა მიიღო მეტად გაბედული გადაწყვეტილება, რომელსაც, შესაძლოა, მართლაც იმ მომენტში ერთადერთი გამაწყვეტი მნიშვნელობა ჰქონდა. მოუხედავად იმისა, რომ მას მხოლოდ ჰანიბალის წინააღმდეგ დგომა და ჩრდილოეთისაკენ მისი წინსვლის შეკავება ევალებოდა და თანაც თავის კოლეგასთან არამეგობრული განწყობილებით იყო, სწრაფად გადაწყვიტა: სანამ ჰანიბალმა არაფერი იცოდა, კონსულთა გაერთიანებული არმიებით უნდა მოესპოთ ჰანდრუბალი. ნერონი სრული საიდუმლოების პირობებში შეუდგა თავისი გეგმის განხორციელებას. უპირველესად რომში სენატს გაუგზავნა ჰანდრუბალის წერილები და აუწყა მას თავისი გადაწყვეტილება, თან უთვლიდა, რომ რომის დასაცავად კაპუიდან ჩამოეყვანათ ერთი ლეგიონი და აგრეთვე ქალაქის მთელი მოსახლეობა დაეყენებინათ ფეხზე, ხოლო ქალაქ ნარნიასთან, სადაც ჰანდრუბალი თავის ძმას პაემანს უნიშნავდა, გამოეყვანათ იქ მდგარი საპოლიციო ნაწილები და მოსახლეობაც მტერთან დასახვედრად მიემზადებინათ. შემდეგ კონსულმა ჩრდილოეთის ოლქებში, სადაც მას უნდა გაეელო, წინასწარ აფრინა შიკრიკები ბრძანებით: ადგილობრივ მცხოვრებლებს გზებზე გაემზადებინათ სურსათ-სანოვაგე, ცხენები და სხვა გამწევი საქონელი მისი არმიისათვის. ერთი სიტყვით, ყველაფერი მზად ყოფილიყო ზედმიწევნით სწრაფი, ელვისებური მარშისათვის. ამის შემდეგ ნერონმა არმიიდან ამოარჩია ყველაზე უფრო ამტანი და მამაცი 6 000 ლეგიონერი

9. ანტიკური ქვეყნების ისტორია.

და 1 000 ზხედარი; გამოაცხადა, რომ აპირებს მოულოდნელად თავს დაესხას ლუკანიაში მდებარე ერთ-ერთ პატარა ქალაქს. თითქოსდა ამ მიზნით, იგი ღამით გავიდა ბანაკიდან და ყველასათვის მოულოდნელად გაუხვია ჩრდილოეთით, პიცენუმისაკენ. უმოკლესი გზებით, უსწრაფესი „მგლურით“ დაიძრა ჩრდილოეთისაკენ კონსულ ლივიუს სალინატორთან შესაერთებლად.

ჰანიბალის პირდაპირ მტრის ბანაკი იმავე მდგომარეობაში განაგრძობდა დგომას. ლეგატის, გაიუს კაციუსის მეთაურობით რომის არმია განაგრძობდა ჰანიბალის დარაჯობას.

ჰანიბალმა არაფერი იცოდა იმის შესახებ, თუ რა ამბები ხდებოდა მის ირგვლივ.

ნერონის მიერ გავზავნილმა ამბავმა რომში პირველად აურზაური და მითქმა-მოთქმა გამოიწვია. არავინ იცოდა სწორი იყო თუ არა ნერონის მიერ გადადგმული ექსტრაორდინალური ნაბიჯი. ბევრი იმ აზრისა იყო, რომ კონსულის ღონისძიება ავანტიურისტულია, რადგან მან შეასუსტა და უმეთაუროდ დასტოვა რომაული არმია მრისხანე ჰანიბალის პირისპირ. ყველაფერი დამოკიდებული ხდებოდა იმაზე, თუ რამდენხანს არ ეცოდინებოდა ჰანიბალს რა მოხდა როწინააღმდეგის ბანაკში; და როდ გაეგო, მაშინ ხომ მოსალოდნელი იყო კანეს ტრაგედიის განმეორება აპულიაში ან მრისხანე ფინიკიელის დაძვრა კონსულის ფეხდაფეხ, მისი განადგურება და მტრების შეერთება. ასეთი რისკი კი კონსულმა გასწია მაშინ, როცა ჩვენ იძულებული ვართ ომი ვაწარმოოთ მტრის ორი არმიისა და „ორი ჰანიბალის“ წინააღმდეგო.

მაგრამ ნერონის გადაწყვეტილებამ ბრწყინვალე შედეგი გამოიღო. იგი შეუსვენებლივ მიჰქროდა ჩრდილოეთისაკენ. გზადაგზა მისი არმია მთიდან დაგორებული თოვლის გუნდასავით იზრდებოდა. წინ შემხვედრი ადგილობრივი მცხოვრებლები მის არმიაში ერიცხებოდნენ და თან მისდევდნენ. ყველგან მზად ახვედრებდნენ სურსათ-სანოვაგეს, ცხენებს, გამწევე საქონელს. ნერონი კარგად გრძნობდა იმას, რომ ამ მომენტში რა გადაამწყვეტი მნიშვნელობა ჰქონდა სისწრაფეს. ამიტომ ის მებრძოლებს საჭმლის მისაღებადაც არ ასვენებდა; ჰამდნენ ფეხდაფეხ; დაღლილ ცხენებს გზადაგზა ცვლიდნენ; დაქანცულ მეომრებს ცხენებზე სვამდნენ ან ურმებზე ათავსებდნენ.

ასე მივიდა ნერონი ჩრდილოეთ იტალიის უკიდურეს სამხრეთ-აღმოსავლეთ ნაწილში, ე. წ. „გალების მიწაზე“, სადაც მდინარე მეტავრასთან დაბანაკებული იყო კონსული ლივიუს სალინატორი. იქვე, მის პირისპირ უკვე დაბანაკებულიყო შუა იტალიაში შესაქრელად გამზადებული ჰასდრუბალი.

ნერონმა წინდაწინ გავზავნა ეჭიბი ლივიუსთან და აცნობა მას თა-

ვისი მოსვლა. თან ეკითხებოდა მას: შეერთებოდა, თუ ცალკე დაბანაკებულიყო; და თუ შეერთების თანახმა გახდებოდა, დღისით მისულები მის ბანაკში, თუ ღამით.

კონსულები შეთანხმდნენ და ღამით შეაერთეს არმიები. ჰასდრუბალს რომ ნერონის მოსვლის ამბავი მოწინააღმდეგის კარვების გამრავლებით არ შეეტყო, ლივიუსმა ბრძანა არც ერთი კარავი არ შეემატებინათ ბანაკისათვის. ახალმოსულები უნდა მოთავსებულყვნენ დამხვდურთა სადგომებში: ტრიბუნი — ტრიბუნთან, ცენტურიონი — ცენტურიონთან, ლეგიონერი — ლეგიონერთან, ცხენოსანი — ცხენოსანთან და ა. შ.

გათენებისას მოწვეულ იქნა სამხედრო საბჭო. ზოგნი წინადადებას აყენებდნენ ბრძოლისაგან თავი შეეკავებინათ მანამ, სანამ ახალმოსულები კარგად არ დაისვენებდნენ. მაგრამ ნერონმა, რომელმაც ნათლად დაასურათა შექმნილი მდგომარეობა, ხაზი გაუსვა იმას, რომ, თუ ბრძოლა დაუყოვნებლივ არ მოხდებოდა და მრისხანე მტრები მოტყუების ბურუსიდან გამორკვევას მოასწრებდნენ, ყველაფერი წაგებული იქნებოდა. კამათი აღარ გაგრძელებულა. ნერონის წინადადება მიღებულ იქნა, კონსულებმა ბრძანება გასცეს და ატყდა საბრძოლო ნაღარის ცემა. რომაელთა არმია საბრძოლველად ეწყობოდა.

ჰასდრუბალიც ყოველგვარი ყოყმანის გარეშე მზად იყო შეებოდა მტერს და მასთან ანგარიშის გასწორების შემდეგ რაც შეიძლება მალე შეჭრილიყო ცენტრალურ იტალიაში. მაგრამ, როდესაც იგი ამხედრებული, მცირე ამაღის თანხლებით წინ გამოვიდა და საბრძოლოდ დაწყობილი მოწინააღმდეგის რიგები დაათვალიერა, შეაძჩნია, რომ ისინი გაცილებით მეტი იყვნენ, ვიდრე წინა დღეს; ამის შემჩნევა მას გაუადვილა მოწინააღმდეგეთა შეიარაღებაზე, ცხენებსა და საყვირის ხმებზე დაკვირვებამ: ბევრ რომაელს ისეთი სისტემის ფარი ეჭირა, როგორც ლივიუსის არმიაში მანამდე არ ჰქონდათ; ცხენთაგან ბევრი დადლილ-დაქანცული და ნაოფლარი ჩანდა; საბრძოლო საყვირთა ორმაგი ხმაც ნიშნავდა, რომ ორივე კონსული ერთად იყო. ჰასდრუბალი დარწმუნდა, რომ მტრის არმიას ახალი ჯარები შეემატნენ. ამიტომ მან არ მოისურვა გენერალური ბრძოლის რისკი გაეწია და ბრძანება გასცა ბრძოლისაგან თავი შეეკავებინათ და ბანაკში ჩაკეტილიყვნენ. ღამით ის მთელი არმიით აიყარა და მტრისაგან იღუმელ დაიძრა მდ. მეტავრას ზემო წელისაკენ. რათა მოხერხებული ფონის მონახვისთანავე გადასულიყო ნახე და შეჭრილიყო უმბრიაში, სადაც, მისი აზრით, ელოდებოდა ჰანიბალი!

საშინელი ბნელი ღამე იყო. უძილობითა და მრავალი მტრის სიახლოვით აფორიაქებული მეომრები ძლივს მიბობლავდნენ მდინარის

ღრანტეებიან სანაპიროებზე. კართაგენელებმა დაკარგეს მეგზურებიც; ერთი საღლაც მიამალა, მეორე პირდაპირ მდინარეში გადაეშვა და გაუჩინარდა. რაც უფრო ზევით მიიწევდნენ, გზა უფრო და უფრო ძნელად სავალი ხდებოდა. გათენდა. მზე შუბის ტარზე წამოიხარა, მაგრამ მეტად წყალუხვ და სწრაფ მთის მდინარეზე გადასვლა არსად ხერხდებოდა. სწორედ ამ დროს გამოჩნდნენ მტრის მოწინავე რაზმებიც.

რომელთა ბანაკში ზალე შეიტყვეს ჰასდრუბალის წასვლის ამბავი. კონსულებმა დაუყოვნებლივ ბრძანეს გამოედგნება. პირველი წამოეწივნენ მტერს ცხენოსანთა რაზმები, რომელთაც თვით ნერონი მეთაურობდა. შემდეგ, სულ ზალე, გამოჩნდნენ მსუბუქი ქვეითები პრეტორ პორციუსის მეთაურობით. ჰასდრუბალმა შეამჩნია, რომ ბრძოლისაგან უკან დახევისათვის აღარც ადგილი იყო და აღარც დრო. ამიტომ ბრძანა სასწრაფოდ გამაგრებულიყვნენ ზასლობელ ბორცვზე, საიდანაც შედარებით ადვილი იქნებოდა მრავალრიცხოვანი მტრის თავდასხმათა მოგერიება. მაგრამ სწორედ ამ დროს მოაღწია ლივიუსმა მთელი ქვეითი ლეგიონებით. კონსულებმა სასწრაფოდ გამართეს საბრძოლო წყობა: მარჯვენა ფლანგზე ნერონი დადგა, მარცხენაზე — ლივიუსი; ცენტრი პორციუსმა ჩაიბარა. ჰასდრუბალმაც სასწრაფოდ დააწყო თავისი არმია: საბრძოლო დროშების წინ ჩაამწყრივა სპილოები; მარცხენა ფლანგზე, ნერონის წინააღმდეგ, დააყენა კელტი მეომრები; მარჯვენა ფლანგზე, ლივიუსის წინააღმდეგ, ესპანელი ვეტერანები, ხოლო ცენტრში — ლიგურები.

ბრძოლა გაჩაღდა არაჩვეულებრივი სიმძაფრით. ორივე მხარე გრძნობდა, რომ ამ ბრძოლაში წყდებოდა მათი ქვეყნის სვე-ბედი. ბრძოლა განსაკუთრებით ცხარე იყო ფლანგებზე. ლივიუსის ლეგიონერთა მძლავრ იერიშებს თავგამეტებით იგერიებდნენ ესპანელები, რომელთაც წინ მიუძღოდა თვით ჰასდრუბალი. ნერონმაც კარგახანს ვერ მოახერხა ოდნავი ბიჯიც წაედგა კელტების წინააღმდეგ ბრძოლაში; „ნუთუ ამისათვის გამოვიარეთ თავპირისმტერევით ეს ამოდენა გზა!“ — დაპლრიალებდა იგი სისხლისღვრისაგან შეძრწუნებულ მეომრებს. ის ამაოდ ცდილობდა ასულიყო ბორცვზე, რომელზეც მიბჯენილი იყო კელტების მარცხენა ფლანგი. ბოლოს ნერონმა მოხსნა თავისი კოპორტები, ზურგიდან შემოუარა ისევ რომელთა არმიის ცენტრალურ რაზმებს, ლივიუსის მარცხენა ფლანგს, ე. ი. მთელს რომაულ განლაგებებს, და სრულიად მოულოდნელად გვერდიდან თავს დაესხა მტრის მარჯვენა ფლანგს. ამგვარად, ბრძოლის მთელმა სიმძიმემ კართაგენელთა არმიის ყველაზე ბრძოლისუნარიან ნაწილებზე, ესპანელთა და ლიგურთა მხარეზე გადაინაცვლა. ხოცვა-ჟლეტა ახალი სისასტიკით გაჩაღდა. ნერონი თანდათან მოექცა მოწინააღმდეგის ზურგშიაც. რომაელები მტრის

გარშემო ნელ-ნელა კვრავდნენ მარყუქს. კიდევ რამდენიმე საათი და კართაგენელთა მარჯვენა ფლანგი გვაშების გროვად იქცა; მალე მათი ცენტრიც და მარცხენა ფლანგიც დამარცხდა. კელტების უმრავლესობა, რომლებიც ბრძოლაში ყველაზე ნაკლებ თავგამოდებას იჩენდნენ, თითქმის უბრძოლველად დანებდნენ რომაელებს. დაიხოცა ყველა სპილო. რომლებიც, ბრძოლაში გაგიყვებულნი, ერთნაირ ვნებას აყენებდნენ როგორც კართაგენელებს, ასევე რომაელებს. გაცოფებულ მხეცებს მათივე მხედრები მძიმე ჩაქუჩებს სცემდნენ თავისა და კისრის არეში და ისე ხოცავდნენ (ეს ჰასდრუბალისაგან ჰქონდათ ნასწავლი).

თვით ჰასდრუბალმა ამ ბრძოლაში ყველა განაცვიფრა როგორც შესანიშნავმა სარდალმა და შეუდარებელი სიმამაცის მემომარმა. იგი სისხლში მოსვრილი მიჰქროდა ყველაზე სახიფათო ადგილებზე; იგი ყველგან იყო, სადაც კი მის მემომრებს უჭირდათ; საყვედურობდა, ევედრებოდა. ეხმარებოდა სულიერად დაცემულთ; უკან აბრუნებდა ბრძოლიდან გაქცეულთ; აქებდა და აქეზებდა თავდადებულთ. ასეთი იყო ის მანამ, სანამ ბრძოლა თითქმის არ შეწყდა, ხოლო როცა დაინახა, რომ მისი დამარცხება საბოლოოდ დადასტურებული იყო, ღეზი ჰკრა ცხენს და გადაეშვა რომაელთა ლეგიონების შიგ შუა გულში, სადაც იბრძოდა როგორც ჰერკულესი კენტავრებით გარშემორტყმული, სანამ მტრების სათხედებისაგან სრულიად არ დაიხსრია და სისხლისაგან არ დაიცილა. ასე გმირულად მოკვდა ჰამილკარის ღირსეული შვილი, ჰანიბალის მამაცი ძმა.

მეტავრას ბრძოლა კატასტროფის სისრულით კანეს ბრძოლას ჰგავდა. კართაგენელთა არმია მთლიანად განადგურდა. ჰასდრუბალის 50 000 მემომარი ესვენა სისხლიან ველზე. შორა, წინ, თავისიანთაგან განცალკევებით, დახოცილ რომაელთა შუაგულში ძნელი არ იყო თვით განგმირული სარდლის ზონახვა. ნერონის ბრძანებით მას თავი მოჰკვეთეს და ქსოვილში გახვიეს. როგორც ჰანიბალისათვის განკუთვნილი საზარელი ძღვენი. ეს იყო სამაგიეროს გადახდა „ბარბაროსი“ ფინიკიელისადმი მის მიერ ემილიუა ჰავლეს. ტაბერიუსს გრაკხუსისა და კლავდიუს მარცელუსის დიდებულად დაკრძალვისათვის. 5 000 ტყვე ჩაიგდეს რომაელებმა ხელში. მაგრამ კონსულებსაც ძვირად დაუჯდათ ეს გამარჯვება: დახოცილ მტერთა გროვებში 8 000 რომაელი ერიო. მრავლად ჰყავდათ დაჭრილებიც. ხოლო თითქმის მთელი არმია ბრძოლის სისასტიკისა და ხოცვა-ყლეტის საშინელებისაგან ისე იყო შეძრწუნებული, რომ ძალა აღარ შეაწყვედათ დასდევნებოდნენ კელტებისა და ლიგურების იმ ბრბოებს, რომლებიც სრულიად უიარაღოდ. დაჭრილები და დაღლილ-დაქანცულნი ძლივს მილასლასებდნენ მახლობელ ადგილებში. თვით კონსულმა ლივიუს სალინატორ-

მა უარი განაცხადა დასდევნებოდა მათ. „დაე, დარჩნენ მოწამენი და მოამბენი მტრის განადგურებისა და ჩვენი ვაჟკაცობისა“, — ამაყად განაცხადა ზინ.

რომრ დაძაბული მოუთმენლობით ელოდა ბრძოლის შედეგს. მზის ამოსვლიდან. დაღამებამდე სენატორები არ შორდებოდნენ კურჩებს. ფორუმი და ქუჩები სავსე იყო მღელვარე ხალხით. მოხუცები და ქალები განუწყვეტელი ლოცვა-ვედრებით „თავს აბეზრებდნენ“ ღმერთებს. გამარჯვების პირველი ხმა რომში ჩამოიტანეს ეტრურებიდან, სადაც ბრძოლის მონაწილე ორი მხედარი დაბრუნებულა სასიხარულო ამბით. მაგრამ არავის სჯეროდა, რომ გამარჯვების მოპოვება ასეთ საშიშ მტერზე ასე მოკლე დროში შეიძლებოდა. მალე მოვიდა ეჯიბი ნარნიის პრეტორისაგანაც, რომელიც წერილით ადასტურებდა ეტრურიელი მხედრების ნათქვამს. ხალხი გარს შემოეხვია ეჯიბს და მოითხოვდა აქვე, სენატში წარდგენამდე გაეხსნა წერილი. ყველაფერი მართალი გამოდგა. ხოლო როცა რომში თვით კონსულთაგან გამოგზავნილმა მალემსრბოლებმა შემოაბიჯეს და სასიხარულო ამბავი საბოლოოდ დაადასტურეს, ქალაქი აუწერელმა აღტაცებამ მოიცვა. განუწყვეტელი ძახილი: „ვიქტორია!“ (victoria—გამარჯვება) აყრუებდა რომს. ეს ჰგავდა ბერძენთა „ნიკეას“, მართონის ველზე თავზარდამცემი მტრის, სპარსელების დამარცხების შემდეგ¹. სენატის დადგენილებით სამდღიანი ლოცვა-ზეიმი გამოცხადდა. სამი დღის განმავლობაში რომი ზეიმობდა ისე, როგორც არასდროს. ტრაზიმენისა და კანეს სისხლი აღებულ იყო. ყველა გრძნობდა, რომ ჰასდრუბალის განადგურება ჰანიბალზე ძლევის მოახლოებას ნიშნავდა. რომაელები ხედავდნენ სრული გამარჯვების ცისკარს.

ნერონი თავისი ჯარებით ბრძოლის დამთავრებისთანავე სწრაფი მარშით დაიძრა ისევ ჰანიბალის პირისპირ დაბანაკებული არმიისაკენ. იგი მეექვსე დღეს ადგილზე იყო. ამგვარად, ყველაფერი ეს, საბედისწერო ამბები კართაგენელთათვის, სულ რაღაც ორ კვირაში დამთავრდა. ჰანიბალმა არაფერი არ იცოდა. ის ელოდა ამბავს ძმისაგან და მან მიიღო იგი.

ნერონმა ბანაკში დაბრუნებისთანავე ბრძანა კართაგენელთა მოწინავე საგუშაგო პოსტებზე გადაეგდოთ ჰასდრუბალის თავი, რომელიც მას აქამდე დიდის „მზრუნველობით“ მოჰქონდა. თან ორი აფრიკელი

¹ 490 წელს (ძვ. წ.) მართონის ველზე (ატიკის ჩრდილო-აღმოსავლეთ ოლქში) ათენელებმა სასტიკად დამარცხეს სპარსელთა მრავალრიცხოვანი არმია. ბრძოლის მონაწილე ერთი ათენელი მეომარი სირბილით მივიდა ათენში და „ნიკეას“ („გამარჯვება“) ძახილით აცნო თანამემამულეებს სასიხარულო ამბავი. ამას ათენში საყოველთაო ზეიმი მოჰყვა.

ტყვე გაათავისუფლა, რათა მათ კართაგენელთა სარდლისათვის პირადად ეცნობებინათ საშინელი ამბავი.

დიდი სარდლის კარავს გლოვის ზარი დაეცა. აუწერელი იყო ჰანიბალის მწუხარება, როცა მას კარავში შეუტანეს რომაელთაგან შემადგენელი მონაძღვენი: გასისხლიანებული ძმის თავი, რომელსაც მისთვის გამარჯვება უნდა მოეტანა. „ახლა კი ვხედავ კართაგენის ბედს!“ — შეჰყვირა ჰანიბალმა. იგი დასცქეროდა მის წინ დასვენებულ სისხლში შეღებილ ძმის მამაცურ თავს და მასთან ერთად ხედავდა დამარცხებულ სამშობლოს. მზე ესვენებოდა; საღამო ახლოვდებოდა; დგებოდა ჰანიბალის ძლიერების დაისი.

უანანანელი ბრძოლები. სიბიონი აფრიკაში

ჰანიბალი იტალიიდან წასვლას ჯერ კიდევ არ ფიქრობდა. მას თითქოს აღარაფრის იმედი არ ჰქონდა, რომ ისევ აღედგინა 9—10 წლის წინანდელი სიმძლავრე. მაგრამ მაინც ცდილობდა უკანასკნელი, მოგერიებითი ბრძოლები ეწარმოებინა მანამ, სანამ უკანასკნელი სისხლის წვეთები შერჩენოდა მას და მის არმიას; სანამ ვინ იცის რა „სასწაული“ მოხდებოდა და კართაგენელთა ჩამობნელებულ ცაზე კვლავ ინათებდა; იქნებ აფრიკიდან აწ დასუსტებული ბარკიდების პარტია გაძლიერებულ კონსერვატორებთან ბრძოლაში რამეს გააწყობდა და მიეშველებოდნენ; ან კიდევ, იქნებ ჰამილკარის მესამე „ბოკვერი“, მაგონი ესპანეთიდან იტალიისაკენ ახალი ლაშქრობით ჰასდრუბალის აჩრდილის როლის შესრულებას მაინც შესძლებდა.

ამ ვარაუდებითა და მათზე დაყარებული გადაწყვეტილებებით ჰანიბალი გაეშურა უკიდურეს სამხრეთ იტალიაში, ბრუციუმისაკენ. მხოლოდ ეს ოლქიღა ემორჩილებოდა მას. აქედან იგერიებდა ის რომაელთა შემოტევებს.

მაგრამ რომაელთა შეტევები უშუალოდ ჰანიბალის წინააღმდეგ აღარ ატარებდა სისტემატურ ხასიათს. რომის მთავარ მიზანს, მისი სტრატეგიული გეგმის ძირითად ხაზს ახლა წარმოადგენდა ესპანეთის სრული დამორჩილება და ექსპედიცია აფრიკაში, უშუალოდ კართაგენის წინააღმდეგ. ამის შემდეგ სრულიად გარიყული ჰანიბალი თვითონ დაჰყრიდა იარაღს ან სულ გადაიხვეწებოდა იტალიიდან. ახალი რომაული გეგმა ძალიან ჰგავდა ჰანიბალის შიშველადრიდანვე შემუშავებულ სტრატეგიულ გეგმას, რომლის ძირითად ამოცანას რომის გარიყვა და უმოკავშიროდ, ურეზერვოდ მისი დაჩოქება წარმოადგენდა.

ბედნიერი 207 წელი რომაელებმა ძლევაამოსილ კონსულთა ბრწყინვალე ტრიუმფით დაასრულეს. ტრიუმფის ბოლოს, ნერონის წინადადებით. დიქტატორად დანიშნულ იქნა მისი კრლევა ლივიუს სა-

ლინატორი. მან კი თავის თანაშემწედ და ცხენოსანთა უფროსად დანიშნა ქვინტუს ცეცილიუსი. მომავალი წლისათვის კონსულებად არჩეულ იქნენ ლუციუს ვეტურიუსი და ქვინტუს ცეცილიუსი (იგივე დიქტატორის თანაშემწე). ესპანეთის მმართველობის, პროკონსულატობის ვადა გაუგრძელდა პ. კორნელიუს სციპიონს.

კონსულებმა ძლიერი არმიებით არაერთხელ სცადეს ბრუციუმიდან ჰანიბალის გამოდევნა, მაგრამ ამაოდ. საომარ მოქმედებათა ცენტრებმა იტალიიდან საბოლოოდ გადაინაცვლეს.

კართაგენი დიდად შეაშფოთა იტალიაში განცილებმა უკანასკნელმა მარცხმა და სციპიონის წარმატებებმა ესპანეთში. ამიტომ კართაგენის სელისუფლებამ ესპანეთის მთავარსარდლის პოსტზე ახალი ჯარებით გაგზავნა ჰანონი. მალე სციპიონმა გაერთიანებული მაგონისა და ჰანონის წინააღმდეგ გაგზავნა ლეგატი სილანუსი, რომელმაც დაამარცხა კართაგენელები და ტყვედ შეიპყრო აფრიკიდან ჩამოსული მთავარსარდალი ჰანონი. სამი დღის განმავლობაში რომაელთა მთელი კავალერია ამაოდ სდევნიდა მაგონს.

ამის შემდეგ სციპიონმა მიმართა ჰასდრუბალ გისკონის-ძეს, რომელიც თავისი არმიით გადაიხვეწა ნახევარკუნძულის უკიდურეს სამხრეთში და შეუდგა აქ მდებარე ქალაქების, მათ შორის ყველაზე დიდისა და მნიშვნელოვანის გადების (კადიქსი) დაცვას.

206 წელს ესპანეთში კიდევ ერთი დიდი ბრძოლა მოხდა კართაგენელებსა და რომაელებს შორის ისევ ქ. ბეკულასთან. მდ. ბეტისზე. ჰასდრუბალმა და მაგონმა აქ თავი მოუყარეს 70 000 ქვეით მეომარს, 4 000 მხედარსა და 32 სპილოს. სციპიონს 40 000 მეომარი ჰყავდა. მაგრამ მისი არმია ბრძოლისუნარიანობით გაცილებით სჯობდა მოწინააღმდეგის ჰერესსა და ნაკლებ დისციპლინირებულ ჯარებს. კართაგენელთა სარდლებმა ცენტრში დააყენეს რჩეული აფრიკული ნაწილები, ფლანგებზე — ესპანელები. სციპიონმა ცენტრში განაწყო ესპანელი მოკავშირეები. ზოლო ფლანგებზე — რჩეული რომაული ლეგიონები. ჯარების ასეთმა წყობამ თავიდანვე რომაელთა სასარგებლოდ შემოაბრუნა ბრძოლის ჩარხი. წინ გაჭრილი აფრიკელთა ცენტრი რომაულ ლეგიონერთაგან შემდგარ რკინისებურ ფლანგებში მოექცა და ყველა მხრიდან მათი შემოტევის ობიექტად იქცა. რომაელთა წინსვლას ისიც უწყობდა ხელს. რომ სციპიონმა ბრძოლაში კართაგენელთა ჩათრევა მოახერხა მაშინ. როცა მათ კიდევ არ ესაუზმათ და სიცხე-პაპანაქებაში მშვიერ-მწყურვალთ უხდებოდათ ბრძოლა. კართაგენელი სარდლები დამარცხდნენ და სწრაფი უკანდახევით ისევ გადესს შეაფარეს თავი.

მალე ამის შემდეგ პუბლიუს სციპიონმა და მისმა ძმამ ლუციუსმა თითქმის მთელი პირენეის ნახევარკუნძული ჩაიგდეს ხელში. კართაგენ-

ნელები ჯერ კიდევ მსილად უკიდურეს სამხრეთ სანაპიროებს ინარჩუნებდნენ. მათი არმია თითქმის სრულიად დაიშალა.

კართაგენელებს მთლიანად ჩამოშორდა ნუმიდიელი მასინისა, რომელთანაც ორი წლის წინათ მომხდარ დიდ ბრძოლაში მისი ტყვედჩავარდნილი ძმისწულის მასივას განთავისუფლების შემდეგ სციპიონს ახალი ურთიერთობა ჰქონდა. მასინისამ თანდათან აიცრუა გული კართაგენელ სარდლებზე და სციპიონს დაუახლოვდა.

ბოლოს მასინისა და სციპიონი პირადად შეხვდნენ ერთმანეთს და შეთანხმდნენ: როგორც კი რომაელი სარდალი აფრიკაში ჯარებს გადასხაზდა, მასინისა მთელი ნუმიდიური მხედრებით გაჩნდებოდა მის ბანაკში და ერთიანი ძალებით შეუტევდნენ კართაგენს.

მაგონმა ამის შესახებ არაფერი იცოდა. ის თავგამოდებით იცავდა გადესს. აქ მან მიიღო კართაგენის სენატის ბრძანება: ფლოტი, რომელიც მას გადესთან ჰყავდა, დაუყოვნებლივ წასულიყო ჩრდილოეთ იტალიისაკენ. შექრილიყო ლივურიაში, მოესყიდა ადგილობრივი ტომები. ჩაერიცხა ისინი თავის არმიაში და შეერთებოდა ჰანიბალს. ამრიგად, მას ევალებოდა განეხორციელებინა ჰასდრუბალის ამოცანა.

მაგონი გამოსაზამთრებლად გადავიდა ბალეარის კუნძულებზე და იქ შეუდგა სამზადიას მომავალ წელს იტალიაში ლაშქრობისათვის.

206 წლის ბოლოს სციპიონმა თითქმის მთლიანად დაპყრობილი ესპანეთის მმართველობა ჩააბარა პროპრეტორებს, ლუციუს ლენტიუსსა და ლუციუს მანლიუს აციდინუსს, თვითონ კი ათი გემით გაეშურა იტალიისაკენ. მას გადაწყვეტილი ჰქონდა თავისი თავი წამოეყენებინა კონსულის კანდიდატურად მომავალი წლისათვის.

რომის გარეთ, ბელონის მონასტერში შეხვდნენ სენატორები სციპიონს. აქ მან სენატის წინაშე წარმოადგინა მთელი ანგარიში, თუ რა გააკეთა ხუთი წლის მანძილზე ესპანეთში ყოფნის დროს; ლაპარაკობდა, რომ მან გაანადგურა მტრის ოთხი ძლიერი სარდალი თავიანთი ძლიერი არმიებითურთ; რამდენი ბრძოლა მოიგო, რამდენი ქალაქი აიღო, რამდენი სიმდიდრე ჩაიგდო ხელში; მთელი ესპანეთი ძე მგლის გერბს ემორჩილება. მაგრამ სენატმა სარდალს მანც უარი უთხრა სასურველ ტრიუმფზე. მიზეზად ის მოიგონეს, რომ რომაულ კანონთა თანახმად ტრიუმფის უფლება ენიჭებოდათ მხოლოდ დიქტატორს. კონსულს და პროეტორს, ხოლო არავითარ შემთხვევაში პროკონსულს ან პროპრეტორს (სციპიონი ხომ პროკონსული იყო). სციპიონი იძულებული გახდა ბოლმა გულში ჩაეკლა.

სულ სხვარიგად შეხვდა მას რომაელი ხალხი. მთელი მოსახლეობა

უდიდესი აღფრთოვანებითა და ზეიმით ეგებებოდა ესპანეთის გმირს. რომელიც დიდებამოსილი მიეშურებოდა კაპიტოლიუმისაკენ. მის წინ მიჰქონდათ სახელმწიფო ხაზინისათვის განკუთვნილი 14 342 გირვანქა ვერცხლი და უამრავი ვერცხლის მონეტა. ქალაქის მთელი მოსახლეობა ესწრებოდა კაპიტოლიუმში დიდ მსხვერპლშეწირულებას: სციპიონი აღთქმას უსრულებდა მის მფარველ ლმერთს იუპიტერს — ას ხარს სწირავდა მას.

სციპიონისადმი ხალხის დიდი პატივისცემა კიდევ უფრო ნათელი გახდა კონსულთა არჩევნების დროს. მრავალრიცხოვანმა კომიციებმა კონსულად ერთხმად აირჩიეს სციპიონი, რომელსაც, ხალხის რწმენით, ერთადერთს შეეძლო მეტოქეობა გაეწია გენიალური კართაგენელი სარდლისათვის.

სციპიონისადმი ოლიგარქიული სენატისა და დემოკრატიული მასების დამოკიდებულების სხვადასხვაობისას ერთი რამ აშკარად იგრძნობოდა: ოლიგარქიას არ სურდა ერთი პიროვნება, ამ შემთხვევაში სციპიონი, ისე გაძლიერებულიყო, რომ თავისი ერთპიროვნული „ტირანიით“ დაესუსტებინა რომის მმართველი კონსერვატიულ-არისტოკრატიული ოლიგარქიის ძალაუფლება, რაც რომის ე. წ. რესპუბლიკური კონსტიტუციით იყო დაკანონებული. ხოლო დემოკრატიას სურდა სახელმწიფოს მთელი ძალაუფლება სწორედ ერთი კაცის, „უ პ ი რ ვ ე ლ ე ს ი მ ო ქ ა ლ ა ქ ი ს ა“ (princeps civitalis) და ნიჭიერი სამხედრო-პოლიტიკური ზოღვაწის ხელში ყოფილიყო კონცენტრირებული. თანდათან ბატონდებოდა აზრი, რომ ე. წ. რესპუბლიკური კონსტიტუციით გათვალისწინებული კონსულ-სარდალთა ხშირი ცვალებადობა ხელს უშლიდა მტრის განადგურების დაჩქარებას. საჭირო იყო ოლიგარქია შერიგებოდა მისი უმაღლესი უფლებების გამომხატველი კონსტიტუციის დარღვევას და დათანხმებულიყო რამდენიმე წლის განმავლობაში მაინც, სანამ სახელმწიფოს უშიშროება უზრუნველყოფილი არ იქნებოდა, სახელმწიფოს მართვა-გამგეობის სადავეები ცენტრალიზებული ყოფილიყო ერთი პიროვნების ხელში. ჰანიბალის დამარცხებას და კართაგენის დამორჩილებას რამდენიმე წელი მაინც დასჭირდებოდა და სენატიც უნდა შერიგებოდა ამ წლების განმავლობაში სციპიონის „თვითნებობას“ და „ტირანიას“. სციპიონისათვის ტრიუმფზე უარის თქმა პირველი სიმპტომი იყო იმ უთანხმოებისა, რომელიც შემდგომ წლებში უფრო შესამჩნევად და საგრძნობი შეიქნა ერთპიროვნულ მმართველსა და ოლიგარქიას შორის.

მეორე კონსულად არჩეულ იქნა პუბლიუს ლიციინიუს კრასუსი, რომელიც იმავე დროს უმაღლესი ქურუმიც იყო.

სციპიონი აშკარად აცხადებდა, რომ მან უმაღლესი მავისტრატურა

იმისათვის მიიღო, რათა დაამთავროს ეს საშინელი ომი. ამისათვის ის აყენებდა გაბედულ გეგმას აფრიკაში უშუალოდ კართაგენის წინააღმდეგ ექსპედიციის მოწყობის შესახებ. მისი სურვილი, მმართველობისათვის მიეღო პროვინცია სიცილია, საიდანაც უნდა განხორციელებულიყო აფრიკაში ლაშქრობა, ადვილად შესრულდა იმის წყალობითაც, რომ მეორე კონსულს, კრასუსს, როგორც ქურუმთა უზენაესს, წესის მიხედვით უფლება არ ჰქონდა იტალიის საზღვრებს გასცილებოდა.

სციპიონის ახალ სამარ გეგმას წინ აღუდგა მოხუცი ფაბიუს მაქსიმე კუნქტატორი, რომის კონსერვატორ-ოლიგარქთა ბელადი. როგორც კვლავ ურყევად იდგა თავის ძველ, ფრთხილ „კუნქტატორულ“ პოლიტიკაზე. ფაბიუსმა სციპიონის წინააღმდეგ ვრცელი სიტყვა წარმოსთქვა სენატში. ის მოაგონებდა ყველას, რომ ჰანიბალი, რომლის ჭარბსაც ჯერ კიდევ ასდის რომის საუკეთესო შვილთა სისხლის ოსშივარი, ჯერ კიდევ უძლეველად დათარეშობს იტალიაში და სანამ ის არ დამარცხებულა, აფრიკაში ლაშქრობა დასაღუპავად არის განწირული ისევე, როგორც ეს მოუვიდა ატილიუს რეგულუსს პირველი პუნიკური ომის დროს; ამას ზედ ერთვის უმცროსი ბარკიდის, მაგონის შემოჭრის საშიშროება დასავლეთიდან. მოხუცი პატერი სციპიონის გეგმას „ახალგაზრდა შეშლილის“ ნაზრევს უწოდებდა. მისმა სიტყვამ ძლიერი ზეგავლენა მოახდინა. სენატორთა დიდი ნაწილი, რომელსაც ისედაც არ მოსწონდა სციპიონის მეტად დამოუკიდებელი ქცევა, ფაბიუსის მხარეზე დადგა.

სციპიონმაც თავის მხრივ წარმოსთქვა სიტყვა ფაბიუსისა და მის მომხრეთა წინააღმდეგ. იგი ასაბუთებდა თავისი გეგმის სისწორეს; ანიჭებდა მას გადამწყვეტ მნიშვნელობას ომის დამთავრების საქმეში; ამტკიცებდა, რომ აფრიკაში რომაელთა ლაშქრობა ჰანიბალს აიძულებდა დაეტოვებინა იტალია და კართაგენის მისაშველებლად გაქცეულიყო. მე ჰანიბალს ვაიძულებ ბრძოლა გამიმართოს თავისივე სამშობლოს ტერიტორიაზე. და ამ ბრძოლაში ჩემი გამარჯვების მონაპოვარი იქნება თვით კართაგენი და არა ბრუციუმის ნახევრადდანგრეული სიმაგრეები; სადაც ახლა თავს აფარებს ჰანიბალიო, — ამბობდა ახალგაზრდა სარდალი. ბოლოს, როცა მან შეიტყო, რომ სენატი კვლავ ყოყმანობდა, გამოაცხადა: თუ სენატი მას უარს ეტყვის, მაშინ მიმართავს სახალხო კრებას და მისი უეჭველი მხარდაჭერით გაიტანს თავისას. სენატი იძულებული გახდა დასთანხმებოდა: სციპიონს გადასცემოდა პროვინცია სიცილია, იქ მდგარი ორი ლეგიონი, რომელთაც კანუს ბრძოლის შემდეგ სიცილიაში ყოფნა ჰქონდათ მისჯილი. და, თუ საჭიროდ ჩასთვლიდა, მოეწყო სამხედრო ექსპედიცია აფრიკაში. მაგრამ სენატი მას უფ-

ლებას არ აძლევდა გამოცხადებინა სავალდებულო და საყოველთაო სამხედრო გაწვევა. როგორც ეს ჩვეულებრივად შეეძლოთ კონსულებს. აგრეთვე სენატი უარს ამბობდა ფინანსების გაცემაზე ფლოტის შექმნისათვის.

მაგრამ სციპიონი ვერც ამან შეათერხა. მთავარი იყო რომაელი და იტალიელი ხალხი. რომლებსაც სჭეროდათ ახალგაზრდა გმირის „ბედის ვარსკვლავის“, მასში ხელდაუდნენ საშინელი. დამქანცველი და გამანადგურებელი ომების ზღვარის დამდებს, მისი ძლევამოსილად დამთავრების გაბედულ ბელადს. ამიტომ, სწორედ სახალხო ფონდებით სწრაფად აიკო 30 სამხედრო გემისაგან შემდგარი ფლოტი, რომლის ეკიპაჟიც 7 000 მოხალისე-მეომარისაგან შედგა.

ამგვარად, სციპიონის საბრძოლო დროშის ქვეშ, აღნიშნული ფლოტის გარდა, იკრიბებოდა 25 000 მეომარი. 205 წლის გაზაფხულზე ის უკვე სიცილიაში იყო და გამალებით ემზადებოდა აფრიკაში სალაშქროდ; კრებდა მოხალისეებს, წვრთნიდა ჯარებს, ამზადებდა ფლოტს. სხვადასხვა ხერხებით ცდილობდა საომარი მოზნებისათვის დაეჭვემდებარებინა ყველა სახის ადგილობრივი რესურსები და სამხედრო საკუთრეელი. ამით სურდა შეეცო დანაკლისი, რომელიც მას სენატის ოპოზიციამ მიაყენა; ასე. მაგალითად, სციპიონმა, როცა ყველა მეომარი გარკვეულ საჯარისო ნაწილებს მიაწერა, 300 კაცი. ყველაზე უფრო ახალგაზრდები და ჯანდონით სავსენი. სრულიად უიარაღონი ჩამოიტოვა; არავინ იცოდა რისთვის სკირდებოდა მას ეს უიარაღო ამაღა. სანამ მან სამხედრო სამსახურში არ მოუხმო 300 აცილიელ მხედარს. სციპიონმა მიმართა სიცილიელებს: მე შევიტყვე, თურმე თქვენ ძალიან გაშინებთ და გაფიქრებთ აფრიკის მძიმე ლაშქრობა. თუ მართლა ეს ასეა, ახლავე აშკარად მითხარით და სიტყვას გაძლევთ ისე მოვიტყევი. როგორც თქვენ მოისურვებთ. მე მირჩენია ახლავე ვიცოდე ლაშქრობისადმი თქვენი განწყობა, ვიდრე შემდეგ თვით ლაშქრობის დროს გამოამედავნოთ თქვენი უკმაყოფილებაო. მაშინ ერთმა სიცილიელმა გაბედა და სთქვა: თუ ნებას მოძეცემთ, მე სრულებით არ წამოვალ ომშიო. „მამ კარგი, — სთქვა სციპიონმა, — რაჟი შენ არ დაფარე და ყველაფერი ისა სთქვი, რასაც გრძნობ, მე ვათავისუფლებ სამხედრო სამსახურისაგან იმის საფუძველზე, რომ მაძლევ სამაგიერო კაცს. როდელიც შენს მაგივრად მიიღებს მონაწილეობას ბრძოლაში. მაგრამ შენ მას მისცემ შენს ცხენს, შეიარაღებას და ვალდებული ხარ ასწავლო მთელი საცხენოსნო ბრძოლის ხელოვნებაო“, — და მას თანმხლებ იტალიელთაგან გამოუყო ერთი კაცი. სიცილიელი აღფრთოვანებით შეხედა სციპიონის წინადადებას. ასე, ყველა სიცილიელმა ჩააბარა თავისი შეიარაღება. ცხენები იტალიელ

მოხალსეებს და შეუდგნენ მათ გაწვრთნას; წინააღმდეგ შემთხვევაში სიცილიელები ვერ დასტოვებდნენ რომაელთა ბანაკს. ამგვარად, სციპიონი თავისი არმიის რიგებს სწმენდდა მერყევი და საექვო ერთგულების ელემენტებისაგან და მათ ნაცვლად არმიებს აესებდა კარგად გაწვრთნილი, საუკეთესოდ შეიარაღებული და თავდადებული მეომრებით.

სარდალმა განსაკუთრებით ძლიერი კოპორტები შექმნა იმ მეომართაგან, რომელთაც ბევრი სახელოვანი ბრძოლა ჰქონდათ გამოვლილი; უმეტესწილად იმათგან, ვინც მარცელუსის ვეტერანები იყვნენ. სციპიონმა იცოდა, რომ მარცელუსის მეომრები ყველაზე უფრო გაწვრთნილი, დისციპლინიანი და სირაკუსის ალების შემდეგ საფორტიფიკაციო ხელოვნების საუკეთესო მცოდნენი იყვნენ. სციპიონი სახმელეთო არმიის წვრთნასთან ერთად ზრდიდა ფლოტს ახალი გემებით. სიცილიის ყველა სოფელსა და ქალაქს ევალებოდა გარკვეული რაოდენობის სურსათ-სანოვაგე ჩაებარებიან რომაელთა საწყობებისათვის.

იმავე დროს სარდალმა გაიუს ლელიუსი საზღვაო ძალებით გაგზავნა აფრიკის სანაპიროების დასაზვერად და შესაძლებლობის შემთხვევაში გასაძარცვად.

205 წელს კართაგენმა. შეიტყო რა სციპიონის სამზადისი აფრიკის დასალაშქრავად, უკანასკნელი ღონისძიებების გატარება სცადა კონტინენტს გარეთ საომარი მდგომარეობის თავის სასარგებლოდ გარდაქმნისათვის. კართაგენელებმა სასწრაფოდ დაიწყეს მოლაპარაკება სიფაქსთან და აფრიკის სხვა წვრილ-წვრილ მთავრებთან. აუხსნეს მათ, რომ რომაელთა შემოჭრის საშინელება მარტო კართაგენს როდი ემუქრება, იგი მთელს აფრიკას უქადის წალეკვას. ელჩები გაგზავნეს ფილიპე მაკედონელთან, აღუთქვეს მას 200 ვერცხლის ტალანტი და სამაგიეროდ სთხოვეს ჯარების გადასხმა იტალიასა და სიცილიაში; ბრძანება გაუგზავნეს იტალიაში მოქმედი ჯარების სარდლებს, რომ როგორმე დაებრკოლებინათ სციპიონი სიცილიაში, ხოლო ყველაზე მეტი, რაც იმხანად კართაგენმა გააკეთა, იყო ის, რომ ბალეარის კუნძულებზე მყოფ მაგონს გაეგზავნა 25 გემი, 6 000 ქვეითი და 2 000 ცხენოსანი მეომარი, ფული დამხმარე ჯარების დასაქირავებლად და ბრძანა დაძრულიყო იტალიისაკენ და რაც შეიძლება მალე შეერთებოდა ჰანიბალს.

მაგრამ კართაგენელების ამ ღონისძიებათაგან არც ერთს რეალური შედეგი არ გამოუღია.

გ. ლელიუსი მიადგა აფრიკის სანაპიროს კართაგენიდან შორს დასავლეთით, ქ. ჰიპოს რეგიუსთან. აქ მასთან გამოცხადდა მასინისა, რომელმაც დაწვრილებით აუწყა აფრიკაში შექმნილი მდგომარეობა, სიფაქსის შეკავშირება კართაგენთან და აღუთქვა: როგორც, იცოდა სციპიონს აფრიკაში გადავა. თვითონ მაშინვე გაჩნდებოდა ჩოშიდოლორი ცხენოსნე-

ბით მის დაახმარებლად. ასეთი ამბებითა და ძლიერი ნაძარცვით-ლე-
ლიუსი დაბრუნდა სიცილიაში.

იმავე 205 წელს რომაელებმა აღმოსავლეთით ზავი დასდეს ფილიპე
მაკედონელთან. ასე დაედო ზღვარი ე. წ. პირველ მაკედონურ ომს, რომელიც ათი წლის მანძილზე (215 — 205) მეტად ზანტად და უშედე-
გოდ მიმდინარეობდა. ამრიგად, კართაგენმა ფორმალურად დაჰკარგა
მოკავშირე, რომელსაც ფაქტიურად მისთვის არასოდეს არავითარი
მოკავშირეობა არ გაუწევია.

ამ წელს ერთხელ კიდევ იფეთქა აჯანყებებმა ესპანელ ტომებში.
რომლებმაც ისარგებლეს სციპიონის წასვლით და თავისუფლების მოპო-
ვება სცადეს. მაგრამ ამბოხებები სასტიკი შეტაკების შემდეგ ჩაქრობილ
იქნა: მათი ბელადები—მადონიუსი და ინდიბილისი რომაე-
ლებმა სიკვდილით დასაჯეს; 30 ესპანელი ტომისაგან მძევლები ჩაიბარეს.
ესპანეთში პროვინციული, მმართველობა დამყარდა. კართაგენმა საბო-
ლოოდ დაჰკარგა პირენეის ნახევარკუნძულზე ფენის მოკიდებისა და
ოდინდელი ძალაუფლების აღდგენის იმედი.

205 წლის ზაფხულზე მაგონი 30 გემისაგან შემდგარი ფლოტით.
12 000 ჰექეთი მეომრითა და 2 000 ცხენოსნით მიაღდა ჩრდილოეთ იტა-
ლიის, ლიგურიის სანაპიროებს. აქ მან მისვლისთანავე ხელთ იგდო
ქ. გენუა.


რომაელებმაც სასწრაფოდ მიმართეს კონტრლონისძიებას იტალიაში
შემოჭრილი მტრის ახალი ძალების წინააღმდეგ. პრეტორმა მ. ლივიუს-
მა ეტრურიაში დაბანაკებული ჯარები გადაიყვანა ჩრდილოეთ იტალი-
აში და იქ შეუერთდა მეორე პრეტორს გნეუს ლუკრეციუსს. ამგვარად,
რომაელთა ორი ძლიერი არმია მზად იყო შეჯახებოდა მაგონის შედა-
რებით მცირერიცხოვან ჯარებს, თუ კი ის ოდნავ მაინც შეეცდებოდა
პასდრუბალის ცდის განმეორებას — სამხრეთისაკენ ჰანიბალთან შე-
საერთებლად გაჰრას.

204 წლის გაზაფხულზე ლილიბეუმთან მზად იყო 52 სამხედრო და
400 სატრანსპორტო გემი. 35 000 მეომარი იდგა ფლოტის გემბანებზე.
მათ შორის იყვნენ: სციპიონის ერთგული, ესპანეთში მის მხარდამხარ
მებრძოლი ვეტერანები, სახელოვანი მარცელუსის ნაწრთობი ვაჟაკები,
კანეს საბედისწერო ბრძოლას გადარჩენილი ლეგიონერები, რომლე-
ბიც ათ წელზე მეტ ხანს იხდიდნენ იტალიიდან გასახლებისა და უპა-
ტიურობის სამარცხვინო სასჯელს და ახლა აფრიკაში საოცნებო ლაშ-
ქრობით ცდილობდნენ ძველი პატივის დაბრუნებას. ყველა მოუთმენ-
ლად ელოდა იალქნების აშლას. დილას სციპიონმა, ყოველგვარი მზად-
ყოფნის შემოწმების შემდეგ მსხვერპლი შესწირა „ყოვლისმძლე ღმერ-
თებს“. შეჰკვიდრა მათ განზრახულის წარმატებით დაგვირგვინე-

ბა, მსხვერპლად დაკლული ცხოველის შიგნეული ზღვაში ისროლა ნებტუნის სადიდებლად და ლაშქრად გასვლის სიგნალი მისცა. უამრავი მაყურებელი გამაყრუებელი ღრიანცელით აცილებდა ზღვად-გასულ მოლაშქრეებს, ზურგის ქარი სწრაფად მიაქროლებდა ფლოტს აფრიკისაკენ. შუადღისას ქარი ჩადგა და სქელი ნისლი ჩამოწვა ზღვაზე. წინსვლა გაჭირდა. ღამეც ჩამოდგა და წინ, ადმირალის გემის ანძაზე მოციმციმე სამი ლამპარი ძლივს უჩვენებდა გზას უკან მიმდევართ. მაგრამ დილით მზის სხივებმა და კვლავ ამოვარდნილმა ქარმა სრულიად გაფანტეს ნისლი. მესამე დღეს, მზის ამოსვლისას, ჰორიზონტის მთელ სამხრეთულ ნახვზე გამოჩნდა აფრიკის სანაპირო. სციპიონმა ხელი გაიშვირა წინ წამოზიდული უახლოესი კონცხისაკენ და იკითხა რა ერქვა მას. „მშვენიერი“, — უპასუხეს მეზღვაურებმა; „ეს კარგი ნიშანია. მიმართეთ იქითკენ გემები!“ — ბრძანა სარდალმა.

რომაული არმია და ფლოტი მიადგა აფრიკის სანაპიროს, კართაგენ-უტიკას შორის მდებარე ოლქში, და სწრაფად დაიწყეს მასზე გადასვლა.

50 წელი გავიდა რეგულუსის აფრიკული ლაშქრობიდან. კართაგენს მას შემდეგ თავის მანლობლად აღარ უხილავს ესოდენ ძლიერი რომაული არმია. ახლა იგი გრძნობდა უდიდეს საფრთხეს, რომელსაც აღარ უნდა მოჰყოლოდა ისეთივე შედეგი. როგორითაც კართაგენელები ყოველთვის ამაყობდნენ რეგულუსის განადგურებას შემდეგ. კართაგენის ცის თალი შეარყია ძახილმა: „იარალისაკენ!“ და ზთელი მოსახლეობა ფეხზე დადგა. კართაგენის მაშინდელი მთავარსარდალი ჰასდრუბალ გისკონის-ძე აღრევე გრძნობდა სციპიონის აფრიკული ლაშქრობის სიახლოვეს. მას ზზად ჰყავდა 20 000 ქვეითი, 6 000 ცხენოსანი და 140 სპი-



რომაული სამხედრო ინსიგნიები
(ნიშნები):

- 1—მედროშე; 2—ლეგიონის არწივი; 3—კაკალერიის შტანდარტი; 4, 5, 6—კორპორტერის ნიშნები; 7—სამხედრო საყვირი „ლოკოცინა“; 8—მოსრილი ბეკი; 9—სასიგნალო საყვირი; 10—ფლეიტა; 11—საომარი დაფაფები. 12—სამაჭერი; 13—სარაგარა გაქვი; 14—პატარა დროშა წარწერით.

S. P. Q. R. (Senatus Populusque Romanus).

ლო. მაგრამ კართავენი ასეთი ძალეებით რომაელთა მრავალრიცხოვანი არმიის წინაშე თავს მშვიდად მაინც ვერ იგრძნობდა. ამიტომ ჰასდრუხბალს არაფერი დაუზოგავს, რათა თავის მხარეზე გადმოებირებინა მეფე სიფაქსი. ჰასდრუხბალის დახმარებით სიფაქსმა შესძლო გაეძევებინა მასინისა¹ და მთელი ნუმიდია თავისთვის დაემორჩილებინა. ჰასდრუხბალს სიფაქსის მხარდაჭერის შენარჩუნებისათვის საკუთარი ოჯახის პატივიც არ დაუზოგავს. მან სიყვარულით დატყვევებულსა და გრძნობებს აყოლილ მეფეს ცოლად შერთო თავისი ასული სოფონიბე, მთელს აფრიკაში განსაცვიფრებელი სილამაზით, კდემამოსილებითა და

¹ ს ი ფ ა ქ ს ი ს , მ ა ს ი ნ ი ს ა ს ა და კართავენის უკანასკნელ ურთიერთობაზე და მასინისას ტრაგიკული თავგადასავლის შესახებ წყაროები შემდეგნაირად გადმოგვცემენ: მასინისას ესპანეთში ყოფნის დროს აფრიკაში გარდაიცვალა მისი მამა მეფე გალა. ტახტის მემკვიდრეობის ნუმიდიური წესის მიხედვით სამეფო ეკუთვნოდა გარდაცვლილ მეფის ძმას ეზაკლს; მაგრამ ეს უკანასკნელიც მოხუცი იყო და მალე გარდაიცვალა. მისი სიკვდილის შემდეგ ატყდა დინასტიური ომი ნუმიდიის სამეფო საგვარეულოს წევრებს შორის. მასში მონაწილეობას ლებულობდა სიფაქსიც, რომელიც ცდილობდა ამ საქმეში კართავენის მხარის დაჭერა მოეპოვებინა. სწორედ ამ დროს ესპანეთიდან დაბრუნდა მასინისა, ტახტის ყველაზე კანონიერი პრეტენდენტი. მან მოახერხა კიდევ ნუმიდიელთა უმრავლესობის მიმხრობა და სამეფო ტახტის ხელთ იგდო. მალე სიფაქსსა და მასინისას შორის მოხდა ბრძოლა მათს სამეფოთა საზღვარზე. სიფაქსმა კართავენელთა მხარდაჭერით მოახერხა მეტოქის დამარცხება. მასინისამ მცირერიცხოვანი რაზმით თავი შეაფარა მთებს, საიდანაც ის აწყობდა ყაჩაღურ თავრეშს. სიფაქსმა სათაიკლოდ მიიჩნია ავჯაკების წინააღმდეგ მთებში ხეტიალი. ამიტომ მან მასინისას საბოლოო მოსპობა დააეცა ერთ-ერთ თავის მსახურს, სახელად ბოკარს და ამ საქმისათვის მას ჩააბარა 4 000 ქვეითი მეომარი და 2 000 ცხენოსანი. ბოკარს მეფე აღუთქვამდა დიდ ჯილდოს, თუ მასინისას თავს მოუტანდა და კიდევ უფრო მეტს, თუ ცოცხალს მოჰგვრიდა. ბოკარმა სასტიკ შეტაკებაში მასინისას მთელი რაზმი ამოუწყვიტა. დაჭრილმა მასინისამ ოთხი კაცის თანხლებით მოახერხა გაქცევა. ბოკარი სდევდა მანამ, სანამ ისინი მთის ერთ-ერთ მდინარეში არ გადაეშენენ. ორი მაშინვე დაიხრჩო. დალუპულთა შორის ბოკარმა მასინისა ჩასთვალა და უკან დაბრუნდა. მაგრამ მასინისამ გადარჩენილი ორი მხლებლის თანხლებით თავი დააღწია მდინარის ტალღებს და ერთ-ერთ მიყრუებულ გამოქვაბულს შეეხიზნა. აქ ის რაღაც ზღაპრებით იშუშებდა ჭრილობას. მხლებლები მძარცველობდნენ და ისე არჩენდნენ მას. და აი, როცა მთელს აფრიკაში გაუარდნილი იყვნენ მასინისა მკვდარი და მის შესახებ დაივიწყეს კიდევ, ის 50 კაცის თანხლებით, რომლებიც მას გზად შეუგროვებია, გამოჩნდა ნუმიდიაში. სრული მოულოდნელობისა და სასტიკი სიფაქსისადმი ხალხის სიძულვილის მეოხებით მან მოახერხა ტახტის დაბრუნება. მაგრამ მისი მმართველობა ისევ ხანმოკლე გამოდგა. სიფაქსმა კართავენელთა დახმარებით კვლავ სასტიკად დაამარცხა იგი. მასინისამ ძლივს დააღწია თავი დალუპვას; რამდენიმე დღე სდევნიდა მას სიფაქსის შვილი ვერმინა, მაგრამ ლტოლვილი გადარჩა მისი არაჩვეულებრივი ფიზიკური ძალღონის მეოხებით. სწორედ ამ დროს მოადგა აფრიკის სანაპიროებს გაიუს ლელიუსი. სციპიონის ლეგატისა და მასინისას შეხვედრის შესახებ ჩვენ უკვე გვექონდა საუბარი.

სულის სიმშვენიერით სახელგანთქმული ქალი, რომელიც მანამდე მასინისაზე, მის შესაფერისად პირმშვენიერსა და ახოვან გძირზე იყო დაწინაურებული.

ამგვარად, სციპიონი უნდა შერიგებოდა სიფაქსის კავშირის დაკარგვას და ჯერჯერობით დაკმაყოფილებულიყო იმ რამოდენიმე ასეული ნუმიდიური მხედრობით, რომელიც მის ბანაკში სასწრაფოდ მოიყვანა სიფაქსზე და კართაგენზე ბრაზითა და განუზომელი შურისძიებით შეპყრობილმა მასინისამ.

ჰასდრუბალმა რომელთა შემოჭრის მეორე დღეს 1 000 მხედარი გაგზავნა მტრის დასაზვერად და ხმელეთზე მისი გადმოსვლის დასაბრკოლებლად. მაგრამ რომელთა მოწინავე რაზმებმა დაამარცხეს ისინი; ბრძოლაში მოკლეს მათი ახალგაზრდა მამაცი ბელადი ჰანონი. სციპიონის ლეგიონებმა ხელი მიჰყვეს აფრიკის მოსახლეობის დარბევას, ძარცვას, ქალაქებისა და სოფლების აოხრებას, ადგილობრივ მცხოვრებთა დატყვევებას და მონებად ქცევას. პირველსავე დღეს 9 000 კაცს დაადეს მონობის ბოროცილები.

სციპიონი ერთ კილომეტრზე მიუახლოვდა ქ. უტიკას და დაბანაკდა მას სურდა ხელში ჩაეგდო ეს მეტად მნიშვნელოვანი ქალაქი, რომელიც გამოადგებოდა როგორც მძლავრი ბაზისი აფრიკაში შემდგომი შეტევების წარმართვისათვის. 40 დღის განმავლობაში მიქონდათ რომაელებს იერიშები უტიკის კედლებზე როგორც ხმელეთიდან, ისე ზღვიდან, მაგრამ ამაოდ. ბოლოს, როცა გამოჩნდა ჰასდრუბალის 30 000 ქვეითი და 3 000 ცხენოსანი, ხოლო სულ მალე, აგრეთვე, სიფაქსის 50 000 ქვეითისაგან და 10 000 მხედრისაგან შემდგარი არმია, სციპიონმა მოხსნა ალყა და უკან დაიხია. იგი გამოსაზამთრებლად დაბანაკდა ერთ-ერთ მოხერხებულ კონცხზე, რომელიც ვიწრო ყელით უერთდებოდა ქვეყნის კონტინენტურ ნაწილს.

მთელი ზამთრის განმავლობაში სიცილიიდან სციპიონის ბანაკისაკენ მიემშურებოდნენ სურსათ-სანოვავით, ტანსაცმლითა და საჭურველით დატვირთული გემები. თვითონ სციპიონი ამ ხნის მანძილზე ათასნაირ გეგმებს აწყობდა მომდევნო წლისათვის წარმატების მოპოვებაზე. მან მოსინჯა კიდევ ნიადაგი სიფაქსის ხელახლა თავის მხარეზე გადმობირებისათვის. ეს მით უფრო ადვილი უნდა ყოფილიყო, რომ, მისი ფიქრით, გაქსუებულ ბარბაროს მეფეს აძლენხანს უნდა მობეზრებოდა კართაგენელი ასული, მშვენიერი სოფონიბე. 203 წლის გაზაფხულამდე მიმდინარეობდა მოლაპარაკება მოწინააღმდეგეთა შორის. სიფაქსი ორივე მხარეს, კართაგენსა და რომს, სთავაზობდა ზავის მეტად ზომიერსა და კომპრომისულ პირობებს: კართაგენელებმა დასტოვონ

იტალია, ხოლო რომაელებმა — აფრიკა. რასაკვირველია, სციპიონს, რომელსაც ევკვიტ არ ეპარებოდა, რომ უმოკლეს დროში კართაგენს საბოლოოდ ძირს დასცემდა, არც უფიქრია ზავის ასეთი პირობების მიღებაზე; მაგრამ იგი მოლაპარაკებას, თუ სიფაქსის გადმობირება არ მოხერხდებოდა, იძისთვის მაინც აჭიანურებდა, რომ მოედუნებინა მოწინააღმდეგის სიფხიზლე და კარგად შეესწავლა მისი სამხედრო პოზიციები. სწორედ ამ მიზნით ყოველ კვირას იგზავნებოდნენ რომაელთა ელჩები სიფაქსისა და ჰასდრუბალის ბანაკებში. ელჩებს თან მიჰყვებოდნენ თანმხლებნი, მონების ტანსაცმელში გადაცმული დახელოვნებული მსტოვრები. ისინი სწავლობდნენ მოწინააღმდეგის განლაგებათა ყოველ წვრილმანს, მანძილს სიფაქსისა და ჰასდრუბალის ბანაკებს შორის, ბანაკთა მოცულობას, მათ კარიბჭეთა და ზღუდეთა აგებულებას, კარვების განლაგებებსა და შედგენილობას. სარდალთა და უფროს მეთაურთა ადგილსამყოფელთ, გუშავთა ცვლის დროს და სხვ.

როცა სციპიონს ყველაფერი მზად ჰქონდა, სიფაქსს შეუთვალა: ჩვენი შეკავშირების აუცილებელი პირობაა დასტოვო კართაგენელებიო. სიფაქსმა უარი განაცხადა. იმავე ღამეს სციპიონმა არმია ორ ნაწილად გაჰყო. ერთი ნაწილი ჩააბარა გ. ლელიუსსა და მასინისას. უბრძანა მათ სრულიად შეუძჩნევლად მიჰპარვოდნენ სიფაქსის ბანაკს და ცეცხლი გაეჩინათ მისთვის, ხოლო თვითონ არმიის მეორე ნაწილით გაეშურა ჰასდრუბალის ბანაკისაკენ. ის იქ უნდა შეჭრილიყო მაშინ, როცა სიფაქსის ბანაკში ცეცხლი იფეთქებდა.

მართლაც, შუალამისას, როცა სიფაქსის არმიას ტყილად ეძინა, მათ ბანაკში უკვე ნაცნობი გზებით ჩუმად შეეცოდნენ რომაელები და ცეცხლს მისცეს ხისა და ლერწმის ღეროებისაგან აგებული კარვები. სიფაქსის ბანაკი ცეცხლის ალში გაეხვია. ყველას სჭეროდა, რომ ცეცხლი შემთხვევით გაჩნდა და რომაელები, რომელთაც მოლაპარაკება ჯერ კიდევ არ გაუწყვეტიათ, აქ არაფერ შუაში იყვნენ. ნახევრად მძინარე და უიარაღო მეომრები ცდილობდნენ ხანძრის ჩაქრობას. საშინელი პანიკისა და დაბნეულობის პირობებში სიფაქსის მეომრები უწყალოდ ინოცებოდნენ ცეცხლითა და რომაელთა მახვილისაგან. ბანაკის კარიბჭეებში გასაქცევად მოვარდნილი გონდაკარგული ადამიანები ერთიმეორეს სრესდნენ ან მრისხანე მტრის იარაღზე ეგებოდნენ.

როცა კართაგენელმა გუშავებმა სიფაქსის ბანაკში ხანძარი შენიშნეს, სასწრაფოდ ატეხეს განგაში. აქაც ყველა ფიქრობდა, რომ ცეცხლი შემთხვევით იყო გაჩენილი და ამიტომ ისინი ჯგუფ-ჯგუფად უიარაღოდ გამორბოდნენ სიფაქსის ბანაკის მისაშველებლად. სწორედ აქ, გზაზე სციპიონი თავისი მეომრებით ელობებოდათ წინ და უწყა-

ლოდ ელექტდა უიარალო და გონდაკარგულ ბრბოებს. მალე ჰასდრუბა-
ლის დაცარიელებული ბანაკიც საშინელმა ხანძარმა შთანთქა.

ამგვარად, ერთი ღამის განმავლობაში მტრის ორი არმია თითქმის
სრულიად განადგურდა. მცირერიცხოვანი უიარალო და დამწვარ-დასა-
ხიჩრებული რაზმებით ბრძოლიდან გაქცეულმა ჰასდრუბალმა და სი-
ფაქსმა 45 000 მეომრის გვაში დასტოვეს საბედისწერო ველზე; 5 000
ტყვედ ჩავარდა; აქედან 11 კართაგენელი სენატორი და ბევრი წარჩი-
ნებული მოქალაქე. გარდა ამისა, რომაელებმა ხელთ იგდეს მტრის
174 საბრძოლო დროშა, 2 700-ზე მეტი ცხენი და 6 სპილო. ბრძოლის
ველი სავსე იყო უთვალავი დამწვარი პირუტყვით. მოწინააღმდეგის
ბანაკებში ნაპოვნი უაბრავი საბრძოლო იარაღი სციპიონის ბრძანებით
ერთ ადგილზე შეაგროვეს და ღმერთ ვულკანის¹ სადიდებლად მთლია-
ნად დასწვეს.

სციპიონი ისევ შემოერთყა უტიკას.

საშინელმა მარცხმა კართაგენს თავზარი დასცა. სუფეტებმა შეკრი-
ბეს სენატი, გამართეს ბჭობა. ერთნი წინადადებას აყენებდნენ გაეგზავ-
ნათ ელჩები სციპიონთან და გაემართათ საზავო მოლაპარაკება; მეორენი
მოითხოვდნენ იტალიიდან ჰანიბალის გამოწვევას და მისი მეოხებით
ქვეყნის დაცვას; მესამენი მომხრენი იყვნენ ახალი არმიის შეკრებისა
და სიფაქსის მხარდაჭერით ომის გაგრძელებისა. ეს უკანასკნელი აზრი
იქნა მიღებული. კართაგენი გამალებით შეუდგა ახალ საომარ სამზადისს.
იკრიბებოდა ჯარები, რომელთა ბირთვს 4 000 დაქირავებული კელტი-
ბერი შეადგენდა. გაგზავნეს ელჩები სიფაქსთან. ეს უკანასკნელიც,
შურისძიებით აღვსილი, კრებდა ახალ ჯარებს და ემზადებოდა რევან-
შისათვის. ამას ხელს უწყობდა მისი მშვენიერი ცოლიც, რომელიც ცრემ-
ლისღვრით ევედრებოდა მას ასეთი განსაცდელის ეამს არ მიეტოვებინა
მისი მამა და სამშობლო.

მალე ჰასდრუბალისა და სიფაქსის გაერთიანებულ არმიაში 30 000
მეომარმა მოიყარა თავი. როგორც კი სციპიონმა მოწინააღმდეგის ახალი
სამზადისის ამბავი შეიტყო, უტიკის გარშემო მცირერიცხოვანი რაზ-
მები დასტოვა და არმიის ძირითადი ძალებით მოწინააღმდეგისთან შე-
სახვედრად გამოვიდა.

სამი დღის განმავლობაში მოწინააღმდეგენი უბრალო კენწულობით
ერთიმეორის ძალღონეს სინჯავდნენ. მეოთხე დღეს გაჩაღდა ბრძოლა.
სციპიონმა მარჯვენა ფლანგზე იტალიელი კავალერისტები გამოიყვანა,
მოწინააღმდეგის ნუმიდიური მხედრობის პირისპირ; მარცხენა ფლანგ-

¹ ვულკანი (რომაელებთან) იგივე ჰეფესტო (ბერძნებთან)—ცეცხლისა და
სამკვდლო ხელოვნების ღმერთი.

ზე მასინისა და მისი ცხენოსნები იდგნენ კართაგენელთა კავალერიის წინააღმდეგ: ცენტრში რომაული ლეგიონები უპირისპირდებოდნენ მოწინააღმდეგის ქვეით არმიას და მის ბირთვის, კელტიბერ მოქირავნეებს. ბრძოლის დასაწყისშივე ჰასდრუბალისა და სიფაქსის ცხენოსნები, და საერთოდ მთელი ახალწვეული, ბრძოლებში გამოუცდელი ჯარები, დამარცხდნენ. რომაელთა ძლიერ შეტევებს მხოლოდ კელტიბერები იგერიებდნენ მედგრად. თანდათანობით მასინისამ და იტალიელმა ცხენოსნებმა ფლანგებდან და ზურგიდან შემოუარეს მათ; ალყაში მოქცეულნი რომაელებმა მთლიანად ამოელიტეს. ჰასდრუბალი და სიფაქსი მათი არმიის სრულ განადგურებამდე გაიქცნენ ბრძოლის ველიდან.

ამრიგად, კართაგენმა აფრიკაში უკანასკნელი არმია მიიბარა მიწას. სციპიონმა მტრის დამარცხებულ სარდლებს კავალერიითა და მსუბუქადშეიარაღებული მეომრებით გამოადევნა ლელიუსი და მასინისა. თვითონ კი რამდენიმე დღეში ზედიზედ დაიპყრო უტიკასა და კართაგენს შორის მდებარე გაშლილი ოლქები და აურაცხელი სიმდიდრით დატვირთული მიადგა ქ. ტუნესს (ტუნისი), საიდანაც კარგად ჩანდა კართაგენის ცადატუორცნილი კოშკები.

კართაგენის სენატში, სანამ მოსახლეობა დღე და დღე ქალაქის გამაგრებაზე და თავდაცვისათვის სამზადისზე ძალღონეს არ ზოგავდა, ბჭობდნენ თუ როგორ უნდა ემოქმედნათ კარზე მომდგარი საფრთხის თავიდან ასაცილებლად. ახლაც ორი პარტია — ომისა და ზავის პარტიები — ებრძოდა ერთმანეთს; პირველი მოითხოვდა იტალიიდან ჰანიბალისა და მაგონის გამოწვევას, მეორე კი — მტერთან საზავო მოლაპარაკების გამართვას. ორივე წინადადება იქნა მიღებული: დაუყოვნებლივ გაგზავნეს ბრძანება ჰანიბალთან და მაგონთან რაც შეიძლება მალე დაეტოვებინათ იტალია და მიშველებოდნენ მშობლიურ ქალაქს; გადაწყდა სციპიონთან ელჩების გაგზავნაც. ეს უკანასკნელი ღონისძიება (სციპიონთან საზავო მოლაპარაკების გამართვა) დროებით შეაჩერა ერთ პატარა მასშტაბის საზღვაო ბრძოლაში კართაგენელთა წარმატებამ, მაგრამ მალე ეს საკითხი ისევ წამოჭრა ძლიერი მოკავშირის — მეფე სიფაქსის-თავზე დატრიალებულმა ტრაგედიამ.

15 დღის დევნის შემდეგ ლელიუსი და მასინისა შეიჭრენ აღმოსავლეთ ნუმიდიისაში და იქიდან განდევნეს სიფაქსი. მასინისამ დაიბრუნა თავისი მამაპაპეული ტახტი. მაგრამ არც ერთი და არც მეორე არ ფიქრობდნენ დაკმაყოფილებულიყვნენ თავისი კანონიერი მემკვიდრეობით. ორივე მხარე ემზადებოდა უახლოეს დროში გადაწყვეტი შეტაკებისათვის. სიფაქსმა სასწრაფოდ შეკრიბა ყველა, ვისაც კი იარაღის ტარება შეეძლო; მხედრები ესკადრონებად დაანაწილა, ქვეითი მეომ-

რები — კოპორტებად, როგორც ეს შესწავლილი ჰქონდა რომაელები-საგან.

მაღე მოხდა გადამწყვეტი ბრძოლა. დასაწყისში მოწინააღმდეგეთა ცხენოსნების შეტაკებაში სიფაქსის ესკადრონები აშკარად სჯობნიდნენ მტერს, მაგრამ როცა ლელიუსის ბრძანებით იტალიელთა კავალერია შუაზე გაიპო და გზა მისცა რომაული ქვეითების მტკიცედ შეკრულ კარეს, სიფაქსის მეომრებმა უმაღვე ზურგი აქციეს ბრძოლის ველს. თვით მეფე ამოდ ცდილობდა გაქცეულ თანამებრძოლთა შემობრუნებას; არცხვენდა მათ, პირადად უჩვენებდა სიმამაცის მაგალითს და დაჰქროდა ბრძოლის ყველაზე სახიფათო ადგილებზე. უეცრად სიფაქსის ცხენი სათხელით განგმირული დაეცა ძირს და მხედარიც ქვეშ მოიყოლია. მეფე შეიპყრეს და ცოცხლად მიჰგვარეს ლელიუსს. მასინისა სიხარულისაგან აცახცახებული დასცქეროდა ძირს დაცემულსა და შებოჰილ მოსიხსლეს. მან სთხოვა ლელიუსს მიეცა უფლება, რათა ბორკილდადებული სიფაქსისა და კავალერიის თანხლებით დაქრულიყო ცირტასაკენ, ხოლო თვითონ ქვეითი ჯარით ნელ-ნელა გაჰყოლოდა უკან. იგი აღებულს დაახვედრებდა ცირტას.

მართლაც, მასინისა მიუახლოვდა ქალაქს და მოითხოვა დანებება. როცა მან ქალაქის ზოთავეებისა ყოყმანი შენიშნა, დაანახვა შებორკილი სიფაქსი. მოქალაქეებმა წინააღმდეგობის გაწევა უაზრობად ჩასთვალეს და კარები გააღეს. ამგვარად, მასინისამ უბრძოლველად ჩაიგდო ხელში ცირტა; განაწყო მასში სამხედრო გარნიზონი და თვითონ ცხენზე ამხედრებული გაეშურა სამეფო სასახლისაკენ. აქ მას შემოეგება და ფეხებში ჩაუვარდა დედოფალი სოფონიბე, რომელიც თავიდანვე ორი ბარბაროსი რაყიფის, — სიფაქსისა და მასინისას ტროფობისა და მათ შორის დაუძინებელი მტრობის საგნად იყო ქცეული. ის ევედრებოდა მასინისას არ დაენებებინა მისი თავი შეუბრალებელი რომაელებისათვის, რომლებიც არ დაინდობდნენ ჰასდრუბალის ასულს; ემუდარებოდა. შეეფარებინა თვითონ მას. ხოლო თუ ამ თხოვნას არ შეასრულებდა, ნება მიეცა სიკვდილით მაინც აეცილებინა თავიდან მოსალოდნელი უპატიურობა. მასინისამ ერთგულებისა და მფარველობის ნიშნად ხელი მისცა მას. მცირედი ფიქრის შემდეგ, თუ როგორ უნდა გადაერჩინა საყვარელი ქალი რომაელთა ხელყოფისაგან, ის შეუუღლდა სოფონიბეს მანამ, სანამ ლელიუსი მოუხსნებდა. მართლაც, ლელიუსი მაშინ მოვიდა ცირტაში. როცა ქორწინება უკვე დამთავრებული იყო. გაცეცხლებულ ლელიუსს სურდა საქორწინო სარეცელიდან გადმოეთრია აფრიკის „მშვენიერი ელენე“. როგორც ძვირფასი ტყვე და სიფაქსთან ერთად გაეგზავნა ის სციპიონისათვის, მისი მომავალი ტრიუმფის დასამშვენებლად. მაგრამ მასინისას ხვეწნა-მუდარამ, რომ თვითონ მის-

თვის წინდო სციპიონთან ამ საქმეზე მოლაპარაკება, დააშოშმინა ლელუსი და მთავარსარდალთან გაგზავნა მხოლოდ სიფაქსი და სხვა ტყვეები. მანამდე მან და მასინისამ მთელი ნუმიდია დაიმორჩილეს და კართაგენის წინააღმდეგ ბრძოლის რეზერვში ჩააყენეს. ამგვარად, კართაგენს სამხრეთიდან მტრული გარემო შემოერთება გარს.

პატრიციუსმა სიფაქსმა სციპიონის წინაშე მონანიება დაიწყო. ის ამბობდა: მოვიქვც მეტად უქკუოდ. როცა ხელი აღმართე რომაელთა წინააღმდეგ. მაგრამ ყველა ამ ჩემი უბედურების მიზეზი არის ის, რომ მე ჩემს სასახლეში შემოვიყვანე კართაგენელი ქალი; მასთან ქორწინების ცეცხლმა შთანთქა ჩემი საშეფო-საცხოვრებელი; მან, ცბიერმა ფურიაში და საშინელმა სენმა ქალური ალერსისა და თვალთმაქცობის ათასნაირი ხერხებით დამაბრმავა და მაიძულა მანვილი გამეშიშვლებინა ჩემი მეგობრის (გულისხმობდა სციპიონს) წინააღმდეგ; მაგრამ ჩემთვის. დაღუპული კაცისათვის, ნუგეშად რჩება ის, რომ ეს ფურია და საშინელი სენი ახლა თავშეფარებულია ჩემი უბოროტესი მტრის სასურავჭკეუშ. მასინისა არ იქნება ჩემზე უფრო წინდახედული და ურყევი სოფონიბეს წინაშე, ხოლო სიანალგაზრდავით კიდევ უფრო გაუფრთხილებელია. რა თქმა უნდა. მასინისას თავშეუკავებლობა და უქკუობა. რაც მის ახალ ქორწინებაში მდგომარეობს, ყველაზე დიდი შეცდომაა, რომელიც კი მე ოდესმე ჩამიდენია.

სიფაქსის სიტყვამ მძიმე ზეგავლენა მოახდინა სციპიონზე. იგი, გარდა იმისა, რომ ზნეობრივი საბაბიც საკმარისად ეჩვენებოდა დაესაჯა მასინისა, სიფაქსის სიტყვაში ხედავდა დედაზრს: დღეს თუ ხვალ, მოსალოდნელია. ცბიერი კართაგენელი ქალი ხელს შეუწყობს მერყევი და დაუკვირვებელი მასინისას პოლიტიკური პოზიციის შეცვლას, კართაგენელთა მხარეზე მის გადასვლას. ეს იყო ძირითადი, რამაც სციპიონს გადააწყვეტინა წაერთმია სოფონიბე მასინისასათვის. მაგრამ ეს ძირითადი არ უთქვამს მისთვის მიზეზად. სარდალმა გაიხმო მასინისა და ტკბილი სიტყვით დაუწყო დარწმუნება მის შეცდომაში, ზნეობრივ თავშეუკავებლობასა და დაუკვირვებლობაში, როგორც ერთადერთ ცუდ ნაკლში ასეთი შესანიშნავი ვაჟკაცისა, მაგრამ, რაც მთავარია. ისევე როგორც შეპყრობილი სიფაქსი და დატყვევებული მისი ქვეშევრდომები, ასევე მისი ცოლიც რომაელ ხალხს ეკუთვნის; შით უმეტეს, რომ ეს ქალი კართაგენელია და კიდევ მეტი: ის ჩვენი ყველაზე დიდი მტრის — ჰანდრუბალის ასულია. ამიტომ სოფონიბე შენ უთუოდ უნდა დასთმო.

¹ ფურია (რომაელებთან) იგივე ერინია (ბერძნებთან) — შურისგებისა და სიბოროტის ერთ-ერთი ქალღმერთთავანი.

თავზარდაცემულმა მასინისამ ისევ აღუთქვა რომაელს თავისი ერთგულება და სთხოვა მცირე ხანი მოფიქრებისათვის. იგი შევიდა თავის კარავში. კარგა ხნის ოხვრა-გოდების შემდეგ მოიხზო ერთგული მონა, რომელიც მულად თან ატარებდა საწაძლავს. მისი ბრძანებით მონა გამოცხადდა სოფონიბესთან. მიაწოდა მას ძლიერი საწაძლავით სავსე ფიალა და გადასცა მასინისას სიტყვები: „მთელი სულით და გულით მსურდა შემესრულებინა აღთქმა, რომელიც მე მოგეცი, როგორც ქმარი აღუთქვამს ცოლს; მაგრამ ისინი, ვის ხელშიც ჩვენ ვართ, ამის საშუალებას არ გვაძლევენ, ამიტომ მე მსურს შეგისრულო მეორე აღთქმა მაინც, რომ შენ ცოცხალი არ ჩაუვარდე რომაელებს. მაშ, გახსოვდეს შენი მამა, სახელოვანი სარდალი, სამშობლო და ორი მეფე. რომელთა მეუღლეც შენ იყავი, და ამიერიდან შენს ბედზე შენ თვითონ იზრუნე!“ სოფონიბემ ჩამოართვა ფიალა და სთქვა: „ვლებულვით საქორწინო საჩუქარს სრულის მადლიერებით, რაკი მასინისას სხვაგვარად არ შეეძლო შეესრულებინა ქმრის მოვალეობა ცოლისადმი. უთხარა მას: ჩემი სიკვდილი ჩემთვის უფრო სასიამოვნო იქნებოდა, რომ ამ სიკვდილის ზღურბლზე ხელახლა არ დავქორწინებულყავ!“ — ამ სიტყვებით მიიღო მან საწაძლავი.

სციპიონმა ამ ამბის შეტყობისთანავე იგრძნო ბარბაროსი მოკავშირის ჯიუტი ხასიათი. მოსალოდნელი იყო, რომ თავზეხელაღებული ავანტიურისტი სულ მიატოვებდა რომაელთა ბანაკს. მაგრამ სციპიონმა მასინისას ყველაზე სუსტი ადგილიც იცოდა — მისი განუზომელი პატივმოყვარეობა. ამიტომ მან საზეიმოდ შეპყრიბა არმია და მის წინ მასინისას უწოდა ნუმიდიის მეფე; შეასხა მას ქება-დიდება და თავზე დაადგა ოქროს გვირგვინი. გადასცა ოქროს თასი, კურულის სავარძელი, სპილოს ძვლის სკიპტრა, სხვადასხვა ფერით შემკული ტოგა და მოქარგული ტუნია. აქვე დააჯილდოვა სციპიონმა სხვებიც, მათ შორის ლელიუსიც ოქროს გვირგვინით შეამკო.

საკვირველი მაინც არ არის, რომ ეს მრისხანე რომაელი მთავარსარდალი ამდენ ანგარიშს უწევდა ამ პატარა ბარბაროს მეფეს: ის ყოველთვის ითვალისწინებდა ნუმიდიური კავალერიის სიძლიერეს; უმრავლეს შემთხვევაში მის გადაწყვეტ მნიშვნელობას კართაგენელებსა და რომაელებს შორის ბრძოლაში.

ბორკილდადებული სიფაქსი და სხვა მისი თანამებრძოლები ლელიუსმა რომში ჩაიყვანა. აქ, სციპიონის წარმატებისა და აფრიკელი მეფის განადგურების აღსანიშნავად, ოთხდღიანი ლოცვა-ზეიმი გამოცხადდა. სენატმა მიიღო მასინისას ელჩები და აღიარა ის ნუმიდიის მეფედ. სიფაქსი დილეგში ჩააგდეს. მას სიკვდილამდე კიდევ ერთი

მოვალეობა აწვა კისრად: მონაწილეობა უნდა მიეღო სციპიონის მომავალ ტრიუმფში.

კართაგენში საბოლოოდ გაიმარჯვა ზავის პარტიამ. 30 კართაგენელი სენატორი გამოცხადდა გუნესთან დაბანაკებული რომაელი სარდლის კარავში. დაემხნენ სციპიონის წინაშე და ითხოვეს საზავო მოლაპარაკების გამართვა. სციპიონს სჯეროდა თავისი სრული გამარჯვების სიახლოვისა, მაგრამ მას კარგად ახსოვდა მისი წინამორბედის—რეგულუსის ბედიც. ამიტომ ზილო კართაგენელთა წინადადება და წაუყენა მათ ზავის შემდეგი პირობები: კართაგენელებს რომაელებისათვის უნდა დაებრუნებინათ ყველა სამხედრო ტყვე, ემიგრანტები და გაქცეულები; გამოეყვანათ ჯარები იტალიიდან; რომის სასარგებლოდ ხელი აეღოთ ესპანეთზე და ყველა კუნძულზე, რომლებიც კი არსებობდნენ იტალიასა და აფრიკას შორის; ნუმიდიის მეფედ ეცნოთ მასინისა; მთელი ფლოტი, გარდა 20 გემისა, ჩაებარებინათ რომისათვის; გადაეხადათ 800 000 საწყაო ხორბალი და სამხედრო კონტრიბუცია 5 000 ტალანტის რაოდენობით; დაენიშნათ ორმაგი ხელფასი რომაელი ჯარისკაცებისათვის. სციპიონმა ამ პირობებზე მოსაფიქრებლად სამი დღის ვადა მისცა კართაგენს, და თუ ის თანხმობას განაცხადებდა, დასდებდა მასთან დროებით ზავს, ხოლო ზავის საბოლოოდ გაფორმებისათვის კართაგენს ელჩები უნდა გაეგზავნა რომში.

ელჩებს კრინტიც არ დაუძრავთ! რომაელის ასეთი ღმივე მოთხოვნების წინააღმდეგ. კართაგენი ცდილობდა გაექიანურებინა მოლაპარაკება, სანამ პანიბალი აფრიკაში ჩამოვიდოდა. ელჩები გაგზავნილ იქნენ რომში ზავის სათხოვრად. ზავის ჩამოგდების დაჩქარების სურვილის გამოსახატავად თან გაიყოლეს 200 იტალიელი სამხედრო ტყვე ემიგრანტი.

ამ დროს ძმები ბარკიდები თავიანთი უკანასკნელი ძალებით იბრძოდნენ იტალიის მიწაზე. ჩრდილოეთ იტალიაში, კელტ-ინსუბრთა ოლქში, მაგონს, რომელმაც ვერ შესძლო სამხრეთისაკენ გაქრა და პანიბალთან შეერთება, გენერალური ბრძოლა გაუმართეს პრეტორმა პუბლიუს ჭვინტილიუს ვარუსმა და პროკონსულმა მარკუს კორნელიუსმა. მთელი დღის განმავლობაში მოწინააღმდეგენი არაჩვეულებრივი სიმძაფრით ებრძოდნენ ერთმანეთს. მიუხედავად იმისა, რომ რომაელები რიცხობრივად ორჯერ აღემატებოდნენ მტერს, მაგონმა მაინც მოახერხა მათი პირველი რიგების გარღვევა. ამოდ ცდილობდა რომაელი პრეტორი და მისი მამაცი შვილი კავალერიით მტრის ფლანგებიდან შემოვლას. მაგონის მხედრობამ წარმატებით უკუაქცია რომაელი ცხენოსნები. მან გადამწყვეტ მომენტში გამოიყვანა სპილოებიც და ის იყო გამარჯვების სასწორმა კართაგენელთა მხრისაკენ იწყო გადახრა,

რომ ამ დროს ბარძაყში მძიმედ დაჭრილი მაგონი ძირს დაეცა. მამაცი სარდლის დაცემამ თავზარი დასცა არმიას. რომაელებმა ისარგებლეს, ბედნიერი შემთხვევით. როცა სისხლისაგან ნახევრად დაცლილი და გრძობადაკარგული მაგონი არმიის ზურგისაკენ გაატარეს, კართაგენელებმა საბოლოოდ დაქარგვეს გამარჯვების იმედი და დაიწყეს ბრძოლის ველიდან გაქცევა. 5 000 კართაგენელი დაეცა მკვდარი. არანაკლები ზარალი ნახეს რომაელებმაც. დაღუპულთა შორის იყო სამი სამხედრო ტრიბუნი და 22 წარჩინებული მხედარი.

ამ ბრძოლის შემდეგ ლიგურიის ზღვის სანაპიროზე დაბრუნებულმა მაგონმა მიიღო კართაგენის სენატის ბრძანება დაუყოვნებლივ აფრიკაში გადასვლის შესახებ. მან ჩასვა თავისი არმია გემებში და დასტრვა იტალიის სანაპიროები. მაგრამ მაგონმა ვერ მიაღწია მშობლიურ მხარეს. ის ჭრილობისაგან გარდაიცვალა გზაში (203 წ.). დარჩა უკანასკნელი ბარკიდი, ჰანიბალი.

კროტონთან დაბანაკებულმა ჰანიბალმა 204—203 წლებში უკანასკნელი მძაფრი ბრძოლები გაუშარტა რომაელებს. უკანასკნელი ბრძოლიდან დაბრუნებულ სარდალს კარაგში კართაგენელი ელჩები დახვდნენ, რომლებმაც გადასცეს მას იტალიის დატოვებისა და აფრიკაში დაუყოვნებლივ გამოცხადების ბრძანება. მაშ, ჰანიბალს უნდა დაეტოვებინა იტალია, რომელიც მას 16 წლის განმავლობაში წომავალი პროვინციის მსგავსად ეჭირა ხელში; როგორც დამარცხებულს უნდა დაეტოვებინა ქვეყანა, სადაც მას არც ერთი დამარცხება არ უნახავს და სადაც ის მტერთან ყველა გენერალური ბრძოლის მძლეताმძლე ითვლებოდა. თექვსმეტი წელი რომის ისტორიაში „ჰანიბალის ომის“ სახელწოდებით შევიდა. ამ რამდენიმე წლის წინათ ის რომის კედლებთან იდგა, სადაც მან ანტიკურ ბრძოლის ისტორიკოსები აიძულა აღეშარტათ მემორიალური დაფა. რომელზეც თავიანთი „ისტორიების“ საწყის ერად ხშირად ჰანიბალის მოსვლა მოეხსენებოდა.

იგი ცრემლითა და გმინვით შეხვდა ელჩებისაგან მოტანილ ბრძანებას. „მაშ, ახლა უკვე არა გადაკვრით. არამედ აშკარად მიწვევენ ისინი, ვისაც დიდი ხანია სურთ გამიყვანონ იტალიიდან, ისინი, ვინც ყოველნაირად ცდილობდნენ ხელი შეეშალათ ჩემთვის მაშველი ძალების გამოგზავნაზე და ხელი შეეწყობთ ჩემი დასუსტებისათვის; მაშ, ჰანიბალი დაამარჯხა არა რომაელებმა ხალხმა, რომელიც მას თვითონ მრავალჯერ დაუმარცხებია და გაუნადგურებია. არამედ კართაგენის სენატმა მისდამი შურითა და უკეთურობით; და ისე სციპიონი არ გაიხარებს და არ ამალღდება ჰანიბალის სამარცხვინო დაბრუნებით, როგორც ჰანონი, რომელმაც კართაგენის დასაღუპავად ჰანიბალის სახელის განადგურების გარდა სხვა საშუალება ვერ გამოიხატა!“ — წამოიძახა ბრაზმორეულ-

მა სარდალმა. შემდეგ ბრძანა დაეკლათ ყველა ცხენი და ყველა იტალიელი ჯარისკაცი. რომლებიც კი უარს იტყობდნენ აფრიკაში წასვლაზე, ხოლო დანარჩენი ჯარები ჩამსხდარიყვნენ გემებში.

გადმოგვეყვინ, რომ არავინ სამშობლოდან გაძევების დროსაც ისე დაღონებული არავის უნახავს. როგორც ჰანიბალი იტალიიდან წასვლისას ყოფილა. ის წყევლა-კრულვას და შეჩვენებას უთვლიდა ღმერთებს; ადამიანთა მოდგმას, საკუთარ თავს. დიდხანს, სანამ თვალს არ მიეფარა, ცრემლმორეული გასცქეროდა ქვეყანას, სადაც ის ახალგაზრდა, ჯანღონით სავსე ვაჟკაცი მოვიდა და საიდანაც 16 წლის სისხლის ღვრით გაქაღარავეებული და უამთა სიავისაგან მხრებში მოდრეკილი მოხუცი მიდიოდა.

ჰანიბალისა და მაგონის წასვლამ რომში გიყური სიხარული, აუწყრელი ზეიმი გამოიწვია. ხუთი დღის მანძილზე გრძელდებოდა ღრეობა. 120 ხარი შეეწირა კაპიტოლიუმის საკურთხეველებს. რომი და იტალია გადარჩა! სენატმა და ხალხმა ჰანიბალის წასვლის აღსანიშნავად ყვავილებითა და ბალახით შემკული ოქროს გვირგვინი მიუძღვნეს 90 წლის ფაბიუს მაქსიმე კუნქტატორს, როგორც ერთადერთ რომაელ მხედართმთავარს, რომელიც თავიდან ბოლომდე მომსწრე იყო ჰანიბალის ომის საშინელებისა, თუმცა ის მაინც ვერ მოესწრო მრისხანე მტრის განადგურებას: გარდაცვალა იმავე წელს, რა წელსაც ჰანიბალმა დასტოვა იტალია.

საზავო მოლაპარაკებისათვის ჩამოსული კართაგენელი ელჩები რომში არ შეუშვეს. სენატორები მათ ქალაქს გარეთ შეხვდნენ. კართაგენელებმა ჯერ მონანიება დაიწყეს და ომის გაჩაღება ჰანიბალს გადააბრალეს. შემდეგ ითხოვეს ზაჟის ის პირობები, რომლებიც დადებულ იქნა პირველი პუნიკური ომის ბოლოს, ე. წ. კატულუსის ზაჟის სახით. რომაელებმა უარი სთქვეს და სციპიონს ლელიუსის პირით შეუთვალეს განეგრძო ომი.

ზამა. ომის დასასრული

ჰანიბალის ჩამოსვლამ ერთხელ კიდევ დააყენა ფეხზე კართაგენის სამხედრო პარტია. დავიწყებას მიეცა უკანასკნელი დამარცხებანი; ისევ აკიაფდა გამარჯვების იმედი. კართაგენელებს ბრმად სჯეროდათ ჰანიბალის გენიისა და ვერ გრძნობდნენ, რომ მისი ნიჭი ფუჭი იყო მოვლენათა მსვლელობის კანონზომიერებათა წინაშე, რაც რომაელთა სასარგებლოდ ვითარდებოდა.

აფრიკაში დროებითი სიწყნარე დაირღვა. მოწინააღმდეგეებმა კვლავ იარაღს მოავლეს ხელი. ორ დიდ ბუმბერაზს უნდა გადაეჭვარედიწებია

მახვილები, ორ ბუმბერაზს, რომელთაგან ერთის ვარსკვლავი ზენიტს უახლოვდებოდა, მეორისა კი — ესვენებოდა.

ჰანიბალი ჩვეული ენერგიითა და სისწრაფით შეუდგა საომარ სამზადისს. იგი კართაგენში ჯერ არ იყო გამოცხადებული. ქ. ჰადრუმეტუმში იდგა და იქ უყრიდა თავს ჯარებს. მისი საბრძოლო დროშის ქვეშ 50 000 მეომარმა მოიყარა თავი. ეს იყო უკანასკნელი რესურსები, რასაც კართაგენის სიძლიერე ერქვა და რაზედაც დამოკიდებული იყო მისი სიკვდილ-სიცოცხლე.

სციპიონიც, როგორც დარწმუნებულად არ უნდა ყოფილიყო თავის „ბედის ვარსკვლავში“ (როგორც წყაროები ამას ხშირად აღნიშნავენ), მაინც დიდის პასუხისმგებლობით გრძნობდა როგორ მოწინააღმდეგესთანაც ჰქონდა საქმე. მან იცოდა, რომ ეს არ იყო მეფე სიფაქსი, არამედ იყო ჰანიბალი, გენიალური სარდალი და უმაჰაცესი მეომარი, ათასჯერ რომაელთა სისხლში განბანილ; მას თან მოსდევნენ მისივე თანატოლი, მრავალ ბრძოლაში ნაწრთობი მეომარები, რომელთაც საკუთარი ხელით დაუსამარებიათ რომაელი კონსულები, პრეტორები და სხვა სახის ბელადები, შემკულნი მრავალი ჯილდოთი. გვირგვინებით. ახლა რომის უმაღლესი მოხელეების წკებლათა კონების საერთო რიცხვი იმდენი არ შეგროვდება, რამდენიც ის შეუძლოა წარმოადგინოს ჰანიბალმა, რომელ სარდალთა გამანადგურებელმა. ამიტომ სციპიონიც დიდის ენერგიით ემზადებოდა მოწინააღმდეგესთან შესახვედრად. დამხმარე ჯარები ჩამოვიდნენ იტალიიდან. მასინისამ მოიყვანა მრავალრიცხოვანი პირველხარისხოვანი ნუმიდური კავალერია. სციპიონის არმიაც რიცხოვრივად ჰანიბალისას უტოლდებოდა.

ამრიგად, 100 000 კაცმა მოიყარა თავი ადამიანთა ახალ სასაქლაოზე. ეს მოხდა 202 წლის 19 ოქტომბერს, ქ. ზამასთან. გადმოგვცემენ, რომ ამ დღეს მზის დაბნელება მომხდარა. და ეს დღე კართაგენელთათვის დაბნელდა.

ბრძოლის წინა დღეებში რომაელებს ხელში ჩაუვარდათ კართაგენელი მზვერავები. სციპიონმა ისინი ჩამოატარა თავის ბანაკებში, დაათვალიერებინა ყველაფერი და გაუშვა ისევ ჰანიბალთან. ჰანიბალმა მათგან შეიტყო, რომ მოწინააღმდეგეს უზარმაზარი საუკეთესოდ გაწვრთნილი არმიები ჰყავს; მათთან არის მასინისაც, რომელსაც 10 000 ნუმიდელი ახლავს, ის ნუმიდელები. რომლებითაც თვით ჰანიბალი მუდამ ამყობდა და მათი მეოხებით სასწაულებს ახდენდა იტალიაში.

ჰანიბალი გრძნობდა, რომ მისი და მისი ქვეყნის აღსასრული მოახლოვებული იყო. ეს იყო პირველი შემთხვევა, როცა ჰანიბალს გამარჯვების რწმენა ჰქონდა დაკარგული. მან გადასწყვიტა ეცადა საზავო.

შოლაპარაკება სციპიონთან, სანამ არმია ცოცხალი ჰყავდა და ზავის უკეთეს პირობებს მიაღწევდა.

მან გაგზავნა კაცი რომაელთა ბანაკში და სციპიონთან შეხვედრა ითხოვა. რომაელმა თანხმობა განაცხადა. და აი, სრულიად მარტონი, მხოლოდ თითო თარჯიმანის თანხლებით, ერთმანეთს შეხვდა ძველი დროის ორი დიდი სარდალი: ახალგაზრდა, ჯან-ღონიერი „მგლის ნაშიერი“ და უკვე ბრჭყალებდაცვეთილი და წელში გატენილი ფინიკიელი „მელკარტი“. ისინი დიდხანს მდუმარედ და განუზომელი ცნობისმოყვარეობით ათვალიერებდნენ ერთერთს. ბოლოს, ჰანიბალმა მიმართა ბედნიერ მეტოქეს: რადგან მე, რომელსაც გამარჯვება მუდამ ხელთ შეპყრა, მაინც ბედმა მარჯუნა პირველმა ვითხოვო ზავი, ესარობ. რომ ამ საკითხზე საუბარი შენთან მიხდება. ბედისწერა მე მაიძულებს დავთმო იმ კაცის წინაშე. რომლის ხალხიც მე ყოველთვის დამიმარცხებია. ბედმა იმაშიც მწარედ დამცინა, რომ სულ პირველი რომაელი კონსული და სარდალი, რომელთანაც მე ბრძოლაში ჩავები, მამაშენი იყო და ახლა მე უიარაღოდ ზავის სათხოვრად ვცხადდები მისი შვილის წინაშე. კარგი იქნებოდა ღმერთებს ჩვენი წინაპრებისათვის ჩაეგონებინათ. რომ მათთვის და ჩვენთვის საკმარისი ყოფილიყო ჩვენ-ჩვენი იტალია და აფრიკა; ვეძებდით სხვისას და ხშირად ამ ძებნაში საკუთარს გადარჩენისათვის გვიხდებოდა ბრძოლა. ასე მოგივიდათ თქვენ იტალიაში და ასე მოგვდის ახლა ჩვენ აფრიკაში. თქვენ, რომაელები მშობლიური ქალაქის კედლებთან ხედავდით მტრის სამხედრო დროშების ფრიალს, ხოლო ახლა კართაგენში ჩვენ გვესმის მტრის სამხედრო ბანაკის ხმაური. მართალია, კართაგენელებს ზავის თხოვნა გვიხდება თქვენთვის. რომაელებისათვის ხელსაყრელ პირობებში, მაგრამ გახსოვდეს, სციპიონო, ეამთა სიავის, უღმობელობა და ბედის ტრიალი. ამის ცოცხალი მაგალითი ახლა შენს წინ დგას ჰანიბალის სახით. ჩემი ცხოვრების გზაზე ბედნიერება და უბედურება ერთმანეთს სცვლიდნენ, ამიტომაც მე მეტ უპირატესობას ვანიჭებ ჰკვიანურ განსჯას, ვიდრე ბედისწერას. მაგრამ მე მაშინებს შენი ახალგაზრდობა და დღემდე ურყევი ბედის წყალობა; ერთმაც და მეორემაც შეიძლება შენ იმდენი გაგაბედვიროს, რასაც ჰკვიანური განსჯა არ დაგანებებდა, ძალიან ცოტას ფაქრობს ბედზე ის, ვისთვისაც მას ჯერ ერთხელაც არ უღალატნია. მეც მიღიმოდა ბედის ვარსკვლავი; მე ხომ შენი ქალაქის წინაშე ვიდექ და შიშის ზარს ვცემდი მას. მაგრამ ახლა ჩემი ქალაქის წინ ვდგავარ და ვცდილობ გადავარჩინო ის იმ საშიშროებისაგან, რომლითაც მე რომს ძრწოლას ვგვრიდი. ამიტომ გირჩევ ნუ ენდობი ბედს, ფორტუნას; ენდე ჰკუას; მოიგონე ატილიუს რეგულუსის ბედი. ჩვენ აქვენს სასარგებლოდ უარს ვამბობთ ყველა იმ ტერიტორიაზე, რომელ-

ბისთვისაც ომი გვიწარმოებია. თქვენი იყოს სიცილია, სარდინია, ესპანე.. თი და ყველა კუნძული აფრიკასა და იტალიას შორის; ჩვენ კი, კართაგენელები, ჩაიკეცებით ჩვენს აფრიკაში.

სციპიონი კართაგენელი სარდლის პესიმისტურმა განწყობამ საბოლოოდ დაარწმუნა თავის სრულ უპირატესობაში. მან უარყო ჰანიბალი-საგან საზავო პირობების მიღება და გადაჭრით მოითხოვა ბრძოლის გამართვა.

სარდლები დაბრუნდნენ თავიანთ არმიებთან და მიმართეს მათ სიტყვებით: ყველაფერი იარაღმა უნდა გადასწყვიტოს. დაე, აღიჭურვოს ყველა მებრძოლი ურყევი სიმამაცით და სიმტკიცით. ეს არის უკანასკნელი ბრძოლა, სადაც საბოლოოდ წყდება ორი ძლიერი სახელმწიფოს სიკვდილ-სიცოცხლის საკითხი. ამ ბრძოლაში გამარჯვებული საბოლოოდ იმარჯვებს, დამარცხებული — სამუდამოდ დასამარდება. ეს არის ბრძოლა მსოფლიოზე გაბატონებისათვის და არა მარტო იტალიის ან აფრიკისათვის. ხვალ დაღამებამდე გაირკვევა ვინ უნდა უკარნახოს კანონები მსოფლიოს ხალხებს — რომმა თუ კართაგენმა.

დილით, 19 ოქტომბერს, სარდლებმა გამოიყვანეს არმიები ბრძოლის ველზე.

ჰანიბალმა ფრონტის წინა ხაზზე 80 სპილო ჩაამწყრივა. მათ შემდეგ პირველ რიგში განალაგა კელტების, ლიგურების, ბალეარელების და მავრიტანების დამხმარე ჯარები, სულ 12 000 კაცი; მეორე რიგში ჩააყენა ახალწვეული კართაგენელები და აფრიკელები, ხოლო სულ ბოლოს, მესამე რიგში, ცოტა დაშორებით, იტალიის ბრძოლებში ნაცადი ვეტერანები, რომლებზეც ამყარებდა ძირითად იმედებს სარდალი. ესენი ბრძოლაში უნდა ჩაბმულიყვნენ გადამწყვეტ მომენტში, როცა პირველი რიგები შესუსტდებოდნენ. ფლანგებზე კავალერია განალაგა: მარჯვნივ — კართაგენელები, მარცხნივ — ნუმიდიელები.

სციპიონმა მთელი ქვეითი არმია ჩვეულებრივი სამრიგოვანი (ჰასტატები, პრინციპები, ტრიარიები) წყობით განალაგა, მაგრამ ისე, რომ ცენტურიებს შორის რამდენიმე ნაბიჯის ინტერვალები დასტოვა. ეს იმისათვის, რომ ბრძოლის დაწყებისას მოწინააღმდეგის სპილოებს მათზე გზა მისცემოდათ და ამგვარად თავიდან ყოფილიყო აშორებული რომაელთა რიგების დანგრევა. წინა ხაზზე დატოვებულ დისტანციებში ჩაყენებულ იქნენ მსუბუქადშეიარაღებული მეომრები (კელტები), რომელთაც ბრძოლის გახსნისას, თუ სპილოთა შემოტევისაგან გაუჭირდებოდათ, სწრაფად შეეთარებინათ თავი მათ უკან მდგარი რიგებისათვის, გზა მიეცათ მხეცებისათვის და შემდეგ გვერდიდან დაეშინათ მათთვის ისრები და სათხედები. სციპიონმა მარჯვენა ფლანგზე დააყენა იტალი-


ური კავალერია გ. ლელიუსის მეთაურობით, ხოლო მარცხენაზე — ნუმიდიელთა მხედრობა მასინისას სარდლობით.

ერთი შეხედვით იგრძნობოდა სციპიონის აშკარა უპირატესობა მისი დიდი მტრის იმდროინდელ სიძლიერესთან შეფარდებით. მას ჰყავდა პირველსარისსოვანი შესანიშნავად გაწვრთნილი წმინდა რომაულ-იტალიური არმია, რომელმაც მშვენივრად იცოდა, თუ რისთვის იბრძოდა ის ამ უცხო ქვეყანაში. ყველას შესანიშნავად ესმოდა ერთიმეორის; ყოველ მებრძოლს ერთი მიზანი და მისწრაფება ჰქონდა. გარდა ამისა, სციპიონის მარჯვენა ხელს წარმოადგენდა მასინისა თავისი მრავალრიცხოვანი ნუმიდიური კავალერიით.

ჰანიბალის არმია ქრელი, მრავალხალხოვანი და სხვადასხვა მიზნებისათვის მებრძოლი მეომრებისაგან შედგებოდა. ერთიმეორის ნაკლებად ესმოდათ ერთი საბრძოლო დროშის ქვეშ მდგარ კართაგენელს, აფრიკელს, ესპანელს, კელტს, ბალეარელს, ლიგურს და მავრს. ისინი ერთიმეორისათვის თითქმის ყოველთვის უცხონი იყვნენ. საერთო მიზნად მათ მხოლოდ ერთი რამ ჰქონდათ: ნადავლი და სამხედრო ქირა. მაგრამ გამარჯვების ეს მეტად საეჭვო საწინდარი ახლა, როცა კართაგენი დაღუპვის კარზე იყო მისული, მეტად ცუდი სტიმულის მიმცემი იქნებოდა დაქირავებულ მეომართა სიმედგრისა და თავგანწირულობისათვის. ერთადერთი ნაწილი, რომელსაც ამ ბრძოლაში მტრის განადგურებისათვის სიცოცხლე არ უნდა დაეზოგა, იყვნენ, მკვიდრი კართაგენელები, მაგრამ თუგინდ ყურადღება იმასაც არ მივაქციოთ, რომ ფინიკიელები თავისი ბრძოლისუნარიანობით რომაელებს ვერასდროს გაუტოლდებოდნენ, ის ხომ ცნადი იყო, რომ ეს კართაგენელები ახალწვეული მეომრები იყვნენ; მათ უმრავლესობას მხოლოდ რამდენიმე დღის წინ მიეტოვებინათ სავაჭრო დუქნები, ბაზრები, საწვრილმანოსავაჭროები და არშინის ნაცვლად ხელში მახვილი აეღოთ. ნამდვილად ერთადერთი სამხედრო ძალა. რომლისაც ჰანიბალს ისე სწამდა, როგორც საკუთარი თავისა და მკლავისა, იყვნენ მხოლოდ მისი თანამებრძოლი მრავალ ბრძოლაში სისხლით თანაზიარი მეგობარი-ვეტერანები. მაგრამ ისინი ხომ მას მხოლოდ რამდენიმე ასეულია შერჩა.

ჰანიბალს ჯერ კიდევ არ დაემთავრებინა თავისი მრავალფეროვანი ჯარებისათვის ყველასათვის შესადარისი სიტყვებით მიემართა, რომ მოწინააღმდეგის ბანაკიდან ატყდა საყვირებისა და საბრძოლო ზინზილაკების გამაყრუებელი ზრიალი. რომაელები თავზარდამცემი ყიყინითა და იარაღის ზათქით მიეჭრენ კართაგენელებს. ჰანიბალმა წამსვე უპასუხა კონტრიერიზით. გამაყრუებელი ღრიანცელით დამფრთხალი სპილოები, განსაკუთრებით ისინი, რომლებიც მარცხენა ფლანგზე იდგნენ, უკანვე გაბრუნდნენ და არივდარიეს კართაგენელთა წინა რი-

გები. ამ შემთხვევით კარგად ისარგებლა მასინისამ, რომელმაც თავისი მხედრობით მაშინვე დაარტყა მოწინააღმდეგის კავალერიას და გააფანტა ის. სპილოთა ნაწილი მაინც შეიკრა რომაელთა მსუბუქად შეიარაღებულ რიგებში. მაგრამ, როგორც სციპიონი ითვალისწინებდა, ველიტები სწრაფად დაიფანტნენ ცენტურებში, გზა მისცეს სპილოებს და გვერდებიდან დაუშინეს მათ. ხმაურისაგან და ჭრილობებისაგან დაგიჟებული მხეცები უკანვე გაბრუნდნენ და ისევ მიაწყდნენ კართაგენელთა რიგებს, ახლა მათ მარჯვენა ფლანგს და ისიც დაშალეს. ამით მშვენივრად ისარგებლა აქ მდგარმა გ. ლელიუსმა და იტალიური მხედრობით უკუაქცია კართაგენელთა კავალერია. ამგვარად, ჰანიბალის არმიის ორივე ფლანგი, ცხენოსანი ჯარები უკვე დამარცხებული და დაფანტული იყვნენ. მისი ქვეითი არმიის პირველი რიგები ბრძოლაში ფლანგებგაშიშვლებული ჩაებნენ. პირველი შეტაკებისთანავე იგრძნო-



ბრძოლა ზამასთან.

ბოდა რომაულ ლეგიონთა აშკარა უპირატესობა. მხოლოდ გულისგამაწყალებლად და სასიოწარკვეთილების მომგვრელად ისმოდა ჰანიბალის შეომართა სხვადასხვა ენაზე აღმობდენილი საბრძოლო შეძახილი. თავზარდამცემად სქექდა რომაელთა ერთენოვანი და ერთხმივი ოლიმპიური საბრძოლო გრგვინვა. რომაელებმა პირველი დარტყმისთანავე აიძულეს ჰანიბალის მოწინავე დაქირავებულთა რიგები უკან დაეხიათ. მაგრამ ისინი მაინც დიდხანს მდგრად იგერიებდნენ მოწინააღმდეგის გაშმაგებულ იერიშებს. ჰანიბალის არმიის მეორე რიგი, კართაგენელები და აფრიკელები, აგვიანებდნენ ბრძოლაში ჩაბმას. ეს მოწინა-

ვეებმა ლალატად მიიჩნიეს და ბრძოლის საშინელებათაგან თითქმის
კუდიდან გადასულებმა ახლა თვით მათკენ მიმართეს იარაღი. ამიტომ
გეორგ რიგს, კართაგენელებსა და აფრიკელებს, თითქმის ორივესთან
— რომაელებთან და საკუთარ დაქირავებულებთან — ერთდროულად
მოუხდათ ბრძოლაში ჩაბმა. მაგრამ მათ სასწრაფოდ მოსპეს ეს მოუ-
ლოდნელი და უცნაური დაბნეულობა: ორივე ფლანგზე მირეკეს და
უკან ჩამოიჭრეს მწყობრიდან გამოსული მოქირავნეები და არაჩვეუ-
ლებრივი თავგანწირულებით შეებნენ რომაელებს. ბრძოლა ახალი
სიმძაფრით გაჩაღდა. მეომრებს ფეხი უსხლტებოდათ სისხლის ღვარ-
თქაფისაგან ატალახებულ მიწაზე. დალილ-დაქანცულნი, მუსლმოკვე-
თილნი, იარაღის ხშირი ქნევისაგან მკლავმოწყვეტილნი ძლივს დაბობ-
ლავდნენ დახვავებულ გვამებზე და საკუთრელებზე; ბორძიკობდნენ, ეცე-
მოდნენ, ისრისებოდნენ, შემზარავი ბლავილით ეგებებოდნენ სიკვ-
დილს. შედრკნენ რომაელთა მოწინავე რაზმები: ჰანიბალის ნატყორ-
ცნმა შუბმა ძირს დასცა სციპიონის ცხენი. ელვის უსწრაფეს მოართვეს
მარქაფი რომაელ სარდალს. მოახტა მყისვე. მოწინავეთა არეულობა
გადაედო მომდევნო რიგებს. მაგრამ სციპიონმა სულიერად დაცემული
პირველი რიგი სასწრაფოდ გაიწვია ბრძოლის ველიდან და მეორე და
მესამე მწყრივები, პრინციპები და ტრიარიები, ახალი ენერგიით ჩა-
აბა ბრძოლაში. ჰანიბალმა, როგორც კი ეს შენიშნა, სასწრაფოდ მოუხ-
მო უკანასკნელ რეზერვებს, ნაცად ვეტერანებს. სისხლის ღვრა ახალ
ფაზაში შევიდა. საშინელი ხელჩართული ხოცვა-ჟლეტა გაგრძელდა
დიდხანს, აუწერელი სისასტიკით, დაუნდობლობით, თავდავიწყებით.
აქ უკვე აღარ იბრძოდნენ ადამიანები. მხოლოდ მხეცადქცეული სულ-
დგმულნი სჩქებდნენ და გლეჯდნენ ერთმანეთს. ჯერ კიდევ არ ჩანდა
საით უნდა გადახრილიყო გამარჯვების სასწორი. მაგრამ, როცა მასი-
ნისამ და ლელიუსმა დაამთავრეს მოწინააღმდეგის კავალერიის სრული
განადგურება და კართაგენელთა ქვეით არმიას ზურგიდანაც შემოუტე-
ეს, ყველაფერი გარკვეულ იქნა: საშინელი ბატალია კართაგენელთა
მარცხით დამთავრდა. კართაგენის 20 000 მეომარი. ესვენა ბრძოლის
ველზე; თითქმის ამდენივე ტყვედ ჩავარდა. რომაელებს ხელში ჩაუვარ-
დათ 11 სპილო და 132 საბრძოლო დროშა. დიდი იყო რომაელთა
მსხვერპლიც.


ჰანიბალი მცირე რაზმების თანხლებით ჰადრუმეტუმისაკენ მიჰქრო-
და. ერთხანს მას თავგამეტებით მისდევდა მასინისა თავისი ნუმიდელიე-
ბით. მისი სურვილი იყო შეეპყრო ჰანიბალი და ცოცხლად გადაეცა ის
სციპიონისათვის. წამოეწია კიდევ დალილ ლტოლვილებს. ჰანი-
ბალმა უეცრად ცხენი შემოაბრუნა და მდევარს შუბი სტყორცნა. მასი-
ნისას ცხენი დაეცა. ის კვლავ მოახტა მარქაფს და ახალი ენერგიით

გამოდევნა. ჰანიბალმა ერთი შოიხედა და ისევ გაისროლა. დაჭრილი მასინისა ცხენიდან გადმოეშვა.

ასე დამთავრდა სახელოვანი ბრძოლა ზამასთან, უკანასკნელი ბრძოლა ამ ომში. სციპიონი და მისი თანამებრძოლები, ასევე ყველა ძველი მეისტორიე, განცვიფრებული და აღტაცებული იყვნენ ჰანიბალით, რომელმაც ამ ბრძოლაშიც ყველაფერი გააკეთა. რაც კი საჭირო იყო გამარჯვებისათვის: ჯარების განლაგება, მათი ხელმძღვანელობა, პირადი სიმამაცე და თავგანწირულობა. მაგრამ ის მანაც გრძნობდა, რომ ძირმომპალი კართაგენის სიძლიერე სწორედ ამ ბრძოლაში უნდა მიჰბარებოდა მიწას. ასეც მოხდა. ჰანიბალი პირველად დამარცხდა. მან ძღვევამოსილებს კვერთხი გადასცა ბედნიერ რომელს. პორიზონტს მიეფარა ჰანიბალის „ბედის ვარსკვლავი“ და მასთან ერთად კართაგენის სიძლიერეც. აფრიკაში დაღამდა. ზენიტში ბრწყინავდა რომაელი იუპიტერი.

ჰანიბალი ჰადრუმეტუმში დაბრუნდა და შეუდგა თავისი არმიის ნაფლეთების შეგროვებას. აქედან ის თანამოქალაქეთა მიწვევით მივიდა კართაგენში. 36 წელი გასულიყო მას შემდეგ, რაც ჰანიბალმა, 8—9 წლის ბიჭმა, მშობლიური ქალაქი დასტოვა. ახლა ის დაბრუნდა და თავის ხალხს აშკარად გამოუცხადა: ამდენი სახელოვანი გამარჯვების მიუხედავად მტერთან უკანასკნელ შეხვედრაში წაგებულა არა მარტო ერთი ბრძოლა, არამედ მთელი საომარკამპანია და ხსნის იმედი არსაიდა არ არის, გარდა იმისა, რომ რაღაც უნდა დაგვიჯდეს მივალწიოთ ზავის დადებას. ამას ამბობდა ჰანიბალი, კართაგენელთა შორის რომის ყველაზე დიდი მოსიხსნელ მტერი. ზავი აუცილებელი იყო კართაგენის გადარჩენისათვის.

გამარჯვებულმა სციპიონმა ხელში ჩაიგდო მოწინააღმდეგის ბანაკი და გაძარცვა ის. დიდძალი ნადავლით დატვირთული რომაელები მივიდნენ უტიკაში, სადაც მათ ელოდებოდა 150 გემით იტალიიდან ჩამოსული პუბლიუს ლენტულუსი.



სციპიონ უფროსი.

უტიკიდან სციპიონმა რომში გაგზავნა გ. ლელიუსი, რომელსაც იქ უნდა ეცნობებინა ბრწყინვალე გამარჯვების ამბავი. შემდეგ მან, მტერზე ახალი შიშის დაცემის მიზნით, ლეგიონები ჩააბარა ლეგატ ოქტავიუსს და გაგზავნა კართაგენისაკენ ხმელეთის გზით, ხოლო თვითონ თავისი ფლოტი შეუერთა ლენტულუსის გემებს და ახალი დიდი საზღვაო ძალებით გაეშურა კართაგენის ყურესაკენ. როგორც კი რომაელთა ფლოტი ქალაქს მიუახლოვდა, იქიდან გამოვიდა ზეთის ხილის რტობით შემკული კართაგენული ხომალდი. მასში იჯდა 11 წარჩინებული კართაგენელი, რომელთაც საზავო მოლაპარაკება უნდა გაემართათ სციპიონთან. მიუახლოვდნენ რომაელი სარდლის გემს და ბაქანზე გადმომდგარ სციპიონს მწვანე რტობის რხევით სთხოვეს დაზავებაზე მოლაპარაკება. მათ უპასუხეს: სციპიონი მიეშურება ტუნესში და იქ შეუძლიათ ამ საკითხზე გამოცხადება. სციპიონი გადავიდა ნაპირზე და დაუწყო თვალთვლება კართაგენს, უფრო იმ მიზნით, რომ მეტი ძრწოლა დატრიალებულიყო ქალაქში. შემდეგ ისევ გაიწვია ოქტავიუსი და მთელი არმია უტიკაში, ხოლო იქედან გაეშურნენ ტუნესში. გზად მიმავალთ უეცრად თავს დაესხა სიფაქსის შვილი ვერმინა, კართაგენელთა დაგვიანებული მშველელი, რომლის არმია უმეტესწილად ცხენოსნებისაგან შედგებოდა. მაგრამ უბედური მეფის მამაცი მემკვიდრე მალე დამარცხდა, მისი ჯარები განადგურდა და თვითონაც ძლივს დააღწია თავი სიკვდილს.

სციპიონი მთელი არმიით ტუნესთან დაბანაკდა. აქვე ელოდებოდა მას კართაგენელთა ბრწყინვალე ელჩობა 30 კაცის შემადგენლობით. გაიმართა საზავო მოლაპარაკება. ყველა რომაელი, მათ შორის სციპიონიც, მოწადინებული იყვნენ ბრწყინვალე გამარჯვების ღრეობა კართაგენის ნანგრევებზე გადაეხადათ. მაგრამ სციპიონი კარგად სჯიდა: მართალია, კართაგენელებს ამჯერად არმია აღარ ჰყავთ, მაგრამ ძნელია კართაგენის კედლების აღება! მით უფრო, რომ მის დაცვას ახლა თვით დიდი ჰანიბალი ხელმძღვანელობს! მისი ალებაც რომ შესაძლებელი გახდეს, ვინ იცის რამდენხანს გაჰიანურდება ალყა (როცა რომაელებმა უტიკაც ვერ აიღეს ამდენხანს). ხოლო სციპიონი უკვე მეათე წელია, რაც უმალლეს იმპერიუმს ინარჩუნებს და სად არის გარანტია, რომში მისი „ტირანიისადმი“ მტრულად განწყობილი პარტია არ მიადწევს მის შეცვლას ახალი კანდიდატურით, რომელიც მითვისებს მის გამარჯვებათა ნაყოფს? ამიტომ, სანამ გვიან არ არის, საჭიროა მიიღოს დამარცხებული მოწინააღმდეგის შემოთავაზება და უკარნახოს ძლევა მოსილის ნება-სურვილები.

სციპიონმა კართაგენელებს ზავის ასეთი პირობები წაუყენა: კართაგენს უფლება რჩება ჰქონდეს ავტონომია, მართოს თავისი თავი სა-

კუთარი კანონებით, ფლობდეს აფრიკის იმ ოლქებს. რომლებსაც ის ფლობდა ომის დაწყებამდე, ხოლო რომაელები შეწყვეტენ ამ ოლქთა აონებას. აი ყველაფერი, რაც კართაგენს რჩებოდა. საზაგიეროდ კართაგენელები ვალდებული არიან: გადასცენ რომაელებს ყველა სამხედრო ტყვე. გაქცეულები, ემიგრანტები; გადასცენ რომს მთელი საზღვაო ფლოტი. გარდა 10 გემისა; ჩააბარონ მას ყველა სპილო და ამიერიდან აეკრძალოთ ახალი სპილოების გაწვრთნა; ეკრძალებათ ომების დაწყება და წარმოება რომის დაუკითხავად როგორც აფრიკაში, ასევე აფრიკის გარეთ; მასინისას უნდა დაუბრუნონ ყველა ოლქი, რომლებიც მას ეკუთვნოდა და დასდონ მასთან სამოკავშირო ხელშეკრულება; სურსათი და ხელფასი მისცენ აფრიკაში მყოფ რომაელ მეომრებს მანამ, სანამ ზავის რატიფიკაციას არ მოახდენს რომის სენატი; სამხედრო კონტრიბუციის სახით რომს ვადაუხადონ 10 000 ვერცხლის ტალანტი (= 18 000 000 მან. ოქროთი). 50 წლის განმავლობაში ყოველ წელიწადს 200 ტალანტი; სციპიონის არჩევით რომაელებს უნდა ჩაბარდეს 100 კართაგენელი მძევალი. ასაკით ყოველი მათგანი არაუმცირეს 14 წლისა და არაუმეტეს 30 წლისა. ბოლოს. დაზავება მაშინ შევიდოდა ძალაში, როცა კართაგენელები დააბრუნებდნენ იმ გემებს, რომლებიც მათ ამას წინათ წაართვეს რომაელებს.

ელჩები დაბრუნდნენ კართაგენში და სახალხო კრების წინაშე წარმოსთქვეს სციპიონის ზავის პირობები. მისმა ასეთმა სიმძიმემ საშინელი ჩოჩქოლი გამოიწვია ხალხში. ბევრი მომხრე იყო მისი უარყოფისა და ომის განგრძობისა. ასეთი აზრის მოთავე იყო გისკონი, რომელიც ხმამაღლა გაჰყვიროდა რძმაელებთან საზავო მოლაპარაკების შეწყვეტასა და ომის გაგრძელებას ბრძანებული ჰანიბალი მივარდა მასთან და კინწის კვრით ჩამოაგდო ტრიბუნიდან. ხალხი აღმფრთხილებით შეხვდა ჰანიბალის ასეთ მოქმედებას სახალხო კრების წინაშე. დარცხვენილმა სარდალმა გულისტკივილით განაცხადა: „ცხრა წლის ბავშვმა დაგტოვეთ თქვენ და ახლა დავბრუნდი ოცდათექვსმეტი წლის შემდეგ. სამხედრო ხელოვნება, რომლის შესწავლას შე ბავშვობიდანვე მძიძულებდა კერძოდ და საზოგადოებრივი მდგომარეობა, როგორც ვფიქრობ, საფუძველიანად შევისწავლე; ხოლო რაც შეეხება კანონებს, საძირთაღს და ადამიანურებებს, შე უკვე გადამავიწყდა და ამ საქმეში თქვენ უნდა იქნეთ ჩემი მასწავლებლები“. ასეთი მობოდიშების შემდეგ მან სახალხო კრებას დაუსურათა ის უკიდურესად მძიმე მდგომარეობა, საიდანაც ერთადერთ გამოსავალს ზავი წარმოადგენდა. მით უმეტეს, — ამბობდა ჰანიბალი, — კონსული ტიბერიუს კლავდიუსი უზარმაზარი არმიითა და ფლოტით უკვე სიცილიაშია ჩამოსული და თუ საჭიროდ ჩასთვლის

დღეს თუ ხვალ აფრიკაშიც გაჩნდება. ამიტომ საჭიროა ზავი, თუნდაც ისეთი, როგორსაც სციპიონი აყენებს.

ჰანიბალის წინადადება მიღებულ იქნა.

სციპიონმა ჩაიბარა კართაგენელთაგან წართმეული გემები და, მასზე დატაცებული ქონების საფასურად, 25 000 გირვანქა ვერცხლი. შემდეგ მან ზავის სრულ რატიფიკაციამდე სამთვიანი დაზავება გამოაცხადა. ამ დროის განმავლობაში კართაგენს ეკრძალებოდა ყოველგვარი ელჩობის გაგზავნა რომელი ქვეყნისაქენაც არ უნდა ყოფილიყო ის, გარდა რომისა. ხოლო თუ საიდანმე, რომელიმე უცხო ქვეყნიდან ელჩობა მივიდოდა კართაგენში, ეს იქიდან ვერ გავიდოდა, სანამ რომაელთა ბელადი მათი ჩამოსვლის მიზეზებს და მიზანს არ შეიტყობდა.

ზავის რატიფიკაციისათვის რომში გაიგზავნა კართაგენელთა ელჩობა, რომელსაც ჰანიბალის დაუძინებელი მტრები ჰანონი და ჰასდრუბალ „თხა“ (Hannibal) მეთაურობდნენ. ამ ელჩობას სციპიონმა თან გააყოლა თავისიანებიც: ლ. ვეტურიუს ფილონი, მ. მარკიუს რალუსი და ლუციუს სციპიონი (სარდლის ძმა).

რომის სენატმა ქალაქის გარეთ, ბელონის ტაძარში მიიღო კართაგენელთა დესპანები და სციპიონის ეჯიბნი. აქ ვეტურიუს ფილონმა დაწვრილებით აუწყა რომაული იარაღის დიდი გამარჯვება დიდ ომში, კართაგენელთა სრული მარცხი და სიფაქსის შვილის ვერმინას განადგურებაც კი. სენატის ბრძანებით, სანამ კართაგენელ ელჩებს მოუსმენდნენ, ეს აღმაფრთოვანებელი ამბები ფილონმა გამოაცხადა რომის ფორუმზე შეკრებილ მრავალრიცხოვან სახალხო კრებაზე. აუწერელი სიხარული! ომი დასრულდა! კართაგენი, ჰანიბალი განადგურებულია! ყურთამდე გაიღო ყველა ტაძრის კარები. სამი დღე და ღამე გრძელდებოდა ღრეობა, ნადიმი, ზეიმი, რელიგიური რიტუალი, მისტერიები; უთვალავ სამსხვერპლო ცხოველთა სისხლით ამთავრებდნენ რომაელები უთვალავ ადამიანთა სისხლით ნაყიდ გამარჯვებას.

უმადლეს მაგისტრატთა არჩევნების შემდეგ (კონსულებად არჩეულ იქნენ გ. კორნელიუს ლენტულუსი და პ. ელიუს პეტუსი) სენატის ახალ სხდომაზე მიიღეს კართაგენელი ელჩები. კარგა ხნის ბჭობის შემდეგ სენატმა მიიღო ზავი იმ სახით, როგორც შედგენილი ჰქონდა სციპიონს¹. მეორე დღეს ზავი დაამტკიცა რომის სახალხო კრებამ.

გამოიყო ოთხი კაცისაგან შემდგარი კოლეგია, რომელიც უნდა გაპ-

¹ როცა კართაგენელ ელჩებს ზავის ერთგულად შესრულებაზე უნდა დაეჭიკებინათ, ერთმა რომაელმა სენატორმა შესძახა მათ:—„რომელი ღმერთებით უნდა დაიფიქოთ თქვენ, როცა წინა შეთანხმებების დროს ყველა ისინი მოატყუეთ!“ — „იმ ღმერთებით, რომლებიც ასე სჯიან შეთანხმებათა სიწმინდის ჩვენებარ დამრღვევთო“—მშვილად უპასუხა ჰასდრუბალ „თხამ“.

ყოლოდა კართაგენელთა ელჩობას და მისი თანდასწრებით კართაგენის ხელისუფლებას მოეხდინა ზავის რატიფიკაცია.

ამის შემდეგ დაკმაყოფილებულ იქნა კართაგენელ ელჩთა თხოვნა შეეშვათ ქალაქში და ნება მიეცათ შეხვედროდნენ აქ, რომის საპატიმროებში ჩაყრილ ტყვე თანამემამულეებს. სენატის სპეციალური დადგენილებით დამარცხებულებს ნება მიეცათ აშოერჩიათ 200 ტყვე, რომლებიც კართაგენში ზავის რატიფიკაციის შემდეგ უსასყიდლოდ იქნებოდნენ გათავისუფლებული.

201 წლის გაზაფხულზე კართაგენში ზავის რატიფიკაციის შემდეგ ყველაფერი დასრულდა. კართაგენელებმა მეორე დღესვე სციპიონს ჩააბარეს მთელი ფლოტი (ათი გემის გარდა), სამხედრო ტყვეები (4 000 კაცი), გაქცეული მონები, ემაგრანტები, სპილოები. სარდლის ბრძანებით ცეცხლს მისცეს კართაგენის ფლოტი, სულ 500 გემი. კართაგენელები ქალაქის კედლებიდან მოთქმა-გოდებით გასცქეროდნენ ცადატყორცნილ ხანძრებს, რომელიც მათ უკანასკნელ დიდებას შეუბრალებლად ნთქავდა.

სციპიონმა სასტიკად დასაჯა გაქცეულნი. მოღალატენი. იმათგან ლათინებს ყველას თავები დააყრვეინა, ხოლო რომაელები ჯვარზე გააკრა.

დასრულდა ომი, და კართაგენი, უძლიერესი მსოფლიო სახელმწიფო. უბრალო. კოლონიალურ მოხარე ქალაქად გადაიქცა. გადმოვეცემენ, როცა ზავის თანახმად კართაგენის მოსახლეობა დიდია ვიივაგლახით და ცრემლებს ფრქვევით აგროვებდა პირველი წლის გადასახადს. ჰანიბალი მას მწარე ირონიით შეხვდა. მისი მოსიხსლე მტრის პასდრუბალ „თხის“ აღშფოთებულ კითხვაზე. თუ რა აცინებდა მას ასეთი საყოველთაო მწუხარების დროს. ჰანიბალმა უპასუხა: რომ შეიძლება ადამიანის სულის ისე დანახვა, როგორც მისი სახისა, მაშინ ადვილად შენიშნავდით, რომ ჩივი სიცილი. თქვენი გაკიცხვის საგანი. გამოწვეულია არა სიხარულით. არამედ ის წარმომდგარია სულის სიღრმიდან. რომელიც მე აუარებელ მწუხარებათაგან თითქმის სრულიად დაჯარგე. ყოველ შემთხვევაში ეს სიცილი უფრო სამართლიანია, ვიდრე თქვენი ამყამინდელი. ნაგვიანევი და მეტად უადგილო წუწუნი და სამარცხვინო ცრემლები. სამწუხარო და სატირალი თქვენ გქონდათ მაშინ, როცა შესაძლებლობა გქონდა და მას ერთიანი შეთანხმებულობით არ ვიყენებდით მძვინვარე მტრის წინააღმდეგ: უნდა გეტერათ მაშინ, როცა ამ შეუთანხმებლობისა და შინაური მტრობის წყალობით მტერმა იარალი წაგვართვა, ფლოტი დაგვიწვა და საგარეო პოლიტიკის წარმოების უფლება ჩამოგვართვა. მაგრამ არც ერთ დიდ სახელმწიფოს არ შეუძლია მშვიდად იყოს: თუ არ ჰყავს მტერი ქვეყნის გარეთ, მაშინ

ზას პოულობს ქვეყნის შიგნით, თავის სახლში. ასევე მეტად მძლავრი სხეული, რომელსაც გარედან თავს არავინ ესხმის, ძირს მაინც ეცემა თავისი საკუთარი ძალ-ღონის სიმძიმისაგან. ასე მოგვიღოდა ჩვენც. ყველაზე უკიდურესი საჭიროების დროს, ჩვენ თვითონ ერთუროს ვებრძოდით; ეს იყო უდიდესი სამწუხარო და სატირალი მდგომარეობა; ახლა კი თქვენი ცრემლები იღვრება მეტად გვიან, უმნიშვნელო მწუხარებაზე.

ძლევამოსილი სარდალი და არმია ამაყად მიაბიჯებდნენ აპენინზე. ყველგან იტალიის ქალაქებისა და სოფლების მოსახლეობა დიდის ამბით ხვდებოდნენ რომისაკენ მიმავალ აფრიკის მოლაშქრეებს. უბრწყინვალესი გამარჯვება ძლევამოსილი სარდლის მანამდე არნახული ტრიუმფით დასრულდა. ოქროს ეტლში, რომელშიც შებმული იყო ოთხი თეთრი მერანი, იჭდა დაფნის ფოთლებით შემკული ოქროს გვირგვინოსანი სციპიონი. მის ეტლს მისდევდნენ აფრიკის მზით დამწვარი, გაკაყებული და უხვად დაჯილდოებული ლეგიონები; გათავისუფლებული რომაელები. წინ მიჰქონდათ აფრიკიდან წამოღებული მდიდარი ნადავლი, იარაღი, 123 000 გირვანქა ვერცხლი. ტრიუმფატორს წინ მიუძღოდნენ ძვირფასი სამხედრო ტყვეები; ყველაზე წინ მეფე სიფაქსი, რომელსაც ამის შემდეგ მალე სიკვდილი ელოდა.

დიდებული პროცესია კაპიტოლიუმში მივიდა. სციპიონმა მსხვერპლი შესწირა და ხალხის თვალუწვდენელი ზღვის წინ აღმართულ ტრიბუნაზე ავიდა. „გაუმარჯოს აფრიკელს!“, „გაუმარჯოს აფრიკელს!“ გრგვინავდა ხალხი. აფრიკის დამპყრობს, კართაგენის მძლეს, რომაელმა ხალხმა „აფრიკელი“ უწოდა. დიდხანს ყველას პირზე ეკრა პუბლიუს კორნელიუს სციპიონ აფრიკელის სახელი.

თავი მეოთხე

კართაგენი და რომი მეორე და მესამე პუნიკურ ომებს შორის

კართაგენი ომის დასრულების შემდეგ

კართაგენი მეორე პუნიკური ომიდან აფრიკის უბრალო, მეორეხარისხოვან და რომის მოხარკე ნახევრადკოლონიურ ქალაქად დაქვეითდა. რომი ფხიზლად ადევნებდა თვალს კართაგენში მომხდარ ყოველგვარ ცვლილებას, მის პოლიტიკოსთა ყოველ ნაბიჯს, რომელიც კი მიმართული იქნებოდა დაცემული ქვეყნის ძლიერების აღდგენისაკენ. კართაგენის მორჩილების მუდმივი უზრუნველყოფისათვის რომმა აღვირა ახსნა ნუმიდიის მეფე მასინისას, რომელიც ერთგული კერებრივით¹ დარაჯობდა მიწაზე გართხმულ ქალაქს. ძალიან ხშირად მასინისა შეიჭრებოდა კართაგენელთა საზღვრებში, აოხრებდა, სძარცვავდა მის სოფელ-ქალაქებს და სრულიად დაუსჯელად მდიდარი ნადავლით დატვირთული ბრუნდებოდა უკან. იგი მთელ რიგ ოლქებს, მანამდე კართაგენელთა ძალაუფლების ქვეშ მყოფთ, ითვისებდა და მათ ხარჯზე თავის სამფლობელოთა საზღვრებს ზრდიდა. კართაგენს უფლება არ ჰქონდა შებრძოლებოდა გათავხედებულ თავდამსხმელს. რომთან დადებული ზავი ხომ უკრძალავდა მას რომის ხელისუფლების ნებართვის გარეშე ომის წარმოებას ვისმესთან. თუნდაც ეს ომი სპართლიანი, თავდაცვითი ხასიათის ყოფილიყო. ამიტომ რომში ზედიზედ ცხადდებოდნენ კართაგენელი ელჩები და ხეყნა-მუდარით „თავს აბეზრებდნენ“ სენატს შეეწყნარებინათ დაღუპვის კარზე მისული მათი ქალაქი ან მიეცათ თავდაცვის უფლება, ან აელაგნათ თავგასული ნუმიდიელი. ცხადია, ეს საჩივრები ისევე რომის საგარეო პოლიტიკის წინააღმდეგ იყო მიმართული. რომი თვითონ აძლევდა ნუმიდიის მეფეს უფლებას გაეფართოვებინა თავისი სამფლობელოები და ვის ხარჯზე უნდა მომხდარიყო ეს, თუ არა ისევე კართაგენის გავლენის სფეროთა ხარჯზე. ამიტომ სენატი დამარცხებული მტრის სამართლიან თხოვნას ჩვეული დიპლომატიური ხრიკებით იშორებდა თავიდან. აფრიკაში „საქმის ადგილზე შესწავლის ზიზნით“

¹ კერბერი (ბერძნული მითოლოგიით) ქვესკნელის, საიქიოს კარებზე დარაჯად მდგარი ძალდი-ურჩხული.

ერთიმეორეს სცვლიდნენ რომაული კომისიები; „არკვევდნენ“, „სწავლობდნენ“, აკიანურებდნენ, ორკოფობდნენ, თაღლითობდნენ, მოწინააღმდეგეებს „შეარბებდნენ“ და არასოდეს არც ერთ მხარეს გადაჭრით არაფერს ეტყოდნენ; აფრიკიდან წავიდოდნენ და კართავენსაც ახალი თავდასხმებისა და აოხრების საშიშროების ქვეშ დასტოვებდნენ.

ბუნებრივი იყო, რომ უზომოდ დამცირებული და გასასრესად გამზადებული „ჰიაც ბოლოს გაიქნევდა“. კართავენში ჯერ კიდევ არ ჩამქრალიყო პატრიოტული გრძნობის ცეცხლი. ჯერ ისევ ოპტიმისტური თვალთ უტყეროდნენ მომავალს ერთ დროს ძლიერი სამხედრო პარტიის თანმიმდევარნი, რომელთაც სათავეში ჰანიბალ ბარკა ედგა. ჰანიბალი ჯერ კიდევ ცოცხლობდა და მისი სიცოცხლის მიზნად უცვლელადვე რჩებოდა რომის წინააღმდეგ შეურიგებელი ბრძოლა. „ჰანიბალის ფიცი“ ძალაში რჩებოდა. ის კარგად სედავდა სახალხო მასების აღშფოთებას, რაც გამოწვეული იყო ასეთ მძიმე დროს ოლიგარქიული ჩელისუფლების უმოქმედობითა და დაბნეულობით. საჭირო ხდებოდა მთელი სახელმწიფო აპარატისა და მმართველობის სისტემის გადაჭალასება დანგრეული ქვეყნის აღდგენისა და გაჯანსაღებისათვის. ამის შესაძლებლობა მით უფრო რეალური ჩანდა, როცა ამ დროს რომი იძულებული იყო ისევ კელტებთან ომით დაკავებულყო და აღმოსავლეთის ქვეყნებთან მოსალოდნელი დიდი ომების პერსპექტივის წინაშეც დამდგარიყო.

კართავენის ოლიგარქები გრძნობდნენ ჰანიბალის ავტორიტეტის სიძლიერეს, მისდამი ფართო საგარეო პოლიტიკის ვაშლის მომხრე სავაჭრო-ფინანსური პარტიებისა და საერთოდ სახალხო მასების მხარდაჭერას და სახელმწიფოს შართვის სადავეთა დაკარგვის საშიშროებას. ამიტომ მათ ზავის დადებისთანავე გააჩალეს ბრძოლა ჰანიბალთან. ცდილობდნენ მისი ავტორიტეტის დაკეშას: აღდგენდნენ „საქმეებს“; ბრალს სდებდნენ სახელმწიფო ღალატშიც, რომ მან კანესთან გამარჯვების შემდეგ, თითქოს, რომის აღების შესაძლებლობა განზრახ გაუშვა სელიდან; თითქოს მან იღუმალ მიოთვისა იტალიაში დაგროვილი ქონების დიდი ნაწილი და სხვა ბევრი ამდაგვარი.

მაგრამ მათ ვერ შესძლეს ჰანიბალის ავტორიტეტის შელახვა. პირიქით, მისმა პოლიტიკურმა მოწინააღმდეგეებმა თვითონ გაიტეხეს სახელი და საბოლოოდ დაქარაგეს მოსახლეობის უმრავლესობის ნდობა. ამას კი შედეგად ის მოჰყვა, რომ 195 წელს კართავენის სახალხო კრებამ ჰანიბალი უმაღლესი მაგისტრატის განუსაზღვრელი ძალაუფლებით აღკურვა.

დიდმა მხედართმთავარმა ახლა თავი გამოიჩინა როგორც საუკეთესო შინასახელმწიფოებრივმა მოღვაწემაც. იგი დაუყოვნებლივ შეუდგა

ქვეყნის ეკონომიური და პოლიტიკური სიძლიერის აღდგენისათვის ბრძოლას, ფინანსური და ადმინისტრაციული რეფორმების გატარებას. პირველ რიგში მან ლახვარი ჩასცა ოლიგარქთა მმართველობას, რომელიც მუდამ ხელს უშლიდა სახელმწიფოს ცენტრალიზებული ხელისუფლების შექმნას და მის ნიადაგზე მთელი მატერიალური შესაძლებლობების კონცენტრაციას საქვეყნო საქმეთა წარმატებით განხორციელებაში. ჰანიბალმა თავისი პოლიტიკური რეფორმით გააუქმა კონსერვატორ-ოლიგარქთა ძირითადი დასაყრდენი ბირთვი, ე. წ. ასოთხის საბჭო, რომელიც მანამდე კონტროლს უწევდა და მთელი სისასტიკით ცხოვრებაში ატარებდა იგივე ოლიგარქიული სენატისაგან დადგენილ კანონებს. ფლობდა ქვეყნის მატერიალურ რესურსებს, თვითნებურად განაგებდა სამოქალაქო და სამოსამართლო საქმეებს. ჰანიბალმა მეტი უფლებით, აქტიურობითა და ინიციატივით აღკვეთა სახალხო კრება. მისი მხარდაჭერით გამოცა კანონი, რომლითაც ერთსა და იმავე კაცს არ შეეძლო ორ წელს ზედიზედ ყოფილიყო მოსამართლედ. შემდეგ მან ხელი მოკვიდა სახელმწიფოს ეკონომიური მდგომარეობის მოწესრიგებას. ფინანსური რეფორმებით ზღვარი დაუდო უმაღლეს მოხელეთაგან და თავგასულ დიდკაცთაგან სახელმწიფო ხაზინის გაქურდვას. განიავებას და უყაირათობას. დაწესდა მკაცრი კონტროლი სახელმწიფო ბიუჯეტის შემოსავალ-გასავალზე. მოწესრიგებულ იქნა საგადასახადო სისტემა. ყოველგვარი გადასახადი, სავაჭრო ბაჟი, მიწის ნაკვეთისა თუ სხვა მრავალი საწარმო-სახელოსნოს გაძოსალები თავს იყრიდა სახელმწიფო ხაზინაში. ქვეყანა ნელ-ნელა ფეხს იდგამდა, ეკონომიურად და მორალურად ძლიერდებოდა. კართაგენის ქუჩებში აღარ ისმოდა მოთქმა-გოდება. რასაც მანამდე რომისადმი ყოველწლიურად დაწესებული კონტრიბუციის გადახდა იწვევდა. თითქოს ყველაფერი კარგად მიდიოდა.

მაგრამ ოლიგარქიას არ ეძინა. მისი წარმომადგენლები სისტემატურად აგზავნიდნენ წერილებს რომში და ატყობინებდნენ მას, რომ ჰანიბალი რომის წინააღმდეგ ახალ ომს ამზადებს; იგი, როგორც ვარეული მხეცის ზორჯულება არ შეიძლება, ისე არ მოიშლის რომისადმი უკიდურესი მძულვარებით აღსავსე მტრობას; ის ურთიერთობას აბამს სირიის მეფე ანტიოქე III-თან, უგზავნის ელჩებს ან თვითონ საიდუმლოდ ლებულობს მის დესპანებს და ორავენი ერთად აღგენენ რომის დამხობის ახალ გეგმებს. ჰანიბალი აღშფოთებულია კართაგენელთა სასოწარკვეთილი დაცემულობითა და რუტინით. ამიტომ ის აშკარად გაიძანის, რომ მხოლოდ ახალ ძლიერ საბრძოლო ყიჟინასა და იარაღის უღარუნს შეუძლია კართაგენის გამოღვიძება.

რომაელებმა დროზე მიაქციეს ყურადღება აღნიშნულ ამბებს. გა-

დაწყვეტილ იქნა კართაგენს წართმეოდა მისი აღორძინებისათვის თავ-
გამოდებული ბრძოლისა და შრომის მოთავე. ამის გასამართლებელ
საბაბს და საბუთებს თვით კართაგენი იძლეოდა.

194 წელს კართაგენში ჩავიდა რომის კომისია თითქოსდა კართაგენ-
სა და ნუმიდიას შორის ატეხილი უთანხმოების მოსაწესრიგებლად. ჰა-
ნიბალს არ გასჭირვებია შეეტყო რა იყო რომაელთა ჩამოსვლის ნამ-
დვილი მიზანი; იგი მიხვდა, რომ ტყვის ბორკილებით უნდა შესულიყო
იმ საქმლველ ქალაქში, სადაც ძლევამოსილების ტრიუმფით შესვლა
ვერ მოახერხა. ამიტომ მან სასწრაფოდ მოიფიქრა გაქცევის გეგმა.

ექვი რომ არავის შეჰპარვოდა, ჰანიბალი მთელი დღის განმავლობა-
ში სამსახურებრივ ტანსაცმელში გამოწყობილი დადიოდა ქალაქის ქუ-
ჩებში და ჩვეულებრივი გულისყურითა და სიმშვიდით ხელმძღვანე-
ლობდა ამა თუ იმ საზოგადოებრივ საქმეთა წარმოებას. ხოლო რო-
გორც კი დადამდა, ორი მსახურის თანხლებით გავიდა კართაგენის კედ-
ლებიდან, მოახტა ცხენს და გაქუსლა თავისი კერძო მამულისაკენ, რო-
მელიც მდებარეობდა კართაგენიდან და ტუნესიდან სამხრეთისაკენ,
ზღვის სანაპიროზე, ქ, ტ ა პ ს ი ს მახლობლად. აქ ჩაჯდა გემში, რომელიც
მას საჭიროებისათვის მუდამ მზად ჰყავდა და სასწრაფოდ გაეშურა
აღმოსავლეთისაკენ. დილით ის მიაღვა კართაგენის ერთ-ერთ ჰატარა
კუნძულს კ ე რ კ ი ნ ა ს, მასზე გადავიდა მცირე ხნის შესვენებისა და
სამგზავრო თადარიგისათვის.

კუნძულის მცხოვრებნი დიდს ამბით შეხვდნენ სარდალსა და
გმირს, რომელმაც აუწყა თავისი მგზავრობის გეზი: კართაგენი მას
აგზავნის თავის მეტროპოლიაში, ფინიკიის დიდ ქალაქ ტიროსში. მაგ-
რამ ჰანიბალს აფიქრებდა აღმოსავლეთიდან აფრიკისაკენ მიმავალი და-
ამჯერად კერკინის ყურესთან შეჩერებული კართაგენელი სავაჭრო გე-
მი, რომელსაც შეეძლო კართაგენში ჩაეტანა კუნძულზე ჰანიბალის
ყოფნის ამბავი. ამიტომ მან ზღვის პირზე გამართა დიდი მსხვერპლშე-
წირულება და ნადიმი, რომელზეც კართაგენელთა გემის ეკიპაჟიც
ზიიპატიეა. ზაფხულის სიცხიანი დღე იყო და ჰანიბალმა თითქოს იმ
მიზნით, რომ მონადიმეები მზეს არ შეეწუხებინა, კართაგენელებს მათ
გეზზე იალქნები და ბაგირები აახსნევინა და კარვები გამართა. ღრუობა
შულაღმემდე გაგრძელდა. ჰანიბალმა შეუმჩნევლად დასტოვა უგრძობ-
ლად მთვრალი თანამესუფრენი, ჩაჯდა თავის ხოშაღლში და ზღვის
უსაზღვრო სივრცეში გაუჩინარდა.

მეორე დღეს ნაბახუსევმა კართაგენელმა ვაჭრებმა ძალიან გვიან
გამოიღვიძეს, დათენთილები შეუდგნენ კარვების აყრას და გემზე იალ-
ქნების გაბმას. ამას კარგა დიდი დრო დასჭირდა. ჰანიბალის გემი კო-
უკვე შორს მიაპობდა ზღვის ტალღებს, მიჰქროდა ტიროსისაკენ.

კართაგენში გვიან შეიტყვეს ჰანიბალის გაქცევის ამბავი. ეს ზაშინ, როცა გადაწყდა რომისადმი მისი გადაცემა და ამ გადაწყვეტილების შესასრულებლად დაუწყეს მას ძებნა. არავინ იცოდა სად უნდა ეძებნათ ის. ზოგი იმასაც კი ფიქრობდა, რომ თვით რომაელებმა საიდუმლოდ მოჰკლესო. სწორედ ამ დროს კართაგენის პორტში შევიდა კუნძულ კერკინიდან ჩამოსული გემი. ყველაფერი ცხადი შეიქნა, მაგრამ უკვე გვიან იყო. გაცოფებულმა რომაელებმა კართაგენის სენატს კატეგორიულად მოსთხოვეს სასტიკად დაესაჯათ ჰანიბალი, რომელიც მანამ არ მოისვენებეს, სანამ მთელ მსოფლიოს არ აამხედრებს; რომის წინააღმდეგ საომრად. ჰანიბალის გაქცევით განაწყენებულმა, მაგრამ მისი გადაკარგვით წელში გამართულმა ოლიგარქიულმა ხელისუფლებამ სიამოვნებით მიიღო რომელი ელჩების ბრძანება: ჰანიბალი სახელმწიფოს მტრად და სამშობლოდან გაძევებულად იქნა გამოცხადებული. მისი სახლი ნანგრევებად აქციეს, ხოლო დანარჩენ ქონებას კონფისკაცია უყვეს.

ამასობაში ჰანიბალმა მშვიდობიანად მიაღწია ფინიკიის სანაპიროებს. ქ. ტიროსის მცხოვრებლები ფეხზე დადგნენ, დიდი ზეიმით შეხვდნენ სახელოვან ნაშვირსა და ნათესავს. ტიროსიდან ჰანიბალი გაეშურა მცირე აზიისაკენ. ქ. ეფესოში, სადაც იმ დროს იმყოფებოდა სირიის მეფე ანტიოქე III.

რომი ისევ გაღვიძდა და ახსანაწილის წინააღმდეგ

რომსა და იტალიას კართაგენზე გამარჯვება მეტად ძვირად დაუჯდათ. მრავალწლიანმა გამანადგურებელმა ომებმა ნანგრევებითა და ნაცარტუტით მოჰფინა მთელი აპენინის ნახევარკუნძული. მრავალი ქალაქი და სოფელი სამუდამოდ აღიგავა პირისაგან მიწისა. იტალიის მეურნეობა მოიშალა და გაპარტახდა. ურიცხვი ადამიანის, სიცოცხლე შეიწირა ფინიკურმა მახვილმა, შიშობილმა, გაჰირვებამ. ეპიდემიამ. ომამდე (220 წ.) არსებული 270 000 რომელი მოქალაქისაგან ომის დამთავრებას (201 წ.) 200 000 რომელი მოესწრო. გარდა ამისა, 300 000-მდე იტალიელმა შესწირა სიცოცხლე რომის მსოფლიო ჰეგემონობისათვის ბრძოლის საქმეს. განსაკუთრებით დაზარალდა სამხრეთ იტალიის ნაყოფიერი ოლქები, სადაც კანეს ბრძოლიდან ცამეტი წლის განმავლობაში შეუწყვეტილ მძინვარებად სასტიკი ბრძოლები. იტალიის მშვენიერ ველებს და დასახლებულ პუნქტებს ერთნაირად სპობდნენ შეუბრალებელი ფინიკელები და „მოკავშირეთა“ ლალატით გამძვინვარებული რომაელები. მეტად ძნელი ხდებოდა ომში მიღებული ჭრილობების მოშუშება.

ამიტომაც რომისათვის შედარებით ძნელი და მძიმე უნდა ყოფილიყო ის ახალი ომები, რომლის საჭიროებაც კართაგენთან ზავის დადების შემდეგ გარდაუვალი შეიქნა.

მეორე პუნიკური ომის დასასრულს რომისათვის სრულიად ნათელი იყო: 1) მართალია, კართაგენი დამარცხდა, მაგრამ სანამ ცოცხალია „აფრიკის ლომი“ (ჰანიბალი) და სანამ კართაგენი ნანგრევებად არ ქცეულა, ხოლო მთელი მისი „წყევლი“ მოსახლეობა იტალიის ზეურნეობაში მონებად არ დაფანტულა ან მთლიანად არ ამოყლეს, აფრიკიდან რომის წინააღმდეგ ბრძოლის მომწოდებელი ყოფიანა ყოველთვის მოსალოდნელია; 2) მსოფლიოში გაბატონებისათვის რომს უცილობელი ომების ჩატარება ელის აღმოსავლეთის ძლიერ სახელმწიფოებთან, პირველ რიგში მაკედონიასთან, რომელიც დახმარების ხელს უწყვედის ყველას, ვინც რომზე იარაღს აღმართავს, შემდეგ სირიის წინააღმდეგ, სადაც ახლა თავს აფარებს რომის დასაძახად ახალ საბრძოლო გეგმებში ჩაფლული ჰანიბალი; 3) საჭირო იყო, რომ რომს გადამჭრელი ზომები მიეღო დასავლეთით ესპანური ტომებისა და ჩრდილოეთით კელტური სამყაროს მიმართ. ყველაზე პირველად რომს სწორედ ეს უკანასკნელი ამოცანა უნდა გადაეჭრა: კელტების განადგურებისა და ჩრდილოეთ იტალიის საბოლოოდ დაპყრობის საკითხი.

201 წელს კართაგენთან ზავის რატიფიცირებისთანავე გაჩაღდა ბრძოლები ჩრდილოეთ იტალიაში გალებსა და რომაელებს შორის.

197 წელს მდ. პადუსზე რომაელებმა დაამარცხეს ინსუბრები.

193 წელს ქ. მუტინასთან, ბონონიის ჩრდილო-აღმოსავლეთით, მოხდა დიდი ბრძოლა რომაელებსა და ბოიებს შორის. ბოიები დიდხანს არაჩვეულებრივი სიმამაცითა და თავგანწირულობით იბრძოდნენ. თითქმის არც ერთ მათგანს არ სურდა ბრძოლის ველიდან ცოცხლად გასვლა. რომაელებმა დიდი მსხვერპლის გაღებით მიაღწიეს გამარჯვებას.

II საუკუნის 70-იანი წლებისათვის ლიგურიისა და ვენეციის დამორჩილების შემდეგ რომმა საბოლოოდ დაიმკვიდრა ჩრდილოეთ იტალია და ამგვარად თავის სამფლობელოთა ჩრდილოეთი საზღვარი საბოლოოდ მიიტანა ალპების მთებამდე.

იმავე წლებში რომაელებმა სასტიკად დალაშქრეს კუნძულები კორსიკა და სარდინია, სადაც ადგილობრივმა მცხოვრებლებმა უკანასკნელად სცადეს კისრიდან გადაეგდოთ რომაული ბატონობის მძიმე უღელი. სარდალმა ტიბერიუს გრაკუსმა 80 000 სარდინიელი ამოელიტა ან მონებად აქცია. მონათა სიმრავლისაგან მათი ფასი იზღენად დაეცა, რომ ისტორიას შერჩა გამოთქმა: „იაფია, როგორც სარდი“.

ესპანეთში კართაგენელთა განდევნის შემდეგ რომაელებმა ორი დიდი პროვინცია შექმნეს: პირველი, ე. წ. შორეული ესპანეთი.

(Hispania ulterior), რომელშიც შედიოდა დღევანდელი ანდალუზია, გრენადა, მურსია და ვალენსია, ხოლო მეორე, ე. წ. ახლო ესპანეთი (Hispania citerior), რომელიც მოიცავდა ნახევარკუნძულის აღმოსავლეთ ტერიტორიებს, მდ. იბერის (ებრო) მახლობელ ოლქებს, დღევანდელ კატალონიასა და არაგონიას.

197 წელს სახალხო ომების, გერილიების ცეცხლმა მოიცვა ორივე ესპანური პროვინცია. რომაელთა არმიები ზედიზედ მარცხდებოდნენ. შორეული ესპანეთის მმართველი პრეტორი ველარ უმკლავდებოდა ინსურვიგენტების გააფთრებულ თავდასხმებს, ხოლო ახლობელ ესპანეთში პრეტორის არმია მთლიანად განადგურდა, თვით რომაელი სარდალიც ბრძოლაში დაიღუპა.

195 წელს ესპანეთში ექსტრაორდინალური ღონისძიებების გასატარებლად დიდი არმიით გაიგზავნა კონსული მარკუს პორციუს კატონი.

კატონი იმ რიგის რომაელ მოღვაწეთა რიცხვს ეკუთვნოდა, რომლებიც სახელმწიფოს სადავეებისაკენ თავიანთი პირადი ნიჭით, წინდახედულებითა და შორსმჭვრეტელობით იკაფავდნენ გზას და არა არისტოკრატიულ-შთამომავლობითი პრივილეგიებით. რომში ამ გზით დაწინაურებულ პირს „ვიგიინდარას“, „ახალ ადამიანს“ (homo novus) ეძახდნენ. ასეთივე იყო კატონიც, პირციუსების პლებეური გვარის წარმომადგენელი. მას დაწერილი ჰქონდა სამეურნეო ტრაქტატებიც. კატონი ებრძოდა რომში შემოჭრილ ფუფუნებით ცხოვრებას და თავგამოდებით იცავდა ძველი პატრიარქალური ცხოვრების უბრალოებასა და სიმარტივეს; აიღეალებდა დროგადასულ რომაულ ატრიუმს, რომლის ჰერზეც „ობობა თავის ქსელს ქსოვდა“; ბრძოლას უცხადებდა ყველას, ვინც კი ოდნავ შეეცდებოდა კონსერვატიულ-რესპუბლიკური კონსტიტუციის დარღვევას. ეს განსაკუთრებით მას შემდეგ, რაც მეორე პუნიკური ომის პერიოდში თანდათან „მოდაში შემოდოდა“ ცალკეულ პიროვნებათა საგანგებო უფლებებით აღჭურვა და მათი „ტირანული თავგასულობითა“ და დამოუკიდებლობით ოლიგარქიული კონსტიტუციისადმი ანგარიშგაუწევლობა. გარდა ამისა, კატონმა ადრევე ისახელა თავი ჰანიბალის თანამოლაშქრეთა წინააღმდეგ ბრძოლებში. ჯერ კიდევ სრულიად ახალგაზრდა ამაყად აჩვენებდა ყველას ჰრილობებისაგან დაფლეთილ მკერდს.

თი ამ კაცმა 195 წელს მიიღწია კონსულობას და გაემგზავრა ესპანეთში. აქ კატონმა დიდ სისხლისმღვრელ ბრძოლაში დიდის გაჭირვებით მოიპოვა გამარჯვება.

მან ბრძანება დაუგზავნა ყველა ქალაქს ერთ დღეს დაენგრიათ თავიანთი კედლები და სიმაგრეები. ყველა ქალაქს ცალკეულად ეგონა,

რომ ბრძანება მხოლოდ მას ეხებოდა. ყველგან, სადაც ურჩობა სცადეს, რომაული არმია გამოჩნდა. ასე, ერთ დღეს ესპანეთში ოთხასამდე ქალაქი დაინგრა. კატონი იკვებინდა: ესპანეთში იმდენი დღეც არ გამიტარებია, რამდენიც ქალაქი დამინგრევიყო. მან თითქმის ჩააქრო აჯანყების ცეცხლი. მაგრამ როგორც კი გავრცელდა ცრუ ხმები კონსულის წასვლის შესახებ, ისევ წამოიშალნენ აჯანყებულები. კატონმა ზეორედ დაამარცხა ისინი; ესპანეთში სისხლის ღვრა დროებით შეწყდა. სამი დღე გრძელდებოდა კატონის ტრიუმფი რომში. ესპანური ოქრო-ვერცხლით აივსო რომის საგანძურები.

მეორე ანკიდონური ომი

როცა რომაულმა იარაღმა ილირიიდან ატლანტიის ოკეანემდე და ალპებიდან საპარის უდაბნომდე ყველა ქვეყანა დაიმორჩილა, რომაულმა დიპლომატიამ საბოლოოდ გასწმინდა ნიადაგი აღმოსავლეთის სახელმწიფოების წინააღმდეგ ომების გაჩაღებისათვის. რომი უკვე ერთ-ერთი უძლიერესი მსოფლიო სახელმწიფო იყო. მას აღარ აკმაყოფილებდა ხმელთაშუა ზღვის აუზის მხოლოდ დასავლეთი ნაწილი. მისი მთავარი მიზანი, ნამდვილად მსოფლიო სახელმწიფოდ გახდომა, მხოლოდ მაშინ ჩაითვლებოდა განხორციელებულად, როცა ის აღმოსავლეთის ქვეყნებსაც დაიმორჩილებდა.

პირველი რომაული საექსპანსიო გზა საბერძნეთის გავლით მაკედონისაკენ მიემართებოდა. საჭირო იყო ომის დაწყების საბაბი.

204 წელს გარდაიცვალა ეგვიპტის მეფე პტოლემე IV ფილიპატორი. სასახლის კამარბილია დიდხანს საიდუმლოდ ინახავდა მეფის გვამს. მისი სიკვდილი მხოლოდ 203 წელს შეიქნა ცნობილი. ეგვიპტის ტახტზე ოთხი წლის პტოლემე V ეპიფანე დასვეს. ამით ისარგებლეს ფილიპე V მაკედონელმა და სელევკიდური სირიის მეფე ანტიოქე III-მ, საიდუმლოდ შეჰკრეს კავშირი და ეგვიპტის სამფლობელოთა დატაცებას შეუდგნენ. ანტიოქე III-მ დაამარცხა ეგვიპტელთა ჯარები, ხელში ჩაიგდო მთელი ფინიკია და პალესტინა.

ფილიპე V დაიძრა სამხრეთისაკენ და ხელი მიჰყო ეგვიპტის სამფლობელოთა ხელში ჩაგდებას ეგეოსის ზღვასა და მცირე აზიის სამხრეთ სანაპიროებზე. იგი, აგრეთვე, ცდილობდა მთელი საბერძნეთის, პირველ რიგში ათენის, დამორჩილებას და შავი და ეგეოსის ზღვების შემაერთებელ სრუტეთა ხელში ჩაგდებას.

მაკედონიის მეფის აგრესიულმა ღონისძიებებმა შეაშფოთა და ფეხზე დააყენა ეგვიპტის, როდოსისა და პერგამოსის სახელმწიფოები. ესენი აღმოსავლეთში ვერ ხელდავდნენ ისეთ ძალას, რომლისთვისაც უნდა

ეთხოვით დახმარება მაკედონელი „ურჩხულის“ წინააღმდეგ საბრძოლველად. ამიტომ მათ მიმართეს რომს. 201 წელს რომში გამოცხადდნენ ეგვიპტის, როდოსის და პერგამოსის ელჩები და დახმარება ითხოვეს.

სულ მალე ფილიპე მაკედონელის წინაშე წარსდგნენ რომაელი დესპანები და კატეგორიულად მოსთხოვეს შეეწყვიტა საომარი მოქმედება ეგვიპტის, ათენის, პერგამოსისა და როდოსის წინააღმდეგ; დაებრუნებინა მათთვის ყველა წართმეული მიწა და ყოველგვარი სადავო საკითხები გადასცემოდა მესამე მხარეს, ე. ი. რომს.

მაგრამ მაკედონელმა გვირგვინოსანმაც კატეგორიულად უარჰყო რომაელთა მოთხოვნა. ამას მოჰყვა ომის გამოცხადებაც. ასე დაიწყო ე. წ. მეორე მაკედონური ომი (200—197).

ომის დაწყების პირველ ორ წელს ფილიპეს წარმატებები ჰქონდა მძიმე პუნიკური ომებიდან ახლახან გამოსულ მოწინააღმდეგესთან, რომელიც იმავდროულად ბრძოლებს აწარმოებდა გალებთან.



ფლამინიუსი.

ორი წლის განმავლობაში ბალკანეთის ნახევარკუნძულზე რომაელთა სასარგებლოდ საქმე ერთი ნაბიჯითაც არ წაწეულა წინ. მათ მხოლოდ იგივე პოზიციები ეჭირათ, რაც ბრძოლის დაწყებისას ჰქონდათ. მაკედონიის მეფე კი ახალი ძალებით გადამწყვეტი შეტევებისათვის ემზადებოდა. 198 წლის დასაწყისში ის შეიჭრა რომაელთა ძალაუფლების ქვეშ მყოფი ილირიის ჩრდილოეთ ოლქებში. მდგომარეობა მეტად სერიოზული შეიქნა. საჭირო იყო განსაკუთრებული ღონისძიებების მიღება.


198 წელს ბალკანეთში ახალი არმია გადასხა კონსულმა ტიტე ქვინციუს ფლამინინუსმა. ეს იყო 30 წლის ენერგიული, ნიჭიერი სარდალი და მოხერხებული დიპლომატი. მას ყველა იცნობდა როგორც სახელოვანი მარცელუსის სკოლაგავილ მამაც მებრძოლსა და სციპიონის მსგავსად ბერძნული კულტურის დიდ თაყვანისმცემელს — „ჰელინოფილს“.

197 წელი რომაელთა წარმატებებით დაიწყო. ფლამინიუსის დიპლომატიამ სწრაფად მიიმხრო სპარტის ტირანი ნაბისი და მაკედონელთა ადრინდელი მოკავშირე ბეოტია. ამგვარად, რომაელებმა სამხრეთ და

ჩრდილოეთ საბერძნეთში ახალი ძლიერი პლაცდარმები შექმნეს მაკედონისაკენ სალაშქროდ.

ფილიპე გამალებით ემზადებოდა. მან არმიაში გაიწვია სრულიად ახალგაზრდა, უწვერულვაშო კაბუკები და ღრმადმოხუცებულები. სულ 26 000 ზეომრისაგან შემდგარი არმიით ჩავიდა თესალიაში. აქვე დააჯლოებით ამდენივე ძალებით გამოცხადდა ფლამინინუსი.

მოწინააღმდეგეებს ერთიმეორისაგან ჰყოფდა მაღალი ბორცვები, რომელთაც „კინოსკეფალე“, ე. ი. „ძალის თავები“ ეწოდებოდათ. ეს ბრძოლა (197 წ.) კინოსკეფალეს ბრძოლის სახელით შევიდა ისტორიაში.



ბრძოლა კინოსკეფალესთან.

წვიმიანი და ნისლიანი დილა გათენდა. მოწინააღმდეგეთა ორივე მხარეს ავანგარდული ნაწილები გამოეყვნენ და მალლობის დასაკავებლად გაემართნენ. აქ უეცრად შეეჩხენ ერთიმეორეს; ბრძოლაც გაჩაღდა. მათ თანდათან ემატებოდნენ ახალ-ახალი ძალები. ფილიპეს იმ დღეს გენერალური ბრძოლა არ სურდა, მაგრამ როდესაც ფლამინინუსმა მალლობებისაკენ მთელი არმია დასძრა, თვითონაც იძულებული შეიქნა მთელი ძალებით გამოსულიყო. პირველ ხანებში მაკედონელთა მარჯვენა ფლანგმა, რომელსაც თვით მეფე სარდლობდა, ძლიერი

დარტყმებით არავდარია და უკუაქცია ფლამინინუსის მარცხენა ფლანგი. მაგრამ მაკედონელთა არმიის ზარცხენა ფრთა, რომელიც ბრძოლაში გვიან, არაორგანიზებულად ჩაება, პირველი შეტაკებისთანავე დამარცხდა. რომაელები დაედევნენ გაქცეულთ და ზურგში მოექცნენ ფილიპეს სარდლობით მედგრად მოიერიშე მტრის ნაწილებს. იმავდროულად ფლამინინუსმა ბრძოლაში ჩააბა სპილოებიც. მაკედონელებმა დაჰკარგეს გამარჯვების იმედი და გაქცევა დაიწყეს. ფილიპემ ტემპის ველს მიამუშა. მან მოკლულთა სახით 8 000 მეომარი დაჰკარგა; 5 000 მაკედონელი ტყვედ ჩავარდა. რომაელებმა 7 000 კაცი დაჰკარგეს. ✓

კინოსკეფალეს ბრძოლაში მარცხმა ფილიპე აიძულა ხელი აეღო რომთან ომის გაგრძელებაზე და ფლამინინუსს ზავი შესთავაზა. ფლამინინუსი დათანხმდა.

ზავის პირობები ასეთი იყო: ფილიპე ხელს იღებდა ყველა დაპყრობილ ტერიტორიაზე ევროპასა თუ აზიაში და რჩებოდა მხოლოდ მაკედონიის საზღვრებში; ის რომს გადასცემდა მთელს საზღვაო ფლოტს, გარდა ექვსი ხოზალდისა; უნდა მოეხდინა სახმელეთო არმიის დემობილიზაცია, გარდა 5 000 მეომრისა; სამხედრო კონტრიბუციის სახით უნდა გადაეხადა 1 000 ტალანტი (დაახლოებით 2 000 000 მან. ოქროთი), აქედან ნახევარი — დაუყოვნებლივ, ნახევარიც — თანაბარი დაყოფით ათი წლის განმავლობაში; გარდა ამისა, რომის ნებართვის გარეშე ფილიპეს ეკრძალებოდა ყოველგვარი ომის გამოცხადება და წარმოება, რომელ ქვეყანასთანაც არ უნდა ყოფილიყო ეს. ამგვარად, რომაელებმა მაკედონია ჩააყენეს დაახლოებით იმავე პირობებში, რა მდგომარეობაშიაც აღმოჩნდა კართაგენი მეორე პუნიკური ომის შემდეგ.

ახლა დაისვა საკითხი საბერძნეთის შესახებ. რა პირობებში უნდა ჩამდგარიყო საბერძნეთი მაკედონელთა განდევნის შემდეგ? რომისათვის დიდ სიძნელეს არ წარმოადგენდა, რომ საბერძნეთი უბრალო ქვეშევრდომ პროვინციად გამოეცხადებინა. მაგრამ ფლამინინუსს, რომელიც მაკედონელთა წინააღმდეგ საბერძნეთის განთავისუფლების დროშით იბრძოდა და თვითონაც, უაღრესი პატივმოყვარეობით შეპყრობილი „ჰელინოფილი“, ამ ლოზუნგის განხორციელებაზე ოცნებობდა, კარგად ესმოდა, თუ რა უნდა მოჰყოლოდა საბერძნეთის ხელაღებით დამონებას. ფლამინინუსი სრული გამოხატულება იყო რომის დიპლომატიის ნაცადი პრინციპებისა. საბერძნეთში შეჭრა რომის აღმოსავლური პოლიტიკის პირველი ნაბიჯი იყო და მაშინვე უხეში ძალადობით ჰელინური კულტურის აკვანთა ფეხქვეშ გათელვა სამუდამოდ დასცემდა რომის როგორც „განმათავისუფლებლის“ ავტორიტეტს. ამიტომ მოხერხებულ დიპლომატს ჩვეულებრივი რომაულ-დიპლომატიური კომედია უნდა გაეთამაშა და მით მოედუნებინა თავისუფლებისმოყვარე

ბერძნების სიფხიზლე; ამავე გზით აემადლებინა რომის ავტორიტეტი აღმოსავლეთის ხალხების თვალში, რომისა, როგორც „მფარველისა ჩაგრულთა, შეურაცხყოფილთა და დამონებულთა“. ეს ახლა საჭირო იყო კიდეც უფრო თუნდაც იმიტომ, რომ ანტიოქე III-მ უკვე გადასხა ჯარები თრაკიაში, ევროპაში. იგრძნობოდა, რომ ის ანგარიშს არ უწევდა რომის პრეტენზიებს აღმოსავლეთის მიმართ. და მისთვის მეტად ხელსაყრელი იქნებოდა, თუ საბერძნეთში რომისადმი მტრულად განწყობილი პოზიციები დახვდებოდა; ასეთ პოზიციებს კი სწორედ საბერძნეთის დამოკიდებულების სრული მოსპობა გამოიწვევდა.

ამიტომ გადაწყდა, რომ გამოცხადებულიყო საბერძნეთის „განთავისუფლება“. რომის კომისიის წევრები ძირითადად იეთანხმებოდნენ ფლამინიუსს. მხოლოდ მოითხოვდნენ, რომ რომაული გარნიზონები დარჩენილიყვნენ კორინთში, ქალკიდაში და დემეტრიადაში, ე. ი. იმ ქალაქებში, რომელთაც ფილიპე მაკედონელი „საბერძნეთის ბორკილებს“ უწოდებდა. მაგრამ ეტოლიელები ფლამინიუსისაგან მოითხოვდნენ არ დაეშვა ასეთი რამ. „ნუთუ ბერძნებს, — ამბობდნენ ისინი, — შეუძლიათ ატარონ ბორკილები, თუგინდ უფრო ახალი და ლამაზი, მაგრამ უფრო მძიმე, ვიდრე ძველი. მაკედონური; ეს ნიშნავს იმას, რომ ბერძნებს ფეხებიდან ახნათ ბორკილები. მაგრამ დაადოთ ისინი კისერზე“.

ფლამინიუსმა კატეგორიულად უარჰყო დეცემვირთა წინადადება და საქვეყნოდ გამოაცხადა საბერძნეთის თავისუფლება.

ეს მოხდა 196 წელს კო რ ი ნ თ ო ს ყ ე ლ ზ ე (ისტომოსი), სადაც იმ დღეს ე. წ. ისტომოს ასპარეზობანი მიმდინარეობდა და საბერძნეთის ყველა კუთხიდან უამრავი ხალხი იყო შეკრებილი. ფლამინიუსის ბრძანებით გაისმა საყვირების ხმა. შეწყდა ასპარეზობა; ჩამოვარდა სიჩუმე. რომაელი ჰეროლდი აცხადებდა: რომის სენატი და სარდალი ტიტე ჭვინკიუს ფლამინიუსი. მაკედონელები და მათი მეფის ფილიპეს დამარცხების შემდეგ, უცხადებენ თავისუფლებას ყველა ბერძენს, მთელს მათ ქვეყანას; ამიერიდან ისინი თავისუფალი არიან უცხოელთა გარნიზონებისაგან; სრული თავისუფლება ენიჭებათ გადასახადთა ნებაყოფლობითი გადახდისა და საკუთარი მართვა-გამგეობისა, ეძლევათ ავტონომია.

დიდი ხანი გავიდა. რაც საბერძნეთმა დამოუკიდებლობა დაჰკარგა (145 წელი გასულიყო მას შემდეგ, რაც მაკედონიამ დაიპყრო იგი). თავისუფლებისმოყვარე ხალხი აღარც კი მოელოდა რომაელებისაგან ასეთ „წყალობას“. ამიტომაც იყო, რომ ხალხმა მოითხოვა ჰეროლდს კვლავ გაემეორებინა თავისი ნათქვამი. როდესაც ეს შესრულდა, იფეთქა საყოველთაო სიხარულისა და აღტაცების ცეცხლმა. ხალხი სიხარულით ეხვეოდა ფლამინიუსს, ართმევდნენ ხელს და გულში იკრავდნენ.

„ვანმათავისუფლებელი“ ძლივს გადაურჩა აღტაცებული ბრბოსაგან გასრესას. ვერავინ გრძნობდა, რომ მეტად ხანმოკლე იქნებოდა რომისა და საბერძნეთის მეგობრობის „თაფლის თვე“.

სირიული ომი

რომაელები საბერძნეთიდან ჯარების გაყვანას ზაინც არ ჩქარობდნენ. ამის ერთ-ერთი დიდი მიზეზი იყო ანტიოქე III-ის მიერ ჯარების გადასსპა ვეროპის კონტინენტზე.

ანტიოქე III სირიის დიდი სახელმწიფოს მმართველი დინასტიის — სელევკიდების ერთ-ერთი თვალსაჩინო წარმომადგენელი იყო. მან ჯერ აღმოსავლური ლაშქრობებით გაითქვა სახელი და „დიდის“ ტიტულიც კი მოიპოვა. მისი სიძლიერე განსაკუთრებით აღიარებულ იქნა მას შემდეგ, რა ქ. რაფიუმთან (სამხრეთ პალესტინაში) სასტიკად დაამარცხა ეგვიპტელთა ჯარები. ეს მოხდა იმ წელს, როცა დასავლეთიდან აღმოსავლეთში ჩამოვიდა ტრაზიმენის ტბასთან რომაელთა დიდი მარცხის ამბავი.

ამის შემდეგ ანტიოქე ნაკლებ ანგარიშს უწევდა რომის სამხედრო-პოლიტიკურ ძლიერებას და მუდამ მტრული თვალით უცქერდა ეგვიპტეზე რომაულ მფარველობას. ეგვიპტისა და მცირე აზიის წვრილ სახელმწიფოთა სამფლობელოებზე მისი თავდასხმები ვერ შეაჩერა ვერც პუნიკური ომიდან რომის ძლიერდამოსილად გამოსვლამ და ვერც ამ უკანასკნელის წარმატებებმა საბერძნეთში.

198 წელს ანტიოქემ ისევ დაამარცხა ეგვიპტელთა ჯარები და თავის სამფლობელოთა საზღვარი სუეცის ყელამდე მიიტანა. მცირეწლოვანი ეგვიპტელი მეფის პტოლემეიოს V-ის რეგენტები, ეგვიპტეში სირიელთა შემოჭრის შიშით შეპყრობილნი, იძულებული გახდნენ ეცნოთ ანტიოქეს ბატონობა მთელს სირია-ფინიკიაზე და პალესტინაზე და ზავი დასდეს მასთან. კავშირისა და მშვიდობიანობის შენარჩუნების მიზნით შვიდი წლის ეგვიპტელ მეფეს დაანიშნინეს ანტიოქე III-ის ქალიშვილი კლეოპატრა.

ანტიოქე, ეგვიპტესთან მშვიდობიანობის ჩამოგდების შემდეგ, 197 წელს 200 გემისაგან შემდგარი ფლოტითა და დიდი სახმელეთო არმიით დაიძრა მცირე აზიისაკენ. ის ხელთ იგდებდა მცირე აზიის სამხრეთ და სამხრეთ-დასავლეთ სანაპიროებს, თან ჰელესპონტისაკენ (დარდანელი) მიეშურებოდა.

მაშასადამე, ანტიოქე სწორედ იმ ტერიტორიებს უპოტინებდა ხელს, რომელთა მიზეზითა და საბაბით რომი ფილიპე მაკედონელს ებრძოდა. პერგამოსისა და როდოსის მმართველები, რომლებიც ამას წინათ მაკედონიის მეფეს უჩიოდნენ, ახლა რომაელებს ანტიოქენ აგრესიის წინააღმდეგ დახმარებას სთხოვდნენ.

ანამ რომაელები ყოყმანობდნენ, ანტიოქემ ხელში ჩაიგდო მცირე აზიის თავისუფალი ქალაქები: ეფესო, აბიდოსი, ლამპსაკი, ტროადის ალექსანდრია, სმირნა და სხვები. ხოლო სანამ ამ ქალაქთა ელჩები რომში საჩივლელად მგზავრობდნენ, მეფემ გადალახა ჰელესპონტი, ხელში ჩაიგდო თრაკიის ხერსონესი და შეიჭრა თვით თრაკიის სიღრმეშიც.

ამგვარად, აღმოსავლეთის პორიზონტზე ახალი დიდი ომის საშიშროება შეიქმნა. რომს არ შეეძლო გულგრილად ეცქირა აღმოსავლეთში მოპოვებულ პოზიციათა დაკარგვის საფრთხისათვის.

თრაკიაში ანტიოქესთან გამოცხადდნენ რომაელი ელჩები ლუციუს კორნელიუს ლენტულუსის მეთაურობით, მაგრამ მოლაპარაკებას არავითარი შედეგი არ მოჰყოლია.

195 წელს ეფესოში ანტიოქესთან გამოცხადდა ჰანიბალი. მეფემ პირველად დიდის პატივით მიიღო და დაიახლოვა რომაელთადმი სიძულვილისა და ბრძოლის უბადლო გმირი.

ჰანიბალმა რომის წინააღმდეგ ბრძოლის ახალი გრანდიოზული გეგმა დაუსახა ანტიოქეს: დაუყოვნებლივ უნდა გაეგზავნათ ემისარები კართაგენში და მოეზადებინათ აჯანყება რომის წინააღმდეგ; შემდეგ ჰანიბალი ანტიოქესაგან ჩაიბარებდა 100 გემს, 10 000 ქვეით მეომარს და 1000 მხედარს; ამ ძალებით ის ჩავიდოდა კართაგენში და დაიწყებოდა ახალი პუნიკური ომი რომის წინააღმდეგ. ჰანიბალი ითვალისწინებდა ესპანელი ტომების იმდროინდელ დიდ აჯანყებას, მათთან შეერთებას და დიდი არმიებით იტალიის ლაშქრობათა განმეორებას; როცა ჰანიბალი რომს დასავლეთიდან რისხვად დაატყდებოდა, ანტიოქეც აღმოსავლეთიდან დაიძრებოდა და ამგვარად რომი ორმხრივი დარტყმებს ქვეშე გაისრისებოდა.

მაგრამ ჰანიბალის ახალ გეგმას განხორციელება არ ეწერა. ანტიოქე და მისი ახლობლები უკვე ნაკლებად ენდობოდნენ უცხოელს. ეს პატივმოყვარე ადამიანები ეჭვის თვლით უცქერდნენ „მეტიჩარა“ ფინიკიელის ცხოველმყოფელ მოქმედებას და შიშობდნენ „არ მიეთვისებინა“ მას რომზე გამარჯვების პატივი. რის მოპოვებაშიც მათ ეჭვი ოდნავადაც არ ეპარებოდათ. ასეთი ინტროვანული განწყობილების ატმოსფეროში დიდი სარდალი უბრალო საზღვდრო მრჩევლისა და უმნიშვნელო ბრძოლათა მეთვალყურის მოვალეობამდე დააქვეითეს.

ანტიოქე უფრო მეტ იმედებს ამყარებდა რომის წინააღმდეგ აზიისა და საბერძნეთის წვრილ სახელმწიფოთა შემოჭრებაზე და აღმოსავლეთში ძლიერი კოალიციის შექმნაზე. ჯერ მისი ჰარამხანა საშუალებას აძლევდა, რომ პოლიტიკური მნიშვნელობის ქორწინებებით გადმოებირებინა მეზობელი მმართველები. როგორც ვიცით, ჯერ ერთი ქალიშვილი ცოლად შეირთო ეგვიპტის მეფეს. მეორე აღუთქვა პერგამოსში

ახლად გამეფებულ ევმენ 11-ს, ხოლო მესამე — კაპადოკიის მეფე არიარატეს. ასეთივე გზებით ის ცდილობდა გალატებისა და მცირე აზიის თავისუფალ ქალაქთა მიზნობას და ფილიპე მაკედონელის კვლავ წაქეზებას.

ანტიოქემ საბოლოოდ უარყო რომის ულტიმატუმი ევროპიდან გავლისა და მცირე აზიის თავისუფალ ქალაქთა დატოვების შესახებ. ის აღარ უწყევდა ანგარიშს იმასაც, რომ რომთან კავშირში იყო აღმოსავლეთის სახელმწიფოთა უმრავლესობა: მაკედონია (რომაელებმა ფილიპეს უკვე დაუბრუნეს მძევლები), ათენი, აქეიის კავშირი, როდოსი, პერგამოსი და მცირე აზიის თავისუფალი ქალაქები. ანტიოქე საბერძნეთში ლაშქრობისას იმედებს ამყარებდა მხოლოდ ეტოლიაზე, ბეოტასა და ევბეაზე.

დაიწყო ე. წ. სირიული ომი (192 — 189).

ანტიოქემ დაასწრო არმიის გადასხმა ბალკანეთის ნახევარკუნძულზე, დიდი არმიით მიადგა კუნძულ ევბეაზე მდებარე ქ. ქალკიდას და მცირე წინააღმდეგობის შემდეგ აიღო იგი. რომაელთა სახელდახელოდ გაგზავნილმა რაზმმა არამც თუ დახმარება აღმოუჩინა ქალაქს, არამედ თვითონაც სრულიად განადგურდა ანტიოქეს ჯარებისაგან.

შემდეგ სირიელებმა ხელში ჩაიგდეს თრაკიის სამხრეთ-დასავლეთ სანაპიროზე მდებარე დიდი სტრატეგიული და ეკონომიური მნიშვნელობის ქალაქი ამფიპოლისი და სხვა ქალაქები. რომაელთა ჯერ კიდევ მცირე ძალები რეალურ წინააღმდეგობას ვერ უწყევდნენ მტრის წინსვლას.

რომში საეკვოდ არავის მიაჩნდა, რომ აზიაში მეტად საპასუხისმგებლო ლაშქრობის ხელმძღვანელობა წილად უნდა რგებოდა იმ კაცს, რომელიც ჰანიბალის მძლეველის სახელით იყო ცნობილი. მაგრამ პუბლიუს სციპიონს, რომელიც უკანასკნელად 194 წელს იყო კონსულად, კონსტიტუციის თანახმად ათი წლის ვადის გასვლამდე უფლება არ ჰქონდა კვლავ წამოეყენებინა თავისი კანდიდატურა ამ უმაღლეს თანამდებობაზე. მართალია, კონსერვატიული კონსტიტუციის ეს მუხლი მეორე პუნიკური ომის პერიოდში ხშირად ირღვეოდა, მაგრამ ამჯერად სციპიონის მოწინააღმდეგეებმა შესძლეს კვლავ მოქმედებაში მოეყვანათ ეს „ახირებული“ კანონი.

მაგრამ მოეწყო ისე, რომ არც რესპუბლიკური კონსტიტუცია „დაზიანებულა“ და აღმოსავლეთის ექსპედიციის მთავარსარდლობის საკითხიც ისე გადაიჭრა, როგორც რომის საზოგადოებრიობის ფართო წრეებში მოითხოვდნენ.

190 წლისათვის კონსულებად აირჩიეს პუბლიუს სციპიონის ძმა: ლუციუსი და მისი უახლოესი მეგობარი გაიუს ლელიუსი.

აღმოსავლეთის ფრონტი წილად სვდა ლუციუსს. ყველამ იცოდა, რომ ლუციუს სციპიონი, როგორც სარდალი და სახელმწიფო მოღვაწე, საშუალო სიმაღლეზეც კი არ იდგა. ამიტომაც მას პროკონსულის, თანამემწის რწმუნებებით დაუნიშნეს ძმა პუბლიუსი, რომელიც ფაქტიური ხელმძღვანელი უნდა ყოფილიყო აზიური ლაშქრობისა. ასეც მოხდა. აზიის წინააღმდეგ რომაელთა პირველ ლაშქრობას სახელოვანი სციპიონ აფრიკელი უძღოდა წინ.

190 წლის გაზაფხულზე ძმები სციპიონები საბერძნეთში ჩამოვიდნენ და იქ მყოფი ჯარებიც შეიერთეს. მათ ჩამოსვლამდე რომაელებსა და ეტოლიელებს შორის ჯერ კიდევ გრძელდებოდა შეტაკებანი. ეტოლიელთა სასტიკი წინააღმდეგობა გამოწვეული იყო რომის ახალი კატეგორიული მოთხოვნით: ან გადაეხადათ დიდი სამხედრო კონტრიბუცია (რისი გადახდაც მათ არ შეეძლოთ), ან უსიტყუო მორჩილება გამოეცხადებინათ. სციპიონმა ექვსთვიანი დროებითი ზავი დასდო ეტოლიელებთან, საბერძნეთში სამხრეთ იტალიიდან გადმოყვანილი გარნიზონები ჩააყენა და დანარჩენი ძალებით ჰელესპონტისაკენ დაიძრა.

რომაელებს ლაშქრობისას ხელს უწყობდნენ, ყოველნაირად ამარაგებდნენ და თრაკიულ-ბარბაროს ტომთა თავდასხმებისაგან იცავდნენ მაკედონელები. ამგვარად, ფილიპე პირნათლად ასრულებდა მორჩილი ქვეშევრდომის როლს. ასევე, რომაელთა სარდლობას ჰელესპონტზე გადასვლისას შეეძლო დაყრდნობოდა ბითანიის მეფე პრუსიას, რომელიც ახლა რომაელთა „მოკავშირედ და მეგობრად“ აცხადებდა თავს.

მაგრამ სციპიონისათვის ყველაზე უფრო მტკიცე გარანტია აზიაში გადასვლისა და იქ გამარჯვების მოპოვებისათვის პირველ რიგში ისევე ანტიოქე III-ის მოუსაზრებლობა და წინდაუხედაობა იყო. აზიელი ხელმწიფე არც კი ცდილა თავისი მრავალრიცხოვანი არმიები ჰელესპონტისა და მცირე აზიის სანაპიროებზე ჩავსატყუებინა და ამით წინააღმდეგობა გაეწია რომაელთა ჯარების გადმოსხმისათვის. პირიქით, მან გარნიზონებიც კი გამოიყვანა საბერძნეთიდან, თრაკიის ზღვრისკენ და ამრიგად კიდევ უფრო გასწმინდა ნიადაგი მტრის წინსვლის დასაჩქარებლად.

როცა რომაელებმა სრულიად დაუბრკოლებლად გადალახეს ჰელესპონტი და აზიის მიწაზე გადავიდნენ, ანტიოქემ ელჩები გაგზავნა სციპიონთან მოსალაპარაკებლად. ის ითხოვდა ზავს; გადაიხდიდა საომარი ხარჯების ნახევარს; რომს დაუთმობდა ყველა ევროპულ სამფლობელოს და მცირე აზიის ბერძნულ ქალაქთა მნიშვნელოვან ნაწილს. მაგრამ სციპიონმა უარპყო მეფის ნაკვიანვეი წინადადებანი. ახლა გვიან იყო, რადგან „მერანმა უკვე აგრძნო აღვირი და თვით მხედარიც“. მან ზავის დადება შესაძლებლად ჩასთვალა იმ შეპოხვევაში, თუ ანტი-

ოქე რომის სასარგებლოდ გადაიხდიდა საომარ სარჩებს მთლიანად და დასთმობდა არა მარტო ევროპას და ბერძნულ ქალაქთა ნაწილს, არამედ მთელს მცირე აზიასაც. ანტიოქემ ვერც ანგარებით მოიგო რომაელი სარდლს ვული: ამაოდ აღუთქვამდა ის სციპიონს თავისი ყოველწლიური შემოსავლის ნახევარს.

მოლაპარაკება შეწყდა. ანტიოქე თითქმის იძულებით და უხალისოდ შეუდგა საომარ სამზადისს. მისი ახალი დიდი შეცდომა იმაში მდგომარეობდა, რომ ვერ გაითვალისწინა მოწინააღმდეგის სუსტი მხარე — რეზერვებისა და ზურგის სიშორე (რასაც კარგად ითვალისწინებდნენ რომაელები კართაგენელებთან ბრძოლაში); ვერ გაითვალისწინა ამ მხრივ თავისი უპირატესობა: მას შეეძლო გაეძლო ხანგრძლივი, გაჭიანურებული ომისათვის და ყველაფერი ამის გაუთვალისწინებლობის გამო დიდი ტაქტიკური შეცდომა დაუშვა, როცა მან დააჩქარა გენერალურ ბრძოლაში ჩაბმა.

190 წლის შემოდგომაზე მოწინააღმდეგენი ერთმანეთს შეხვდნენ მცირე აზიის უკიდურეს დასავლეთ ნაწილში, ქ. მაგნეზიას მახლობლად, გაშლილ ველზე.

ანტიოქეს არმია 70 000 მეომრისაგან შედგებოდა; მათ შორის: 36 000 ქვეითი, 12 000 მხედარი, 54 სპილო და მრავალი, ბასრი ცელებით შეიარაღებული საბრძოლო ეტლი. რომაელთა ძალები რიცხობრივად მოწინააღმდეგის არმიის ნახევარსაც არ შეადგენდნენ. ისინი ბერძნების, მაკედონელებისა და პერგამოსის მეომრებთან ერთად სულ 30 000-მდე კაცს ითვლიდნენ.

ანტიოქემ თავისი არმია ორად გაჰყო. პირველ რიგში იდგნენ მსუბუქად შეიარაღებული მეომრები და ცელებით აღჭურვილი ეტლები. მეორე რიგში — ცენტრში იდგნენ მძიმედ შეიარაღებული ფლანგები, ხოლო ფლანგებზე — შესანიშნავად შეიარაღებული, მტკიცე აბჯრებში ჩასმული მხედართა ესკადრონები. ორივე რიგს შორის ჩამწყკრივებული იყო 54 სპილო, იმ დროის საბრძოლო „ტანკები“.

სციპიონი ამ დღეს ავად იყო და ლოგინდჩავარდნილს არ შეეძლო ბრძოლისათვის ეხელმძღვანელა. მის მაგივრად, მისივე გეგმით, სარდლობდა გნეუს დომიციუს აგენობარბი. მან მარცხენა ფლანგზე, რომელიც მდ. სიპილას ეყრდნობოდა, მხოლოდ მცირერიცხოვანი ცხენოსანთა რაზმები განალაგა; ცენტრში, როგორც ყოველთვის, ლეგიონები იდგნენ: განსაკუთრებით ძლიერი იყო რომაელთა მარჯვენა ფლანგი, სადაც იდგა მთელი კავალერია და მსუბუქად შეიარაღებულ მებრძოლთა სქელი რიგები; აქ სარდლობდა პერგამოსის მეფე ევმენ II, რომაელთა ერთგული მოკავშირე.

რომაელთა მარჯვენა ფლანგმა ბრძოლა მაშინ დაიწყო, როცა ანტი-ოქემ ძლიერად შეუტრა მოწინააღმდეგის მარცხენა მხარეს. ეგემენმა ცელებით შეიარაღებული ეტლებისაყენ სახელდახლოდ გაგზავნა მსუბუქი მეომრები, რათა გადაეკრათ მათთვის ქაპუნები და ამგვარად უვნებელყოთ ისინი. როგორც კი მოწინავეებმა ბრძანება შეასრულეს, ეგემენმა ელვის სისწრაფით დასძრა კავალერია და ძლიერად დაჰკრა სირიელთა მარცხენა ფლანგს, იქ, სადაც ერთიმეორეს ერთვოდნენ ცხენოსნები და ქვეითი ფლანგიტები. ამით აზიელებს საშუალება წაერთვათ ერთდროულ შეტევაზე გადასულიყვნენ რომაული ლეგიონების წინააღმდეგ და იძულებული შეიქნენ მხოლოდ თავდაცვაზე ეფიქრათ. ამგვარად, ანტიოქეს მეთაურობით წინ გაჰრილი მარჯვენა ფლანგი, რომელმაც წარმატებით უკუაქცია რომაელთა სუსტი მარცხენა ფრთა და მოწინააღმდეგის სამხედრო ბანაკამდეც კი მიაღწია, სრულიად მოსწყვდა არმიის ძირითად ნაწილებს, ქვეით ფლანგებსა და უკვე დამარცხებულ მარცხენა ფლანგს. რომაულ ლეგიონებს აღარც კი დაჰირვებიათ ბრძოლაში აქტიური მონაწილეობის მიღება. მთელს ფრონტზე დაწინაურებული მსუბუქადშეიარაღებული მეომრები, შუბისა და სათხედის მტყორცნელები. მოცინარნი და მოშურდულენი ძღვერი „ცეცხლით“ თავის ალების საშუალებას არ აძლევდნენ მოწინააღმდეგეს. არც ერთი მათი ნასროლი უქმად არ იკარგებოდა; ალაღბებდად გასროლილიც კი ხვდებოდა ერთად შეკრულ ხალხთა უზარმაზარ მასას, 64 კაცის სიღრმით ჩაწყობილ ურდოს. ერთ ხანს ანტიოქეს ფლანგები ორგანიზებულად იხევდნენ უკან, მაგრამ როცა გამაყრუებელი ბრძოლის ყოყინითა და ჭრილობებით გაშმაგებული სპილოები ისევ თავისიანთა რიგებში შეიჭრენ, მათი წყობაც დაიშალა და გეფის მთელი არმია უწყესრიგოდ გაიქცა. ანტიოქემ 50 000 კაცი შესწირა ასე წინდაუხედავად გამართულ ბრძოლას. რომაელებმა მხოლოდ 300 ქვეითი და 24 ცხენოსანი მეომარი დაჰკარგეს.

ანტიოქემ ზავი ითხოვა და თანხმობა ვანაცხადა იმ პირობებზე, რასაც ბრძოლის დაწყებამდე უცხადებდა სციპიონი. ზავის საბოლოოდ გაფორმებამდე მეფეს უნდა ერჩინა აზიაში დაბანაკებული რომაული ჯარები. ასე გავრძელდა წელიწადნახევარი. ანტიოქეს რომაელ მეომართა გამოკვება და დასახუქრება 3 000 ტალანტი (დაახლოებით 4 500 000 მან.) დაუჯდა.

ბოლოს, 188 წ. როგორც იქნა აზიაში ჩამოვიდა ათი კაცისაგან შემდგარი რომაული კომისია. ზავი საბოლოოდ გაფორმდა ქ. აპამეიაში. ანტიოქე ვალდებულებას კისრულობდა ხელი აედო ყველა ევროპულ და მცირე, აზიურ სამფლობელოზე: სამხედრო კონტრიბუციის სახით 12 წლის განმავლობაში რომის სასარგებლოდ უნდა გადაეხადა 15 000

ტლანტი (დაახლოებით 22 500 000 მან.); უნდა ჩამორთმეოდა მთელი ფლოტი და ამიერიდან ეკრძალებოდა 10-ზე მეტი სამხედრო გემის შენარჩუნება; ეკრძალებოდა სპილოების ყოლაც. გარდა ამისა, ზავის განსაკუთრებული მუხლით რომი მოითხოვდა ყველა მისი აქტიურა მტრისა და პირველ რიგში ჰანიბალის გადაცემას.

რომაელებმა თავიანთ მოკავშირეთაგან უხვად დააჯილდოვეს პერგამოსის მეფე ევმენი. მას გადაეცა თითქმის ყველა ის მცირეაზიური სამფლობელო, რომლებსაც მანამდე ანტიოქე ფლობდა (თრაკიის ხერსონესი, ლიდია, ფრიგია, კარია, პანფილია და ეფესო). რომის მეორე მოკავშირეს, როდოსს, გადაეცა ლიკია და კარიის ნაწილი. „გათავისუფლებულად“ ცხადდებოდა ბევრი მცირე აზიური ქალაქი.

ცხადია, ყველა ეს ახლადდასაჩუქრებული „მოკავშირენი“ რომის ყურმოქრილ ვასალებად და აღმოსავლეთში რომაული იარაღის შემდგომ წინსვლათა პლაცდარმებად გადაიქცნენ.

მაგნეზიის ბრძოლით სელევკიდთა იმპერიამ მომაკვდინებელი დარტყმა მიიღო. ძნელი დასაჯერებელია წყაროებში მოტანილი ცნობა, რომ ასეთ ზარცხს ანტიოქე მეტად უცნაური სიტყვებით შეხვედროდეს: „მადლობელი ვარ რომაელებისა, რომლებმაც მიხსნეს ამხელა სახელმწიფოს მმართველობისაგან“. მაგნეზიის ბრძოლა სიგნალი შეიქნა სელევკიდური სირიის იმპერიაში შემავალი დამორჩილებული ხალხებისათვის. მის სხვადასხვა კუთხეში იწყება ძლიერი აჯანყებები, ცხადდებიან დამოუკიდებელი სახელმწიფოები¹. მალე ზავის დადებიდან ანტიოქე თვითონ შეიქნა ასეთი აჯანყების მსხვერპლი (187 წ.).

ამგვარად, რომაელთა პირველი ლაშქრობა აზიაშიც დიდის წარმატებებით ჩატარდა. აღმოსავლეთში რამდენიმე წლით წონასწორობა დამყარდა. მაგრამ მალე რომს კვლავ უნდა აესხა იარაღი ისევ მაკედონიის წინააღმდეგ. მანამდე კი რომში სციპიონისა და ჰანიბალის სახელებთან დაკავშირებით მეტად საყურადღებო ამბები მოხდა.

32 სციპიონისა და ჰანიბალის უპანასაწალი ღწევა

გმირების სიკვდილი მზის ჩასვლას
ჰგავს და არა ბაყაყის სიკვდილს,
რომელიც გაკინთვით გასკდა.
მ ა რ ქ ს ი

187 წელს რომის ქუჩები ბრწყინვალე ტრიუმფით გაიარეს. ძმებმა სციპიონებმა, „აფრიკელმა“ და „აზიელმა“ (ასე ეწოდებოდა ლუციუს სციპიონს ამიერიდან). მაგრამ სულ მალე მათს ბრწყინვალეობას და დიდ-

¹ ამავე ბრძოლის შედეგით ისარგებლეს სელევკიდთა მონარქიაში შემავალი სომხეთის მმართველებმა არტაქსიამ და ზარიადრემ და სომხეთის დამოუკიდებლობა გამოაცხადეს.

ბამოსილყბს ს ზღვარი დაუდეს ძლიერმა პოლიტიკურმა მოწინააღმდეგე-ებმა, რომლებიც შეშფოთებული იყვნენ სციპიონთა გვარის არნახული გაძლიერებითა და მათი, ნებისთ თუ უნებლიეთ, დიქტატურისაკენ სწრაფვით. ოლიგარქიული კონსტიტუციის თავგამოდებული დამცველე-ბი, მარკუს პორციუს კატონის მეთაურობით, ენერგიულ ბრძოლას იწყებენ სციპიონთა „ტირანობის“ წინააღმდეგ, განსაკუთრებით კი პუბლიუსის მიმართ, რომელიც თითქოს მეფედ გრძნობდა თავს რომა-ელთა შორის.

პუბლიუს სციპიონის წინააღმდეგ ბრძოლა ჯერ არაპირდაპირი გზით დაიწყო. მისი სახელის გატეხვის მიზნით, პირველად იერიში მიიტანეს მის ძმაზე, ლუციუსზე. სახალხო ტრიბუნებმა სენატისა და ხალხის წინაშე აღძრეს საქმე. ლუციუს სციპიონს ბრალად ედებოდა მეფე ანტიოქესათვის წართმეული ფულადი თანხებისა და ძვირფასი ნივთე-ბის მითვისება. ლუციუსი ამაოდ იმართლებდა თავს. მას დიდძალი ფულადი ჯარიმა დააკისრეს გადასახდელად. ხოლო როცა ბრალდებულ-მა უარი განაცხადა უსამართლოდ დაკისრებული ჯარიმის გადახდაზე, სახალხო ტრიბუნმა მისი შეპყრობა ბრძანა.

სწორედ ამ დროს ფორუმზე გამოჩნდა ბრახმორეული პუბლიუს სციპიონი. მან მცველებს ხელიდან გამოსტაცა ძმა. ამას მოჰყვა საშინ-ელი ალიაქოთი. ხალხი ორ პარტიად გაიყო; ერთნი სციპიონებს უჭერ-დნენ მხარს, მეორენი კი იერიშზე მიდიოდნენ მათ წინააღმდეგ.

ვინ იცის ეს საქმე როგორ დამთავრდებოდა. რომ მასში არ ჩარეუ-ლიყო სახალხო ტრიბუნი ტიბერიუს სემპრონიუს გრაქუსი. რომელიც სციპიონების დაუძინებელ მტრად და მათ წინააღმდეგ თავგამოდებული ბრძოლის ერთ-ერთ აქტიურ მეთაურად ითვლებოდა; ეს იყო შემდგომში სახელოვანი ძმები გრაქუსების მამა. მაღალი კულტურის მქონე და სამართლიანობით განთქმული რომაელი. მან ჯერ დაჰკამო პუბლიუს სციპიონის ასეთი თვითნებობა სახალხო კრე-ბის წინაშე, მაგრამ იქვე „ვეტო“ დაადო თავისი კოლეგის, სახალხო ტრიბუნის განკარგულებას და ბრძანა ხელი არ ეხლოთ ლუციუსისათვის. „მართალია, — განაცხადა მან, — მე სციპიონებთან ისეთივე მტრობა-ში ვრჩები, როგორც მანამდე და არც მსურს მათგან სამადლოს გადახ-და, მაგრამ არავითარ შემთხვევაში არ მოგცემთ ნებას. რომ იმ საპ-ყრობილეში, სადაც სციპიონ აფრიკელი ჩვენი მტრების მეფეებსა და მხედართმთავრებს მიერეკებოდა, ახლა მისი ღვიძლი ძმა ჩაამწყვდიოთ!“

¹ უეპელია. სციპიონებისადმი გრაქუსის ასეთ დახმარებაში დიდი როლი ითამა-შა წმინდა პირადმა და ოჯახურმა ინტერესებმაც. ამასთან დაკავშირებით წყაროები გაღმომგვემენ, რომ გრაქუსს მეტად მოსწონდა პუბლიუს სციპიონის ქალიშვილი

ლუციუსი გათავისუფლებულ იქნა, მაგრამ მისი ქონების კონფისკაცია, დადგენილი ჯარიმის ასანაზღაურებლად, მაინც ზოახდინეს. იქვე იპოვნეს ვერაფერი ისეთი, რაც მართლაც ჩრდილს მიაყენებდა სციპიონთა პატიოსნებას. ლუციუსის ქონება არც კი ეყო დაწესებული ჯარიმის ასანაზღაურებლად და მის შესავსებად მისმა ნათესავებმა, მეგობრებმა და კლიენტებმა შეაგროვეს ფული. გადმოგვცემენ: ლუციუსს რომ მის ახლობელთაგან შეკრებილი ფული მთლიანად აეღო, ის უმდიდრესი კაცი შეიქნებოდა, მაგრამ დაკმაყოფილდა მხოლოდ იმის აღებით, რაც დაკისრებული ჯარიმის ანაზღაურებისათვის დასჭირდებოდა.

მალე ამის შემდეგ იერიში მიიტანეს თვით პუბლიუს სციპიონზეც. მას მოსთხოვეს სენატორებისათვის წარედგინა ანგარიშები თუ როგორ გამოიყენა აზიური ლაშქრობის წინ აკრებილი გადასახადები; განსაკუთრებით კი ლაშქრობის შედეგად მოპოვებული ნადავლი. სციპიონმა მართლაც წარადგინა ანგარიშსწორების დავთრები, მაგრამ შემდეგ ბრანზმორეულმა ნაკუწებად აქცია ისინი სენატორთა წინაშე და მრისხანედ განაცხადა, რომ მისთვის აღმაშფოთებელია ანგარიში ჩააბაროს რაღაც 4 000 000 სესტერციუსზე, როცა მან სახელმწიფოს ხაზინაში შეიტანა 400 000 000 სესტერციუსი.

კორნელია, მაგრამ მათ შეუღლებას აბრკოლებდა გრაკხუსებსა და სციპიონებს შორის არსებული პოლიტიკური მტრობა. ბოლოს სწორედ ამ დღეს, როცა გრაკხუსმა ტყვეობიდან გაათავისუფლა ლუციუსი, ხოლო საღამოს, კაპიტოლიუმში სპეციალურად მოწყობილ ვაჭაშაშე მან პუბლიუს სციპიონს მისი ქალის ხელი სსთოვა, სციპიონი ყოველგვარი ყოყმანზე გარეშე დათანხმდა. სახლში დაბრუნებისთანავე სციპიონმა განუცხადა თავის მეუღლეს ემილიას (ეს იყო კანეს ბრძოლაში დაღუპული ლუციუს ემილიუს პაულუს ქალი), რომ მან სასიძოს სიტყვა მისცა ქალიშვილის მიტოვებაზე. ემილიამ მკაცრად უსაყვედურა ქმარს: ჩვენი კორნელიას ბედის გადაწყვეტაში ჩემთვის, დიდისათვის უნდა გეკითხოა, ხოლო შენ ისე აჩქარებულხარ, თითქოს მას ტიბერიუს გრაკხუსს ატანდე ცოლადო. „სწორედ გრაკხუსს აღუთქვი ცოლად ჩვენი კორნელია!“ — სიზარულით შესძახა სციპიონმა.

ეს კორნელია დედა იყო სახელგანთქმების ტიბერიუსისა და გაიუს გრაკხუსებისა. კორნელია საისტორიო ტრადიციამ დახატულია, როგორც შესანიშნავი თვისებებისა და ზნეობის რომელი მატრონა. როცა ის ნაადრევად დაქვრივდა, უარი განაცხადა ხელმეორედ გათხოვებაზე. მან უარი თქვა ცოლად წაჰყოლოდა თუნდაც ეგვიპტის მეფეს. კორნელია მთელ თავის სიცოცხლეს და შესაძლებლობას შეიღებინა აღზრდას ანდომებდა. ერთხელ ის სტუმრად მოხვედრილა რომელიღაც წარჩინებულ და სიმდიდრით განთქმულ რომაულ ოჯახში. აქ დიასახლისს მისთვის დიდის ამბით უჩვენებია ყველა თავისი აურაცხელი სიმდიდრე. მეორედ ეს ქალი თვით მოხვდა გრაკხუსების ოჯახში და სთხოვა კორნელიას ახლა მას ეჩვენებინა მისი საუნჯენი. კორნელიამ დაუძახა თავის ვაჟებს — ტიბერიუსს და გაიუსს, მიუთითა მათზე თავის სტუმარს და უთხრა: „აი, ჩვენი საუნჯე!“

¹ რომაული სესტერციუსი უდრდა 4 გირვანქა ვერცხლს.

ამის შემდეგ ორბა წელმა განვლო და პუბლიუს სციპიონს ისევ მისწვდნენ ყელში. სახალხო ტრიბუნებმა კვლავ აღძრეს „აფრიკელის“ „ანგარებით გასვრილი“ საქმე სახალხო კრების წინაშე. გამოჩნდა სციპიონი თავისი უამრავი მეგობრითა და კლიენტით გარშემორტყმული. ყველა განცვიფრებით შესცქეროდა ტრიბუნაზე ამავალ გმირს, რომელსაც რატომღაც ამ დღეს სადღესასწაულო ტანსაცმელი ჩაცვა და თავი ტრიუმფატორის გვირგვინით შეეშკო. საშარისებურ სიჩუმეში სციპიონმა მკექარე ხმით განაცხადა: „ქვირიტებო, სწორედ ამ დღეს მე აფრიკაში დავამარცხე ჰანიბალი და კართაგენელები და რადგან ამ დღეს დრო არ არის არავითარი დავისა და განხეთქილებისათვის, ამიტომ მე აქედან ახლავე მივეშურები კაპიტოლიუმში, სადაც უნდა ვილოცო და მსხვერპლი შევსწირო ყოვლისმძლე იუპიტერის, იუნონასა და მინერვას წინაშე, მადლობა გადავუხადო მათ, რომ ამ დღეს, ისე როგორც სხვა მრავალ დღესაც, ძალა და უნარი მომცეს, წარმემართა სახელმწიფო საქმეები შესაფერისი ხელოვნებით. თქვენც ქვირიტებო, წამოდით ჩემთან ერთად და სთხოვეთ ღმერთებს, რათა მათ თქვენს სათავეში ყოველთვის დააყენონ ჩემი მსგავსი ადამიანები“.

ეს სთქვა და ამაყად გაეშურა კაპიტოლიუმისაკენ. ხალხი გაიპო და გზა მისცა. დემაგოგიამ გასჭრა: სულ ზალე მთელი სახალხო კრება თან გაჰყვა ამამგოსილ გმირს. ფორუმზე მხოლოდ სახალხო ტრიბუნები დარჩნენ. ისინი ამაოდ აცხადებდნენ პროტესტს ამ მოულოდნელი და უცნაური ამბის გამო.

რა თქმა უნდა, ასე დიდხანს ვერ გაგრძელდებოდა. კიდევ რამდენჯერმე დანიშნეს სასამართლო გამოძიება „სციპიონთა საქმეზე“. ამაცი სარდალი იძულებული შეიქნა დანებებოდა მტრების დაყენებით შემოტევებს, საბოლოოდ ჩამოშორებოდა სახელმწიფო საქმეებს და თვით რომსაც, სადაც ის თავისი არსებობით საშინელი ფსიქოზის ატმოსფეროს უქმნიდა ზოწინააღმდეგე პარტიას.

სციპიონი 184 წელს გადასახლდა თავის მამულში. ქ. ლიტერანუმში, კამპანიის ოლქში, ქ. კუმის მახლობლად. აქ ატარებდა თავისი სიცოცხლის უკანასკნელ დღეებს; ახმარდა მათ საყვარელი ბერძნული ლიტერატურის, ისტორიის, ხელოვნებისა და მეცნიერების შეთვისებას და გარდასულ დიდებულ დღეთა მოგონებებით იკლავდა უკანასკნელ მწარე დღეთაგან გულში ღრმად ფესვგადგმულ ბოღმას. მას ნუგეშს თუ მოჰკვრიდა ისეთი რამ, როგორსაც წყაროები გადმოგვცემენ: ერთ დღეს თავისი ვილის აივანზე მდგარმა სციპიონმა შენიშნა, თუ როგორ მიუახლოვდა მისი მამულის სანაპიროებს რამდენიმე ხომალდი, მათგან სასწრაფოდ გადმოხტნენ მეკობრეები და მიაშურეს ვილას. სციპიონმა სასწრაფოდ გასცა განკარგულება და მთელი მისი

კლიენტელა. მონები და მეგობარ-ნათესავეები წაშვე საბრძოლო მზად-ყოფნაში ჩააყენა. მაგრამ მეკობრეებმა მშვიდობიანობის ნიშანი აჩვენეს და სციპიონს მასთან მიახლოების ნება სთხოვეს. როცა სციპიონმა ამის ნება დართო, ისინი მისცვიდნენ, დაემხნენ მის წინაშე, ხელით ეხებოდნენ და ელოლიავებოდნენ მის ხელებს, მკერდს, ტანსაცმელს. ჩვენ მხოლოდ ვესურდა გვეჩილა დიდი სარდალი, ესპანეთის, აფრიკისა და აზიის გმირი; კაცი, რომელსაც უძლეველი ჰანიბალის მძლეს უწოდებენო, — განაცხადეს მათ და უკანვე გაბრუნდნენ. აი, კიდევ როგორი ამბებით შეეძლო ენუგეშებინა თავი სციპიონს.

სციპიონი გარდაიცვალა 183 წელს, 52 წლის ასაკში. ანდერძში ის მოითხოვდა დაეკრძალათ იქვე. ლიტერნუმში, და არავითარ შემთხვევაში რომში.



იმავე წლისათვის თინალს უახლოვდებოდა ჰანიბალის მრავალფეროვანი სიცოცხლეც¹.

როგორც ითქვა ანტიოქე აზიელის სამეფო კარზე ჰანიბალის ახალ გრანდიოზულ გეგმებს ეჭვის თვალითა და უნდობლობით დაუწყეს ცქერა. სირიულ ომში მას სრულიად უმნიშვნელო ბრძოლის უბნება ჰქონდა ჩაბარებული, სადაც მის ბრწყინვალე ნიქს კვლავინდებურად აღარ შეეძლო გაეღვება. 183 წლის ზავით ანტიოქეს რომაელებისათვის უნდა გადაეცა ჰანიბალი. მაგრამ როცა ზავის ეს მუხლი იწერებოდა, ჰანიბალს სირია უკვე დატოვებული ჰქონდა.

იგი მივიდა კუნძულ კრეტაზე. მან კარგად იცოდა კრეტელ ხელისუ-

¹ ტიტე ლივიუსთან დაკულია ერთი ცნობა ჰანიბალისა და სციპიონის უქანასენელი შეხვედრის შესახებ ანტიოქე III-ის სასახლის კარზე, სადაც 194 წლის მახლობლად სციპიონი ერთ-ერთ ელჩად ყოფილა სირიაში. ამ ცნობის მიხედვით დიდ სარდლებს შემდეგი შინაარსის დიალოგი ჰქონიათ:

სციპიონი: ვის სთელი შენ ყველაზე დიდ სარდლად მსოფლიოში?

ჰანიბალი: ყველაზე დიდი სარდალი იყო ალექსანდრე მაკედონელი, რომელმაც მტერებრივად ჩარებით მოსპო მტრის ურიცხვი არმია და გაიარა ისეთი ქვეყნები, რომელთა გავლაც სხვებს წარმოუდგენლად მიაჩნდათ.

სციპიონი: რომელ სარდალს აყენებ მეორე ადგილზე?

ჰანიბალი: მეორე ადგილი ეკუთვნის პიროსს.

სციპიონი: მესამე?

ჰანიბალი: ეს მე ვარ.

სციპიონი: (საცილით) რომელ ადგილზე დააყენებდი შენს თავს მე რომ არ დამემარცხებინე?

ჰანიბალი: მაშინ მე ჩემს თავს დავაყენებდი უფრო მაღლა. ვიდრე ალექსანდრე, პიროსი და ყველა სხვა დანარჩენი სარდლები.

ფალთა ანგარებისმოყვარეობა, ფულისადმი სიხარბე. და იმ ღიზნით, რომ როგორმე გადაერჩინა შავი დღეებისათვის გადანახული ოქრო-ვერცხლი, ასეთ ხერხს მიმართა: რამდენიმე ამფორა (ყუთი) ტყვიით გაავსო, თავზე ოქრო-ვერცხლი გადააფარა და ამ სახით, კრეტის ხელისუფალთა თანდასწრებით, დაალაგა არტემიდეს სახელობის ტაძარში; თან გამოაცხადა, რომ მათ შენახვას ანდობს ადგილობრივ ხელისუფლებას და ღმერთებს. სინამდვილეში კი მთელი მისი საუნჯე ინახებოდა ბრინჯაოს ქანდაკებებში, რომლებიც უწესრიგოდ და თითქოს უყურადღებოდ ეყარა მისი სახლის წესასვლელებში.

მალე რომაელები კრეტაზეც გამოჩნდნენ; ჰანიბალის გარშემო ჩაშუშები აფუსფუსდნენ. სრულიად მოულოდნელად ჰანიბალი გაუჩინარდა, ისევ აზიაში გადავიდა და ბითინიისაკენ გაეშურა. აქ ის გამოცხადდა მეფე პრუსიასთან. რომელსაც სამსახური შესთავაზა და მფარველობაც სთხოვა. პრუსიას მაშინ ომი ჰქონდა მეზობელი პერგამონის ხელმწიფესთან, ევმენტან. ამიტომ სახელოვანი ფინიკიელი მან დიდის სიამოვნებით მიიღო და საომარ საქმიანობაშიც ჩააბა. აქ ჰანიბალმა უკანასკნელად ღიილო ბრძოლაში მონაწილეობა. ერთ-ერთ საზღვაო შეტაკებაში მან მწყობრიდან გამოიყვანა თვითონ მეფე ევმენტის საომარი გემი, ხოლო დანარჩენი ეკიპაჟები საშირლად დააფრთხო და გაჰქანტა სრულიად ახალი, უჩვეულო ხერხით: მისი ბრძანებით ბითონიელებმა მოწინააღმდეგის გემებზე შხამიანი გველებით სავსე ქოთნები გადაისროლეს. ეს იყო მისი უკანასკნელი ბრძოლა და უკანასკნელი შხამის გადმონთხევა რომაელთა წინააღმდეგ (ევმენი ხომ რომის ქვეშევრდომი იყო).

ამავე 183 წელს ბითინიაში გამოცხადდა რომაელთა ელჩობა, რომელსაც სათავეში ედგა პირველი მაკედონური ომის სარდალი ფლავიუსი. მან კატეგორიულად მოსთხოვა პრუსიას დაუყოვნებლივ გადაეცა მისთვის ჰანიბალი. პრუსიას, უმწეო ჯუჯა მეფეს, არ შეეძლო წინააღმდეგობა გაეწია რომის ესოდენ დიდი ავტორიტეტისათვის. პირიქით, მას უკანასკნელ დღეებში გადაწყვეტილი ჰქონდა კიდევ გაეცა ჰანიბალი და ასეთი ბინძური გზით დაემსახურებინა რომაელთა მეგობრობა და გამოესყიდა ის დანაშაული, რაც გამოიხატებოდა მისგან რომის მფარველობის ქვეშ მყოფი პერგამონის წინააღმდეგ ომის დაწყებაში. პრუსიამ და ფლავიუსისმა დაუყოვნებლივ გაგზავნეს ძლიერად შეიარაღებული რაზმები ჰანიბალის შესაპყრობად.

ჰანიბალი მანამდე მიჩენილ ერთ-ერთ კოშკში ცხოვრობდა. მას გათვალისწინებული ჰქონდა მოსალოდნელი საფრთხე და კოშკიდან ყოველი საიდუმლო გასასვლელი საფუძვლიანად ჰქონდა შესწავლილი. მაგრამ აძვირად ჰანიბალმა ვეღარ დააღწია თავი სიკვდილის კლანჭებს.

როცა მსახურმა მოახსენა და თვითონაც ნახა, რომ სახლი შეიარაღებული რაზმითა ალყაში იყო მოქცეული, ხოლო ყველა გასასვლელი მტკიცედ ჩაკეტილი, სასწრაფოდ აავსო ფიალა ძლიერი საწამლავით, რომელსაც ის მუდამ თან ატარებდა, და წამოიძახა: „ამჯერად კი ვიხსნათ შემდგომი საფრთხისა და ზრუნვისაგან რომელი ხალხი, რომელიც ასე დიდხანს ელოდება მოხუცი მტრის სიკვდილს“: ამ სიტყვებით დასცალა საწამლავით სავსე ფიალა და სიკვდილთან ერთად შეხვდა რომაელებს.

ასე მოკვდა ჰანიბალი 64 წლის ასაკში, იმავე 183 წელს, როცა მისი დიდი მტერი სციპიონი, ჰანიბალისავე მსგავსად, უცხოეთში გარდაიცვალა¹.

ჰანიბალმა მტკიცედ შეასრულა აფრიკის უდაბნოში ბავშვობისას წარმოთქმული მხურვალე ფიცი („ჰანიბალის ფიცი!“). რომის ისტორიამ არ იცოდა ჰანიბალზე უძლიერესი და უსასტიკესი მტერი, რომელთან ბრძოლაში რომი გაჭაღარავდა. 50 წლის მანძილზე ელავედა ჰანიბალის მახვილი რომის უმტკიცეს ბეგთარზე; 16 წლის განმავლობაში ის იტალიას შიგ მკერდში ურევდა ტიციუს-ტრებიუსს, ტრაზიმენისა და კანეს ბრძოლათა ცეცხლში ნაწრთობ იარაღს. არასოდეს, კანეს მწვერვლიდან ზამას უფსკრულისაკენ დაქანებულსაც კი, სულიერი მხნეობა არ დაუკარგავს. იგი ყოველთვის და ყველგან ახალი ენერგიით მიისწრაფოდა ერთი მიზნისაკენ — რომის დამხობისაკენ. მიუხედავად იმისა, რომ მას ერთნაირ უნდობლობას უცხადებდნენ სამშობლოშიც და უცხოეთში, და თითქმის მუდამ მარტო იყო ამ უთანასწორო ბრძოლაში, მაინც ყველგან, მსოფლიოს ყველა კუთხეში² ეძებდა მოძაკვდინებელ იარაღს რომის წინააღმდეგ. იგი ისე იყო ამ ბრძოლაში გართული, რომ ვერც კი ამჩნევდა: მისი ასეთი თავგადაღებულები ცდა მხოლოდ და მხოლოდ დასაღუპად განწირული აგონია იყო; ჰანიბალი ცდილობდა ისტორიის მძიმე ჩარხის უკულმა მოტრიალებას; ცდილობდა უკვე დიდი ხნის დახავსებული და გახრწნილი მონათმფლობელური კართაგენის აღორძინებასა და გაახალგაზრდავებას. ვერ ხედავდა, რომ კართაგენის ბრძოლა რომის წინააღმდეგ ეს იყო დრომოკმულის ჰიდილი მომავალ სივსკაცესთან, ვერ ამჩნევდა, რომ მიხრწნილ ბერიკაცს ძალა არ შესწევდა ძირს დაეცა ჯან-ლონით სავსე ვაჟკაცი. ამიტომაც, ერთი ჰანი-

¹ იმავე 183 წელს აგრეთვე უცხოეთში დაიღუპა იმ დროს ცნობილი ბერძენი სარდალი ფილოპემენე.

² პლუტარქეს ცნობით, ჰანიბალი ყოფილა სომხეთშიც. აქ მას მეფე არტაქსიასათვის აუგია სატახტო ქალაქი არტაქსატა.

ბალის ნიჭს, რაგინდ გენიალურიც არ უნდა ყოფილიყო, არ შეეძლოა წინ გადასდგომოდა ისტორიის კანონზომიერ წინსვლას. ჰანიბალის პირადი ტრაგედიის ძირითადი მიზეზი იმაში მდგომარეობდა, რომ ის უდროოდ დროს მოევიდნა თავის ქვეყანას, სახელდობრ მაშინ, როცა კართაგენი უკვე სწურავდა თავის თავს; ჰანიბალის მარცვალი უკვე გამოფიტულ ნიადაგზე ითვისებოდა და ნაყოფი არ მოჰქონდა. ჰანიბალი გამხმარ ხეზე ამოსულ უკანასკნელ ყლორტს ჰგავდა, რომელსაც უნიდაგობისაგან აღარ შეეძლო ცხოველმყოფელობის შენარჩუნება და, მით უმეტეს, მისი გადაცემა და დაბრუნება მშობლისადმი.

39

მესამე მათემატიკური ომი

მაგნეზიის ბრძოლიდან 20 წლის შემდეგ რომაელებს ისევ მოუხდათ ახალი დიდი ომის გაჩაღება აღმოსავლეთში. პირველმა და მეორე მაკედონურმა ომებმა ვერ გადასჭრეს ის წინააღმდეგობანი, რომლებიც არსებობდნენ რომსა და მაკედონიას შორის. ეს წინააღმდეგობანი კიდევ უფრო მძაფრი შეიქნა, როცა ფილიპე V-მ რომისადმი ანგარიშგაუწვევლად ხელახლა ჩაიგდო ხელში თესალიის უდიდესი ნაწილი და თრაკიის სამხრეთ სანაპიროები. „მზე ჯერ კიდევ არ ჩასულა უკანასკნელად“, — ამაყად გაიძახოდა მაკედონელი მეფე თეოკრიტეს¹ სიტყვებს და გაბედულად მიიწევდა წინ.

179 წელს ფილიპე გარდაიცვალა და მაკედონიის ტახტზე დაჯდა მისი ძე პერსეოსი, რომელიც სასწრაფოდ შეუდგა რომთან ბრძოლის სამზადისს.

დაიწყო მესამე მათემატიკური ომი, რომელიც სამი წელიწადი (171 — 168) გაგრძელდა.

რომაელები ჯერ ბალკანეთზე არც კი გადასულიყვნენ, რომ პერსეოსს მისმა მოკავშირეებმა და მეგობრებმა ზურგი აქციეს. ბითინიის მეფე პრუსია ჩაურევლობის, ნეიტრალიტეტის პოზიციაზე დადგა. სირიის ახალი მეფე ანტიოქე IV (სელევკოს IV-ის ძმა) ეგვიპტესთან ტრადიციული ომებით გაერთო და მაკედონიისთვის დახმარებაზე სრულებითაც არ ფიქრობდა; როდოსი, სანამ გვიან არ იყო, ისევ რომაელთა მხარეზე გადაბარგდა. ასევე ბერძენ მოკავშირეთა უმრავლესობა, რომელი შურისგებით შეფიქრიანებული, ჩამოშორდა მაკედონიას. ჯერ-ჯერობით მხოლოდ თრაკიული ტომების, ოდრისების ბელადი კოტისი და ილირიელი გენციუსი, გარყვნილი და ლოთი მთავარი, ინარჩუნ-

¹ თეოკრიტე — III საუკუნის (ძვ. წ. აღ.) სირაკუზელი პოეტი.

ნებდნენ მაკედონიისადმი მხარდაჭერას. ასევე, პერსეოსისადმი ერთგულად რჩებოდნენ ბასტარნებიც.

რომაელთა ძლიერება ომის დაწყებისთანავე იზრდებოდა. გარდა ახლახან ჩამოთვლილი ქვეყნებისა, — მასინისა აფრიკიდან ზედიზედ გზავნიდა ნუმიდიურ კავალერიას, სპილოებს, სურსათ-სანოვავებსა და საომარ საქურველს; ბერძნული სამყაროს უდიდესი ნაწილი, მათ შორის აქეიის კავშირი, რომის მხარეზე იდგა; მცირე აზიიდან დამხმარე ძალებს შეადგენდნენ პერგამოსისა და კაპადოკიის სამეფოები და სხვა თავისუფალი ქალაქები; ყველა ამათ შეეძლოთ ზურგიდან დასხმოდნენ მაკედონიას.

171 წლის გაზაფხულზე კონსულმა პუბლიუს ლიცინიუს კრასუსმა 50 000 მეომრისაგან შემდგარი არმია გადაიყვანა საბერძნეთში. რომის არმიაში იტალიელების გარდა ირიცხებოდნენ ნუმიდელები, კელტები, ლიგურები, ბერძნები და პერგამოსელები. ეგეოსის ზღვას მი-
აშურა 40 გემისაგან შემდგარმა რომაულმა ფლოტმა გაიუს ლუსკიციუსის სარდლობით.

პერსეოსს რომაელთა ამ სამხედრო ძალების წინააღმდეგ შეეძლო გამოეყვანა 45 000-მდე მეომარი.

პირველი ბრძოლა მოხდა თესალიაში, ქ. ლარისას მახლობლად. რომაელები დამარცხდნენ. მათ 4 000 კაცი დაჰკარგეს მოკლულთა სანით, ხოლო 6 000 იტალიელი ცხენოსანი ტყვედ ჩავარდა.

პერსეოსი თითქოს არც მოელოდა გამარჯვებას; თუნდაც იმიტომ, რომ მან ასეთი „იღბლიანობის“ მიუხედავად საზავო მოლაპარაკების გაძარტვა სთხოვა რომაელებს. ის მათ სთავაზობდა 197 წელს ფილიპესთან დადებული ზავის აღდგენას. მაგრამ პერსეოსმა უარი მიიღო.

მიუხედავად მაკედონიის მეფის საერთო დაბნეულობისა, ომის პირველი წლები რომაელთა სასარგებლოდ მაინც არ წარმართულა. აშკარად იგრძნობოდა სარდლობის უნიჭობა, უმოქმედობა და ზნეობრივი დაცემულობაც კი. ორი წლის განმავლობაში რომაელთა არმიაში სრული დემორალიზაცია და უდისციპლინობა სუფევდა. სარდლები, უფროს მეთაურთა შემადგენლობა ქრთამისათვის დეზერტირობის უფლებასაც კი აძლევდნენ ჯარისკაცებს. რომს თითქოს ბედი სწყალობდა, რომ მათ წინააღმდეგ იდგა პერსეოსი და არა, თუნდაც, ენერგიული ფილიპე.

168 წლისათვის რომში ერთ-ერთ კონსულად აირჩიეს ლუსციუს ემილიუს პავლე, კანეს ბრძოლაში მოკლული ემილიუს პავლეს შვილი. ის ამ დროს უკვე სამოც წელს მიღწეული. კაცი იყო, მაგრამ ჯერ კიდევ გამოირჩეოდა ენერგიულობით, სიმამაცით, ჯანღონის სისავე-სითა და გონებრივი გამჭკრიახობით.

ემილიუს პავლემ საბრძოლო ასპარეზზე ჩასვლისთანავე ძირფეს-

ვიანად გარდაქმნა არმიისა და სარდლობის დეზორგანიზებულობისა და უმოქმედობის სამარცხვინო სურათი. აღდგენილ იქნა მკაცრი სამხედრო დისციპლინა და წესრიგი.

მოწინააღმდეგენი ერთმანეთს შეხვდნენ ქალაქ პიღნასთან, მაკედონიაში. მათ ბანაკებს ერთიზეორისაგან ჰყოფდა მდინარე ლეკოსი. საიდანაც ორივე მხარე სარგებლობდა წყლით.


გათენდა 22 ივნისი. იმ დღეს არც ერთი სარდალი არ ფიქრობდა გენერალური ბრძოლის გამართვას. მაგრამ დღის ბოლოს მოწინააღმდეგენი სრულიად შემთხვევით ჩაებნენ სამკედრო-სასიცოცხლო ბრძოლაში. ეს შემდეგნაირად მოხდა.

● მზე უკვე დასავლეთისაკენ იყო დახრილი, როცა რამდენიმე რომაელმა მდინარეზე წყლის სასმელად ცხენები გარეკეს. ერთმა ცხენმა გასცურა მდინარე და მეორე ნაპირზე გავიდა. ის ხელში ჩაიგდეს პერსეოსის არმიაში მომსახურე თრაკიელმა მეომრებმა, რომლებიც იქ გუშაგებად იდგნენ. რომაელმა მეომრებმაც გასცურეს მდინარე, ცხენიც დაიბრუნეს, შეტაკებისას ერთი თრაკიელიც მოჰკლეს და უკანვე გადობრუნდნენ. მაგრამ მათ თან დაედევნა თრაკიელთა ძლიერი რაზმი. მდინარის ნაპირზე ხელჩართული ბრძოლა გაჩაღდა. ორივე მხრიდან ემატებოდნენ მეომრები. ბრძოლა უფრო სასტიკი ხდებოდა. სწორედ მაშინ პერსეოსმა ბრძანება გასცა და მთელი მისი ქვეითი არმია შეტევაზე გადავიდა.

ემილიუს პავლეც თითქოს ამას ელოდა (იმასაც ამბობდნენ, რომ რომაელებმა თვით სარდლის მითითებით გადენეს ცხენი მდინარის მეორე ნაპირზე, რათა მაკედონელები ბრძოლაში გამოეწვიათო, მაგრამ ეს დაბეჭითებით არავინ იცოდა. თვით გულჩათხრობილი მსცოვანი სარდალიც ამის შესახებ არაფერს ამბობდა). ის უკვე საბოლოოდ რაზმავდა არმიას; თავშიშველი და უჩავშნოდ დაიარებოდა ლეგიონების წინ; ყველა მეოპარს თავის ადგილს უჩვენებდა, ყველას ამხნევებდა და ახალისებდა.

რომაელთა მოწინავე ხაზს პირველნი მიეპრენ ყორნისფერ კატანებში გადაცმული თრაკიელ ბრვე ვაჟაკთა რიგები. ლეგიონებმა საპასუხო დარტყმის გამართვაც ვერ მოასწრეს. რომ გრივალეით მოვარდნენ მაკედონური ფალანგები; სისხლანსფერ ზღვას ჰგავდა ძოწეულის ხიტონებში შემოსილ ფალანგიტთა არმია. შედრკნენ რომაელთა მოწინავენი. შედრკა მრავალ ბრძოლაში ნაცადი სარდალიც; არასოდეს ასეთი შიში არ მიგრძენიაო, — თვითონ აცხადებდა ემილიუს პავლე შემდგომში. მაგრამ მან მალე დასძლია მისთვის უჩვეულო გრძნობა, ომანიანად დასკვივლა და შეუტია გაათორებულ იერიშზე გადმოსულ მტერს.

ბრძოლა დასაწყისშივე არაჩვეულებრივად სასტიკი და სიახლის-მღვრელი შეიქნა. რომაელთა მოწინავე კოჰორტა, რომელიც მთლიანად საბელური ტომის, პელიგნებისაგან შედგებოდა, თავგანწირვით ცდილობდა გაერღვია ფალანგების მტკიცედ შეკრული რიგები, მაგრამ ამაოდ. მაშინ მათმა მეთაურმა სალიუსმა მოწინააღმდეგის სქლად შეკრულ რიგებში ისროლა კოჰორტის საბრძოლო დროშა და ბრძანა მისი უკანვე გამოესნა. ზნეცური თავდავიწყებით გადაეშენენ პელიგნები მტრის შუბების ტყეში დროშის დასაბრუნებლად. ისინი მახვილებით სჩეხდნენ მაკედონელთა შუბებს; ფარებს თავში სცემდნენ მათ, მაგრამ მიზანს მაინც ვერ აღწევდნენ. მაკედონელები მათ თავიანთ გრძელ შუბებზე



ბრძოლა პილასთან.

აგებდნენ და უკან ისროდნენ. პელიგნთა კოჰორტა მთლიანად განადგურდა. რომაელებმა უკვე დაიწყეს უკან დახევა. გამხნეებული მტერი კვალდაკვალ მისდევდა და ავიწროებდა მათ. რამდენიმე ათეული მეტრი და რჩა რომაელთა ბანაკამდე. ლეგიონებმა მიაღწიეს ბანაკის მახლობლად მდებარე ბორცვს. აქ მაკედონელები ახალ იერიშზე გადავიდნენ. გაცოფებულ ეზილიუს პაულუს მთლიანად შემოეგლიჯა კონსულის ტოგა. მან, სისხლში მოსვრილმა, ჩამოუქროლა შემდრკალ არმიას და კონტრშეტევაზე გადასვლა ბრძანა. მართლაც დრო იყო: მაკედონელთა ფალანგებს უკვე დაეკარგათ თავიანთი უპირატესობა, რაც მათს ერთიანობასა და მონოლითურ სიმტკიცეში მდგომარეობდა. დევნისას მათი რიგები დაშლილიყო და რაზეულებად მიეშურებოდ-

ნენ „დამარცხებული“ მტრის საბოლოოდ გასანადგურებლად, მაგრამ ჩანდა, რომ ემილიუსი ახლა იწყებდა ბრძოლას.

რომაელები რაზმეულეზად შეიჭრენ დაფანტულ მაკედონელთა დისტანციებში. გაჩაღდა მრავალი ჯგუფობრივი ბრძოლა. რომაელები, რომელთაც უკვე ნაპოვნი ჰქონდათ მანძილი ზანევრიებისათვის, ყოველი მსრიდან გარს ერტყმოდნენ დაქსაქსულ ფალანგიტთა რაზმებს და უწყალოდ სჩეხდნენ. პერსეოსის ქვეითი არმია მთლიანად ნადგურდებოდა. ვინც გაქცევა მოახერხა, ზღვის სანაპიროს მიაშურა, მაგრამ აქ წინ გადაეღობნენ რომაელი მეზღვაურები, რომლებიც სწორედ ამ დროს გამოჩნდნენ პრეტორ ოქტავიუსის ადმირალობით.

კატასტროფა კიდევ უფრო გარდუვალი გახადა მაკედონიის მეფის სრულმა უმოქმედობამ და სიძხადლემ. კავალერიას, რომელსაც თვით მეფე უდგა სათავეში, ბრძოლაში არც კი მიუღია მონაწილეობა. ის მდინარის მეორე ნაპირიდან უცქერდა ფალანგების განადგურებას და პირველი გაიქცა ბრძოლის ველიდან. ●

20 000 მაკედონელის დაჩეხილი გვამი ეყარა მიწაზე. 11 000 ტყვე ჩაიგდეს ხელში რომაელებმა.

ასე გადაწყდა მაკედონიის ბედი ბრძოლაში, რომელიც ერთი საათიც კი არ გაგრძელდებულა. რაღაც კვირა იყო გასული ემილიუს პავლეს მთავარსარდლად არჩევიდან და ალექსანდრე მაკედონელის სამშობლო უკვე რომაელთა ფეხქვეშ იყო გართხმული. წინააღმდეგობის გაწევაზე არავინ ფიქრობდა. პერსეოსი მხოლოდ საკუთარი სიცოცხლისა და ხაზინის გადარჩენაზე ზრუნავდა. ის პიდნადან გაიქცა სატახტო ქალაქ პელაში. გზადაგზა მას თითქმის ყველა ერთგული მსახური ჩამოშორდა. ძლივს გადაურჩა ბრაზმორეულ მეომრებს. მხოლოდ იმის წყალობით, რომ სამეფო ტანისამოსი და დიადემა ჰოიხსნა და უბრალო ტანსაცმელში შემოსილმა მიაღწია პელასს, აქ მან დახოცა ერთგული ხაზინადარები, გასწმინდა სახელმწიფო საგანძური. რომელიც 6 000 ტალანტისაგან (დაახლოებით 9 000 000 მან.) შედგებოდა და გაიქცა სამხრეთისაკენ თავისი ოჯახის, საძი ერთგული მსახურისა და 500 მეომრის თანხლებით. ეს უკანასკნელნიც მას მისდევდნენ არა იმდენად ერთგულების გამო, რამდენადაც იმ ფულის მიღების სურვილით, რომელსაც მათ აღუთქვამდა პატივდაკარგული გვირგვინოსანი. სასყიდლის მიღების შემდეგ ქ. ამფიპოლისში პერსეოსი ამ უკანასკნელმა ამაღამაც დასტოვა.

ბოლოს, ლტოლვილმა მეფემ, თავის ცოლშვილთან ერთად, ძლივს მიაღწია კუნძულ სამოთრაკიას (ეგეოსის ზღვის ჩრდილოეთ რაიონში). აქედან ფიქრობდა თრაკიაში გაქცევას, მის მოკავშირე კოტისთან. სწორედ ამ გეგმის განხორციელების ცდის დროს ის მისივე ანგარების-

მოყვარეობის მსხვერპლი შეიქნა. პერსეოსი მოელაპარაკა ვილაც კრეტელ ოროანდს, რომელსაც თავისი ხომალდით უნდა გაეპარებინა ის და მისი ოჯახი რომაელებით გავსებულ ზღვაში. ღამით ოროანდმა დატვირთა გემი პერსეოსის ხაზინითა და სიმდიდრით. მეორე ღამით, გამგზავრების დათქმულ ვადაზე, პერსეოსი ცოლითა და შვილებით მივიდა ზღვის სანაპიროზე, მაგრამ იქ არც ოროანდი, არც გემი და არც სამეფო საჭურველი აღარ დახვედრია.

სასოწარკვეთილებაში ჩავარდნილმა პერსეოსმა გადასწყვიტა დანებებოდა საბედისწერო ხვედრს. ის თავისი ოჯახით ჩაბარდა პრეტორ ოქტავიუსს, რომელმაც ისინი დაუყოვნებლივ გაგზავნა ემილიუს პავლესთან.

შავი ტანსაცმლით შემოსილი, სულიერად დაცემული მეფე რომაელ სარდალს მიჰგვარეს. პავლემ ხელი გაუწოდა ტყვეს. მაგრამ, როცა პერსეოსმა მის წინაშე მუხლებზე დაეშვა სცადა, ასეთ სულმოკლეობასა და სიმდაბლეს დამსწრენი და პირველ რიგში ემილიუსი ზიზლით შეხვდნენ. უბედურო, — შესძახა ემილიუსმა, — შენი მოქცევით არა მარტო შენს თავს არცხვენ, არამედ ამცირებ ჩემს გამარჯვებასაც. რადგან შენ თავს ვერ იჭერ როგორც კეთილშობილი გმირი და ღირსეული მოწინააღმდეგე რომაელი ხალხისა; შეუდრეკელი ნებისყოფა და სიმამაცე მტერსაც აიძულებს უცქიროს სვედაესილს პატივისცემით. ხოლო სულმოკლეობა, თუნდაც ის ბედნიერ კაცს ჰქონდეს, მაინც განუზომელ ზიზლს იწვევს რომაელებშიო. პერსეოსმა სთხოვა ემილიუსს პავლეს ეხსნა ის სამარცხვინო ტრიუმფისაგან. რომაელმა სარდალმა დაცინვით მიუგო: ტრიუმფში გატარების სირცხვილისაგან თავდასახსნელი საშუალება შენ ყოველთვის გქონდა და ახლაც შენს ხელში არისო. ამით ის ანიშნებდა თვითმკვლელობაზე. მაგრამ მაკედონელ მეფეს არც ამის გამბედაობა ეყო და სრული მორჩილება გამოუტყნადა საშინელ ბედს.

რომის მცხოვრებნი ცირკში დიდ სანახაობაზე იყვნენ შეკრებილნი; იქ გამოცხადდნენ ემილიუს პავლეს შიკრიკები, რომლებმაც ჩამოიტანეს სასიხარულო ამბის მაუწყებელი დაფნის ფოთლებით შემკული ეპისტოლე. ხალხი დიდი ზეიმით შეხვდა ახალ დიდ გამარჯვებას. საყოველთაო დღესასწაული და მსხვერპლშეწირულება ჯერ არც კი დამთავრებულიყო, რომ კიდევ ახალი გამარჯვების ამბავი მოვიდა: რომაელებმა დაამარცხეს და შეიპყრეს მაკედონიის მოკავშირე ილირიელი მეფე გენციუსი.

სენატის დადგენილებით გაიგზავნა ბრძანებები, რომლის მიხედვით ემბრიუს პავლეს უნდა მოეწესრიგებინა ახლადდაპყრობილი და საერთოდ აღმოსავლეთის ქვეყნების საქმეები.

მაკედონიის სამეფო ოთხ ნაწილად იქნა გაყოფილი. ამიერიდან ისინი სრულიად იზოლირებული იყვნენ ერთმანეთისაგან. ჩამოერთვათ ურთიერთ შორის ვაჭრობის უფლება (jus commercii). ქორწინების უფლება (jus connubii) და სხვ. დანგრეულ იქნა ყველა ციხე-სიმაგრე და აღიკვეთა ახალი შეიარაღების ყოველგვარი შესაძლებლობა. მოსახლეობას ყოველწლიურად ღმირი ხარკი უნდა ეხადა რომისათვის.

ასევე სამ ნაწილად გაიყო ილირია. ისიც სასტიკი რეპრესიების ქვეშ დააყენეს და მძიმედ დახარკეს.

რომაელებმა სასტიკად დასაჯეს საბერძნეთის ის ოლქებიც, რომლებიც მაკედონიის მიმართ ოდნავი სიმპათიით იყვნენ განწყობილნი. 1 000-ზე მეტი წარჩინებული აქველი მძევლებად გაირეკეს რომისაკენ. მათ შორის იყო ცნობილი ისტორიკოსი პოლიბიოსიც.¹

ყველაზე მეტი სისასტიკით რომაელები მოექყრნენ ეპირს. დანიშნულ დღეს რომაული კოპორტები შეუდგნენ ეპირის ქალაქებისა და სოფლების ძარცვას, დანგრევას და მოსახლეობის მონებად გარეკვას. 70-მდე ქალაქი დაინგრა; 150 000 ეპირელი მონებად გაჰყიდეს. აურაცხელი სიმდიდრით გაივსო რომის სახელმწიფო ხაზინა და ლაშქრობის მონაწილეთა პირადი საჭურჭლე.

168 წლის სექტემბერში რომის კარიბჭე მქუხარე ტრიუმფით გაიხსნა. წინ მოჰქონდათ აუარებელი ძვირფასი, ბერძნულ-მაკედონური ხელოვნებით ნაკეთები ნივთი, ჭურჭლები, თასები, ლარნაკები, სკულპტურები, იარაღი, ყველაფერი ოქრო-ვერცხლითა და კეთილშობილი ქვებით მოოჭვილი; შემდეგ მოჰყავდათ 120 სამსხვერპლო ხარი, მოოჭროვილი რქებითა და გვირგვინებით მორთული; კვლავ ძვირფასი ნივთები; მათ მოსდევდა მეფე პერსეოსის ეტლი, რომელზეც ელაგა მისი იარაღი, სამეფო ტანსაცმელი და დიადემა; მას მისდევდნენ პერსეოსის ორი ვაჟი და გოგონა, თავიანთი აღმზრდელების, პედაგოგებისა და სეფეწულების თანხლებით; ყველა ისინი თვალცრემლიანი ემუდარებოდნენ შემწეობას ჟივილ-ხივილით მოვარდნილ „მგლის ნაშიერთა“ ხროვას. უფლისწულებისა და მათი ამალის უკან ძლივს მოაბიჯებდა შავი ტანსაცმლით შემოსილი სვედაესილი პერსეოსი თავისი მეუღლითა შემდეგ გამოჩნდა გვირგვინთა ტბორე; აზიისა და საბერძნეთის ქალაქთაგან მორჩილების ნიშნად გამოგზავნილი 300 ოქროს გვირგვინი მოჰქონდათ ტრიუმფატორის ეტლის წინ. მოოჭროვილ ეტლში, რომელსაც ოთხი

¹ პოლიბიოსი ამნისტიის წილების შემდეგაც აღარ დაბრუნებულა საბერძნეთში. ის დარჩა რომში, დაუახლოვდა სციპიონ უმცროსის მოწინავე წრეს, წერდა თავის „მსოფლიო ისტორიას“ და აქტიურ მონაწილეობას ღებულობდა რომის პოლიტიკურ ცხოვრებაში.

ოეთრი მერანი მოაქანებდა, იდგა ახოვანი ემილიუს პავლე; ძლევამოსილ კარმავ რომაელს შვენოდა ოქრომკერდით ნაქარგი ძოწეულის მანტია, ქალარა თავზე ტრიუმფატორის გვირგვინი (corona triumphalis) და ხელში დაფნების კონა. დაფნის გვირგვინებით იყო შემკული ყველა მისი ვეტერანი, რომლებიც საბრძოლო ჰიმნების გრგვინით მისდევდნენ სარდლის ეტლს.

პერსეოსი გადაასახლეს ქალაქ ალბაში, ფუცინოს ტბის მახლობლად. აქ საშინელ პირობებში მყოფმა მეფემ კიდევ დიდხანს იტოცხლა. ბოლოს მან სიტოცხლე დაასრულა შიმშილით. იმასაც გადმოგვცემენ, რომ რომაელი გუშაგები მას ძილის საშუალებას არ აძლევდნენ და ამგვარად სრულიად ნიათგამოცილილი მეფე გარდაიცვალა. იქვე დაიხოცნენ მისი ოჯახის წევრებიც, გადარჩა მხოლოდ ერთი უფლისწული. ალექსანდრე, რომელმაც კარგად აითვისა ლათინური კულტურა და კარგა ხანს ალბას მმართველის მწერლად მსახურობდა.

პიდნას ბრძოლა გარდატეხის პუნქტი იყო რომის აღმოსავლური პოლიტიკისა და დიპლომატიის თანდათანობით შეცვლაში. ამის შემდეგ რომმა შესცვალა გაქნილი „მამაშვილური“ დამოკიდებულება იმ ქვეყნებთან, რომლებიც მანამდე „მოკავშირეების და მეგობრების“ სახით ესაჭიროებოდა მსოფლიოში გაბატონების მძლავრი მეტოქეების, მაკედონიისა და სირიის წინააღმდეგ ბრძოლაში. რომმა მალე შესცვალა „მამობრივი პროტექტორატის“ შემპარავი დამოკიდებულება აშკარა დამპყრობლურ-მბრძანებლური პოლიტიკით პერგამოსის, ბითინიის, როდოსისა და ბერძნული ქალაქ-სახელმწიფოების მიმართ. ამიერიდან ამ წვრილ სახელმწიფოებს მხოლოდ ნომინალური ავტონომია შერჩათ და ისიც რამდენიმე წლით. მალე მათ რომაულ-პროვინციული მმართველობის სისტემაში უნდა ამოეყოთ თავი. ამიტომ სრულიად არ არის შემთხვევითი პოლიბიოსის აზრი, როცა ის პიდნას ბრძოლის დღეს რომაელთა მსოფლიო ბატონობის დასაწყისად სთვლის. უკვე მზად იყო მძლავრი ფუნდამენტი, საიდანაც რომს ამიერიდან შეეძლო უფრო აშკარად და გაბედულად ეწარმოებინა ძლიერი შეტევები აზიის მიმართულებით, მის სიღრმეში.

კიდევ უნდა მოიხაზოს რამდენიმე მნიშვნელოვანი პუნქტი, რომლებმაც პიდნას ბრძოლის შემდეგ დიდი როლი შეასრულეს აღმოსავლეთში რომაელთა საბოლოოდ დამკვიდრების საქმეში.

იმ დროს, როდესაც რომაელები პერსეოსის წინააღმდეგ იბრძოდნენ, სირიის მეფე ანტიოქე IV წარმატებით ეოძებოდა ეგვიპტეს. 168 წლისათვის, სწორედ მაშინ, როდესაც პიდნას ბრძოლა რომაელთა გა-

მარჯვებით დამთავრდა, ანტიოქე IV-ის ჯარები უკვე ეგვიპტეში იყვნენ. შეჭრილი და ქ. ალექსანდრიის კარიბჭესთან იდგნენ. ყოველდღე მოსალოდნელი იყო ეგვიპტის მკირეწლოვანი მეფის პტოლემე IV-ის ტახტიდან ჩამოგდება. ეგვიპტელებმა დახმარებასათვის ისევ რომს მიმართეს. მალე ეგვიპტეში ჩამოვიდა რომაელი ელჩი გაიუს პოპილიუსი, რომელმაც ანტიოქეს კატეგორიულად მოსთხოვა გასცლოდა ეგვიპტეს და მეორედ აღარ გაეხედნა მისი საზღვრების გადალახვა. შემკრთალმა ანტიოქემ მოთქმების დრო ითხოვა. მაგრამ პოპილიუსმა თავისი კვერთხით მეფის გარშემო წრე შეშოხაზა და უბრძანა ეფიქრა ამ წრეში მდგომარეს. საშინლად დაბნეული ანტიოქე იძულებული გახდა მაშინვე დათანხმებულიყო რომაელის კატეგორიულ მოთხოვნაზე და საშუადამოდ დაეტოვებინა ეგვიპტე. რომელსაც, როგორც ეტყობოდა, უკვე რომის „მფარველობის“ ხელი ედო.

ამის შემდეგ სირიის მმართველთ არასოდეს აღარ უცდიათ ხმის ამაღლება რომის წინააღმდეგ.

პიდნას ბრძოლიდან 20 წლის შემდეგ ბალკანეთმა უკანასკნელად გაიბრძოლა რომის ბატონობის კლანჭებში. 149 წელს მაკედონიაში გამოჩნდა თვითმარქვია ვინმე ანდრიუსი, რომელიც პერსეოსის შვილად, ფილიპედ აცხადებდა თავს. თრაკიის მთავრობის დახმარებით მან მოახერხა მაკედონიის ხელში ჩაგდება და თავისი თავის მეფედ გამოცხადება. ცრუფილიპეს წარმატებებს ძირითადად ხელს უწყობდა ადგილობრივი მოსახლეობის მხარდაჭერა, მოსახლეობისა, რომელიც განუზომელი სიძულვილით იყო განწყობილი რომაული კირთების წინააღმდეგ. თვითმარქვია შეიჭრა თესალიაში. პირველ წელს რომაელები რამდენჯერმე დამარცხდნენ აჯანყებულებთან ბრძოლებში. ბოლოს, 148 წელს პრეტორი ქვინტუს ცეცილიუს მეტელუსი დიდი არმიითა და ფლოტით შეიჭრა ბალკანეთში და სასტიკად დაამარცხა აჯანყებულნი. ცრუფილიპე შეპყრობილ იქნა და ტრიუმფში გატარების შემდეგ საშინელი წამებით მოჰკლეს.

იმავე წელს (148) რომმა მაკედონია პროვინციად გამოაცხადა. ამგვარად, მაკედონიამ საბოლოოდ დაჰკარგა დამოუკიდებლობა. მაკედონიის პროვინციაშივე შევიდა ეპირი და ილირიის სამსრეთი ნაწილი, ე. ი. ის აერთიანებდა ბალკანეთის ჩრდილოეთ ოლქებს, აღრი-ატიკის ზღვიდან ეგეოსის ზღვამდე.

იმავე წლებში, როცა რომაელებს ერთდროული ბრძოლები უხდებოდათ ბალკანეთში (ცრუფილიპე), აფრიკასა (მესამე პუნიკური ომი) და ესპანეთში. ბერძნებმაც უკანასკნელად სცადეს თავისუფლების მოპოვება. ამ ბრძოლას სათავეში ედგა აქეიის კავშირი, ცენტრით ქ. კორინთოში. ორი წლის განმავლობაში გაათურებით იბრძოდნენ ბერ-

ძნები. ბოლოს, 146 წელს კორინთოს ყელზე მომხდარ გენერალურ ბრძოლაში ისინი საბოლოოდ დამარცხდნენ და მიწებდნენ გამძვინვარებულ მტერს. თავიანთი გამარჯვება რომაელებმა საბერძნეთის დიდებული კულტურის ცენტრთა დანგრევეთა და აოხრებით დაასრულეს. განსაკუთრებით დიდი ტრაგედია თავს დაატყდა ქ. კორინთოს. რომაელებმა კორინთოს მოსახლეობის დიდი ნაწილი, განსაკუთრებით მამაკაცები, მთლიანად ამოჟლიტეს; დანარჩენები მონებად აქციეს.

საბერძნეთიც რომის პროვინციად გამოცხადდა აქეიას სახელწოდებით.

საბერძნეთის ტრაგედია, კორინთოს დანგრევა 146 წელს მოხდა; იმ საშინელ წელს, როცა კართაგენიც დაინგრა.

თავი მესამე

მესამე პუნიკური ომი

ომის დასაწყისი

მიუხეობრუნდეთ კართაგენს. რომელიც დავტოვეთ რომაელთა მკაცრი კონტროლისა და მათგანვე აღვირახსნილი ნუმიდიელი მეფის, მასინისას. განუწყვეტელ თავდასხმათა შიშის ქვეშ.

„დამოკლეს მახვილის“ ქვეშ მყოფი კართაგენი მაინც ახერხებს ფეხზე წამოდგომასა და წელში გაშართვას. ჩრდილოეთ აფრიკის მნიშვნელოვანი ნაწილი, განსაკუთრებით აღმოსავლეთის მიმართულებით, ვიდრე კირენაიკამდე, მის საშფლობელოებს შეადგენდა. ისევე ფეხს იღვამდა და ფართოდ იშლებოდა კართაგენელთა საყვარელი საქმიანობა: ვაჭრობა. რომელიც ფინანსიური სიმდიდრის უტყუარ ბაზას კქმენდა. მდ. ბაგრადის ნაყოფიერ ველთა შესანიშნავად ზოწესრიგებული სოფლის მეურნეობა პროდუქტთა სიუხვით ავსებდა კართაგენის ბელლებს. ომის არარსებობამ კართაგენის მოსახლეობა მრავალრიცხოვანი გახადა; იგი 700 000 მცხოვრებს ითვლიდა. ეკონომიურადაც და რიცხობრივადაც კართაგენი ომამდელ დონეს აღარ ჩამორჩებოდა. ის, დაცემული და განადგურებული, ფენიქსისებურად აღორძინდა.¹

რომაელები შიშით და ძრწოლვით უცქეროდნენ მოსისხლე მტრის ხელახლა აყვავებას. აფრიკაში ისევ მზადდებოდა ნიადაგი სასტიკი შურისგებისა; საფლავიდან დგებოდა ჰანიბალის აჩრდილი. რომში თანდათან ფეხს იკიდებდა რწმენა, რომ კართაგენის მხოლოდ მორჩილებაში ყოლა საკმარისი არ იყო. ახალი პუნიკური ომების საშიშროებანი მანამ არ მოიხსნება, სანამ კართაგენი სრულიად არ იქნება აღვლილი პირისაგან მიწისა. ამიტომაც რომაელებს საკმარისად აღარ მიაჩნდათ მარტო მასინისა, რომელიც რომაელთა თანაგრძნობითა და მხარდაცურობით 50 წლის მანძილზე აფორიაქებდა კართაგენის საზღვრებს.

რომაული კომისიები უფრო სისტემატურად ჩნდებიან აფრიკის

¹ ფენიქსი ძველევკიბტური მითოლოგიის ზღაპრული ფრინველი. რომელიც სიკვდილის მოახლოებისას თავის ბუდეში დაიწვებოდა და ფერფლისაგან კვლავ აღსდგებოდა.

პირიზონტზე და უხეშად ერევიან კართაგენის საგარეო თუ საშინაო საქმეებში. პიდნას ომის შემდეგ რომის საგარეო პოლიტიკაში მომხდარა ცვლილებები. რაც დამორჩილებულ ქვეყანათა მიმართ მკაცრ და აშკარა ავრესიულ ომში მდგომარეობდა. პირველ რიგში კართაგენისადმი იყო მიმართული.

153 წელს კართაგენსა და მასინისას შორის ახალი უთანხმოების „მოსაგვარებლად“ აფრიკაში გაგზავნილ იქნა მოხუცი მარკუს პორციუს კატონი. კატონის განცვიფრებასა და შეშფოთებას საზღვარი არა ჰქონდა, როცა ზან კართაგენი აღორძინებული იხილა: ქალაქის გარ-



კატონი

შემო შესანიშნავად მოწყობილი მეურნეობანი; ქუჩები ჯანსაღი მოსახლეობის სიმრავლეს ვერ იტევს; ყველგან სიმდიდრე და სიუხვე შეინიშნება; სამხედრო არსენალები საჭურველით არის სავსე; დოკები სავსეა გემთშეუბღობისათვის საჭირო მასალით. ერთი სიტყვით, კართაგენი საომრად გამზადებულ ქვეყანას ჰგავდა და არა დაცემულსა და დაკნინებულ ქალაქს.

რომში დაბრუნებისთანავე კატონმა სენატის წინაშე წარმოსთქვა სიტყვა, რომლითაც მოუწოდებდა კართაგენის წინააღმდეგ დაუყოვნებლივ ომის დაწყებას, მის სრულ განადგურებას, დანგრევას. ის აცხადებდა: დამარცხებებმა უფრო კართაგენელთა უკუობა მოსპეს, ვიდრე მათი სიძლიერე; ჩვენ, რომაელებმა ისინი გამოციდილ ჯარისკაცებად და პოლი-

ტიკოსებად ვაქციეთ; ნუმიდიელებთან კენწლაობა კართაგენელებისათვის სასწავლო ვარჯიშია, რომლის შემდეგ, ხელსაყრელი დროის შერჩევისთანავე, ისევ ჩვენს წინააღმდეგ გამოილაშქრებნო. კატონი ხაზს უსვამდა აფრიკის ხელში ჩაგდების ეკონომიურ საარფიანობასაც. ვაღმომოგვემენ, როცა ის სენატში შევიდა, ამოკალთავებული ტოგა დაუშვა და იატაკზე საუკეთესო აფრიკული ლეღვები დაჰყარა. ყველა განცვიფრებით ათვალიერებდა მსხვილ, ლამაზ და გემრიელ ხილს. მაშინ კა-

ტონს უთქვამს: ქვეყანა, სადაც ეს ლეღები მოდის. მხოლოდ სამი დღის სავალზეა რომიდანა.

ამის შემდეგ კატონი ხშირად გამოდიოდა კართაგენის წინააღმდეგ ომის დაწყების მოწოდებით. როგორი შინაარსის სიტყვითაც არ უნდა გამოსულიყო, ყოველთვის მას ასეთი ლოზუნგით დააბოლოებდა: „ს ხ ვ ა, მ ე ვ ფ ი ქ რ ო ბ, კ ა რ თ ა გ ე ნ ი უ ნ დ ა დ ა ი ნ გ რ ე ს!“ („ceterum censeo Carthaginem delendam esse“).

მართალია, რომში იყო კართაგენთან მშვიდობიანობის შენარჩუნების პარტიაც, რომლის ბელადი, ს ც ი პ ი ო ნ ნ ა ზ ი კ ა (სციპიონ აფრიკელის სიძე), საპასუხოდ დევნიბით ამთავრებდა თავის სიტყვებს: „ჩემი აზრით, კართაგენი არ უნდა დაინგრესო“,—მაგრამ ეს მიმდინარეობა თანდათან უთმობდა აგრესიულად განწყობილი მმართველი პარტიის მოთხოვნებს, რომლებიც მიზნად ისახავდნენ სავაჭრო გზების, ბაზრების, სიძლიდრის წყართა და მონათა ახალი კონტინგენტების ხელში ჩაგდებას.

ასე რომ რომში II საუკუნის 50-იან წლებში კართაგენის სრული გაცემტვერებისათვის ახალი ომის დაწყება საბოლოოდ გადაწყდა. საქირო იყო მხოლოდ საბაბი. ესეც გამონახულ იქნა.

როგორც აღვნიშნეთ, 201 წლის ზავის მიხედვით კართაგენს აკრძალული ჰქონდა რომის დაუკითხავად ეწარმოებინა საგარეო პოლიტიკა. ამიტომაც იყო, რომ რომის ჩაურევლად მას უფლებაც კი არ ჰქონდა მოგერიებითი ხასიათის ომი ეწარმოებინა მასინისას ავაზაკური თავდასხმების თავიდან ასაცილებლად. რომი ყოველთვის მასინისას მხარეს იჭერდა, ხოლო კართაგენს თავის დასაცავად ხელის გაქნევასაც უკრძალავდა. ასე გაგრძელდა მთელი ნახევარი საუკუნე. ბოლოს, უკვე ძალ-ღონეზე მოსულმა და გულმოცემულმა ქალაქმა გაბედა გადამჭრელი ნაბიჯის გადადგმა ნუმიდიელების თავდასხმათა აღსაკვეთად. კართაგენის ხელისუფლების სათავეში ისევ მოექცა დემოკრატიულ-პატრიოტული პარტია, რომელიც ხალხის ფართო მასების მხარდაჭერით მზად იყო აქტიური წინააღმდეგობა გაეწია მოძხდურთათვის. ამ პარტიის სათავეში იდგნენ ბარკას მეომარი გვარის წარმომადგენელი, ჰ ა ს დ რ უ ბ ა ლ ი და კ ა რ თ ა ლ ო ნ ი. ისინი საწრაფოდ შეუდგნენ ახალი არმიის ჩამოყალიბებასა და გაწვრთნას. კართაგენელთა ახალ არმიამ იყენენ ნუმიდიელი ცხენოსნებიც, რომელთაც სათავეში ედგათ სიფაქსის შვილიშვილი ა რ კ ო ბ ა რ ზ ა ნ ი. ჰასდრუბალის წინადადებით და სახალხო კრების დადგენილებით კართაგენიდან განდევნეს მასინისას 40-მდე მომხრე. კრებამ შეპტიცა, რომ აღარასოდეს არ მისცემდნენ მათ უკან დაბრუნების უფლებას.

იმავე წელს (151 წ.) მასინისამ ახლად ჩამოვარდნილი კონფლიქტის მოწესრიგება რომს მიანდო. აფრიკაში ჩამოსულმა რომაელთა კომი-

სიამ კართაგენის ხელისუფლებას მოსთხოვა დაუყოვნებლივ ჯარების დაშლა და ფლოტის ასაგებად გამზადებული მასალის დაწვა. ოლიგარქია მზად იყო შეესრულებინა ეს ბრძანება, მაგრამ სახალხო კრებამ კატეგორიულად უარჰყო იგი. რომელი ელჩები ძლივს გადაურჩნენ გამძვინვარებული ხალხისაგან დაგლეჯას. უკან, იტალიაში გაბრუნებულებს მასინისამ გააყოლა თავისი შვილი გულუსა, რომელმაც რომის სენატს დაწვრილებით აუწყა კართაგენის საომარი სამზადისი და მოუწოდა კართაგენის წინააღმდეგ ახალი ომის დაწყებისაკენ. სრულიად ფორმალურ ხასიათს ატარებდა კართაგენში დეცემვირთა ახალი კომისიის ჩასვლა, რამაც ერთხელ კიდევ „დადასტურა“ კართაგენელთა გამალებული საომარი სამზადისი. კატონი დაჟინებით მოითხოვდა ომის დაუყოვნებლივ გამოცხადებას.

რომაელებს ომის დაწყების საბაბი უკვე ხელთ ჰქონდათ. 150 წელს მასინისამ გულუსას ზეთაურობით კართაგენში გაგზავნა ყველა იქიდან განდევნილი თავისი მომხრე. მაგრამ მათ კართაგენელებმა კარიბჱე ჩაუკეტეს და ქალაქში არ შეუშვეს; რამდენიმე მათგანი უკან დაბრუნებისას ისრებით დახოცეს. მაშინ მასინისამ დასძრა თავისი არმია. ჰასდრუბალმაც გამოიყვანა ახლადორგანიზებული ჯარები. სასტიკ ბრძოლაში კართაგენელები დამარცხდნენ და ზავი ითხოვეს. საზავო მოლაპარაკების ხელმძღვანელობა და მასინისასთან შერიგების მოწყობა კართაგენელებმა სთხოვეს სციპიონ ემილიანეს, რომელიც მაშინ ესპანეთის ფრონტებიდან (იქ მაშინ რომაელებს ომი ჰქონდათ აჯანყებულ ესპანელებთან) იყო წამოსული მასინისასთან საომარი სპილოების სათხოვრად. ის მახლობელი ბორცვიდან ხედავდა ხსენებულ ბრძოლას კართაგენელთა და ნუმიდელთა შორის.

სციპიონმა (რომლის შესახებ ქვემოთ გვექნება ლაპარაკი) სიამოვნებით იკისრა შუამავლის როლი. ჯერ ჰასდრუბალი ჯიუტობდა მიეღო მასინისას მიერ წაყენებული ის მოთხოვნა, რომელიც კართაგენელთა რიგებში მეტბრძოლ ნუმიდელთა გადაცემას გულისხმობდა. მაგრამ, როცა მასინისამ მოლაპარაკების შეწყვეტა მოითხოვა და ისევ იარაღს მიმართა, კართაგენელი სარდალი იძულებული შეიქნა მიეღო ნუმიდელი მეფისაგან წაყენებული ყველა პირობა: ჩაებარებინათ იარაღი. უიარაღო კართაგენელთა არმიას, თავის სარდლებთან ერთად დაჩოქილებს გაეარათ ნუმიდელთა გადაჯვარედინებულ შუბებს ქვეშ, გაეცათ მოლალატე ნუმიდელები, კართაგენში დაებრუნებინათ იქიდან განდევნილები, 50 წლის განმავლობაში გადაეხადათ 5 000 ტალანტი (ყოველწლიურად 100 ტალანტი). ასეთი ზავის მიღების შემდეგ უიარაღო კართაგენელებს უფლება ეძლეოდათ დაბრუნებულიყვნენ თავის ქალაქში. მაგრამ მასინისამ ეს უკანასკნელი პირობაც არ შეასრულა: უკან გაბ-

რუნებულ უიარაღო ხალხს თავისი ცხენოსნები დაადევნა და თითქმის მთლიანად ამოაელეტინა. ამგვარად, სციპიონმა ყველაფერი ისევე მასინისას სასარგებლოდ გადასქრა.

ზიუხედავად ამ ბრძოლაში კართაგენის სავალალო ბედისა, რომს ხელთ ჰქონდა სასურველი საბაბი მისთვის ომის გამოცხადებისათვის: კართაგენმა დაარღვია 201 წლის ზავი, რაკი ის რომის დაუკითხავად ჩაება ბრძოლაში რომისავე მოკავშირე ნუმიდისათან!

რომი გამალებით შეუდგა არმიების შეკრებასა და ფლოტის მომზადებას.

კართაგენი თითქოს გაზოგრკვა მისგან ჩადენილი „დანაშაულისაგან“. რომისა და ნუმიდის მოსალოდნელი ორმხრივი დარტყმის თავიდან აცილების მიზნით კართაგენის ხელისუფლებამ „ხელი დაიბანა“ მომხდარი ამბის მონაწილეობისაგან და მისთვის მთელი პასუხისმგებლობა მხოლოდ პასდრუბალსა და კართალონს დააკისრა. სპეციალური დადგენილებით ორივეს სიკვდილი მიუსაჯეს, ხოლო რომში სასწრაფოდ ელჩობა გაგზავნეს.

კართაგენელი ელჩები ბოდიშს იხდიდნენ რომის სენატის წინაშე, ყველაფერს პასდრუბალსა და კართალონს აბრალებდნენ და მომავალში სრულ მორჩილებას აღუთქვამდნენ. — მაგრამ როცა ერთ-ერთმა სენატორმა მათ ჰკითხა: როგორ ზოხდა, რომ თქვენ დამნაშავე პასდრუბალსა და კართალონს სიკვდილი მიუსაჯეთ არა ომის დაწყებამდე, არამედ ახლა. დამარცხების შედეგ და ელჩებიც ახლა ჩამოხვედით და არა ადრე, ომის დაწყებამდეო, — კართაგენელები დაიბნენ და აღარ იცოდნენ რა ეპასუხნათ. მათ უთხრეს, რომ არადაშაკმაყოფილებელია თავის მართლება, ხოლო როცა კართაგენელებმა იკითხეს: თუ მართლაც ჩვენ დამნაშავეებად ვითვლებით, რით შეგვიძლია თქვენს წინაშე ამ დანაშაულის გამოსყიდვაო, — უპასუხეს: „თუ დააკმაყოფილებთ რომაელებსო“. ეს იყო და ეს, ამ ორაზროვანი სიტყვებით დაასრულა სენატმა მათთან ბჭობა. მეორე ელჩობამაც ვერ გამოარკვია, რას ნიშნავდა და რაში მდგომარეობდა „რომაელთა დაკმაყოფილება“. „თქვენ თვითონ კარგად იცითო“ — იყო პასუხი.

კართაგენის ელჩობის უნაყოფობას და ომის დაწყების გარღვევლობას დიდად შეუწყო ხელი, აგრეთვე. აფრიკის მეორე დიდი ქალაქის, კართაგენის კონკურენტისა და მტრის, უტიკას ახალმა ნაბიჯმა. სწორედ იმავე ხანებში უტიკის ელჩები რომში გამოცხადდნენ და თავიანთი ქალაქი მას ჩააბარეს. იმავე დღეს სენატი კაპიტოლიუმში შეიკრიბა და საბოლოოდ დაამტკიცა კართაგენისადმი ომის გამოცხადება.

ასე დაიწყო მესამე პუნიკური ომი, რომელიც სამ წელიწადს (149 — 146) გაგრძელდა. ამ ომის დაწყების ყველაზე დიდი მოსურნე მარკუს

პორციუს კატონი ვერ მოესწრო კართაგენის დანგრევას. მისი აკვირებული დევიზის განხორციელებას; ის გარდაიცვალა ომის დაწყების წელს (149).

149 წელს კონსულებად იყვნენ მ ა ნ ი უ ს მ ა ნ ი ლ ა უ ს ი და ლ უ - ც ი უ ს მ ა რ ც ი უ ს ც ე ნ ზ ო რ ი ნ ი. ორივე გაგზავნილ იქნენ სიცილიაში, საიდანაც უნდა მოეწყოთ ექსპედიცია აფრიკაში. მანილიუსი სარდლობდა სახმელეთო არმიას, ცენზორინი—ფლოტს. სულ რომაელთა სამხედრო ძალები შედგებოდა 200-მდე სხვადასხვა სახის გემისაგან. 80 000 ლეგიონერისაგან და 4 000 ცხენოსნისაგან. კონსულებს მკაცრად ევალებოდათ, რომ არავითარი პირობით არ შეეწყვიტათ საომარი მოქმედება. სანამ კართაგენს საძირკველამდე არ დაანგრევდნენ.

ომის გამოცხადებისა და დაწყების ამბავი ერთდროულად მოვიდა კართაგენში. ქალაქი საშინელ სასოწარკვეთილებაში ჩავარდა. სასწრაფოდ აირჩიეს 30 კაცისაგან შემდგარი ელჩობა, რომელსაც საგანგებოდ განუსაზღვრელი ძალაუფლება მიანიჭეს და გაგზავნეს რომში. სადაც მათ, საერთო მდგომარეობასთან შეფარდებით, თავიანთი შეხედულების მიხედვით უნდა ემოქმედათ და რადაც უნდა დასჯდომოდათ აღედგინათ მშვიდობიანობა.

ელჩები რომში იმ დროს ჩავიდნენ, როცა კონსულები უკვე სიცილიაში იყვნენ. სენატმა ასეთი პასუხი მისცა კართაგენელებს: საომარი მოქმედება შეწყდება იმ შემთხვევაში, თუ კართაგენი სიცილიაში მყოფ კონსულებს 30 დღის ვანმავლობაში ჩააბარებს 300 მიძევალს, წარჩინებული ოჯახების შვილებს. მაგრამ იმავე წუთში საიდუმლოდ აფრინეს კაცი სიცილიაში და აცნობეს კონსულებს მტკიცედ მდგარიყვნენ რომში მიღებული ბრძანების შესრულებაზე, ე. ი. არ შეეწყვიტათ ომი.

კართაგენელებსაც უკვე ნაკლებად სჯეროდათ, რომ ომის გზაზე დამდგარი მძვინვარე მტერი უკან გაბრუნდებოდა. მაგრამ მაინც მზად იყვნენ შეესრულებინათ ყველა პირობა, რომელსაც კი რომი მოითხოვდა მშვიდობიანობის აღდგენისათვის. ამიტომ ისინი სასწრაფოდ შეუდგნენ მიძევლების შეგროვებას. შემზარავი გლოვა-გოდებით ჩასვეს გემებში 300 ბავშვი და სიცილიისაკენ გაუყენეს.

კონსულებმა მიძევლები გაგზავნეს რომში, ხოლო კართაგენელებს უთხრეს, რომ ყველაფერს დანარჩენს, რაც საომარი მდგომარეობის შეწყვეტისათვისაა საჭირო, ეტყვიან უტიკაში.

რომაელთა არმიები დაუბრკოლებლად გადავიდნენ აფრიკის სანაპიროზე, ქ. უტიკაში. ფლოტი განლაგდა ქალაქის ნავსადგურში, სახმელეთო არმია კი იქ, სადაც ერთ დროს დაბანაკებული იყო სციპიონ აფრიკელი.

აქ შეპირებისამებრ გამოცხადდნენ კართაგენის ელჩებიც. ისინი გაატარეს მწყობრად დალაგებულ მრავალრიცხოვან ლეგიონთა შორის. მათ უფლებაც არ მისცეს მიახლოვებოდნენ ამალღებულ ადგილს, სადაც ლეგატებითა და სამხედრო ტრიბუნებით გარშემორტყმული კონსულები იდგნენ. ისინი შეაყენეს გაბმულ თოქთან, სადაც მათ შეეძლოთ ეთქვათ თავისი სიტყვა და მოესმინათ რომის ნება-სურვილი.

როცა ჰეროდმა კართაგენელებს სიტყვის უფლება მისცა, მათ ვრცლად ილაპარაკეს რომისა და კართაგენის უძველეს მეგობრობაზე, კავშირზე, კართაგენის ოდინდელ სიძლიერეზე, მაგრამ ბოროტი ფორტუნასაგან მის დაცემაზე; ასევე უნდა ფიქრობდნენ დღეს ძლიერების მწვერვალზე მყოფი რომაელებიც, რომლებიც თავიანთი შეუპოვებლობით სუსტთა მიმართ შესცოდებენ ყოვლისმძლე ბედისწერის წინაშე და ისევე დაისჯებიან, როგორც ამჟამად კართაგენელები არიან დაცემულნი. მაინც ვერ გაგვიგაა, რა დავაშავეთ რომის წინაშე; ნუთუ საკმარისი არ არის, რაც ჩვენ ტანჯვა-წამება და დამცირება გადავიტანეთ; ყოველგვარი თქვენი მოთხოვნა პირნათლად, უყოყმანოდ შევასრულეთ და ვასრულებთ; ჩაგაბარეთ მთელი ფლოტი, აღარ გვყავს არც ერთი სამხედრო ხომალდი. არც ერთი სპილო; ყოველთვის, როცა წოითხოვდით, მძევლებს გაბარებდით; სისტემატურად გიხდიდით ხარკს, როცა ჩვენ მის მიღებას სხვებისაგან ვიყავით ჩვეული; ასე მორჩილად და ერთგულად ვიყავით განწყობილი თქვენს მამებთან, რომლებთანაც ჩვენ ბრძოლა გვექონდა, და ისინი ამის შემდეგ ჩვენი ერთგული მოკავშირეები იყვნენ; მაგრამ თქვენთვის, მათი შვილებისათვის, რომლებთანაც ჩვენ არასოდეს ომი არ გვექონია, ხელშეკრულების რა პუნქტი არის დარღვეული, რომ ასე უეცრად, ომის გამოუცხადებლად გვესხმით თავს? თუ მასინისას დაუსრულებელი, თავხედური თავდასხმების წინააღმდეგ ხელის აღმართვა ჩვენს დანაშაულად მიგაჩნიათ, მაშინ რაღა უნდა გსურდეთ მეტი, როცა ამ ბრძოლაშიც დავმარცხდით, მასინისამაც რაც მოითხოვა, ყველაფერი წაიღო და ომის წამოწყების მოთავეებსაც სიკვდილი მიუღსაჯეთ, ელჩებიც გამოვიგზავნეთ და ყველაფერი გაცნობეთ; მძევლებიც თავის დროზე ჩაგაბარეთ; ხოლო თქვენი სენატის უკანასკნელი დადგენილებით, მძევლების ჩაბარების შემდეგ, უნდა შეგეწყვიტათ ლაშქრობა ჩვენს წინააღმდეგ.

მაშინ წამოდგა კონსული მარციუს ცენზორინი და წარმოსთქვა: ომის დაწყების მიზეზი კართაგენელებმა ძალიან კარგად იცით, და ის თქვენ მოისმინეთ რომის სენატში; რაც შეეხება მძევლების თავის დროზე ჩაბარებას, ამისათვის ქების ღირსი ხართ სწორედ. მაგრამ როცა თქვენ გაიძახით, რომ მშვიდობიანობა გსურთ, რაღა საჭიროა იმდენი შეიარაღება, რომელიც კართაგენს აქვს? ამიტომ, თუ მშვიდობიანობის

აღდგენა გასურთ, დაუყოვნებლივ ჩაგვაბარეთ მთელი შეიარაღება — როგორც სახელმწიფო, ასევე კერძო პიროვნებათა საკუთრეული.

კონსულის ამ მოთხოვნაზე კართაგენელებმა განაცხადეს, რომ ქალაქის განიარაღება მეტად საშიშია, რადგან სიკვდილმისჯილმა ჰასდრუბალმა გაქცევა მოახერხა, 20 000 მეომრისაგან შემდგარი არმია ჩამოაყალიბა, დაბანაკებულია კართაგენის მახლობლად და ხელსაყრელ დროს უცდის მასზე თავდასასხმელად და ვინ დაგვიცავს ჩვენ იარაღი რომ ჩაგვაბართო. ამაზე კონსულებმა მიუგეს: ჩვენ თვითონ ვიზრუნებთ კართაგენის დაცვაზეო.

კართაგენელები დამორჩილდნენ. იარაღის ჩასაბარებლად ელჩებთან ერთად კართაგენში გაგზავნილ იქნენ პ. კორნელიუს ნაზიკა და გნ. კორნელიუს ესპანელი. მრავალი ორთვალა და ურემი დიტივირთა უამრავი საკუთრეულით. შეგროვდა 200 000 სხვადასხვა სახის იარაღის კომპლექტი, აურაცხელი ისარი და სათხელი, 3 000 კატაპულტა, ისრებისა და ქვების მფრქვეველი მანქანები. საინტერესო და უცნაური იყო სანახაობა, როცა მტრებს თვითონ მიჰქონდათ მტრებთან საკუთარი საბრძოლო საკუთრეული.

იარაღთა ღა ელჩებთან ერთად კონსულთა წინაშე გამოცხადდნენ კართაგენის სენატორები, ქურუმები და წარჩინებული მოქალაქენი. ყველა გრძნობდა, რომ ეს იყო უკანასკნელი, რისი შესრულებაც შეეძლო კართაგენს.

სამარისებური სიჩუმე ჩამოვარდა. წაშლდა მარციუს ცენზორინი. კარგა ხანს მდუმარებდა კონსული მრისხანე გამომეტყველებით. ბოლოს მკაცრად და მტკიცედ განაცხადა: მორჩილებისათვის და ყველა მოთხოვნების დაკმაყოფილებისათვის საჭებარი ხართ, კართაგენელებო. მაგრამ ასეთ მძიმე მდგომარეობაში საჭიროა მოკლედ თქმა. მაშ, გამაგრდით და მოისმინეთ საბოლოო ბრძანება რომის სენატისა: კართაგენის მოსახლეობა უნდა აიყაროს და დასტოვოს თავისი ქალაქი. მათ უფლება ეძლევათ დასახლდნენ სადაც სურთ თავის ტერიტორიაზე, მხოლოდ ზღვიდან დაშორებით არანაკლები 80 სტადიონისა (15 კმ); ხოლო თვით ქალაქი კართაგენი საძირკველამდე უნდა დაინგრეს!!!

თითქოს მეხი დასცემოდეთ თავზე კართაგენელებს. ისინი საშინელი ღრიალითა და გოდებით დაემხნენ დედამიწაზე. კარგა ხნის გმინვის, თმების გლეჯისა და პირის ხოკვის შემდეგ კიდევ ერთხელ ითხოვეს საქმის გადადება, სანამ ახალ ელჩობას გაგზავნიდნენ რომში, მაგრამ ამაზედაც უარი მიიღეს.

საშინელი ამბავი მიჰქონდათ კართაგენელ ელჩებს თავისი ქალაქისათვის. ზოგმა მათგანმა გზიდან გადაუხვია და სამუდამოდ სთქვა უარი


განწირულ ქალაქში დაბრუნებაზე. მცხოვრებლები მთელი დღეების განმავლობაში კედლებიდან მოუთმენლად გასცქეროდნენ უტიკიდან მომავალ გზას. მრავალრიცხოვანი ბრბოები მისცივდნენ ქალაქში შემოსულ დაღვრემილ ელჩებს. პირველად სენატმა მოისმინა რომაელთა მკაცრი ბრძანება, ხოლო როცა ის ხალხს გამოუცხადეს, კართაგენი არნახული აღშფოთებისა და დღევანდელ გრიგალმა მოიცვა. ქალაქის მთელი მოსახლეობა საშინელი ბლავილით მივარდა სენატის შენობას. გახელებულმა ბრბოებმა იქვე დაჰკლიჯეს ისინი, რომლებიც განსაკუთრებული აქტივობით მოითხოვდნენ მძევლებისა და შეიარაღების გაცემას. სიკვდილის მსხვერპლი შეიქნენ ელჩებიც, რომელთა დანაშაული მხოლოდ ის იყო, რომ ასეთი თავზარდამცემი ამბის მოშტანი იყვნენ. ხალხი გააფთრებით დაერია ქალაქში მყოფ იტალიელებს და საშინელი წამებით დახოცეს. სასოწარკვეთილი ადამიანები ტირილითა და გულში მუშტების ცემით შერბოდნენ დაცარიელებულ არსენალებში და საღვთო ტაძრებში, ჰკიცხავდნენ ღმერთებს, რომლებმაც „საკუთარი თავის დაცვაც კი ვერ შესძლეს“.

სასოწარკვეთისა და პანიკის ქარიშხალმა გადაიარა. განწირულ ქალაქს უექველი დაღუპვის მოახლოებამ არაჩვეულებრივი სიმამაცისა და თავგანწირულობის სული შთაბერა. ყველა, როგორც ერთი, მოითხოვდა ბრძოლას უკანასკნელ სისხლის წვეთამდე. ასეთივე იყო სენატის დადგენილებაც. ქალაქი თავბრუდამხვევი ენერგიით შეუდგა თავდაცვისათვის სამზადისს. ქალაქის შიგნით სარდლად აირჩიეს ჰასდრუბალი, რომელიც დედით მასინისას შვილიშვილი იყო. იმავდროულად გაგზავნეს კაცი მეორე ჰასდრუბალთან, რომელიც თავისი არჩევით კართაგენის ახლოს იდგა. სთხოვეს მას დაევიწყებინა მისადმი მიყენებული წყენა, მიეღო მთავარსარდლობა და მიშველებოდა მშობლიურ ქალაქს ასეთ მძიმე პირობებში.

კართაგენელებმა ისევ გაგზავნეს კაცები კონსულებთან და რომში ელჩობის გაგზავნისათვის 30 დღიანი დაზავება ითხოვეს. მათ სრულიად არ ჰქონდათ იმედი, რომ ამ ელჩობიდან რაიმე გამოვიდოდა, მაგრამ სურდათ დრო მოეგოთ თავდაცვის მომზადებისათვის და დაერწმუნებინათ მტრები თავიანთ სასოწარკვეთასა და სრულს უიმედობაში.

მთელი დღე-ღამეების განმავლობაში მოსახლეობა შეუსვენებლივ შრომობდა. კაცი და ქალი, მოხუცი და ბავშვი, ყველა ერთნაირად იღწვოდა მშობლიური ქალაქის გადასარჩენად. სახელმწიფო და სამონასტრო ადგილები, შენობები იარაღის სახელოსნოებად აქციეს; მრავალი შენობა დაანგრიეს და თავდაცვის მანქანების მასალად გამოიყენეს. დღე და ღამე განუწყვეტლივ სჭედდნენ საქურველს, მახვილებს, ფარებს, შუბებს, სათხედებს, ისრებს და „საარტილერიო“ მანქანებს. ქა-

ლები ნაწნავეებს იჭრიდნენ მშვილდების ლარებისა და თოკებისათვის. რომელთა ბანაკში ეჭვი არავის ეპარებოდა, რომ უიარალოდ დარჩენილ კართაგენში სრული დაცემულობა სუფევდა და დღეს თუ ხვალ იქიდან გამოცხადდებოდა კაცი, რომელიც აუწყებდა მათ ქალაქიდან გასახლების თანხმობასაც. კართაგენელთა უსასოობას ადასტურებდა რომში ახალი ელჩობის გაგზავნისა და დროებითი ზავის თხოვნაც.



კართაგენი.

რასაკვირველია. კონსულებმა ამ თხოვნასაც უარით უპასუხეს, მაგრამ კართაგენზე ლაშქრობას არ ჩქარობდნენ. ისინი, თითქოს სიამოვნებდნენ იმ საზარელი კოწმარით, რომელიც, მათი აზრით, კართაგენში საშინელი მოლოდინით იქნებოდა გამოწვეული.

ჯერჯერობით კონსულები ნუმიდიის საქმეზე უფრო ფიქრობდნენ, ვიდრე კართაგენზე, საითაც დღეს თუ ხვალ სრულიად არჩეინად გაისეირნებდნენ თავისი საყვარელი საქმის შესასრულებლად: საძარცვაად, სანგრევად, მოსახლეობის დასამონებლად ან გასაყლელად. საქმე იმაშია, რომ მასინისა უკმაყოფილო იყო რომელთა ასე მოულოდნელად ჩამოსვლით. ის მოწადინებული იყო თვითონ ჩაეგდო კართაგენი ხელში და არ სურდა მისი დაპყრობის მონაწილე სხვა ვინმე, თუნდაც რო-

მი ყოფილიყო. უფრო მეტ უკმაყოფილებას მასინისა კედევ იმიტომ გაძოსთქვამდა, რომ რომაელებმა ჩვეულებრივად, ადრინდელად. არაფერი ჰკითხეს კართაგენის საქმეზე. ამიტომ, როცა კონსულებმა დაგვიანებით შეუთვალეს გამოცხადებულო მათთან ერთობლივი მოქმედებისათვის, მასინისამ საკმაოდ მკვახედ უპასუხა, რომ მაშინ გაუგზავნიდა მაშველ ძალებს, როცა ამის საჭიროებას თვითონ დაინახავდა.

რომაელებს უსათუოდ, რამდენიმე დღით მაინც, დააბრკოლებდა სურსათ-სანოვავის საკითხიც, რადგან ადგილობრივი ოლქების ნაწილი ჭერჭერობით ჰასდრუბალს ეჭირა, ხოლო დანარჩენი რაიონებიდან პროდუქტთა მარაგი კონსულებს საკმარისად არ მიაჩნდათ.

ასე გავიდა ერთი თვე და რომაელები დაიძრენ კართაგენისაკენ. როგორი უნდა ყოფილიყო მათი განცვიფრება და შეძრწუნება, როდესაც ქალაქი თავდაცვისათვის სრულ მზადყოფნაში დახვდათ!

კართაგენი ისედაც მიუვალ ციხე-სიმაგრეს წარმოადგენდა. ის მდებარეობდა ზღვაში (ტუნისის ყურეში) შეჭრილ მაღალ ნახევარკუნძულზე. ჩრდილოეთიდან და აღმოსავლეთიდან ქალაქი დაცული იყო ციცაბო კლდეებითა და ქვის მტკიცე კედლებით. დასავლეთიდან, საიდანაც ის უერთდებოდა კონტინენტს, იცავდნენ ქვის კედლები; სულ სამი კედელი ტერასების მსგავსად იყო ერთმანეთზე უფრო მაღლა აღმართული. თითოეული ამ კედლის სიმაღლე 15 მეტრს უღრდა. ხოლო სიგანე — 8½ მეტრს. კედლებზე, ყოველი 400 მეტრის მანძილზე აღმართული იყო საგუშავო და თავდაცვითი კოშკები. კედელთა შორის არსებობდა სამხედრო ყაზარმები, იარაღისა და სურსათის საწყობები, სპილოებისა და ცხენების თავლები. კედლების სამხრეთის დაბოლოებას მტკიცედ ეკვროდა მაღალ კლდოვან ბორცვზე აღმართული ციხე-სიმაგრე ბირსა, აკროპოლისი, რომლის გარშემოწერილობა 3 000 მეტრს უღრდა. ბირსას თავზე, ცენტრში, აღმართული იყო ფინიკელთა მკურნალი ღმერთის, ეშმუნის დიდებული ტაძარი, რომელსაც ქალაქი 60 საფეხურიანი ქვის კიბით უკავშირდებოდა. სამხრეთით მიემართებოდა ზღვაში შეჭრილი ხმელეთის ვიწრო ზოლი. ქალაქს სამხრეთ-აღმოსავლეთიდან ეკვროდა დიდი ნავსაყუდელი, რომლის ჩაკეტვა ჯაჭვებითაც შეიძლებოდა ზღვის მხრიდან. ეს ნავსადგური შედგებოდა ორი ნაწილისაგან: სამხრეთით სავაჭრო პორტი, ხოლო ჩრდილოეთით, ე. წ. კოთონი, რაც მკარე პორტს ნიშნავს. აქ თავს იყრიდნენ სამხედრო გემები. კოთონი მრგვლად იყო ხმელეთში შეჭრილი და ყოველი მხრიდან შესანიშნავად იყო დაცული. ორვე პორტს ერთიმეორისაგან კედელი ჰყოფდა ისე, რომ კოთონი, ე. ი. სამხედრო ნავსადგური, ქალაქის დაცვის შიგნით იყო მოქცეული. თვითონ კართაგენი ორი ნაწილისაგან შედგებოდა: სამხრეთით, ბირსასთან, — ძველი ქალაქი. მის

ჩრდილოეთით — ახალი ქალაქი. სულ ბოლოს, კიდევ უფრო ჩრდილოეთით—გარეუბანი. ე. წ. მ ა გ ა ლ ი ა. რომელიც თავისი მშენებელი ბუნებით. კლიმატითა და ბალებით შესანიშნავ კურორტს წარმოადგენდა.

ასეთი იყო კართაგენი როგორც ციხე-სიმაგრე, რომლის ალება მაშინ. როცა მოსი მრავალრიცხოვანი მოსახლეობაც მზად იყო სიცოცხლეს არ დაეზოგა მშობლიური ქალაქის შენარჩუნებისათვის, მეტად ძნელ საქმეს წარმოადგენდა.

კართაგენზე სისტემატური იერიშების წარმოებასა და ალყას კიდევ მეტად გააძნელებდა ჰასდრუბალის მრავალრიცხოვანი არმია, რომელიც მთლიანად ფლობდა ქალაქის გარე რაიონებს, სულ 800-მდე დასახლებულ პუნქტს. გარდა ამისა, ყველა იცნობდა კართაგენელთა არმიაში მყოფი ცხენოსანი ესკადრონების მამაც ატამანს ჰ ი მ ი ლ კ ო ნ . თ ა მ ე - ი ა ს. რომელსაც დევალებული ჰქონდა პარტიზანული თავდასხმებით თავზარი დაეცა და შეევეწროებიან რომაელთა ავანპოსტები.

მასინისაც ხომ ჭერჭერობით თავს იკავებდა რომაელებისთვის დახმარებისაგან.

კონსულებმა გაინაწილეს შეტევის უბნები. მანილიუსმა დასავლეთიდან დასტრა სახმელეთო არმია, ხოლო ცენზორინმა ფლოტი დაიწყო შეტევა სამხრეთიდან. ტუნისის ყურედან. რომაელთა პირველივე შეტევები სრული უშედეგობით დამთავრდა. განსაკუთრებით ზანტად და უნაყოფოდ მოქმედებდა მანილიუსი.

ცენზორინის არმია ქაობიან ადგილებში იყო დაბანაკებული. კონსულმა სცადა ხმელეთის სიღრმეში გადაეყვანა არმია და შესულიყო იქვე მდებარე ტყეში, სადაც მას სურდა ხის მასალა გამოეყენებინა საიერიშო მანქანათა ასაგებად. მაგრამ წინსვლას ხელს უშლიდა ტუნისის ყურის აღმოსავლეთით ციხე-სიმაგრე, ნ ე ე რ ი ს შ ი გამაგრებული ჰასდრუბალის არმია. აქედან სრულიად მოულოდნელად გამოიჭრენ ჰიმბილკონ თამეიას ცხენოსანი რაზმები და ცნარე შეტაკებაში 500 კაცი მოუკლეს დამფრთხალ რომაელებს. თვითონ კი სრულიად უვნებლად გაქუსლეს უკან.

რომაელებმა მაინც მოახერხეს ტყიდან მასალის გამოტანა და საიერიშო მანქანების აგება. მოხერხდა სამხრეთის კედლის გარღვევა, მაგრამ იმ დღეს მაინც ვერ შესძლეს ქალაქში შეჭრა, ხოლო ღამით კართაგენელებმა ნაწილობრივ მოასწრეს დაზიანებული კედლის შეკეთება. გარდა ამისა, ისინი მაშხალებითა და იარაღით ხელში გამოიჭრენ კედელს გარეთ და ცეცხლი გაუჩინეს მტრის საიერიშო მანქანებს. მეორედღეს რომაელებს აღარ შეეძლოთ მანქანების გამოყენება. მაგრამ კონსულმა მაინც ბრძანა გარღვეულ კედელში შეჭრა, მიუხედავად

იმისა, რომ აქ კართაგენელთა მრავალრიცხოვანი რიგები მზად იყვნენ უკუეგდოთ მტრის იერიში.

სასტიკი ხელჩართული ბრძოლა რომაელთა მარცხით დამთავრდა. უკან გამოქცეული ლეგიონერები ველარ ასწრებდნენ კედლის ნანგრევებიდან გამოხტომას და ილუპებოდნენ. უთუოდ მეტი უნდა ყოფილიყო მსხვერპლი, რომ განსაკუთრებული წინდახედულობა არ გამოეჩინა სამხედრო ტრიბუნ ს ც ი პ ი ო ნ ე მ ი ლ ი ა ნ ე ს, რომელმაც აღრევე უარპყო ქალაქში შეჭრა და თავისი კოპორტა კედელს გარეთ, გარღვეული ადგილის ორივე მხარეს ჩაასაფრა. უკუქცეულ რომაელებზე გამოდევნებულ კართაგენელებს მისი მეომრები ელობებოდნენ და ამრიგად არჩენდნენ დასალუპად განწირულ თავისიანებს.

ასეთმა წინდახედულებამ კიდევ უფრო აამაღლა ახალგაზრდა სციპიონის ავტორიტეტი. მან სრულიად დაჩრდილა ჯიუტი და უხიაგი ცენზორინი და კიდევ მეტად ზანტი მანილიუსი.

სწორედ ეს ახალგაზრდა სამხედრო ტრიბუნი იყო ის სციპიონ ემილიანე, რომელიც მესამე პუნიკური ომის დაწყებამდე, 151 წელს მთიდან დასცქეროდა კართაგენელებისა და ნუმიდიელების სისხლისმღვრელ ბრძოლას, ხოლო შეძდეგ ორივე მებრძოლმა მხარემ მას სთხოვა შეამავლობა და „სამართლის დადგენა“, თითქოს ის ოლიმპოს მთაზე მდგარი ზევსი ყოფილიყოს, ტროელთა და ბერძენთა ომების მსაჯული.

პუბლიუს კორნელიუს სციპიონ ემილიანე, პიდნას ომში გამარჯვებული სარდლის ლუციუს ემილიუს პავლეს შვილი იყო. მან კორნელიუს სციპიონის გვარი მიიღო სახელოვანი სარდლის სციპიონ აფრიკელის ვაჟისაგან, რომელსაც ის ნაშვილები ჰყავდა. ამგვარად, ის პანიბალის მძლეველის შვილიშვილად ითვლებოდა (ემილიუს პავლეს ცოლად ხომ სციპიონის ასული ჰყავდა).

ახალგაზრდა სციპიონ ემილიანემ პირველად სახელი გაითქვა პიდნას ბრძოლაში, სადაც ის მამის სარდლობის ქვეშ არაჩვეულებრივი სიმამაცით იბრძოდა ყველაზე სახიფათო და საპასუხისმგებლო უბნებზე. შემდეგ ის ესპანეთის ფრონტებზე კრეფდა ვაჟკაცობის გვირგვინებს, ხოლო ახლა, მესამე პუნიკურ ომში იხვეწდა უებრო მეომრისა და გამპრიახი სამხედრო მეთაურის სახელს. კართაგენელებთან ბრძოლის მთელი მომდევნო ისტორია სავსე იყო სციპიონ ემილიანეს სიკისკასით, წინდახედულობით, შორსმხედველობით. მებრძოლები მას სთვლიდნენ ნამდვილ სარდლად. მოიგონებდნენ მის სახელოვან წინაპრებს (ორივე პავლე, სციპიონ აფრიკელი) და დაასკენიდნენ, რომ მას, სციპიონ აფრიკელის მსგავსად, „ყოვლისმძლე იუპიტერი მფარველობდა“. ყველა პატივით იგონებდა პომპეროსის სიტყვებს, რომლებიც მოხუც კა-

ტონს ვადაუტანია ახალგაზრდა სციპიონ ემილიანეზე და მის გარშემო ზყოფ რომაელებზე: „ის ერთია გონიერი ვაჟკაცი, დანარჩენები კი მოხეტიალე აჩრდილები არიან“¹. ამ სიტყვებით სიკვდილის სარეცელზე მყოფი კატონი თავისი სასურველი მიზნის, კართაგენის დანგრევის განხორციელებას ანდერძად სციპიონ ემილიანეს უტოვებდა.

შუა ივლისში, აფრიკულ სიციხე-პაპანაქებასა და ქაობიან დახშულ ადგილებში, სადაც დაბანაკებული იყო ცენზორინის არმია, გაჩნდა საშიშნელი ავადმყოფობანი. კონსულმა ზღვაზე გადაიყვანა არმია. აქ, საზღვაო პორტის კედლებიდან, კართაგენელები რომაელთა ხომალდებს თავზე ასხამდნენ ცეცხლმოკიდებულ კუპრს.

შემოდგომაზე ცენზორინი გაემგზავრა რომში, სადაც მას ხელმძღვანელობა უნდა გაეწია მომავალი წლის მაგისტრატთა არჩევნებისათვის. კართაგენელები კიდევ უფრო აქტიურად მოქმედებდნენ მანილიუსის წინააღმდეგ, რომელიც ახლა ორივე არმიის სარდლად ითვლებოდა. ერთ ღამეს კართაგენელებმა მოახერხეს კიდევ რომაელთა ბანაკში შეჭრა. არმია სრული განადგურებისაგან იხსნა ისევ სციპიონმა, რომელმაც ბანაკის მოპირდაპირე კარებიდან სასწრაფოდ გაიყვანა თავისი ცხენოსანი რაზმები და სრულიად მოულოდნელად ზურგიდან დაესხა მტერს. კართაგენელები იძულებული შეიქნენ უკან დაეხიათ და ისევ კედლებისათვის შეეფარებინათ თავი.

მანილიუსი მთლიანად თავდაცვაზე გადავიდა და კართაგენზე შეტევას აღარც კი ფიქრობდა. მტრის ახალი თავდასხმის უვნებელსაყოფად მან თავის ბანაკს თხრილებს გარდა ქვეთიკრის კედლებიც კი შემოავლო. ამის შემდეგ ის მხოლოდ იმით კმაყოფილდებოდა, რომ ყოველ სამხედრო ტრიბუნს ზორიგეობით აბარებდა 10 000 ქვეით მეომარს, 2 000 ცხენოსანს და აგზავნიდა კართაგენის გარშემო ოლქების ასაოხრებლად, ხე-ტყის, სურსათ-სანოვავისა და თივის შესაგროვებლად.

მაგრამ ამასაც ხშირად დიდი მსხვერპლი მოსდევდა. როგორც კი რომაელები უწესრიგოდ მოედებოდნენ ტყესა და მინდორს, სწორედ მაშინ, თითქოს მიწიდან ამოძვრებოდა ჰიმლიკონ თამეია თავისი მფრინავი რაზმებით და არწივივით დაუჭროლებდა მათ. ჰიმლიკონი გამოსვლას ვერ ბედავდა მხოლოდ მაშინ, როცა მძარცველ ექსპედიციას მეთაურობდა სციპიონი, რომელიც სრული წესრიგისა და საბრძოლო ღზადყოფნის პირობებში ასრულებდა დაკისრებულ ამოცანას.

სციპიონმა კიდევ ბევრჯერ დაიხსნა განსაცდელისაგან მოუქნელი მანილიუსი. ამ მხრივ ყველაზე უფრო საყურადღებოა საბრძოლო

¹ ოდისესის სიტყვები ტრეპიოსის შესახებ, პომპროსი, ოდისეა, 494.

ეპიზოდი, რომელიც დაკავშირებულია ციხე-სიმაგრე ნეფერისთან. აქ თავისი არმიით დაბანაკებული იყო ჰასდრუბალი, რომელიც აქედანვე აწყობდა თარეშს რომაელთა ბანაკებზე.

სციპიონი ჯერჯერობით წინააღმდეგი იყო ნეფერისზე შეტევისა. ის ასაბუთებდა, რომ შეტევა მიუვალ ციხე-სიმაგრეზე, რომელსაც გარს არტყია ციკაბოები, ღელეები და გაუვალი ღრანტეები. ასეთ პირობებში, საკმაო საფორტიფიკაციო მოწყობილობათა გარეშე უთუოდ მარცხს გამოიწვევდა. მაგრამ სხვა სამხედრო მეთაურები, რომლებაც სციპიონის წარმატებით შურით იყვნენ აღვსილნი, მშინძრობას მიაწერდნენ მას და აქეზებდნენ კონსულს არ დაეჯერებინა სციპიონისათვის, რომელიც მას, ჩანდა, მთავარსარდლობაშიც ეცილებოდა.

კონსულმა ბრძანა და არმიამ გადალახა დახრამულნაპირებიანი პატარა მდინარე და შეუდგა ნეფერისის ციკაბოებს. ჰასდრუბალმა ზემოდან სასწრაფოდ დასძრა თავისი არმია. პირველი შეტაკებისთანავე ქვემოთ მოქცეული რომაელები დამარცხდნენ და უკანვე უწესრიგოდ გამოიქცნენ. ისინი ვეღარ ახერხებდნენ საშინელი ხრამებიდან ზემოთ ამოსვლას და მტრის ისრებისაგან უწყალოდ იხოცებოდნენ. ბრძოლაში დაიბოცა სამი სამხედრო ტრიბუნი, რომლებიც განსაკუთრებით კრიჭაში უღდნენ სციპიონს.

რომაელთა არმია სრული განადგურებისაგან ისევ სციპიონის მოსაზრებულობამ იხსნა. მან თავისი კოჰორტა და 300 ცხენოსნისაგან შემდგარი ესკადრონი ფლანგზე გაიყვანა და ისრის სეტყვა დააყარა მოწინააღმდეგეს. ჰასდრუბალი იძულებული გახდა მთელი ძალები მიემართა მის წინააღმდეგ. ამასობაში რომაელთა არმიის ძირითადმა ნაწილმა, რომელსაც თვით მანილიუსი სარდლობდა, გადაასწრო საბედისწერო ადგილს. თვითონ სციპიონმაც ორგანიზებული უკანდახევით, თუმცა დიდი მსხვერპლის გაღებით, მოახერხა სამშვიდობოზე გასვლა.

ამ ამბის შემდეგ აფრიკაში ჩამოსულმა კომისიამ რომს აცნობა საომარი მდგომარეობის ნამდვილი ვითარება, რაც რომაელთა სრულ წარუმატებლობაში გამოიხატებოდა. მაშინ სენატმა ელჩები გაგზავნა ნუმიდიაში, მასინასთან დახმარების სათხოვნად. მაგრამ ცოცხალს ვეღარ მიუსწრეს ნუმიდიის ზეფეს.

90 წლის მასინისა გარდაიცვალა. მას სამი კანონიერი მემკვიდრე დარჩა, სამივე ერთიმეორისაგან სრულიად განსხვავებული ხასიათისა. სულთმობრძავმა მეფემ შვილებს შორის სამეფოს განაწილებაზე სათათბიროდ და რჩევის საკითხავად მიიწვია სციპიონ ემილიანე, რომლის ბაბუასთანაც (სციპიონ უფროსთან) მას ახალგაზრდობაში დიდი მეგობრობა ჰქონდა.

სციპიონი სასწრაფოდ გაეშურა ცირტაში, ნუმიდიის დედაქალაქში, მაგრამ მასინისას ცოცხალს ვეღარ მიუხსწრო. მეფეს მაინც დაებარებინა შვილებისათვის, დაეჭვებინათ სციპიონისათვის.

სციპიონმა ჯერ უხვად დააჯილდოვა მასინისას მრავალრიცხოვანი უკანონო მემკვიდრეები (მათ შორის ერთი ოთხი წლისა იყო), როგორც ნაანდერძევი ჰქონდა მოხუც მეფეს; შემდეგ კი კანონიერ უფლისწულებს შემდეგნაირად გაუნაწილა სახელმწიფოს მართვის ფუნქციები: მიციპსას, რომელიც ყველაზე უფროსიც იყო და მჭერმეტყველიც, ჩააბარა უმაღლესი ხელისუფლება, პირველ რიგში სატახტო ქალაქი ცირტა და სამეფო სასახლის მმართველობა; მომდევნო ძმას, გულუსას, როგორც მამაც მეთმარსა და ჰკვიან სარდალს, ჩააბარა სამხედრო საქმეების ხელმძღვანელობა; ხოლო მესამეს, უმცროს ძმას, რომელსაც სახელად მასტანაბა ერქვა, როგორც სამართლიანობის დიდ მოყვარულს, სამოსამართლო უწყებათა მეთაურობა გადასცა.

სციპიონმა ჩვეული თავაზიანობითა და საზრიანობით სწრაფად მოხიბლა ნუმიდიელთა სასახლის კარი. მის წინადადებაზე, კართაგენის წინააღმდეგ, ნუმიდიის მონაწილეობის შესახებ, ახალგაზრდა მეფეები უყოყმანოდ დათანხმდნენ, და გულუსა საუკეთესო ნუმიდიური მხედრობით თან ეახლა რომაელთა ბანაკში დაბრუნებულ სციპიონს.

ამგვარად, ნაკლი, რომელიც ნუმიდიის დროებითი ნეიტრალიტეტით რომაელთა ბანაკში ძალზე შესამჩნევი იყო, სციპიონის მეოხებით შევსებულ იქნა. თითქოს, მკვდრეთიდან ამდგარ სციპიონ უფროსს თან ახლდა იქიდანვე მობრუნებული ახალგაზრდა მასინისა — გულუსა, თავისი შესანიშნავი მხედრობით.

სციპიონის ახალი დიდი მიღწევა იყო ისიც, რომ მან ურთიერთობა გააბა მტრის კავალერიის უფროსთან, ჰიმილკონ თამეიასთან, რომელიც ბოლოს გადმოიბირა კიდევ, როგორც ჩანს, ჰიმილკონი მეტად ჩაუფიქრებია ნუმიდიური კავალერიით რომაელთა გაძლიერებას; შესაძლოა ამას ჰასდრუბალთან მისი უთანხმოებაც დაერთო, და 148 წლის დასაწყისში რომაელთა ბანაკში ჩვენ ვხედავთ მამაც თამეიას თავისი 2 200 ლიბიელი ცხენოსნით.

ამის შემდეგ სციპიონი ჰიმილკონ თამეიას თანხლებით გაეშურა რომში. ჯარისკაცები მას დიდი ზემოთ მიაცილებდნენ ზღვამდე, თან უსურვებდნენ აფრიკაში კონსულად დაბრუნებას, რადგან მათი აზრით, მხოლოდ მას ერთს შეეძლო კართაგენის აღება.

რომი დიდი ზემოთ შეხვდა აფრიკის გმირსა და ახალ მოკავშირეს. ჰიმილკონი სენატის განკარგულებით უხვად დააჯილდოვეს: მიუძღვნეს ძოწეულის ტანსაცმელი ოქროს შესაკრავებით, საუკეთესო ცხენი ოქროს მოსართავეებით, ძვირფასი იარაღის კომპლექტი და უხვად ფული.

აღუთქვეს კიდევ ზეტი, თუ ის ამიერადან რომაელებთან ერთად თავგამოდებით იომებდა კართაგენის წინააღმდეგ. ჰიმილკონმა ამაზე ფიცადასლო და ისევ აფრიკაში დაბრუნდა.

სწორედ იმავე ხანებში (148 წლის მარტი) აფრიკაში ჩავიდნენ ახალი კონსულები: სახმელეთო არმიის სარდალი ლუციუს კალპურნიუს პიზონი და აღმირალი ლუციუს კოსტილიუს მანციუსი.

ახლად ჩამოსულმა კონსულებმა კიდევ მეტი უმოქმედობა და ბედოვლათობა გამოამქლავნეს. მათ სრულიად შესწყვიტეს კართაგენზე შეტევები და კმაყოფილებოდნენ აფრიკის სხვა ქალაქებზე რავდასხმით. მთელი წლის განმავლობაში სრულიად უშედეგოდ აწყვეტდნენ ჯარებს კართაგენის სამხრეთ-აღმოსავლეთით მდებარე ციხე-სიმაგრეებს (კლუპეა, ნეპოლისი, ჰიპონ დიარიტი და სხვ.).

კართაგენელებს კიდევ მეტად უძლიერდებოდათ სულიერი სიმტკიცე და სიამაყე; ეს განსაკუთრებით მას შემდეგ, რაც რომაელთა ბანაკში მყოფ ნუმიდიელებს გამოეყო ერთ-ერთი მამაცი ატამანი ბითიასი და 800 მხედრს თანსლებით გამოცხადდა კართაგენში. კართაგენელებმა ისიც იცოდნენ, რომ ნუმიდიის ახალი მეფეები, მიციპსა და მასტანაბა, მხოლოდ სიტყვით აღუთქვამდნენ რომაელებს შემდგომ დახმარებას, ჯარს, იარაღს და ფულს, ხოლო საქმით, გულუხვს ჩამოსვლის შემდეგ. ასეთი დახმარება არსად ჩანდა. კართაგენელები ახლა სრულიად უშიშრად დათარეშობდნენ აფრიკაში; ყველგან, ქალაქებსა და სოფლებში, დასცინოდნენ რომაელებს, უწოდებდნენ მათ მხდალებს, მოიგონებდნენ მათ დამარცხებებს უიარაღო კართაგენზე, ნეფერისტან და აფრიკის სანაპირო ქალაქებთან. გარდა ამისა, მათ ურთიერთობა გააბეს ნუმიდიის მეფეებთან, მავრებთან და იმ დროს მაკედონიაში აჯანყებულ ცრუფილიპესთან.

მაგრამ როგორც ყოველთვის, ახლაც. ასეთ წარმატებათა საფეხურზე. კართაგენელთა შორის დაიწყო პარტაათა უთანხმოება და ურთიერთ ბრძოლა. ქალაქგარეთ მყოფი არმიის სარდალმა ჰასდრუბალმა ცილისმწამებლური ქსელი გააბა შიგნით სარდალად არჩეულ ჰასდრუბალის წინააღმდეგ. ის ამ უქანასქნელს ბრალს სდებდა ღალატში. სარგებლობდა იმით, რომ ეს კაცი, როგორც მასინისას შვილიშვილი, დისწულად მოუდიოდა რომაელთა ბანაკში მყოფ გულუხვს, და ასაბუთებდა, რომ ბიძა-დისწულს შორის უკვე გაბმული არის საიდუმლო-გამცემლური ურთიერთობა. ბრალდებულმა ჰასდრუბალმა. რომელსაც სრულიად მოულოდნელად წაუყენეს ასეთი ბრალდება. განცვიფრებისა და გაშმაგებისაგან აღარც კი იცოდა რა ეპასუხნა და სანამ გონს მოვიდოდა სკამის დარტყმით სული გააფრთხობინეს.

პასდრუბალი-ემიგრანტი ერთპიროვნული უმაღლესი გამგებელი და მთავარსარდალი შეიქნა.

კართაგენის აღსასრული

148 წლის ბოლოს რომში ახალ მაგისტრატთა არჩევნებზე საშინელი კანგაში ატყდა. ამის მიზეზი სწორედ აფრიკაში სრული წარუმატებლობა და ომის ასე გაჭიანურება იყო. ამ კრიტიკული მდგომარეობიდან თავის დასაღწევად ხალხი მოითხოვდა გადამკრელი ზომების მიღებას, რაც პირველ რიგში მთავარსარდლობის შტაბის სრულ გადახალისებასა და ენერგიული მხედართმთავრის არჩევაში მდგომარეობდა.

ერთადერთ კაცად, რომელსაც შეეძლო ფინიკიური ჩიხიდან რომის გამოყვანა და კართაგენის გაცამტვერება, მიჩნეული იყო სციპიონ ემილიანე. რომელიც მაშინ თავის კანდიდატურას ედილის თანამდებობაზე აყენებდა.

ხალხი მოითხოვდა სციპიონის კონსულად არჩევას და აფრიკაში მის გავზავნას; ოლიგარქები წინააღმდეგი იყვნენ იმ მოტივით, რომ სციპიონს კონსულობისათვის აუცილებელი ასაკი (43 წელი) არ ჰქონდა; ის მხოლოდ 35 წლისა იყო. ხალხი კი გაიძახოდა, რომ უმაღლესი კანონმდებელი სახალხო კრებაა და რაც მას სურს იმას დაადგენსო. ერთ-ერთმა სახალხო ტრიბუნმა განაცხადა, რომ ის „ვეტოს“ დაადებს კონსულთა არჩევნებს და ამგვარად შეაჩერებს მის წარმოებას, სანამ სციპიონი კონსულად არ იქნება არჩეულიო.

სენატი იძულებული შეიქნა დათანხმებულიყო - და ამჯერად გაუქმებულიყო კანონი უმაღლესი მაგისტრატის ასაკის შესახებ¹. ამგვარად, რომაელები სწორედ ისე მოიქცნენ. როგორც ერთ დროს სპარტელები, რომლებმაც საჭიროებისას კანონთა მოქმედება ასეთი სიტყვებით აიცილეს თავიდან: „დღეს დაიძინონ კანონებმა!...“²

სახალხო კრებამ იმ დღეს კონსულთა შორის საკომანდო პროვინციების კენჭის ყრით განაწილების წესიც კი უარჰყო და სციპიონი უშუალოდ იქნა არჩეული მთავარსარდლად კართაგენის წინააღმდეგ ომში.

სციპიონმა ახალი ძლიერი არმია და ფლოტი შეკრიბა და 147 წლის დასაწყისში გაეშურა აფრიკისაკენ.

იმავ ხანებში მანცინუსმა და პიზონმა თავისი უმაღლესი რწმუნებანი ახალი მარცხით დაამთავრეს. მაშინ როცა პიზონი უტიკის სამხრეთ

¹ ეს იყო ე. წ. ვილიუსის კანონი (lex Villia annalis), რომლის ძალით კონსულ 43 წელზე ნაკლები ასაკის არ უნდა ყოფილიყო.

² ეს მოხდა პელოპონესის ომების დროს (431—404), როცა სპარტელებმა კანონის წინააღმდეგ გამოიხადეს ათენელებისაგან 425 წელს დატყვევებული მეომრები.

რაიონებში მხოლოდ მძარცველობით ირთობდა თავს, მანცინუსმა ზეი-რე რაზმით ზღვიდან მოახერხა შეჭრილიყო კართაგენის. ჩრდილოეთ-ნაწილში, მაგალიაში. ყველას ეგონა, რომ ქალაქი უკვე აღებული იყო და მთელი ეკიპაჟი სრულიად უიარალოდ (ბევრი პერანგის ამარა), მოუშხადებლად, თავდავიწყების ყიყინითა და ძარცვა-გლეჯის სურვი-ლით გატაცებული მიცოცავდა ციკაბობებზე და ხტებოდა კედლებზე. მაგრამ კართაგენელებმა სასტიკად დაამარცხეს უწესრიგოდ შემოცვე-ნილი რომაელები. მანცინუსის ბევრი მეომარი დააღუპა, ხოლო ვინც უკანვე გადმოსვლა მოასწრო—სულ 500 შეიარაღებული და 3000 უიარალო კაცი — მთელი ღამის განმავლობაში საშინელ ფლატებზე მიუყუელნი უცდიდნენ შიმშილით ან მტრის ახალი თავდასხმებისაგან სიკვდილს. მანცინუსმა სასწრაფოდ აფრინა კაცი უტიკისაკენ, პიზონ-თან, დახმარების სათხოვრად.

სწორედ ამ დროს უტიკას მიადგა სციპიონი, რომელმაც იქვე შეიტ-ყო მანცინუსის მძიმე მდგომარეობის ამბავი. მან ბრძანა. ყველა მეომა-რი დაბრუნებულიყო გემებზე და მომზადებულიყვნენ სამრად. სცი-პიონმა ყველა ახალგაზრდა უტიკელი როქალაქე არმიამი ჩაარიცხა, ხო-ლო მოხუცებს უბრძანა სურსათ-სანოვავის მარაგით ხლებოდნენ ფლოტს; იმავე დროს შეკრიკები გაუგზავნა პიზონს დაუყოვნებლივ წამოსულიყო საშველად; თვითონ მთელი არმიითა და ფლოტით სას-წრაფოდ დაიძრა კართაგენისაკენ. მან გაათავისუფლა რამდენიმე ტყვე და წინასწარ გაგზავნა ისინი კართაგენში. რათა რომაელთა ახალი კონსულისა და მისი სამხედრო ძალთა შიახლოების შეტყობინებით თავხარი დასცემოდა ქალაქს.

მეორე დღეს კართაგენელები მზად იყვნენ უკანასკნელი დარტყმით მოესპოთ მაგალიის კლდეზე თავმოყრილ რომაელთა ბრბო. ამ დროს ზღვაზე გამოჩნდა სწრაფად მოძავალი რომაული ფლოტი. გემბანები და ანძები სავესე იყო იარაღში ჩამჭდარი მრისხანე ლეგიონერებით. კართაგენელებმა იცნეს წინ მომავალ საფლავმანო გემის ბაქანზე ამა-ყად მდგარი ახოვანი პორფიროსანი.

კართაგენელებმა ველარ გაბედეს განზრახვის შესრულება. სციპიონ-მა სრულიად დაუბრკოლებლივ ვადაიყვანა განწირული თანამემამულე-ები და ახალი გაძლიერებული რაზმით დიკავა მაგალიის მისადგო-მები; მანცინუსი რომში გაგზავნა, ხოლო მის ნაცვლად ფლოტის სარ-დლობა გადასცა სერანს.

კართაგენელები ამიერიდან კიდევ უფრო სერიოზულად შეუდგნენ თავდაცვის ზღუდეთა გამაგრებას და საერთოდ ქალაქის დაცვის ორგა-ნიზაციას.

სციპიონი ისევ უტიკაში გაეშურა პიზონის ლეგიონების ჩასაბარებლად. ამით ისარგებლეს ჰასდრუბალმა და ბითიასმა და დაიწყეს იერიშები მავალიასთან გამაგრებული რომაელების წინააღმდეგ. მაგრამ სციპიონი ისევ შემობრუნდა და უკუუქცია მტერი.

ახალმა სარდალმა გადამწყვეტი იერიშების დაწყებამდე ხელი მოჰკიდა არმიებში სამხედრო დისციპლინისა და მორალური სიმტკიცის აღდგენას. ზანამდე რომაელთა ბანაკები სავსე იყო სიმდიდრის დაგროვების მოსურნე ათასნაირი ბრბოებით, ვაჭრებით, კურტიზანებითა და სხვ. ჩვეულებრივი მოვლენა იყო დეზერტირობა, ლოთობა, ზნედაცემულობა, მექრთამეობა, მეთაურისადმი დაუმორჩილებლობა და სხვ.

სციპიონმა, ისე როგორც მამამისმა პიდნას ბრძოლის წინ, მოკლე ხანში დაუბრუნა თავისი სახე რომაულ არმიას. ჯარისკაცებმა, რომლებიც კარგად იცნობდნენ სციპიონს, მალე იგრძნეს ახალი სარდლის სიძლიერე, მომთხოვნელობა, სიმკაცრე ურჩებისადმი და პატივისცემა წესრიგიანთა და თავდადებულთადმი. მან არმიიდან გარეკა უსაქმური და მავნე ბრბოები, ვაჭრები, როსკიპები, მაროდირები და სხვადასხვა ჯურის ვიგინდარები.

სციპიონმა პირველი იერიშები მიიტანა მავალიაზე, რომელიც თავის მხრივ თვითონ წარმოადგენდა ჰეგარ ციხე-სიმაგრეს. კართაგენელებმა რამდენჯერმე უკუაგდეს მტრის იერიშები. ბოლოს, შუალამისას, როცა კართაგენელ გუშაგებს ეძინათ, რომაელებმა კედელთან უსმოდ მავორეს მისი სიმაღლე საიერიშო მანქანა. სარდლის ბრძანებით ახალგაზრდა, მეომართა რაზმი სწრაფად გადავიდა კედელზე და შიგნიდან გააღო ციხის კარები. სციპიონი 4 000 მეომრით შეიჭრა მასში და ამგვარად საბოლოოდ დაიჭირა მავალია, რომელიც ჩრდილოეთიდან იცავდა კართაგენს.

კართაგენელებმა სასწრაფოდ მიიწვიეს ქალაქში ჰასდრუბალი და გადასცეს 30 000 მეომრისაგან შემდგარი გარნიზონის სარდლობა.


ფინიკელებმა სარდალმა იმით დაიწყო, რომ რომაელი ტყვეები კედლებზე გამოიყვანა, დააშიშვლა და ყოველ მათგანზე, სციპიონის ბანაკის შესახედვად, აუწერელი წამება გამართა. მისი ბრძანებით ქალათები განწირულებს სპეციალური ინსტრუმენტებით თხრიდნენ თვალებს, აგლეჯდნენ ენას, ძარღვებს, კუნთებს, სასქესო ორგანოებს, აჭრიდნენ თითებს, ფეხის გულებს, აძრობდნენ ტყავებს და ჭერ კიდევ ნახევრად ცოცხლებს ჰყრიდნენ კედლებიდან და კლდეებიდან. ასეთი ბარბაროსობით ჰასდრუბალს, გარდა იმისა, რომ მტრისადმი განუზომელ სიძულვილს იკმაყოფილებდა, სურდა კართაგენელებისათვის საბოლოოდ მოეჭრა უკანასკნელი გზა რომაელებთან შერიგებისა

და აეძულებინა ისინი დამყარებოდნენ მხოლოდ ერთადერთ იმედს: ბრძოლას სრული თავგანწირულებით.

სციპიონმა გადასწყვიტა კართაგენი მთლიან ალყაში მოექცია და საე-
სებით მოეწყვიტა ის ქვეყნისაგან. მან ჯერ დაიწყო დასავლეთის ყე-
ლის გადაჭრა, საიდანაც ქალაქი ხმელეთით უკავშირდებოდა კონტი-
ნენტს. კართაგენელები ამაოდ ცდილობდნენ ხელი შეეშალათ სციპი-
ონის განზრახვისათვის. ოცი დღის განმავლობაში რომაელებმა მთელი
ყელის (5 კმ) სიგანეზე ფართო ღრმა თხრილი გასჭრეს და ძლიერი
თავდაცვითი ზღუდეები — 4 მეტრის სიმაღლე ქვის კედლები — აღმარ-
თეს.

ამან ქალაქში საგრძნობლად შეამცირა სურსათის შემოსავალი,
მაგრამ მამაცი გეზღვაურები, განსაკუთრებით კი ბითიასი, თავიანთი
სწრაფმავალი ხომალდებით მაინც ახერხებდნენ ზღვიდან გაჭრას და
ტუნისის ყურეში შესვლას; აქ, ციხე-სიმაგრე ნეფერისში, სურსათით
დაიტვირთებოდნენ და ისევ კართაგენში ბრუნდებოდნენ. ამგვარად,
ქალაქის ალყაში მოქცევა მანამ შეუძლებელი იყო, სანამ ზღვიდან
მისასვლელებიც არ დაიკვებოდა.

და აი, სციპიონმა
დაიწყო განსაცვიფ-
რებელი გეგმის გან-
ხორციელება: უნდა
აღემართა ქვის უზარ-
მაზარი ჯებირის ხაზი,
ტუნისის ყურეში შეჭ-
რილი ვიწრო ხმელე-
თის ზოლიდან კართა-
გენის პორტამდე. ამით
მას შესაძლებლობა ექ-
ნებოდა ზღვიდან მი-
სასვლელი მოექცა ქა-
ლაქისათვის. რომაე-
ლები განუწყვეტლივ
შრომობდნენ ამ ჯებირებზე, რომლის სიგანე ზემოთ 5½ მეტრს უდ-
რიდა, ხოლო საფუძველი ოთხჯერ განიერი იყო.



საიერიშო კოშკი.

კართაგენელები ხმამაღლა დასცინოდნენ რომაელთა ასეთ წამოწყე-
ბას, სრულიად წარმოუდგენლად მიაჩნდათ მისი შესრულება. მაგრამ,
როცა მათ ნახეს, რომ სციპიონი არაჩვეულებრივი ენერგიითა და სიჯი-
უტით განაგრძობდა თავის საქმეს, თვითონაც რაღაც კონტრლონისძი-

ებათა გატარებას მოჰკიდეს ხელი. რომაელებს დღეებისა და ღამეების მანძილზე კართაგენიდან ვანუწყვეტილად ესმოდათ რაღაც ყრუ, დაჟინებული ცემა და ხმაური. იგრძნობოდა, რომ მთელი მოსახლეობა ახალი ენთუზიაზმითა და ენერგიით შრომობდა რაღაც ახალი გეგმის განხორციელებაზე.

ასე გაგრძელდა ორი თვე, და როცა რომაელები თავის სასურველ მიზანს მიუახლოვდნენ, ქალაქში ზღვიდან მისასვლელი გადაჰკეტეს, სრულიად მოულოდნელად მიწის ქვეშიდან გამოძვრა კართაგენელთა 50 სხვადასხვა ზომისა და სახის ხომალდი და სრულიად დაუბრკოლებლად გავიდა ტუნისის ყურეში. თურმე, კართაგენელებს ახალი გვირაბი გაეჭრათ აღმოსავლეთის მიმართულებით, ტუნისის ყურესაკენ, იმ ადგილისაკენ, სადაც ზღვა მეტად ღრმა იყო და ჭებირით მისი გადაკეტვა არ მოხერხდებოდა. როცა მოსახლეობის ერთი ნაწილი გვირაბის გაჭრაზე მუშაობდა, დანარჩენები გემებს ავებდნენ.

რომაელები ასეთმა მოულოდნელობამ ისე დააბნია, რომ კართაგენელთა ფლოტი უზრუნველად მიტოვებულ მათ გემებს უეჭველად მოსპობდა. მაგრამ რომაელთა ფლოტი იმან გადაარჩინა, რომ კართაგენელები ამჯერად მხოლოდ თავისი მოხერხების, სიძლიერის სადემონსტრაციოდ და მტერზე სიცილის დასაყრელად გამოვიდნენ და ამაყად ისევ უკან გაბრუნდნენ.

სამი დღის შემდეგ კართაგენის ფლოტმა ისევ გასცურა გვირაბი. ტუნისის ყურეში რომაელთა ფლოტი სრული საბრძოლო წყობით შეხვდა მტერს. სასტიკი საზღვაო ბრძოლა, რომელმაც დილიდან შუადღემდე გასტანა, უშედეგოდ დამთავრდა. მაგრამ უკან გაბრუნებისას, გვირაბის შესასვლელთან, სადაც გემები შესვლისას ერთმანეთს ეჯახებოდნენ, კართაგენელებს რამდენიმე ხომალდი დაუზიანდათ.

როცა სციპიონს ამდენმა შრომამ უშედეგოდ ჩაუარა, არმიის ნაწილი ტუნისის ყურეში შეჭრილ ვიწრო ხმელეთზე გადაიყვანა და აქედან ძლიერი შეტევა მოაწყო კედლებზე. იმ დროს, როცა რომაელთა საიერიშო მანქანებმა კედელი ერთ ადგილზე გაარღვიეს კიდეც, კართაგენელები სრულიად შიშველნი შეიჭრენ ზღვაში, ფლანგიდან დაესხნენ მტერს და არაჩვეულებრივი თავგანწირულებით ჩაებნენ ბრძოლაში. რომაელები შეაძრწუნა შიშველი ადამიანების გაშმაგებულმა იერიშმა. ისინი შემდრკალნი და პანიკით მოცულნი უკუიქცნენ. სციპიონმა ცხენოსანი რაზმები გამოიყვანა და მით სცადა უწესრიგოდ უკანგამოქცეულთა შეკავება, როგორც იქნა მოახერხა ბანაკში ჯარების ჩაკეტვა. რომაელები მთელი ღამის განმავლობაში იარაღგამართულნი ელოდებოდნენ მტრის ახალ თავდასხმას. ამასობაში კართაგენელებმა მტრის სააღყო მანქანები მთლიანად დასწვეს, ბრძოლის ველზე მიტოვებული საბრძო-

ლო დროშები და საჭურველი დაიტაცეს, ქალაქში დაბრუნდნენ, ზღუდის გარღვეული ადგილი ამოქოლეს და კედელზე ხის ახალი სათავდაცვო კოშკებიც აღმართეს.

გეორგ დღეს სციპიონი ხელახლა შეუდგა სააღყო მანქანების აგებას. ამავე დროს მისი მეზობლები გოგირდითა და კუპრით სავსე ცეცხლმოკიდებულ „ყუმბარებს“ უშენდნენ კართაგენელთა ხის კოშკებს; რამდენიმე მათგანი დასწევს კიდეც. სარდლის ბრძანებით კედლის გასწვრივ, მის სიმაღლეზე, აღმართულ იქნა აგურის მტკიცე კედელი, ხოლო მის შიგნით კიდეც გავლებულ იქნა ღრმა და ფართო თხრილი. ამგვარად, სამხრეთ-აღმოსავლეთიდანაც, ზღვის მხრიდან, კართაგენი საბოლოოდ მოექცა ალყაში. სციპიონმა 4 000 ზეომარი გამოჰყო ახლად აღმართული კედლიდან ისრის სასროლად. მთელი ზაფხულისა და შემოდგომის განმავლობაში მოწინააღმდეგენი ერთი სიმაღლის კედლებიდან განუწყვეტლივ უშენდნენ „ცეცხლს“ ერთიმეორეს.

სციპიონმა უკანასკნელი ღონისძიება ჩაატარა დანარჩენი ქვეყნისაგან კართაგენის სრული მოწყვეტისათვის. შეუდგა აფრიკის იმ ციხე-სიმაგრეებისა და ოლქების ხელში ჩაგდებას, საიდანაც კართაგენი ჯერ კიდევ ღებულობდა სურსათ-სანოვავებს და საომარ საჭურველს.

პირველ რიგში იერიში მიიტანეს ნეფერისზე. აქ ძლიერი გარნიზონით იდგა პასდრუბალის ნაცვალი დიოგენე. სციპიონმა ნეფერისზე ხმელეთიდან თავდასასხმელად გაგზავნა გაიუს ლელიუსი (სციპიონ უფროსის უახლოესი მეგობრის შვილი) და გულუსა; თვითონ კი საზღვაო ფლოტით მიადგა მას. საიერიშო ტარანების ძლიერი დარტყმებით რომაელებმა გაარღვიეს ნეფერისის ქვის გალავანი და მასში სწრაფად შეიჭრა 3 000 მეომარი, რომლებიც სოლის მსგავსად იყვნენ მტკიცედ დარაზმული და ამრიგად არც ერთ მათგანს არ შეეძლო ბრძოლის დროს უკან დახვევა. როგორც კი დიოგენემ მათ წინააღმდეგ მთელი თავისი გარნიზონი დასძრა და გალავნის მოპირდაპირე მხარე სრულიად უყურადღებოდ დატოვა, სწორედ აქედან სციპიონმა 1 000 რჩეული ლეგიონერი გადასხა და სრულიად მოულოდნელად მიუსია მოწინააღმდეგის-ზურგს. აფრიკელები დააბნია მტრის ორზხრივმა შემოტევამ. გამარჯვების იმედიც სრულიად დაჰკარგეს, როცა გ. ლელიუსიც თავისი ჯარებით სამხრეთიდან შეიჭრა ნეფერისში. დაუნდობელი ხოცვა-ჟლეტა გაჩაღდა. ვინც კი ქალაქიდან გაქცევას ახერხებდა, გულუსა თავისი ნუმიდიური მხედრობითა და სპილოებით უკან მისდევდა და უმოწყალოდ სრესდა. გარნიზონთან ერთად თითქმის ნეფერისის მთელი მოსახლეობა დაიღუპა. 70 000 კაცი მოკლულ იქნა; 10 000 ტყვედ ჩავარდა და მონებად აქციეს; მხოლოდ 4 000 კაცმა უშველა თავს.

ნეფერისის დაცემის შემდეგ დანარჩენი ციხე-სიმაგრეები, დასახლებული პუნქტები, კართაგენის ყველა სამფლობელო რომაელებს ჩაბარდნენ.

ამრიგად, კართაგენი უკვე სრულ ბლოკადაში მოექცა. სციპიონმა ის თავის ახალ მოკავშირეებს — შიმშილსა და ეპიდემიას მიუგდო საჩიჯგნად.

დადგა საშინლად მკაცრი ზამთარი, და კიდევ უფრო საშინელი და საბედისწერო იყო ის კართაგენისათვის. ქალაქში შიმშილი და შავი ჭირი მძვინვარებდა. მოსახლეობა ბუზივით იხოცებოდა. ქუჩები სავსე იყო დაზოცილთა გახრწნილი გვამებით, რომელთა დაკრძალვაზე არავინ ფიქრობდა. იწყებოდა მორალური დაცემულობაც. პასდრუბალმა, როცა შენიშნა, რომ ქალაქის გადარჩენა აღარ შეიძლებოდა, მოლაპარაკება გამართა სციპიონთან. ის ცდილობდა გულუსას შუამავლობით მოეღობო რომაელი სარდლის გული და მზად იყო ზავის ყოველგვარ პირობებზე, ოღონდ კი ქალაქი დანგრევისაგან გადაერჩინა. რასაკვირველია, სციპიონი ამაზე არ დასთანხმდებოდა, მით უმეტეს, რომ ასეთი პირობის მიღება არ მოხერხდა ომის დაწყებამდეც კი. რომს მტკიცედ ჰქონდა გადაწყვეტილი კართაგენის მტვრად ქცევა.

ერთადერთი, რასაც სციპიონი პასუხობდა, ის იყო, რომ, თუ კი პასდრუბალი ქალაქს ჩააბარებდა, სიცოცხლეს შეუნარჩუნებდა თვით პასდრუბალს, მის ცოლ-შვილს, კლიენტელას და მეგობრულად განწყობილ ათიოდე ოჯახს. ასეთი „წყალობა“ პასდრუბალმა კატეგორიულად უარპყო და უპასუხა, რომ მას სურს იცოცხლოს და მოკვდეს თავის თანამემამულეებთან ერთად, ხოლო, თუ კი ბედისწერით ასეა გადაწყვეტილი, ის სხვებთან ერთად დაიმარხება მშობლიური ქალაქის ნანგრევებში.

146 წლის გაზაფხულზე, როცა შიმშილისაგან და სიკვდილისაგან დაოსებულ კართაგენს წინააღმდეგობის გაწევა თითქმის აღარ შეეძლო, რომაელებმა დაიწყეს იერიშები. განსაკუთრებით მძაფრად უტევდნენ ზღვიდან, კოთონის მხრიდან. პასდრუბალმა ბრძანება გასცა ცეცხლი გაეჩინათ კოთონისათვის და თავდაცვის მთელ შესაძლებლობას აქვე მოუყარა თავი. მაგრამ რომაელთა ავანგარდმა, გაიუს ლელიუსის მეთაურობით, სრულიად ზოულოდნელად კართაგენის კედელი გადალახა კოთონის ჩრდილოეთით, იქ, სადაც პასდრუბალი სრულებით არ მოელოდა თავდასხმას. რომაელთა უეცარმა შეჭრამ თავზარი დასცა კართაგენელებს. იმავდროულად სციპიონმა ნიშანი მისცა და ყოველი მხრიდან დაუწყო გააფთრებული იერიშები. რომაელები გრძელ ფიცრებსა და ნამორებს სდებდნენ თავიანთ მიერ აგებულ კედლებსა და კართაგენის თავდაცვით ზღუდეებს შორის და თავზარდაცემი ღრიალით გადარბოდნენ მათზე.

ქალაქი რომაელებით ივსებოდა. მათ პირველ რიგში ხელთ იგდეს მოედანი და დაიძრენ აკროპოლისისაკენ, ბირსასკენ. მომაკვდავი კართაგენი უკანასკნელ წინააღმდეგობას ეწეოდა. რომაელებს ყოველი ქუჩის, უბნის, სახლის, ოთახისა თუ კუთბის ხელში ჩასაგდებად თავგანწირული ბრძოლა უხდებოდათ. ყოველი კართაგენელი ცდილობდა თავისი უკანასკნელი ამოსუნთქვა წინააღმდეგობის აგონიაში დაესრულებინა.

რომაელები სისხლის ზორევეში, გვამთა გროვასა და ნანგრევებში იკაფავდნენ გზას ბირსასკენ, სადაც თავს აფარებდა სიკვდილს გადარჩენილი 50 000-ზე მეტი მცხოვრები. ექვსი დღე-ღამის შეუსვენებელი ხოცვა-ჟლეტისა და ნგრევის შემდეგ მიუახლოვდნენ აკროპოლისს. აქ ბრძოლამ კიდევ უფრო მძაფრი ხასიათი მიიღო. ბირსას გარშემო არსებული ყოველი სახლი — ყველა ექვსსართულიანი — იერიშით ასაღები ხდებოდა; თითოეული მათგანი ცალკე სიმაგრედ იყო ქცეული. ბრძოლა წარბოვდა ქალაქის ვიწრო ქუჩებში, სახლებში, ოთახებში. კიბეებსა და სახურავებზე. რომაელები სახლიდან სახლზე ისროდნენ „ხიდებს“, გადარბოდნენ სახურავებზე, ჩასაფრებულებთან ხელჩართულ ბრძოლაში ებმებოდნენ, ძირს ჰყრიდნენ და ხშირად მათზე სამკვდრო-სასიცოცხლოდ გადაჭოდობილნი თვითონაც ძირს ცვიოდნენ. ყურთასმენა დახშული იყო შემადრწუნებელი ღრიალით, დაკრილ-დაკოდითა გმინვით, ქალების კივილით, ბავშვების წიოკობით, საბრძოლო ყიჟინით, ნაღარების ამზარზენი გუგუნით. სციპიონი ხოცვა-ჟლეტისა და ნგრევისაგან შეძრწუნებულ ჯარებს სცვლიდა და ახალ-ახალი ენერგიით აბამდა მათ ახალ საშინელებათა გასაფართოებლად.

როცა რომაელები ყოველის მხრიდან გარს შემოერტყნენ ბირსას, სციპიონმა ბრძანა ქალაქისათვის ხანძარი გაეჩინათ. ბირსაში თავშეფარებულნი ხედავდნენ, თუ როგორ დაჰფარა მშობლიური ქალაქი ცადამწვდენმა ცეცხლის ალებმა. ზეცას სწვდებოდა სახლებში ჯერ კიდევ დარჩენილი და ცეცხლის სტიქიონში მოხვედრილი ადამიანების გამაყრუებელი ღრიალი და ნგრევის გრუხუნი.

სციპიონმა ბრძანა გაეწმინდათ ბირსას მისადგომები ნაგვის ბორცვებისაგან და ამ ნაგავში ის გულისხმობდა შენობების ნანგრევებს, ნაქარტუტასა და მათში აღრეულ დახოცილ და ჯერ კიდევ სულთმობრძა ადამიანთა გვამებს.

ბირსაში ჩაკეტილებმა ვეღარ გაუძლეს მათ გარშემო სიკვდილის შეფეფარაყრილ ჯოჯობეს. მეწვიდე დღეს ბირსას კიბე ზე ძლივს ჩამოლასლასდნენ ალყაშემორტყმულთა ძვალტყავად ქცეული ელჩები და სიცოცხლის შენარჩუნება სთხოვეს სციპიონს. სარდალმა თანხმობა განაცხადა სიცოცხლე ეჩუქებინა ყველა გადარჩენილი კართაგენელისათ-

ვის, ხოლო უეჭველი სიკვდილი ელოდათ მოღალატე რომაელებს, რომელთა რიცხვი ბირსას დამცველთა შორის 900 კაცამდე აღწევდა.

ამგვარად, აკროპოლისი დასტოვა 50 000-მა ადამიანმა, რომელთაგან 30 000 ქალი იყო. ყველა ისინი რომაელებმა განსაკუთრებულ ადგილზე გაიყვანეს, მონობის ბორკილები დაადეს და საგუშაგო რაზმებს ჩააბარეს.

900 კაცი-ღა შერჩა აკროპოლისს. მათ შორის იყო ჰასდრუბალი თავისი ცოლითა და ორი მცირეწლოვანი შვილით. ყველა ისინი გამოცვივდნენ ღმერთი-მკურნალის ტაძრის გალავანში და იქიდან ეწეოდნენ უქანასკნელ გააფთრებულ წინააღმდეგობას. ხოლო როცა შიშ-შილის, უძილობისა და საშინელი კოშმარისაგან სიკვდილის მოახლოება იგრძნეს, შევიდნენ ტაძარში და ჩაიკეტნენ; ზოგიც სახურავზე და სხვენზე ავიდა და იქ დაუწყო ლოდინი სიკვდილს.

და აი, როცა ტაძრის კარებზე შემაზრზენი აღსასრულის ზარმა ჩამოჰკრა, ჰასდრუბალმა ვედარ გაუძლო და მარტოდმარტო გამოექცა სიკვდილის გარემოს. მან ძლივს გადასდგა საძოცი ნაბიჯი, რომელსაც აკროპოლისის კიბის ჩავლა მოითხოვდა; ძალადაკარგული მუხლებზე დაეცა რომაელი სარდლის წინაშე და სიცოცხლე შეჰვედრა.

სარდლის სულმოკლეობით აღშფოთებულმა ალყაშემორტყმულებმა ტაძარს ცეცხლი გაუჩინეს და თვითონაც შიგ გადაეშენენ. აღმოდებული ტაძრის ქონგურებზე ორივე შვილის თანხლებით გამოჩნდა სადღესასწაულოდ მორთული მეუღლე ჰასდრუბალისა და გამყინავი ხმით შეჰკვივლა სციპიონის ფეხებთან დაცემულ ქმარს: „ო, ბოროტო და უსინდისო ადამიანო; ო, უმხდალესო კაცთა შორის; მე და ჩემს შვილებს გულში ჩაგვიკრავს ეს ცეცხლი; ხოლო შენ, რომელ ტრიუმფს დაამშვენებ, დიადი კართაგენის დიდო სარდალო?! ო, რომ იცოდე, როგორი სასჯელი გელის მისგან, ვის ფერხთა ქვეშაც გართხმულხარ შენ!“

ამ სიტყვების შემდეგ მან ყელი გამოსჰკრა შვილებს, გადაისროლა ისინი ცეცხლში და თვითონაც გადაეშვა მათთან ერთად. ასე დაავიროვინა კართაგენელმა ქალმა მშობლიური ქალაქის ტრაგედია, მსგავსად ლეგენდარული დიდონასი, რომელმაც კართაგენის დაარსება ასევე ცეცხლში თავის დაწვით ამცნო ისტორიას¹.

¹ ანტიკური ლეგენდის თანახმად, დიდონა, ანუ ელიზა, იყო ფინიკიის მთავარი ქალაქის ტიროსის მეფის ასული; ეს ქალი ითვლება კართაგენის დამაარსებლად. დიდონამ, იმისათვის, რომ თავი დაეხსნა ერთ-ერთი ლიბიელი მეფის ცოლობისაგან, გააჩაღა კოცონი და თავი დაიწვა მასში. რომაელმა პოეტმა ვირგილიუსმა თავის ნაწარმოებ „ენეიდაში“ ეს ლეგენდა დაუკავშირა ტროადან ენეოსის გამოქცევას. მასთან, დიდონამ მიტომ დაიწვა ცეცხლში თავი, რომ ის მიატოვა ენეოსმა, მისმა საყვარელმა, რომელსაც იუპიტერის ბრძანებით უნდა დაეტოვებინა აფრიკა და წასულიყო იტალიაში.

მეტ სასჯელს, სირცხვილს და დამცირებას არც იგულისხმებდა თავ-
განწირული ქალი მისი შემდრკალი ზეუღლისათვის, როგორც ტრიუმ-
ფში სამარცხვინოდ გატარება და საშინელ ტყვეობაში სიკვდილი, რომ-
ლებიც ელოდა ჰასდრუბალს რომში.

კართაგენის ხაზინა, სახელმწიფო და სატაძრო საგანძურები სცი-
პიონმა ქვესტორს გადასცა რომის ხაზინაში ჩასაბარებლად, ხოლო ქა-
ლაქი მთლიანად საძარცვავად მისცა ლეგიონებს. ზოგიერთი ძვირფასი
ნივთი, რომლებიც კართაგენელებს წამოღებული ჰქონდათ სიცილიის
ქალაქებიდან, ისევ მათ დაუბრუნეს¹.

სციპიონმა შეკითხვა გაუგზავნა სენატში, თუ როგორ მოქცეოდა
ქალაქის გადარჩენილ ნაწილს. მოვიდა და აღსრულდა რომის სენატის
ბრძანება: კართაგენი, მაგალია, ყველა მისი გარეუბანი და ციხე-ქალა-
ქები მიწასთან იქნენ გასწორებული; ოცი დღის განმავლობაში იწვოდა
ის ადგილი, სადაც რამდენიმე კვირის წინ კართაგენი იდგა; რომაელებ-
მა დასწყევლეს და კილით-კიდეზე გუთნით ხნული გააგლეს, რომ იქ
აღარასოდეს აღამიანთა მოდგმისაგან აღარავის ეცნოვრა. კართაგენის
ტერიტორიები რომის საკუთრებად ცხადდებოდა „პ რ ო ვ ი ნ ც ი ა
ა ფ რ ი კ ი ს“ სახელწოდებით.

ღრმა ფიქრებში ჩაძირული და ცრემლმორეული სციპიონი დიდხანს
უცქერდა თავის თანამემამულეთა და პირად ნამოქმედარს; ფერფლად-
ქცეულ და გადახნულ ადგილს, სადაც ერთ დროს მძლავრი და აყვა-
ვებული ქალაქის სიციცხლე სჩქედდა, და წამოიძახა ჰომეროსის სი-
ტყვები: „დადგება ოდესმე ღლე და დაიღუპება ღვთაებრივი ტროა;
მასთან ერთად დაიღუპება პრიამოსი და ხალხი შუბოსანი პრიამოსისა“.

მას შიეახლა გვერდით მდგომი მეისტორიე პოლიბიოსი და ჰკითხა,
რა სურდა სციპიონს ეთქვა ამ სიტყვებით. — მე ვგულისხმობ ჩემს სამ-
შობლოს, რომს, რომელსაც ეამთა სიავისაგან მოელის ბედი კართაგენი-
სა, — იყო პასუხი სციპიონისა. ✓

ბრძოლა დამთავრდა. კართაგენმა, 700 წლის ბრწყინვალე და დიად-
მა ქალაქმა, შესწყვიტა არსებობა. რომს ასე უსაზღვრო სიხარულით
არასოდეს უზეიმნია. რომაელები დიდის ამბით ულოცავდნენ ერთმა-

¹ მათ შორის იყო ე. წ. ფლარისის ხარის ბრინჯაოს ქანდაკება, რომელიც სცი-
პიონმა დაუბრუნა აგრიგენტუმის მცხოვრებლებს. ამ ქანდაკებაში, რომელიც დამზა-
დებული ყოფილა აგრიგენტუმის ტირანის ფლარისის განკარგულებით. მისივე ბრძა-
ნებით ეოცხლად სწვავდნენ დამნაშავეებს, რის გამოც ქანდაკება ხარის ზეუღლის
მსგავს ხმას გამოსცემდა.

ნეთს ამ დიად დღესასწაულს. სამუდამოდ ამოიძირკვა მოსისხლე მტერი; იწყებოდა ახალი ცხოვრება უშიშრად, მეტოქის გარეშე.

მართლაც, ამ დღიდან რომი ახალ ცხოვრებას იწყებდა. ის მსოფლიოზე გაბატონების ეტლს შეუჩერებლივ მიაჯირითებდა ყოველი მხრივ, და უფრო მას შემდეგ, რაც კართაგენს, ძლიერ მეტოქეს, თავისი ეტლი უკვე დაეშხვრა მსოფლიოში გაბატონების სიძნელეებით აღსავსე გზებზე.

დამთავრდა პუნიკური ომები — ორი დიდი მონათმფლობელური სახელმწიფოს სამკედრო-სასიცოცხლო ჭიდილი მაშინდელ მსოფლიოში გაბატონებისათვის. ამ ხანგრძლივ ბრძოლაში რომის გამარჯვება და კართაგენის განადგურება სრულიად კანონზომიერი მოვლენა იყო.

პუნიკური ომების დასაწყისშივე იჩინა თავი კართაგენის სოციალ-ეკონომიური და სამხედრო-პოლიტიკური სისტემის სისუსტემ და დრო-მოკმეულობამ, მაშინ როცა პირისპირ აღიმართა მზარდი, აღმავლობისა და გაძლიერების გზაზე მდგარი რომის სახელმწიფო. ასეთი დაპირისპირებულობა (დრომოკმულ-წარმავლისა და მზარდ-მომავლისა) კიდევ უფრო აშკარა შეიქნა თვით ომების მსვლელობაში და შედეგიც სრულიად ლოგიკური იყო: რომაელთა ხელით ფინიკიურ-აფრიკულ მიწაზე გავლებულ ხნულში საუკუნოდ დაიმარხა ოდესღაც დიდი კართაგენის არსებობაც.

შინაარსი

კლდექტორისაგან	3
გვსავალი	5
რომი და კართაგენი „პუნიკური ომების“ წინ	
რომი	5
კართაგენი	14
თ ა ე ი პ ი რ ვ ე ლ ი. პირველი პუნიკური ომი	
ომის პირველი წლები. ბრძოლა მილესთან	19
ლაშქრობა აფრიკაში	23
ისევ სცილიაში	26
ბარკა. კატულუსი. ზავი	28
თ ა ე ი მ ე ო რ ე. კართაგენი და რომი პირველ და მეორე პუნიკურ ომებს შორის	
აჯანყება აფრიკაში	32
სარდინიის კრიზისი	34
ჩრდილოეთ იტალია რომის ხელქვეით	37
ილირიული ომები	39
ბარკიდები ესპანეთში	41
„სავუნტის ცეცხლი“	43
თ ა ე ი მ ე ს ა მ ე. მეორე პუნიკური ომი	
ომის დასაწყისი. პირველი ალპიური ლაშქრობა	48
ტიცინუსი და ტრებია	53
ტრაზიმენის ტბა	61
დიქტატორი — „კუნქტატორი“	66
ქანი „ნამაჯალა მთვალე“	74
„ფარი“ და „მახვილი“ რომისა: დიდი დამცველი სირაკუზისა	91
„პანიბალი კარიბუეზა!“	103
ტარენტუმის დაბრუნება. მარცელუსის აღსასრული	110
ესპანეთის ამბები. სციპიონი	114
პანიბალის უკანასკნელი იმედი	126
უკანასკნელი ბრძოლები. სციპიონი აფრიკაში	135
ზამა. ომის დასასრული	154
თ ა ე ი მ ე ო თ ხ ე. კართაგენი და რომი მეორე და მესამე პუნიკურ ომებს შორის	
კართაგენი ომის დამთავრების შემდეგ	168
რომი ისევ გალებსა და ესპანელების წინააღმდეგ	172
მეორე მაკედონური ომი	175
სირიული ომი	180
სციპიონისა და პანიბალის უკანასკნელი დღეები	186
მესამე მაკედონური ომი	193
თ ა ე ი მ ე ხ უ თ ე. მესამე პუნიკური ომი	
ომის დასაწყისი	203
კართაგენის აღსასრული	208